



*sc. sup 23. Pl. 3.*









D. LUDOVICI HABERT,  
*Sacrae Facultatis Parisiensis Doctoris, Theologi,*  
*& Socii Sorbonici,*

**THEOLOGIA**  
**DOGMATICA ET MORALIS,**  
Ad usum  
**SEMINARII CATALAUNENSIS.**

Planissima, Critica, & solidissima Methodo  
conscripta,

Nunc verò

*Ad usum totius Orbis litterarii*

Post Editiones Parisiensem & Venetam  
in Germania denuò recusa,

in VIII. TOMOS divisa,

plurimis Mendis sollicitè purgata.

**TOMUS III**

Continens Tractatus

**DE ACTIBUS HUMANIS;**  
**DE VITIIS ET PECCATIS; DE**  
**REGULA MORUM; DE FIDE**  
**SPE, ET CHARITATE.**

*Editio prima in Germania.*

*Superiorum Permissu*

AUGUSTÆ VINDELICORUM,  
Sumptibus MATTHÆI RIEGER, Bibliopolæ,  
M DCC LI.







# I N D E X

## C A P I T U M.

---

### Tractatus

DE

### ACTIBUS HUMANIS.

Caput I. *De Nomine Actus humani.* Pag. 1

§. I. *De Voluntario.*

(a) 2

3  
§. II.

## INDEX CAPITUM.

§. II. *De Violentia & Coactione.* Pag. 4

§. III. *De Ignorantia.* 7

§. IV. *De Libero.* 20

§. V. *De Morali.* 26

---

Cap. II. *De Bonitate & Malitia Actuum humanorum.* 28

Cap. III. *Utrum omnis humana actio sit bona, vel mala, nec ulla sit indifferens?* 37

---

Cap. IV. *De Objecto Actuum humanorum.* 41

Cap. V. *De Circumstantiis Actuum humanorum.* 46

---

Cap. VI. *De Fine Actuum humanorum.* 51

---

§. I. *De varia Acceptione Finis.* 52

§. II. *De Definitione Finis.* 55

§. III. *De Effectibus Finis.* 57

§. IV. *De quinto & sexto effectu finis.* 66

---

§. V.

## INDEX CAPITUM.

§. V. *De septimo & octavo Effectu Finis.*  
Pag. 73

COROLLARIUM. 84

§. VI. *De Divisione Finis.* 87

§. VII. *De vera hominis Beatitudine objectiva.* 91

§. VIII. *De Beatitudine formali.* 97

§. IX. *De Beatitudine, quæ homini in hac vita competere potest.* 103

Cap. VII. *De Merito Actuum humanorum.* 120

§. I. *Utrum opera ex gratia elicita, sint verè bona?* 122

§. II. *Utrum bona opera gratiæ auxilio elicita, sint meritoria?* 126

§. III. *Utrum honestum sit operari intuitu mercedis æternæ?* 131

(a) 3

§. IV.



## INDEX CAPITUM.

§. IV. *Utrum liceat fiduciam ponere in propriis meritis?* 133

§. V. *Quotuplex sit meritum?* 136

§. VI. *De Conditionibus ad meritum de condigno requisitis.* 141

PRIMA CONDITIO. 142

SECUNDA CONDITIO. 146

TERTIA CONDITIO. 152

QUARTA CONDITIO. 155

QUINTA CONDITIO. 156

SEXTA CONDITIO. 157

§. VII. *De iis, quæ cadunt sub meritum de congruo.* 158

§. VIII. *De iis, quæ pertinent ad meritum de congruo.* 165

Cap.

# INDEX CAPITUM.

Cap. VIII. *De Devisione Actuum humanorum.*  
Pag. 170

---

## Tractatus

DE

## VITIIS ET PECCATIS.

Caput. I. *De varia Acceptione Vitii & Peccati.* 176

Cap. II. *De Definitione Peccati.* 180

Cap. III. *De Macula Peccati.* 183

Cap. IV. *De Divisione Peccati.* 187

Cap. V. *De Peccato mortali & veniali.* 190

Cap. VI. *De Peccati mortalis differentia à veniali.* 197

## INDEX CAPITUM.

§. IV. *Utrum liceat fiduciam ponere in propriis meritis?* 133

§. V. *Quotuplex sit meritum?* 136

§. VI. *De Conditionibus ad meritum de condigno requisitis.* 141

*PRIMA CONDITIO.* 142

*SECUNDA CONDITIO.* 146

*TERTIA CONDITIO.* 152

*QUARTA CONDITIO.* 155

*QUINTA CONDITIO.* 156

*SEXTA CONDITIO.* 157

§. VII. *De iis, quæ cadunt sub meritum de congruo.* 158

§. VIII. *De iis, quæ pertinent ad meritum de congruo.* 165

Cap.

# INDEX CAPITUM.

Cap. VIII. *De Devisione Actuum humanorum.*

Pag. 170

---

## Tractatus

DE

## VITIIS ET PECCATIS.

Caput. I. *De varia Acceptione Vitii & Peccati.* 176

Cap. II. *De Definitione Peccati.* 180

Cap. III. *De Macula Peccati.* 183

Cap. IV. *De Divisione Peccati.* 187

Cap. V. *De Peccato mortali & veniali.* 190

Cap. VI. *De Peccati mortalis differentia à veniali.* 197

# INDEX CAPITUM.

Cap. VII. *De Peccato originali.* Pag. 208

§. I. *Utrum existat Peccatum originale?* 209

§. II. *Quid sit Peccatum originale, & in quo formaliter consistat?* 230

§. III. *Expenduntur sententiæ Hæreticorum circa formalem rationem peccati originalis.* 235

§. IV. *Expenduntur sententiæ Catholicorum circa rationem formalem Peccati originalis.* 242

§. V. *Quomodo traducatur originale?* 250

§. VI. *Utrum peccatum primi parentis transeat ad omnes sine exceptione homines, qui via ordinaria ex ipso nascuntur, aut excipienda sit Mater Christi?* 255

§. VII. *De Pœnis Peccati originalis.* 271

Cap. VIII. *De Causa efficiente Peccati.* 285

Cap. IX.

# INDEX CAPITUM.

Cap. IX. *Satisfit nonnullis difficultatibus circa  
cogitationes morosas.* Pag. 295

---

## Tractatus DE REGULA MORUM. PRIMA PARS.

*De*

De Conscientia.

Caput I. *De* Definitione Conscientiæ. 308

Cap. II. *De* Divisione Conscientiæ. 310

Cap. III. *De* bona malæ Conscientia. 318

## INDEX CAPITUM.

Cap. IV. *De Conscientia probabili.* Pag. 324

Cap. V. *De tuta & tutiore opinione.* 337

---

## SECUNDA PARS.

*De*

### *De Legibus.*

Caput I. *De Legis Nomine, & varia ejus Ac-*  
*ceptione.* 338

Cap. II. *De Definitione Legis.* 340

Cap. III. *De Legis Acceptione.* 356

Cap. IV. *De Subjecto Legis.* 360

Cap. V. *De Legis Observatione.* 368

Cap.



## INDEX CAPITUM.

Cap. VI. *De Legis Divisione.* Pag. 377

Cap. VII. *De Differentia Legis naturalis & positivæ.* 385

Cap. VIII. *De Interpretatione Legis.* 393

Cap. IX. *Utrum Lex obliget cum gravi nocu-  
mento, atque etiam cum vitæ periculo?* 403

Cap. X. *De Dispensatione in Lege positiva.* 409

Cap. XI. *Expenduntur reliquæ difficultates circa  
dispensationes, & alias gratias.* 419

Cap. XII. *De Consuetudine.* 430

Cap. XIII. *De Lege humana.* 440

Cap. XIV. *De Lege Divina veteri.* 452

Cap. XV. *De Lege Evangelica.* 478

§. I.

## INDEX CAPITUM.

§. I. *Quid sit Lex Evangelica, & in quo consistat.* Pag. 479

---

§. II. *Utrum Lex Evangelica sit præceptiva?* 485

---

§. III. *Utrum Lex Evangelica sit alia à veteri?* 493

---

§. IV. *Utrum Lex Evangelica sit veteri gravius?* 510

---

§. V. *Utrum in Lege Evangelica dentur con-*  
*filia?* 516

---

§. VI. *Utrum Lex Evangelica sit aliquando mutanda?* 523

Tracta-



# Tractatus

DE

FIDE, SPE, ET CHARI-  
TATE.

## PRIMA PARS.

De

F i d e.

Caput I. *De Definitione Fidei.* Pag. 526

§. I. *Exponitur definitio Fidei ab Apostolo tra-*  
*dita.* 527

§. II. *Quomodo Fides definiri possit juxta Dia-*  
*lecticorum Leges?* 531

§. III. *Confectaria quaedam colliguntur ex defi-*  
*nitione Fidei.* 551

Cap.

## INDEX CAPITUM.

§. I. *Quid sit Lex Evangelica, & in quo consistat.* Pag. 479

§. II. *Utrum Lex Evangelica sit præceptiva?* 485

§. III. *Utrum Lex Evangelica sit alia à veteri?* 493

§. IV. *Utrum Lex Evangelica sit veteri gravior?* 510

§. V. *Utrum in Lege Evangelica dentur conflictia?* 516

§. VI. *Utrum Lex Evangelica sit aliquando mutanda?* 523

Tracta-



# Tractatus

DE

FIDE, SPE, ET CHARI-  
TATE.

## PRIMA PARS.

De

F i d e.

Caput I. *De Definitione Fidei.* Pag. 526

§. I. *Exponitur definitio Fidei ab Apostolo tra-*  
*dita.* 527

§. II. *Quomodo Fides definiri possit juxta Dia-*  
*lecticorum Leges?* 531

§. III. *Confectaria quædam colliguntur ex defi-*  
*nitione Fidei.* 551

Cap.

## INDEX CAPITUM.

Cap. II. *De interno actu Fidei.* Pag. 559

§. I. *De Definitione & Proprietatibus interni  
actus Fidei.* ibid.

§. II. *De Necessitate interioris actus Fidei.*  
574

§. III. *Satisfit nonnullis difficultatibus circa  
Symbolum Apostolorum.* 581

Cap. III. *De externo actu Fidei.* 587

Cap. IV. *De Peccatis Fidei oppositis.* 594

---

## SECUNDA PARS.

*De*

*S p e.*

Caput I. *De Spei Definitione, Objecto, & Di-  
visione.* 610

Cap.

## INDEX CAPITUM.

Cap. II. <i>De Differentia Spei à Fide &amp; Charitate.</i>	Pag. 627
Cap. III. <i>De Spei Necessitate.</i>	639
Cap. IV. <i>De Spei Certitudine.</i>	645
Cap. V. <i>De Peccatis oppositis Spei Theologicæ.</i>	653
Cap. VI. <i>De Causis Spei Theologicæ.</i>	667
Cap. VII. <i>De Effectibus Spei Theologicæ, ubi de Timore Dei.</i>	669

---

## TERTIA PARS.

*De*

**Charitate.**

Caput I. <i>De Nomine, &amp; Definitione Charitatis.</i>	687
Cap. II. <i>De Objecto materiali &amp; formali Charitatis.</i>	702

Cap.



## INDEX CAPITUM.

Cap. III. *De Necessitate Charitatis.* Pag. 716

§. I. *De præcepto amoris Dei.* 717

§. II. *De præcepto amoris proximi.* 730

Cap. IV. *De Ordine Charitatis.* 746

Cap. V. *De Effectibus Charitatis.* 757

§. I. *De internis Effectibus Charitatis.* 758

§. II. *De Eleemosyna.* 766

§. III. *De Correctione fraterna.* 781

Cap. VI. *De peccatis Charitati oppositis.* 802

§. I. *De novem primis peccatis Charitati oppositis.* 803

§. II. *De Scandalo.* 809



Tra-



# Tractatus DE ACTIBUS HU- MANIS.

**T**heologi vulgò distinguunt inter actionem hominis, & actionem humanam : ab homine quidem utraque procedit, sed illa sine rationis advertentia ; ista cum advertentiâ & humano modo. De posteriori duntaxat instituitur hic Tractatus.

---

## CAPUT PRIMUM.

De Notione Actus humani.

Q. *Quid est actus humanus?*

R. 1. Est actus à voluntate hominis de-

*D. Habert Theolog. Tom. III.*

A

libe-

liberatè procedens. Ita S. Thomas 1. 2. qu. 1. artic. 1. *Illæ solæ actiones*, inquit, *vocantur propriè humanæ*, quarum homo dominus est: est autem dominus suorum actuum per rationem & voluntatem: unde & liberum arbitrium esse dicitur facultas voluntatis & rationis. *Illæ ergo actiones propriè humanæ dicuntur*, quæ ex voluntate deliberata procedunt: si autem aliæ actiones homini convenient, possunt dici quidem hominis actiones, sed non propriè humanæ, cum non sint hominis in quantum homo est.

Dicitur 1. *A voluntate hominis procedens*, quod fit vel immediatè, vel mediatè. Si immediatè à voluntate procedat, ut amor, odium, desiderium, &c. actus dicitur elicited: si mediatè tantum, ut meditatio, deambulatio, &c. actus dicitur imperatus; quia nec meditatio, nec deambulatio exeunt à voluntate, sed ab aliis potentiis; illa ab intellectu, hæc à facultate motrice. Dicuntur tamen actus à voluntate imperati, quia non procedunt à suis potentiis, nisi imperante voluntate. Ad instar actuum voluntatis Philosophi, ac Theologi distinguunt actus virtutum moralium in elicitedos & imperatos, quamvis omnes à voluntate immediatè procedant. Actus virtutis elicitedus est ille, qui immediatè à virtute producit, ut oratio à virtute Religionis: imperatus, qui non nisi mediante alia virtute producit: sic oratio ad obtinendam veniam peccatorum, est actus pœnitentiæ imperatus; quia oratio non procedit à pœnitentia nisi mediante Religione, cujus est proprius & elicitedus actus.

Dicitur 2. *Deliberatè*, hoc est, cum advertentia rationis, & ex electione, ac proinde liberè.

Actus autem à voluntate procedit, vel consenta-

sentaneè ad rectam rationem , vel dissentaneè ; sub quo respectu dicitur actus moralis.

Ergo in actu humano tria sunt spectanda, scilicet voluntarium, liberum, & morale; de quibus sigillatim agendum.

§. I.

*De Voluntario.*

Q. *Quid est Voluntarium?*

R. Est id, quod fit à principio interno, id est, à voluntate, cognoscente singula, in quibus est actio. Ita Philosophi & Theologi summo consensu post Aristotelem, S. Gregorium Nyssenum, sanctum Damascenum, ac præcipuè S. Bernardus, Tractatu de Gratia & libero arbitrio, cap. 2. num. 4. & S. Thomas 1. 2. quæst. 6. art. 1. & 2.

Ergo ad voluntarium duo absolutè requiruntur. Primò, debet esse à principio intrinseco; unde violenta tractio in carcerem non est voluntaria in eo, qui trahitur; quia fit à principio extrinseco, nempe à satellitibus, nec ad eam tractus quidquam confert. Secundò, debet agens, à quo procedit actio voluntaria, agnoscere ea, in quibus versatur ejus actio, singulas nempe circumstantias, locum, finem, tempus, &c.

Dices: actio aliquando est magis voluntaria, etiamsi procedat ex minori cognitione & deliberatione: ergo ad voluntarium non pertinet cognitio.

Probatur antecedens: Concupiscentia auget voluntarium, & causat ignorantiam, seu inadvertentiam, ita ut quò magis ardet concupiscentia,

tia, eò actus sit magis voluntarius, & mentis cæcitas major.

Nego anteced. cujus confirmationem distinguo: Concupiscentia causat ignorantiam & inadvertentiam circa ea, quæ ab objecto possent avertere, & impedire actionem, Conc. Circa ea, ad quæ movet concupiscentia, putà delectabilia, Nego. Itaque multa spectanda sunt circa objectum concupiscentiæ, scilicet, bonum sensibile, & delectabile, turpitudine peccati, prohibitio legis, pænæ, quas Deus minatur. Cum autem hæc posteriora frænum injiciant concupiscentiæ, & motum ejus restringant, efficit, ut peccator inde oculos mentis avertat, & eatenus excæcetur: ad priora verò convertat, nempe ad delectabilia, & attentius ea expendat.

Ergo amor est cæcus, & oculatus, seu perspicax, sub duplici respectu. Nempe oculatus est & perspicax respectu eorum, ad quæ inclinatur: cæcus verò respectu eorum, quorum consideratio motum ejus impediret.

Ergo quem justitia magis delectat, is in bono sapientior est, & in Lege Dei scrutanda perspicacior: contra verò qui temporalia concupiscit, in iis prudentius se gerit, juxta illud Luc. 16. *Filii hujus sæculi prudentiores filiis lucis in generatione sua sunt.*

## §. II.

### *De Violentia & Coactione.*

Q. I. *Quotuplex est violentia seu coactio?*

R. Duplex; alia absoluta, alia secundum



cundum quid, quæ dicitur à S. Thoma coactio insufficiens.

Q. 2. *Quid est coactio absoluta?*

R. Est actio, quæ procedit à principio extrinseco, nihil conferente passo, ut tractio in carcerem, quæ totaliter est à satellitibus.

Q. 3. *Quid est coactio insufficiens, & secundum quid?*

R. Est actio, quæ est partim à principio intrinseco, partim ab extrinseco, ut consensus, quem gravis metus extorquet.

Q. 4. *Omnis coactio tollitne voluntarium?*

R. Absoluta tollit, insufficiens verò minuit duntaxat.

Probatur utraque responsionis pars. Actio voluntaria ex dictis procedit à principio intrinseco, nempe à voluntate: atqui quod fit per coactionem absolutam, ut violenta tractio in carcerem, nullatenus procedit à principio intrinseco: quod autem fit coactione insufficienti, partim est à principio intrinseco seu voluntate; partim à principio extrinseco, puta ab eo, qui per metum extorquet consensum voluntatis. Ergo coactio absoluta voluntarium prorsus excludit; insufficiens verò minuit duntaxat.

Q. 5. *Voluntas potestne cogi coactione absoluta?*

R. Non potest quoad actus elicitos. Hæc est responsio omnium Philosophorum & Theologorum, præsertim verò S. Bernardi Tract. de Grat. & lib. arbitr. cap. 1. 2. 3. 12. &c. Et S. Thomæ 1. 2. qu. 6. art. 4.

Probatur: quia omnis elicita voluntatis actio est volitio, quemadmodum omnis operatio intellectus est intellectio: atqui repugnat volitionem

ab alio principio , quàm à voluntate procedere ; esset autem manifesta contradictio , volitionem non esse quid voluntarium.

Dices : vis seu metus gravis reddit matrimonium nullum : ergo tollit omnino consensum , ac proinde voluntarium.

Distinguo consequ. tollit omnino consensum quoad effectum , & vim obligandi , Concedo : quoad entitatem , Nego consequ. Itaque qui per vim consentit matrimonio , simpliciter voluntariè consentit , estque involuntarius secundum quid duntaxat. Sed consensus ille , ex dispositione juris positivi , nullam parit obligationem , nulliusque est effectus. Idem dicendum est de voto sollemni ex gravi metu emisso ; nam tale votum non ligat voventem , etiamsi sit absolutè & simpliciter voluntarium.

Confirmatur responsio. Valet matrimonium , si metus sit justè incussus , putà si constuprator metu gravioris pœnæ cogatur ducere virginem à se corruptam : ergo metus non tollit absolutè voluntarium.

Ergo apostasia , perjurium , & alia crimina metu extorta , sunt absolutè voluntaria , & secundum quid involuntaria , nec proinde omnino excusanda ; minùs tamen gravia sunt , quia etsi metus non tollat omnino voluntarium , minuit tamen.

Dices : concupiscentia , ex dictis , augeat voluntarium , & tamen minuit gravitatem peccati , ergo majus aut minus voluntarium non reddit peccatum gravius aut levius.

Nego consequ. nam gravitas aut levitas peccati non solum reperitur ex voluntario , sed etiam ex libero. Porro concupiscentia , dum augeat voluntarium



luntarium, minuit liberum; quia magis inclinatur & determinatur: minor autem libertas minuit gravitatem peccati.

Ergo, inquit, gratia minuit meritum; quia dum facit nos magis voluntarios in Lege Domini, reddit minus indifferentes, ac proinde minus liberos.

Nego consequens. namque vera radix meriti est charitas; indifferentia verò, seu potestas agendi & non agendi, est conditio requisita ad meritum, quatenus efficit ut homo sit dominus sui actus. Unde quod major est charitas, eò majus sequitur meritum; quia ex intensiori charitate actus intensior & perfectior procedit.

§. III.

*De Ignorantia.*

Q. I. *Quotuplex est ignorantia?*

R. Alia est ignorantia juris, alia facti: alia vincibilis, alia invincibilis.

Q. 2. *Quid est ignorantia juris?*

R. Est ea, qua quis ignorat legem v. g. consanguinitatem, aut affinitatem esse matrimonii impedimentum dirimens. Hæc autem ignorantia vel est juris naturalis, vel juris positivi, sive divini, sive humani.

Q. 3. *Quid est ignorantia facti?*

R. Est ea, qua quis sciens Legem, v. g. affinitatem esse matrimonii impedimentum dirimens, nescit eam, cum qua contrahit, esse sibi affinem.

Q. 4. *Quid est ignorantia vincibilis?*

R. Est ignorantia eorum, quæ quis scire potest & debet.

Dico, *debet* ; si enim quis ignoret ea , quæ scire non tenetur , non est in eo ignorantia , sed mera nescientia , nec negligentia est insimulandus , si non curaverit addiscere. Hinc quod est nescientia in plebe , potest esse ignorantia vincibilis in Pastore.

Q. 5. *Quid est ignorantia invincibilis?*

R. Est ignorantia eorum, quæ quis scire non potest, nec tenetur.

Dico, *nec tenetur* ; si quis enim munus temerè suscipiat , nec scientiam ad illud exercendum necessariam comparare possit , ignorantia illius non censetur invincibilis, ut ex infrà dicendis patebit.

Q. 6. *Quotuplex est ignorantia vincibilis?*

R. Duplex : affectata , quando quis de industria vult nescire , ut liberius peccet ; & crassa , ut si quis directè quidem non affectet ignorare , debitam tamen non adhibeat diligentiam , ut ignorantiam vitet.

Q. 7. *Ignorantia vincibilis tollitne voluntarium?*

R. 1. Affectatio auget voluntarium, & peccatum , nedum tollat. Ita sanctus Thomas 1. 2. qu. 76. art. 4. *ex intentione . . . voluntatis* , inquit, *ad peccandum provenit, quòd aliquis vult subire ignorantiaè damnum, propter libertatem peccandi.*

R. 2. Crassa minuit voluntarium ; quia minuit cognitionem ; actio enim , quæ procedit à principio minùs cognoscente singula , in quibus est actio , est minùs voluntaria , ac proinde minus malitiæ continet , juxta illud Luc. 12. *Servus, qui cognovit voluntatem Domini sui, & non præparavit, & non fecit secundum voluntatem ejus, vapulabit multis : qui autem non cognovit, & fecit digna plagis, vapulabit paucis.* Et 1. Tim. cap. 1. *Misericor-*

*sericordiam Dei consecutus sum, quia ignorans feci in incredulitate.*

R. 3. Ignorantia crassa non tollit absolutè voluntarium, nec omnino excusat à peccato, quia est volita saltem indirectè, quatenus nempe qui ea laborat, voluntariè vel omittit diligentiam necessariam ut addiscat, vel suscipit officium, ad quod præstandum non potest adipisci scientiam requisitam. Porro qui vult causam, vult consequenter effectum cum ea necessario conjunctum.

Confirmatur responsio, 1. ex Scriptura, Luc. 12. mox laudato, *qui autem non cognovit, & fecit digna plagis, vapulabit paucis.* In Lib. Levitici varia sunt instituta sacrificia ad expianda ignorantiae peccata. Psal. 25. David petit veniam pro peccatis ignorantiae, *ignorantias meas ne memineris, Domine.*

Confirmatur 2. ex Concilio Diospol. in quo damnata fuit hæc Pelagii propositio: *Oblivio & ignorantia non subjacent peccato, quoniam non secundum voluntatem eveniunt, sed secundum necessitatem.* Contra quam propositionem Patres insurgunt his verbis: *hæc reprobat sancta Synodus, & sancta Catholica Ecclesia.* Hunc Pelagii errorem in auctore quodam reviviscentem egregiè refellit sanctus Bernardus Tractatu de Baptismo ad Hugonem Victorinum cap. 4.

Dices: ex dictis, ubi nulla est cognitio, nullum quoque est voluntarium, nec proinde peccatum: atqui plures nesciunt, quæ scire possunt & debent, nec advertunt se nescire; imò existimant, etiam ex aliorum testimonio, se nosse quæ oportet, nec in mentem eorum venit sibi adhibendam esse majorem diligentiam: ergo igno-

rantia vincibilis nonnunquam tollit voluntarium & peccatum.

Minor probatur multis exemplis : 1. Judæorum , qui ex zelo Legis persecuti sunt Christum Dominum ; *si enim cognovissent* , inquit Apostolus 1. Cor. 2. *nunquam Dominum gloriæ crucifixissent.* 2. Hæreticorum , ex quibus non pauci solo Dei timore videntur suæ sectæ addicti. 3. Multorum tum Judicum , tum Pastorum , & Confessariorum , qui ubi ponunt tenebras lucem , ibi putant se obsequium præstare Deo.

Distinguo minorem. Plures nesciunt nec advertunt se nescire , sed advertere possunt , & debent , Concedo : advertere non possunt , nec debent , subdistinguo ; & in illa hypothese ignorantia est invincibilis , qualis est in infidelibus negativis , Concedo ; & ignorantia illa est vincibilis , Nego min. & conseq.

Ad Confirmationem , respondeo 1. Judæos per miracula & prophetias potuisse cognoscere Christum Dominum , juxta illud Joan. 5. *si enim crederetis Moysi , crederetis forsitan & mihi ; de me enim ille scripsit.* 2. Hæreticos & alios infideles , quibus annunciatum est Evangelium , si vellent attendere ad notas veræ Religionis , eam in Ecclesia Romana facile esse deprehensuros. Porrò Pastores & Judices Catholici multò minùs sunt excusandi ob ignorantiam , quàm infideles ; habent enim libros , de quorum auctoritate non dubitant : habent & qui explicant , si quæ occurrant difficiliora ; sed legere negligunt , & audire contemnunt.

Ex his duo colliges.

Primum : meritò à summo Pontifice Alexandro VIII. & à Clero Gallicano anno 1700. damnatum



tam fuisse hanc quorundam Modernorum propositionem, *Peccatum Philosophicum seu morale quantumvis grave in eo, qui Deum vel ignorat, vel de Deo actu non cogitat: est grave peccatum, sed non est offensiva Dei, neque peccatum mortale, dissolvens amicitiam Dei, neque æterna pœna dignum.* Quæ propositio ab Illustrissimis Antistitibus notatur ut scandalosa, temeraria, piarum aurium offensiva, & erronea. Quid enim absurdum magis, quàm nequissimum peccatorem vix offensam Dei incurrere; quia vix de Deo cogitat: justum verò sæpiùs cadere, quia in conspectu Dei sollicitè ambulat: dæmonem in tuto salutem hominum ponere, dum mentis oculos excæcat, & eos falsa boni specie deludit?

Secundum: peccata ignorantiae vincibilis, etsi minus malitiæ contineant, majori tamen damnationis periculo exponere, & eatenus quam maxime esse timenda, ut quæ cum impœnitentia finali plerumque sint conjuncta; quis enim illud emendare cogitabit, in quo se peccare non arbitratur? hinc geminatae Ecclesiæ preces; *illumina oculos meos, ne unquam obdormiam in morte*, Psal. 12. *ab occultis meis munda me*, Ps. 18. hinc firmissimarum Ecclesiæ columnarum tremor, *nihil enim mihi conscius sum, sed non in hoc justificatus sum*, 1. Cor. 4. *multum timeo occulta mea, quæ norunt oculi tui, mei autem non.* Tu nosti de hac re ad te gemitum cordis mei, & flumina oculorum meorum: S. Aug. Lib. 10. Confessionum cap. 37.

Q. 8. Quid observandum ad sedandos graves conscientiae motus ex dictis nascentes; suadendumque ignorantiam, si quæ in nobis sit, non esse vincibilem seu voluntariam, nec proinde peccata, quæ inde sequuntur, nobis in Dei judicio fore imputanda?

R. 1.

R. 1. Quoad ignorantiam juris, communis est Theologorum & Canonistarum doctrina, ut ignorantia non censeatur vincibilis, sufficere eam diligentiam, quæ moraliter sit in hominis potestate, spectatis circumstantiis ejus personæ, & rei tractandæ, quamvis major dari possit: non imputandam ignorantiam scienti, quæ communiter noverunt homines ejusdem professionis, nec requiri, secluso contractu, ut quis excellat inter doctissimos. Hinc Actuarius, seu Notarius, qui vitiosum scripsit contractum ex ignorantia, quam soli peritissimi vitare potuissent, non peccavit, nec damnum inde secutum refarcire tenetur: contra verò si erravit in iis, quæ facilia sunt, quæque communiter norunt, qui ad illud munus sunt idonei. Idem judicium esto de Pastore, Confessario, & Advocato, hi quippe si in suis consiliis errent, ubi periti non errarent, peccant, & obnoxii sunt restitutioni: secus si hæc scirentur duntaxat à peritissimis.

Dixi, *secluso contractu*; namque ex Tractatu de Justitia & Jure Part. 2. cap. 3. sunt contractus, qui requirunt diligentiam singularem, & peritiam excellentem.

R. 2. Quoad ignorantiam facti, qua nonnumquam laborant etiam viri doctissimi. Hæc non videtur vincibilis seu voluntaria, nec proinde imputanda in peccatum iis, qui mandata Dei impensè diligunt, omnem culpam summo opere timent, instantius orant, ne obrepat, & certam morum regulam, de qua suo loco, sibi præstituunt. Quis verò ante tribunal Christi illius patrocinium suscipiat, qui ignorat se eodem spiritu superbiæ & cupiditatis pulsari, quem in aliis cum multa eruditione

tione & magna animi fortitudine detegit ac reprehendit?

Q. 9. *Ignorantia invincibilis excluditne omnino voluntarium & peccatum?*

R. Excludit, siue illa fit facti, siue juris, etiam naturalis, in hypothesi, quod detur ejusmodi ignorantia.

Probatur: quia ex dictis illud voluntarium non est, quod fit à principio nullatenus cognoscente singula, in quibus est actio: voluntas enim non fertur in incognitum. Atqui agens ex ignorantia invincibili nullatenus cognoscit, nec cognoscere potest ea, in quibus est ejus actio; alioquin ignorantia ejus non esset invincibilis: ergo quod fit ex ignorantia invincibili, prorsus involuntarium est. Porro nullum est peccatum, nisi sit voluntarium: *Usque adeo, inquit sanctus Augustinus Lib. de vera Religione cap. 4. peccatum voluntarium est, ut nullo modo sit peccatum, si non sit voluntarium: & hoc ita manifestum, ut nulla doctorum paucitas, nulla indoctorum turba dissentiat.*

Confirmatur ex summis Pontificibus Pio V. Gregorio XIII. & Urbano VIII. qui damnarunt sequentes Baji propositiones: *Ad rationem & definitionem peccati non pertinet voluntarium.* Item, *infidelitas negativa in iis, quibus Christus non est prædicatus, peccatum est.* Alexander quoque VIII. perstrinxit eundem errorem his propositionibus restitutum. Prima: *In statu naturæ lapsæ ad peccatum mortale, & demeritum sufficit illa libertas, qua voluntarium ac liberum fuit in causa sua peccato originali, & voluntate Adami peccantis.* Secunda: *Tametsi detur ignorantia invincibilis juris naturæ, hæc in statu naturæ lapsæ operantem ex ipsa, non excusat à peccato formali.*

Dixi,

Dixi, *etiam juris naturalis, in hypothesis quòd detur ejusmodi ignorantia invincibilis*; nam quæstio est infra examinanda, utrùm revera detur.

Dices 1. peccatum originale est peccatum propriè dictum; quia voluntarium fuit in Adamo: ergo quæ fiunt ex ignorantia invincibili contra legem naturalem, sunt formaliter peccata, cum in Adamo sint æquè voluntaria.

Nego consequentiam & paritatem; quia, ex dicendis Tractatu de Peccatis, peccatum originale est peccatum naturæ, satisque est ad illud contrahendum, quod natura humana fuerit vitiata in sua origine per voluntatem Adami, in quo, tanquam in capite, omnes continebantur: At quæ fiunt ex ignorantia, sunt actus personales, ac proinde debent esse voluntarii propria voluntate. Peccatum autem personale non potest esse voluntarium propria voluntate, nisi adsit, aut adesse possit & debeat aliqua cognitio. Porro posteri Adam nec debuerunt, nec potuerunt in illo prævidere, quæ faciunt ex ignorantia invincibili: ergo illa non sunt peccata formaliter, sed materialiter duntaxat.

Confirmatur 1. Si sacrilegia, homicidia, adulteria, &c. essent peccata naturæ, iis omnibus homines nascerentur obnoxii, & pro iis parvuli sine Baptismo decedentes pœnas in altera vita luerent, quod ne ipsi quidem Adversarii admittunt: ergo ut quis horum censeatur reus, satis non est quòd natura in Adamo vitiata ad ea inclinet, sed accedat necesse est propriæ voluntatis consensus, qui cum ignorantia invincibili exire nequit.

Confirmatur 2. ex concessis Adversariorum, ignorantia invincibilis facti & juris positivi excusat



fat à peccato : atqui illa ignorantia est æquè effectus peccati originalis , & æquè voluntaria in Adamo , ac ignorantia invincibilis juris naturalis : ergo.

Dices 2. Sanctus Augustinus pluribus in locis probat ignorantiam invincibilem non excusare : Libro enim de Grat. & lib. arbitr. cap. 3. sic habet : *Sed & illa ignorantia, quæ non est eorum, qui scire nolunt, sed & eorum, qui tanquam simpliciter nesciunt, neminem sic excusat, ut sempiterno igne non ardeat, si propterea non credidit, quia non audivit omnino quod crederet; sed fortassis ut mitius ardeat; non enim sine causa dictum.* Effunde iram tuam in gentes, quæ te non noverunt. Et Epist. 194. aliàs 105. *Inexcusabilis est,* inquit, *omnis peccator vel vitio originis vel additamento propriæ voluntatis, sive qui novit, sive qui ignorat.* Ergo.

Distinguo anteced. neminem excusat à peccato originali, quod in Adamo contraxit, Concedo : à peccato actuali, subdistinguo : si scire potuit, Concedo : si scire non potuit, Nego antecedens. Itaque infideles negativi, juxta mentem sancti Doctoris, duplici ignorantia laborant, nempe vincibili & invincibili. Ignorantia legis naturalis in ipsis vincibilis est, & ideo peccant, si illam non servant; sed mitius ardebunt; quia illorum peccata minùs sunt gravia, utpote ex ignorantia. Servus enim, ait Christus, qui non cognovit voluntatem domini sui, vapulabit paucis: ignorantia verò Legis Evangelicæ, de qua nihil audire potuerunt, invincibilis est, nec proinde in ipsis peccatum formaliter, sed pœna peccati duntaxat. Quòd autem hæc solutio sit ad mentem sancti Augustini, patet tum ex Lib. 3. de libero arbitrio cap. 19. tum ex laudata Epistola 194.  
sic

fic enim habet cit. cap. 19. de ignorantia juris naturalis, rectè fortasse quereretur (homo) si erroris aut libidinis nullus hominum victor existeret. Cum verò ubique sit præsens, qui multis modis per creaturam sibi Domino servientem, aversum vocet, doceat credentem, diligentem hortetur, conantem adjuvet, exaudiat deprecantem, non tibi deputatur ad culpam quod invitus ignoras, sed quod negligis querere quod ignoras. De ignorantia autem juris positivi, seu Legis Evangelicæ, sic scribit laudata Epistola 194. in iis, qui intelligere noluerunt, sine dubitatione peccatum est; in iis autem, qui non potuerunt, pœna peccati.

Instabis: sanctus Augustinus impugnat hanc Pelagii propositionem, *oblivio & ignorantia non subjacent peccato*: atqui Pelagius non negavit ignorantiam vincibilem subjacere peccato; id enim agnoscit sanctus Augustinus: *Tractat iste*, inquit, *de peccatis ignorantia, & dicit hominem pervigilare debere, ne ignoret, ideoque esse culpandam ignorantiam*. Ergo sanctus Augustinus post Patres Diospolitianos contendit ignorantiam invincibilem non excusare à peccato.

Distinguo minorem: non negavit subjacere peccato ignorantiam naturæ viribus vincibilem, Concedo: vincibilem solo gratiæ auxilio, cujus necessitatem non agnoscebat, Nego minorem. Igitur ignorantia, quæ secundum Pelagium erat invincibilis, vinci poterat auxilio gratiæ, quod Deus suppliciter petentibus non denegat, sed Pelagius de viribus liberi arbitrii præsumens negligebat illud auxilium hoc sophismate delusus: Vel possum adhibita diligentia expellere ignorantiae tenebras, vel non possum: si possum & negligo, ignorantia mihi imputatur: si non possum, ignorantiae

rantia est, non voluntatis, quod peccem. Contra arguit sanctus Augustinus: illud non est dicendum impossibile, quod Deus reddit facile per gratiam suam, quam petentibus misericorditer concedit: *Humana superbia*, inquit, *tanquam præsumens, de viribus liberi arbitrii, excusatam se putat, quando ignorantia est, non voluntatis, quod peccat. Potius disputat, quam ut oret, & dicat, da mihi intellectum, ut discam mandata tua.*

Urgebis: Atqui sanctus Augustinus sæpiùs docet ea, quæ fiunt ex ignorantia invincibili, esse peccata: ergo.

Distinguo antecedens, esse peccata metaphoricè & denominativè, quemadmodum Scriptura nonnumquam vocatur manus, quia per manum exarata est, Concedo: propriè & formaliter, Nego antecedens, & quidem ad mentem sancti Augustini, qui citato Libro de libero arbitrio cap. 19. sic scribit: *Nam illud, quod ignorans quisque non rectè facit, & quod rectè volens facere non potest, ideo dicuntur peccata, quia de peccato liberæ voluntatis originem ducunt. Illud enim præcedens meruit ista sequentia; nam sicut linguam dicimus non solum membrum, quod movemus in ore, dum loquimur, sed etiam illud, quod hujus membri motum consequitur, id est formam tenoremque verborum, secundum quem modum dicitur alia Lingua Græca, alia Latina: sic non solum peccatum illud dicimus, quod propriè vocatur peccatum: libera enim voluntate, & ab sciente committitur: sed etiam illud, quod jam de hujus supplicio consequatur necesse est.*

Dices 3. ex sancto Thoma quodlib. 3. qu. 4. art. 2. *in iis, quæ pertinent ad fidem & bonos mores nullus excusatur, si sequatur erroneam opinionem alicujus Magistri: ergo ignorantia invincibilis non excusat.*

D. Habert Theolog. Tom. III.

B

Nego

Nego conseq. ibi enim loquitur sanctus Thomas de eo, qui sequitur opiniones manifestè repugnantes Scripturæ, aut Ecclesiæ auctoritati. *Qui enim, inquit, assentit opinioni alicujus Magistri contra manifestum Scripturæ testimonium, aut contra id, quod publicè tenetur secundum Ecclesiæ auctoritatem, non potest ab erroris vitio excusari.* Et qu. 12. art. 2. ad 2. *Si alicui dictat conscientia, ut faciat illud, quod est contra Legem Dei: si faciat, peccat; quia ignorantia juris non excusat à peccato, nisi fortè sit ignorantia vincibilis.*

Q. 1. *Daturne ignorantia invincibilis juris naturalis?*

Nota 1. jus naturale tripliciter spectari posse: 1. in suis principiis, quale est istud, *quod tibi non vis fieri, alteri ne feceris.* 2. in conclusionibus, quæ proximè deducuntur ex primis principiis, qualia sunt præcepta Decalogi, *non occides, non mæchaberis; &c.* 3. in remotioribus conclusionibus, cujusmodi sunt usura, matrimonii indissolubilitas, &c.

Nota 2. Prima principia, & primas conclusiones rursus spectari posse vel simpliciter & absolute, putà, *mendacium non dices*: vel in quibusdam circumstantiis, v. g. *non mentieris, etiamsi proximus ab injusta morte liberari non possit.* His prænotatis,

R. 1. Non datur ignorantia invincibilis circa prima principia juris naturalis, neque circa primarias ejus conclusiones.

Probatur 1. auctoritate sancti Augustini, qui in Psalm. 116. sic scribit: *Nullus est qui faciat injuriam alteri, nisi qui sibi fieri nolit; etenim in hoc transgreditur naturæ legem, quam non finitur ignorare, dum id facit, quod non vult pati.* Idipsum agnovit ipse Aristoteles Lib. 3. Moral. ubi sic docet: *quæ agenda, quæve fugienda sunt, nullus improbus ignorat, & hoc ipso vitio improbi & injusti sunt.* Non igitur ideo quisque involuntariè



*luntariè agere dicitur, quia quod expedit, nescit: omnino enim ista ignorantia, qua quis eligit certum aliquod malum, non efficit ut involuntaria sit illa actio, sed ut mala sit; talem enim ignorantiam vitio vertimus.*

Probatur 2. ratione, qua utitur S. Thomas, nempe peccatum naturam humanam prorsus non corrumpit, alioquin homo per peccatum desineret esse homo, & in aliam speciem transmutaretur: atqui si in eo nullum rationis lumen remaneret, quo perciperet prima principia per se nota, jam non esset homo: ergo illa principia ignorare nequit. Porro qui novit prima principia, ex iis facilè elicit conclusiones, quæ immediatè ex iis sequuntur.

R. 2. Circa conclusiones remotiores juris naturalis, quales sunt prohibitio usuræ, uxorum pluralitas, matrimonii indissolubilitas, etiam interveniente aliqua gravi causa, &c. potest esse ignorantia invincibilis; quia non deducuntur ex primis principiis nisi longiori discursu, cujus moraliter capaces non sunt ut plurimum homines indocti, tardioris ingenii, consuetudine & aliorum exemplo præoccupati.

Dices: Ex Gersonis Lib. de vita spiritali, *concors est sententia, nullam in iis quæ legis naturalis sunt cadere ignorantiam invincibilem, ergo.*

Distinguo anteced. quæ legis naturalis sunt, si spectetur quoad prima principia & primarias conclusiones, Concedo: si spectetur quoad conclusiones remotiores, Nego antecedens. Nam ipsimet Theologi nonnunquam circa illas conclusiones variè opinantur.

R. 3. Conclusiones etiam primariæ juris naturalis in quibusdam circumstantiis aliquando invin-

cibiliter ignorari possunt, v. g. in hypothefi qua homicidium, aut oppreffio virginis vitari non poffit fine mendacio officiofo, aliquis fibi certò perfuadere poteft mendacium in hoc cafu non folùm effe licitum, fed etiam præceptum.

Advertes tamen difficiliùs agnofcendam effe ignorantiam invincibilem in iis, quæ juris naturalis funt, quàm quæ juris positivi; qui enim hîc ignorantia laboravit, fortè diligentiam non adhibuit, non oravit; Deum interiùs monentem audire contempfit; fortè etiam aliquis rationis radius, licèt exiguus, ejus mentem perstrinxit, fed dormitantem non excitavit. *Vigiliis continuis*, inquit fanctus Auguftinus Lib. 22. de Civitate Dei capite 23. *excubant jufti, ne opinio verifimilis fallat, ne decipiat fermo verfutus: ne tenebræ alicujus erroris effundant, ne quod malum eft, bonum effe credatur.* Unde qui in iis ex ignorantia peccaverint, non ita facilè ab omni culpa excufandi, quàm qui ignorantia facti aut juris positivi lapfi fuerint.

Atque hæc de voluntario, quod primo loco in Actibus humanis fpectari debet.

#### §. IV.

#### De Libero.

Q. 1. *Voluntarium eftne idem ac liberum?*

R. Minimè; crescente enim voluntario per concupifcentiam, minuitur liberum. Nonnunquam tamen S. Auguftinus, S. Thomas, & alii liberum & voluntarium confundunt; quia nomen libertatis in varia fignificatione accipitur. Quando rogavit Chriftus pro Petro, inquit S. Aug. Lib. de Corrept. & Grat. c. 8. *ne deficeret fides ejus; quid aliud*

*aliud rogavit, nisi ut haberet in fide liberrimam, invictissimam, perseverantissimamque voluntatem?* ubi voluntas maximè voluntaria dicitur liberrima.

Q. 2. *Quotuplex est libertas?*

R. Duplex: alia dicitur libertas naturæ, alia libertas arbitrii.

Q. 3. *Quid est libertas naturæ?*

R. Est libertas, per quam habet quævis natura, ut sine obstaculo tendat in suum finem, & bonum sibi conveniens; sic dicimus aquam liberè fluere, quando violenter non retinetur: Beatos liberè in Deum ferri; quia corpore mortali non prægravantur; & eo sensu Deus dicitur à S. Augustino, & à S. Thoma liberè vivere, liberè seipsum amare. Ex quibus patet hanc libertatis speciem non excludere necessitatem, & in hac acceptione voluntarium ac liberum aliquando esse quid idem.

Q. 4. *Quid est libertas arbitrii?*

R. Est potentia activa, quæ, positis omnibus ad agendum prærequisitis, potest agere vel non agere.

Dicitur 1. *potentia*: neque enim est actus, cum homo maneat liber, etiamsi non agat. Neque etiam est habitus; quia idem habitus non inclinat ad actus contrarios, v. g. ad actum temperantiæ & intemperantiæ: libertas autem arbitrii se habet ad utrumque.

Dicitur 2. *activa*, ut distinguatur libertas arbitrii à potentia passiva, quæ est indifferens ad recipiendam hanc vel illam formam, putà albedinem, aut nigredinem; determinaturque, non à seipsa, sed ab agente eam disponente. At libertas arbitrii est potentia indifferens ad agendum vel non agendum, & sui ipsius determinativa.

B 3

Dici-



Dicitur 3. *positis omnibus ad agendum prærequisitis*. In quo distinguitur causa libera à causis necessariis. Hæ nimirum, quamdiu non ponuntur prærequisita ad agendum, indeterminatæ sunt & indifferentes ad hunc vel illum effectum, v. g. ignis ad comburendum lignum, aut ad liquefaciendum metallum: ubi verò ponuntur, necessariò determinatæ sunt ab objectis & dispositionibus: ignis v. g. necessariò comburit lignum præparatum, & sibi applicatum. Causa verò libera, positis omnibus ad agendum prærequisitis, potest suspendere suum actum, nec nisi à seipsa determinatur.

Ad libertatem autem arbitrii exercendam prærequiritur rationis iudicium; ita tamen ut ab ipso voluntas non determinetur necessariò, ut advertit S. Bernardus Lib. de Grat. & lib. arbitr. cap. 2. his verbis: *Habet sanè (voluntas) quocumque se volverit, semper rationem comitem, & quodammodo pedissequam, non quòd semper ex ratione, sed quòd nusquam absque ratione moveatur, ita ut multa faciat per ipsam contra ipsam, hoc est, quasi per ejus ministerium, contra ejus consilium, sive iudicium . . . . est verò ratio data voluntati, ut instruat illam, non destruat: destrueret autem, si necessitatem ei ullam imponeret.*

Q. 5. *Quælibet necessitas tollitne libertatem arbitrii?*

R. Physica tollit: moralis non tollit, sed minuit duntaxat.

Q. 6. *Quid est necessitas Physica?*

R. Est ea, qua simpliciter & absolutè aliter non possumus agere. Talis est necessitas, qua Beati amore in Deum feruntur.

Q. 7. *Quid est necessitas moralis?*

R. Est ea, quam etsi valeamus superare, nunquam



quam tamen superabimus, quia totas vires non fumus adhibitori. Unde stante ea sola necessitate, habet quis liberam electionem; mereturque vel laudem, si ejus actio fuerit honesta; vel vituperium, si inhonesta. De hac necessitate intelligendus est sanctus Augustinus Julianum sic alloquens: *Erras, si nullam putas esse peccandi necessitatem*: necessitatem, inquam ego, moralem & insufficientem, non physicam & absolutam.

Q. 8. *Quotuplex est libertas arbitrii?*

R. Duplex, nempe contrarietatis, & contradictionis.

Libertas contrarietatis dicitur ea, qua quis potest eligere contraria, bonum & malum: contradictionis, qua quis potest ponere actum, & non ponere; velle & non velle.

Q. 9. *Quotuplex est libertas contradictionis?*

R. Duplex, scilicet specificationis, & exercitii.

Libertas specificationis ea est, qua quis potest eligere hunc vel illum specie actum, v. g. jejunium, aut eleemosynæ erogationem: exercitii, qua voluntas, etsi necessariò determinata ad unum objectum, v. g. Deum amandum, mortem crucis subeundam, indeterminata tamen manet ad hunc vel illum actum, potestque hunc potius eligere, quàm alium. Consule quæ ad hujusce divisionis intelligentiam diximus Tom. 2. Tractatu de Incarnatione cap. 8. ubi probavimus libertatem exercitii sufficere ad meritum: cum per eam agens verè sit dominus sui: agatque humano modo.

Q. 10. *Quæ arbitrii libertas competit homini?*

R. In statu naturæ sive integræ, sive corruptæ,

competit illi libertas contrarietatis & contradictionis, five specificationis, five exercitii : in statu verò beatitudinis non competit, nisi libertas contradictionis.

Prima pars probatur 1. ex Scriptura Eccli. 15. *Ante hominem vita & mors, bonum & malum, quod placuerit ei, dabitur illi.* Ex sanctis Patribus; ex S. August. Lib. de Spiritu & Littera c. 33. *agit Deus ut velimus & credamus . . . sed consentire vel dissentire posse propriæ voluntatis est;* & ex S. Bern. cit. c. Lib. de Grat. & lib. arb. *ubi necessitas, ibi libertas non est; ubi libertas non est, nec meritum, ac per hoc nec iudicium . . . cum ergo voluntas nil liberum habeat nisi se, meritò non iudicatur nisi ex se.* Siquidem nec tardum ingenium, nec labilis memoria, nec inquietus appetitus . . . per se statuunt hominem, sicut nec contraria innocentem : & hoc non ob aliud, nisi quia hæc necessariò & præter voluntatem posse provenire probantur. 3. Ex summis Pontificibus Innocentio X. Alexandro VII. qui tanquam hæreticam damnarunt hancce Jansenii propositionem, *ad merendum & demerendum in statu naturæ lapsæ non requiritur libertas à necessitate, sed sufficit libertas à coactione.* Objectiones, quæ contra fieri possunt, vid. Tract. de Gratia cap. 6. §. 7. &c.

Secunda pars probatur; quia libertas contrarietatis ex dictis est facultas agendi contraria bonum & malum, atqui hæc facultas non competit Beatis, cum sint impeccabiles : ergo.

Q. II. *Quare Beati sunt impeccabiles?*

R. Quia voluntas non potest ferri in malum nisi sub ratione boni apparentis; malum quippe ut malum non est appetibile. Unde hoc in statu nullus peccat nisi aliquo modo ignorans & deceptus

ceptus saltem à propria concupiscentia ; juxta illud Sap. 4. *fascinatio . . . . . nugacitatis obscurat bona , & inconstantia concupiscentiæ transvertit sensum* : atqui ratio nihil voluntati Beatorum proponere potest contrarium Legi æternæ , tanquam bonum apparens & appetibile ; cùm tam clarè & tam perfectè videant Deum esse omne bonum , ut necessariò illis appareat malum & fugiendum , quidquid voluntati ejus repugnat.

Q. 12. *Sub quo respectu Beati habent libertatem contradictionis , sive specificationis , sive exercitii ?*

R. I. Nullam habent respectu visionis intuitivæ , & amoris beatifici ; quia ex mox dictis Beati peccare non possunt , nec habent libertatem contrarietatis : atqui defectus est & peccatum liberè à Deo averti : ergo. Deinde arbitrii libertas non est respectu ultimi finis ; illum enim necessariò volumus saltem in genere ; sed respectu duntaxat mediorum : hinc vulgare effatum , *electio non est finis , sed mediorum* : æger v. g. non deliberat an sanitatem eligat ; sed illa præsupposita , investigat media , & eligit , quæ videntur aptiora ad illam consequendam. Porro visio Dei intuitiva , & amor beatificus sunt ultimus finis hominis , ac proinde sunt actus maximè necessarii.

Nec dicas homini viatori liberum esse constituere suum ultimum finem in Deo vel in creatura ; illud enim est maxima liberi arbitrii imperfectio , quam ex eo patimur , quòd Deum obscure cognoscamus , & alia tanquam bona appetibilia appareant. Unde licèt ultimum finem sub ratione generica necessariò appetamus , eum tamen in specie liberè constituimus in Deo , vel in creatura. Sed ejusmodi infirmitas & imperfectio tolle-

tur in patria, ubi clarè & dilucidè apparebit malum esse, quidquam appetere præter Deum. Interim verò per gratiam minuitur ille defectus, & eò magis, quò plus in virtute proficimus.

R. 2. Beati habent libertatem contradictionis, tum specificationis, tum exercitii, respectu eorum, quæ non sunt necessariò conjuncta cum ultimo fine; quia cum ejusmodi bona non sint summa, sed finita, possunt appeti aut non appeti absque præjudicio Legis æternæ. Unde sicut ad perfectionem Dei pertinet, quòd necessariò amet seipsum utpote summum bonum; liberè verò creaturas, quas non produceret, nec conservaret, si vellet; ita ingens perfectio est creaturæ rationalis sic immobiliter & necessariò adhærere Deo, ut non trahatur more brutorum ab objectis inferioris ordinis.

### §. X.

#### *De Morali.*

Q. 1. *Quid significat nomen illud, Morale?*

R. Quod ad mores pertinet.

Q. 2. *Quid est mos?*

R. Mos generatim est frequens operandi modus communis vel generi, putà omnibus animalibus; vel speciei, v. g. homini.

Mos autem oritur vel ex naturali instinctu & naturæ pondere, vel ex electione voluntatis liberè se determinantis ex rationis judicio. Primum constituit mores animalium, & insensatorum hominum, ut habetur Sap. 12. Secundum verò mores hominum, qui ut tales non agunt nisi ex deliberata voluntate.

Q. 3.



Q. 3. *Quid ergo morale dicit præter liberum?*

R. Dicit ordinem & relationem ad naturam rationalem; liberum quippe dupliciter spectari potest, vel præcise, prout deliberatè exit à voluntate, vel prout exit consentaneè vel dissentaneè ad naturam rationalem, seu rectam rationem; & sub hoc respectu actus humanus dicitur moralis, bonus, vel malus, laude vel vituperio dignus.

Ergo omne liberum est morale, & vice versa omne morale est liberum; quia omnis actus liber vel est consentaneus naturæ rationali, & secundum rectum rationis iudicium; vel dissentaneus.

Dices: operatio artificialis libera est, nec tamen moralis: ergo omnis actio libera non est moralis.

Nego antec. Neque enim artifex exuit hominem, ut vacet suo operi, sed debet illud perficere, tum secundum artis suæ regulas, tum maxime secundum rectam rationem, omnium actuum humanorum regulam, cui subesse debent omnium disciplinarum regulæ: alioquin actus, licet ad normam artis expressus, erit simpliciter malus, & bonus secundum quid duntaxat, scilicet in genere artificialium, & artifex ab eo verè denominabitur improbus homo, bonus verò artifex: namque artifices, juxta S. August. Lib. 1. Confessionum cap. 35. *dum foras sequuntur quod faciunt, intus relinquentes à quo facti sunt, exterminant quod facti sunt.* Mirare ergo hominum cæcitatem, qui, ut artes discant, nomenque sapientissimi artificis mereantur, nihil omittunt, sudant, ingenium acuunt, longius peregrinantur, & peritissimos quosque consulunt: cum vix pedem moveant, aut animum applicent, ut vitam rectè instituant ac pro-

bi

bi homines evadant; omnia satagunt habere quàm optima, præter mores.

Haftenus de actu humano secundum essentiam spectato; nunc, quod caput est, dicendum de morali ejus bonitate & malitia, quæ sunt ejus proprietates.

## CAPUT II.

De bonitate & malitia actuum humanorum.

Q. I. *In quo consistunt bonitas & malitia actionis humanæ?*

R. I. Bonitas seu honestas actionis humanæ consistit in conformitate & convenientia cum natura rationali, adeò ut rectè & ex virtute vivere idem sit homini, ac rationabiliter agere. Res enim quælibet est bona, cùm facit ea, ad quæ nata est: *Vitem laudamus, inquit Seneca, si fructu palmites onerat, & cum ipso ad terram pondere eorum, quæ tulit, adminicula deducit. In bovine laudandum est quod ipsius est, consummaturque ejus bonum, si implet, cui natus est*: atqui natura hominis est rationalis: ergo bonus est, & bene agit, si rationabiliter & ex recto rationis judicio operatur.

Hæc responsio comprehendit actiones supernaturales; quamvis enim sint supra naturam, ipsi tamen maximè conveniunt, cùm ex S. Augustino posse habere fidem, naturæ sit humanæ, non pecorinæ.

R. 2. Malitia actionis humanæ consistit in difformitate & repugnantia cum natura rationali. Responsio patet ex præcedenti; nam contrariorum contrariæ sunt rationes; ergo si bonitas actionis humanæ est ejus conformitas cum natura  
ratio-

rationali, malitia est ejus difformitas cum natura rationali.

Q. 2. *Quomodo definitur actio moraliter bona & actio moraliter mala?*

R. Bona definitur actio humana, libera naturæ rationali consentanea.

Mala verò actio humana, libera, naturæ rationali dissentanea, repugnans.

Q. 3. *Unde habet actio humana, quòd sit consentanea naturæ rationali?*

R. Ex eo quòd illam perficiat; in eo quippe sita est essentia boni relativi, de quo est hic sermo; agitur enim de bono relativè ad hominem, non ad pecora.

Q. 4. *Quotuplex igitur est bonum?*

R. Duplex, absolutum & relativum.

Absolutum, est integritas & perfectio rei secundum se spectatæ. Hanc integritatem laudavit Deus in operibus suis; legitur enim Gen. i. *viditque Deus cuncta, quæ fecerat, & erant valde bona*, quia scilicet erant perfectissima in sua specie; nec ulli deerat quidquam ex iis, quæ illius naturæ congruebant.

Relativum, est virtus perficiendi aliud, seu perfectivitas, adeo ut bonum relativum idem sit ac perfectivum.

Q. 5. *Omne bonum absolutum estne etiam bonum relativum respectu cujuslibet naturæ?*

R. Minimè; nam calor, qui est bonus igni, nocivus est aquæ; venenum, quod perficit serpentem, corrumpit hominem; denique ex sancto Augustino, quod natura est pecoris, vitium est hominis, id est quod consentaneum naturæ pecorinæ, est dissentaneum naturæ rationali.

Q. 6.

Q. 6. *Quenam sunt proprietates boni relativi?*

R. Convenientia & appetibilitas : hoc enim ipso, quo res est alterius perfectiva, est quoque ei conveniens, ac consequenter ab ea appetibilis.

Ergo nihil appetibile aut conveniens, nisi bonum : nullum autem bonum, nisi perfectivum.

Ergo sola actio humana censenda est bona, quæ est hominis perfectiva.

Ergo nec divitiæ, nec voluptas, nec fama seu honores sunt bonum hominis ; quia illum non perficiunt, nec reddunt meliorem : imo, si hujusmodi adhæreat, deprimunt, deterioremque efficiunt ; quemadmodum enim aurum ex commixtione metalli inferioris fit minoris pretii, sic animus redditur deterior, cum rebus inferioribus agglutinatur. *Fieri non potest*, inquit S. Augustinus in Psalm. 32. *ut res deterior te faciat meliorem : deterius te est quidquid cupis, quo beatus esse desideras. Aurum, argentum, quælibet corporalia, quibus inhiis acquirendis, fruendis, possidendis, inferiora sunt . . . Potest corpus tuum melius fieri per meliorem (animum ; ) quia subiectum est corpus animo . . . . ut cum fuerit justus animus tuus sit postea immortale etiam corpus tuum . . . jam ergo superest ut quæras quid melius sit, quam animus tuus.* Angelus quidem melior est homine, sed non est bonum hominis ; quia non est perfectivus hominis ; cum homo non sit formatus ad possidendum Angelum : quemadmodum lumen, quamvis sit melius odore, non potest tamen perficere odoratum ; quia odoratus factus non est ad recipiendum lumen.

Ergo Deus est summum bonum cujuslibet rei ; quia rerum omnium est summè perfectivus ; perfectio



fectio enim effectus est assimilari suæ causæ, ex qua haurit quidquid in se habet bonitatis. Porro sicut oculi inter omnia corporis membra, quæ lumine perlustrantur, speciali modo illius capaces sunt, utpote ad illud recipiendum specialiter formati & dispositi; non enim lumine circumfunduntur duntaxat, quemadmodum alia corpora; sed illud percipiunt ac sentiunt, illo fruuntur, delectantur, & ita perficiuntur, ut & ipsi evadant lumina, juxta illud Matth. 6. *lucerna corporis tui est oculus tuus*: maxima verò sit illis pœna & miseria, si in tenebris jaceant. Similiter ex omnibus creaturis, quæ bonitate divina collustrantur, sola mens humana & Angelica efformata est, ac ordinata ad illam percipiendam & possidendam cognitione & amore. *Erat lux vera*, ait Evāgelista, *quæ illuminat omnem hominem*, nullum verò pecus. Et Apostolus 2. Cor. 3. *Nos verò omnes revelata facie gloriam Domini speculantes, in eandem imaginem transformamur, à charitate in charitatem*, id est, adempto velamine terrenorum, animum ad Deum erigentes, participes efficimur ejus gloriæ, sapientiæ, ac divinitatis; & in illa claritate in dies proficimus, donec venerit quod perfectum est: *Cum apparuerit, similes ei erimus, quoniam videbimus eum sicuti est*, 1. Joan. 3.

Ergo actus humanus eò est melior, quò magis Deo conjungit; quia naturam rationalem magis perficit: pejor verò, quò magis à Deo avocat; quia naturæ rationali magis repugnat, eamque magis inficit ac corrumpit.

Ergo actus mali miserum hominem reddunt; cùm enim sint contrarii & noxii naturæ rationali, non minùs illam excruciant, quàm pulvis & aliæ

aliæ fordes oculum corporis: *Et ideo*, inquit sanctus Augustinus, Concione secunda in Psalm. 32. *perversi sunt homines, qui mali volunt esse, miseri nolum.* *Et cum malitiæ sit individua comes miseria, isti perversi non solum mali esse volunt, & miseri nolum; quod fieri non potest; sed ideo volunt mali esse, ne miseri sint.* Peccatum est vermis ille, qui in damnatis non moritur; quia corrodendo, malitiam eorum nunquam absumit.

Ergo observatio mandatorum præsertim legis naturalis est toto corde expetenda, quia naturæ rationali maximè conveniens: ideo autem maximè conveniens, quia ipsius summè perfectiva, ac proinde summè delectabilis; operatio enim, quò perfectior, eò magis delectat, ut infrà dicetur. Unde vox est Ecclesiæ: *Dilexi mandata tua super aurum, & topazion . . . . Labor ego super eloquia tua, sicut qui invenit spolia multa.* Ps. 118. *Desiderabilia super aurum & lapidem pretiosum multum, & dulciora super mel & favum.* Ps. 18. Si quid autem difficultatis & molestiæ nunc sentimus in exequendis Dei mandatis, unde interturbatur hæc justitiæ suavitas, illud oritur ex palato animæ malè affecto, & ex colluctatione carnis & spiritus, propter quam vigiliæ, abstinentiæ, & aliæ corporis afflictationes assumendæ sunt veluti collyria, quibus sanatur spiritualis oculus. Sed illa corporalis exercitatio locum non habebit, reparata sanitate: justitiæ verò amor & cultus in æternum manebit, utpotè vera hominis perfectio & felicitas: quid est enim possessio Dei, inquit S. Augustinus, nisi possessio sapientiæ & totius justitiæ? Deus quippe est veritas, & justitiæ plenitudo; ac proinde nostra beatitudo, quæ in possessione Dei consistit, est gaudium de veritate & de justitia.

Ergo

Ergo latum est discrimen inter legem naturalem & leges civiles ac humanas : istæ nimirum plerumque sunt onera, quibus subijci servitus est, & subduci singularis gratia principis ; quia bonum commune, quod spectatur à lege humana, & præsertim attenditur in principe, quandoque pugnat cum bono privato. Contra verò, legem naturalem implere usque ad minimos apices, vera est hominis libertas, vera felicitas, & maximum Dei beneficium ; ipsa quippe est divinus radius legis æternæ, fulgor Imaginis Dei, quæ ex sancto Augustino Libro 12. de Trinitate cap. 11. *Non custoditur nisi ad ipsum, à quo imprimitur : Ut . . . . . se homo laudet, ait enarrat. in Psal. 144. arrogantia est : ut Deus se laudet, misericordia est . . . . . Itaque quoniam hoc nobis prodesse novit, ut amemus eum, laudando se amabilem se facit. Quid ita ? quia bonum amando, nos meliores efficiuntur. Hæc est gratia, quam Filius Dei nobis promeruit, quamque continuò postulamus, ut mandata Dei adimpleamus ; quia in illis custodiendis salus & perfectio nostra : Deus nihil jubet, quod sibi prosit : sed illi, cui jubet, S. Augustinus Epistola 138. aliàs 5.*

Dices : 1. Rectitudo seu bonitas artefacti consistit in conformitate ad regulas artis : ergo & bonitas actionis humanæ in conformitate ad legem, quæ est regula morum. Hinc à S. Augustino definitur peccatum, *factum, dictum, vel concupitum contra Legem Dei.*

Distinguo anteced. Consistit in conformitate ad regulas artis secundariò, Concedo : primariò, Nego anteced. Nam opus artificis eò præcisè & formaliter est rectum, quò aptum & concinnatum usui, ad quem destinatur ; domus v. g.

tum perfectè ædificata censetur, cùm est commoda & benè disposita ad habitandum. Per applicationem verò regularum, tanquam per mensuram cognoscitur domus habere perfectionem, quæ ei competit; proindeque conformitas cum regulis est quid consequens ipsam operis perfectionem. Similiter actio humana bona est præcisè, quia conformis est naturæ rationali: sed bonitas illa deprehenditur vel per conscientiae testimonium, vel per Legis applicationem, cui si contraria reperiatur, rectè judicatur mala, & ita potuit definiri peccatum per oppositionem ad legem, tanquam per aliquid consequens & magis notum.

Instabis 1. Actio mala non est, nisi intelligatur facta contra aliquam prohibitionem: ergo malitia primariò consistit in difformitate ad legem.

Nego anteced. Quia nonnulla sunt per se mala, & ideò prohibita: cur enim verbi gr. Lex æterna prohibet mendacium, nisi quia per se malum? ergo priùs mendacium intelligitur malum, quàm intelligatur prohiberi. Cur verò per se malum est, nisi quia repugnat naturæ divinæ, & Imagini ejus, scilicet naturæ rationali?

Instabis 2. Actio humana contra legem positivam, v. gr. manducare carnes die veneris, agrum colere die festo, non est mala, nisi quia prohibetur; sublata enim prohibitione, licitum erit illis diebus carnes manducare, & agrum colere: ergo malitia ejusmodi actionum non consistit in difformitate cum natura rationali, sed cum lege.

Nego conseq. Quia non obedire legitimæ potestati, est res per se mala, & repugnans naturæ rationali & divinæ.

Dices 2.



Dices 2. Perfectio Imaginis consistit in conformitate cum suo exemplari ; defectus verò in difformitate : atqui Deus est exemplar rerum omnium : ergo perfectio seu bonitas actionum nostrarum reponenda est in conformitate cum bonitate divina, ac consequenter cum Lege æterna, seu voluntate divina.

Confirmatur : actio contraria naturæ rationali habet rationem offensæ Dei : atqui offensa Dei intelligi non potest, nisi actio facta sit contra legem æternam, & Dei voluntatem : ergo actio humana eò præcisè bona vel mala est, quòd fit secundùm, vel contra Legem æternam.

Respondeo , concedendo primum argumentum ; quidquid enim conforme vel difforme est Imagini , eo ipso censetur, conforme, vel difforme ejus propotypo, seu exemplari. Perinde ergo est reponere bonitatem, & malitiam actionum humanarum in conformitate & difformitate, sive cum natura rationali, sive cum natura divina, quia quod convenit aut repugnat uni, convenit & repugnat alteri, cùm altera habeat rationem exemplaris, altera verò Imaginis. Unde Lex naturalis nihil est aliud, quàm impressio divinæ bonitatis, & radius quidam Legis æternæ, quam S. Bernardus vocat Legem Dei, adeò ut conveniat homini eadem probare & improbare, velle & nolle, quæ Deus probat, & improbat, amat, & rejicit. Aptius tamen exprimitur bonitas, & malitia actionum humanarum per conformitatem & difformitatem cùm natura rationali, quàm cum natura divina ; quia cùm bonitas divina alio modo participetur ab homine, quàm à creaturis inferioribus, multaque fiant ab istis naturæ suæ conformia,

mia, ac consequenter Legi æternæ, quæ tamen essent vitia in natura rationali, debuit potius definiri bonitas, aut malitia actionis humanæ per conformitatem, aut difformitatem cum natura rationali.

Ad confirmationem respondeo, actionem rationali naturæ repugnantem verè esse offensam Dei; quia est contra ejus bonitatem, ac consequenter contra Legem æternam.

Instabis ex sancto Augustino Enchir. cap. 101. *Aliquando bona voluntate homo vult aliquid, quod Deus non vult . . . . tanquam si bonus Filius Patrem velit vivere, quem Deus bona voluntate vult mori. Et rursus fieri potest, ut hoc velit homo voluntate mala, quod Deus vult bona: velut si malus Filius velit mori Patrem, velit hoc etiam Deus.* Ergo quæ conveniunt naturæ rationali, non semper conformia sunt bonitati divinæ, & Legi æternæ.

Distinguo consequens: Non semper conformia sunt in objecto materiali, seu in re volita, Concedo: In objecto formali, seu in ratione & modo volendi, Nego consequ. Itaque cum Deus voluntate optima & rectissima voluerit mortem Patris alicujus, voluntas ejus non potest honestè displicere voluntati Filii. Sed si spectetur objectum materiale, seu res volita, Filius non solum potest, sed etiam debet nolle mortem Patris, saltem voluntate conditionata, licet Deus illam absolute velit; quia ejusmodi conditionata voluntas non est contraria divinæ; Deus enim posuit necessitudines inter propinquos & amicos, efficitque propensiores voluntate ad invicem, quemadmodum inclinat membrum corporis, v. gr. brachium ad sui conservationem, ita tamen ut paratum

tum sit se exponere pro salute capitis. Imò nec Deus ipse secum pugnat, cum voluntate antecedenti & conditionata vult omnes homines salvos fieri, cum tamen plures ex his damnare decreverit: sicut nec Judex sibi ipsi est contrarius, dum morti addicit reum, quem vellet vivere, ista quippe sub diversis rationibus appetuntur, in quibus voluntas humana, si recta sit, semper est conformis divinæ.

Dices 3. Si quis ex ignorantia invincibili credat sibi mentiendum esse, ut eruat proximum à periculo mortis, actio illa est difformis naturæ humanæ: nec tamen mala est: ergo malitia actionis non est difformitas cum natura humana.

Distinguo anteced. Est difformis materialiter, Concedo: formaliter, Nego anteced. Convenit enim naturæ rationali, ut operemur secundum quod ratio dictat post adhibitam, quam possumus, diligentiam. Porro qui errat in hac vel simili hypothese, non minus est laudandus, quam artifex, qui opus suum perficit secundum regulas artis, sed in materia, cujus vitium cavere non potuit, nec debuit.

### CAPUT III.

Utrum omnis humana actio sit bona vel mala, nec ulla sit indifferens?

Quæstio esse nequit de actionibus indeliberatis, & sine advertentia elicitis; quia cum humanæ non sint, hoc est, nec liberæ, nec morales; bonitas aut malitia moralis non potest eis competere. In confessio est apud omnes dari actiones

humanas ex objecto planè indifferentes, hoc est, actiones, quæ versantur circa objecta nec bona, nec mala, cujusmodi sunt ambulatio, lectio & plures actiones ludicræ.

Controversia itaque, & quidem celebris est in Scholis tum Philosophicis, tum Theologicis, utrùm actiones humanæ ex objecto indifferentes, possint quoque esse formaliter indifferentes in individuo, seu in exercitio. Ad quam dirimendam,

Nota bonitatem & malitiam actuum humanorum non repeti ex objecto duntaxat, sed etiam ex fine & circumstantiis, aded ut actio possit esse indifferens, vel etiam bona ex objecto; mala autem vel ex circumstantiis, ut ludere, & confabulari in Templo; vel ex fine, ut legere ad ostentationem, scilicet, ut in Litteris versatus appareas. His præmissis, ad propositam quæstionem,

R. I. Vix in hocce statu naturæ corruptæ datur actio ex objecto indifferens, quæ in individuo non fiat mala aut bona, ex fine aut circumstantiis.

Probatur; Quia omnis actio, quæ vel procedit ex concupiscentia & cupiditate, vel quæ caret debitis circumstantiis, procul dubio mala est, atqui in hocce naturæ corruptæ statu, nisi ratio invigilet, attendatque ad honestatem, ut benè & laudabiliter ejusmodi actiones fiant, semper, aut ferè semper vel procedunt, ex concupiscentia, hoc est, ex motivo superbiæ, vanitatis, cupiditatis, & voluptatis, vel saltem carent debitis circumstantiis: ergo semper, aut ferè semper malæ sunt, nisi ad honestatem dirigantur.

Major



Major probatur 1. ex Scriptura, Ecclesiastici cap. 18. *Post concupiscentias non eas, & à voluntate tua avertere.* 2. Ex Clero Gallicano, qui anno 1700. hanc propositionem jam ab Innocentio XI. proscriptam anno 1679. *Comedere & bibere usque ad satietatem ob solam voluptatem, non est peccatum, modò non obsit valetudini; quia licitè potest appetitus naturalis suis actibus frui,* hac censura notavit, *hæc propositio temeraria est, scandalosa, perniciofa, & ad Epicuri Scholam ableganda.* 3. Quia mala arbor malos fructus facit, Matth. 7. Atqui concupiscentia est mala arbor, ex S. Augustino passim contra Julianum, & alios, & Pelagianos: Ergo. Præterea bonum est ex integra causa, malum verò ex minimo defectu: ergo si humana actio fiat sine omnibus circumstantiis debitis, mala est absque dubio.

Minor probatur 1. Quia in hoc statu caro concupiscit adversus spiritum, sensus & passiones non expectant rationis imperium, sed præveniunt; ac proinde dormitante ratione, dominantur concupiscentia & carnales animi affectus. Deinde ferè semper ejusmodi actiones inordinatæ sunt ex aliqua circumstantia. 1. In iis plerumque perditur tempus, cujus jactura pejor est quàm pecuniæ. Hac de causa Christus Matth. cap. 12. omne verbum otiosum damnat: *Manet nos,* inquit Tertullianus Lib. de Patientia cap. 8. *omnis vani & supervacui dicti reatus.* Et sanctus Cæsarius Hom. 30. *Si extra Ecclesiam occupari otiosis sermonibus, malum est, quantò magis in Ecclesia?* Sanctus quoque Bernardus sermone de triplici Custodia, ait: *nemo vestrum, fratres, pauci aestimet tempus, quod in verbis consumitur otiosis.* 2. Actiones ex obje-

cto indifferentes, nisi ratione regantur, mentem phantasmatis obnubilant, & rebus terrenis implicant, minusque ad divina reddunt expeditam. Quis autem indifferentes dixerit actiones adeo noxias? Restat ergo quæstionem esse de iis actionibus, quibus naturæ indulgetur, secluso omni motivo honestatis & turpitudinis, nulla dominante cupiditate, nullavè interveniente circumstantia mala, quæ hypothesis potius pertinet ad statum naturæ innocentis, quàm ad præsentem. Utrum autem ejusmodi actiones, si dentur, sint indifferentes in individuo, aut in exercitio?

R. 2. Ejusmodi actiones non sunt indifferentes, quia homo non est purum animal, sed animal rationale: ergo tenetur humano modo, id est, rationabiliter naturæ infirmitatem juvare, & necessitatibus ejus subvenire. Quòd si in hujusmodi more pecudum sensibus deserviat: Imaginem Dei in se deturpat, & naturam rationalem deformat: *Honor hominis verus*, inquebat supra S. Augustinus, *est Imago . . . Dei, quæ non custoditur, nisi ad ipsum, à quo imprimitur*; dedecus verò ejus similitudo pecoris, dum ad ima propellitur, id est, ad ea, quibus pecora delectantur.

Confirmatur, ex S. Bernardo Serm. 36. Cant. *Sunt, inquit, qui scire volunt eo tantum fine, ut sciant & turpis curiositas est.*

Porro quid magis conveniens naturæ rationali, quàm scire, cum id maximè appetat? Attamen turpe est id velle, juxta sanctum Doctorem, nisi adsit aliquod motivum honestum, scilicet, vel ut ædificemur ipsi, vel ut alios ædificemus. Audiamus ergo Apostolum, his verbis graviter monentem I. ad Corinth. 10. vers. 31. *Sive ergo*

ergo manducatis, sive bibitis, sive aliud quid facitis omnia in gloriam Dei facite.

## CAPUT IV.

## De objecto Actuum humanorum.

**D**iximus bonitatem & malitiam ex triplici capite repeti, nempe ex objecto, circumstantiis & fine. Cur autem & quomodo objectum conferat ad bonitatem & malitiam actuum humanorum, hic demonstrandum suscipimus. Itaque

**Q. 1.** *Quare bonitas & malitia Actuum humanorum desumuntur ab objecto?*

**R.** Quia actus formam & speciem ab eo recipiunt, visio v. g. differt essentialiter ab auditu, estque eo melior & nobilior: quia habet objectum nobilius: ergo si objectum actus humani sit bonum aut malum, actus similiter erit bonus aut malus.

Confirmatur responsio ex amore, prima radice omnium actuum humanorum, cujus proprium est transferre amantem in amatum, juxta illud Osee 9. *Facti sunt abominabiles, sicut ea, quæ dilexerunt.* Et S. Augustinus tract. 2. in primam S. Joannis, num. 14. *talis est quisque, inquit, qualis ejus dilectio est. Terram diligis? terra es: Deum diligis? quid dicam? Deus eris.*

**Q. 2.** *Quotuplex est objectum?*

**R.** Duplex, materiale, & formale.

Materiale est id, circa quod versatur actio, v. gr. miseria pauperis est objectum materiale actus misericordiæ; quia circa illam versatur.

Formale est ratio, sub qua actio tendit in objectum; sic sublevatio pauperis est objectum formale actus misericordiæ; quia misericordia tendit in pauperem sublevandum.

Q. 3. *Ex quonam objecto actus desumit suam bonitatem, aut malitiam?*

R. Ex utroque, sed præcipuè ex objecto formali.

Probatur 1. de Materiali; quia quo objectum materiale est præstantius, eò perfectior actus existit, cæteris paribus; quo verò naturæ rationali magis repugnat, eò actus est pejor. Hinc amor Dei melior est amore proximi, licet uterque habeat idem objectum formale, nempe bonitatem Dei; & odium Dei pejor est odio proximi. Deinde objectum per se malum putà mendacium, reddit actum malum, etiamsi voluntas in illud feratur motivo honesto, v. g. charitatis.

Probatur 2. de objecto formali, ex S. Augustino tract. 17. in primam S. Joannis: *Non quid faciat homo, inquit, considerandum est, sed quo animo & voluntate faciat. In eodem facto inveniemus Deum Patrem, in quo invenimus Judam: benedicimus charitatem, in qua Pater Filium, & Filius seipsum tradiderunt: detestamur iniquitatem, qua Judas Dominum.*

Præterea objectum materiale vel est per se indifferens, ut deambulatio, & sic nullam actui tribuere potest bonitatem, nisi ratione objecti formalis, ut si fiat ambulatio motivo Religionis: vel est per se bonum, ut sacrum audire, parentes colere, nec sic reddit actionem bonam, nisi voluntas moveatur bonitate objecti formalis, (quod idè dicitur objectum motivum) audiaturque sacrum motivo Religionis, colantur parentes motivo pietatis.



pietatis ; qui enim indifferenter ista præstaret , actio ejus non esset bona.

Q. 4. *Quæ mentis attentio & intentio requiritur ut objectum formale seu motivum bonitatem conferat operi ?*

Advertes quadruplicem distingui intentionem. Prima dicitur interpretativa , cum quis ita est affectus , ut si tale motivum in mentem veniret , ex illo operaretur. Secunda est habitualis , ut in amente , qui multa facit ex habitu , quem sanus contraxerat. Tertia est actualis cum quis actu advertit ad honestatem objecti , & ex ea movetur. Quarta est virtualis , estque effectus actualis intentionis , quæ præcessit , ut in Concionatore , qui ex actuali motivo charitatis concionari incipit , sed in decursu totus est ad persuadendum , non attendens amplius pulchritudinem charitatis. Intentio tamen actualis , quæ præcessit , dicitur virtualiter manere ; quia virtute illius concionem prosequitur. His præmissis,

R. 1. Intentio interpretativa nullam actibus tribuit bonitatem ; quia in illos nullatenus influit. Deinde non sufficit ad culpam , nec enim Deus quenquam condemnabit propter mala , quæ fecisset , si hæ aut illæ occasiones occurrissent : ergo multò minus sufficit ad bonitatem , quæ plus voluntarii & liberi requirit.

R. 2. Habitualis intentio præcisè sumpta nullam actibus confert bonitatem aut malitiam ; quia actiones , quæ fiunt ex habitu , nec sunt liberæ , nec morales , nec proinde capaces bonitatis , aut malitiæ ; quod videre est in allato amentis exemplo , qui multa dicit aut facit ex habitu , propter quæ non meretur laudem , aut vituperium.

Dices :

Dices: Qui sæpius pejerat ex habitu, toties peccat, etiamsi non advertat se pejerare.

Distinguo antecedens. Si consuetudinem non retractaverit, voluntarièque remaneat habitus, Concedo; Quia qui vult liberè causam, censetur velle cætera, quæ inde consequi ignorare non potest: peccat, si habitum retractaverit, Nego antecedens: Actiones enim, quæ sine advertentia procedunt ex habitu, quem patitur quis contra voluntatem, nec sunt voluntariæ, nec liberæ.

R. 3. Actualis intentio non est necessaria, sed virtualis sufficit, ut actiones virtute illius elicite sint bonæ moraliter.

Probatur 1. Auctoritate S. Thomæ Lib. 3. cont. gent. cap. 138. in quo sic habet: *Voluntas præcedens actum, manet virtute in tota consecutione actus, & ipsum laudabilem reddit, etiam quando de proposito voluntatis, propter quod actus incæpit, in executione operis non cogitatur, non enim oportet quod qui propter Deum iter arripuit, in qualibet parte itineris de Deo cogitet actu.* 2. Talis est operandi modus hominis, & si quid ultra ab eo exigatur, plusquam humanum est: operarius, verbi gratia, tota die de mercede cogitare nequit, nec peregrinus de patria, ad quam tendit, & nihilominus ille tota die operatur mercedis amore, & iste pergit patriæ desiderio.

Ex quibus sic argumentari licet: illud opus verè est bonum, quod fit ex motivo honesto: atqui opus, quod fit propter Deum virtute præcedentis actualis intentionis, est ex motivo honesto: ergo verè est bonum.



*Q. 5. Quandonam recta intentio, quæ manè præcessit, censetur per totam diem virtualiter manere, bonitatemque conferre singulis diei operibus?*

*R. 1. Cum sancto Bonaventura in 2. dist. 41. art. 1. quæst. 3. Satis non est, quòd quis manè offerat Deo quidquid per diem facturus est, nisi pius ille affectus influat in singula ejus opera; quia alioquin non essent effectus, sed objectum præcedentis voluntatis: atqui objectum non desumit bonitatem ullam à bona voluntate, quæ circa illud versatur; nec enim aliorum actiones meliores evadunt ex eo quòd charitatis affectu illas Deo offeram, cum non procedant ex bona mea voluntate.*

*R. 2. Ut intentio, qua quis manè intendit omnia opera referre ad Dei gloriam, sit efficax, comprimatur necesse est quoslibet contrarios affectus; quibus mens præveniri solet, putà lucri faciendi, voluptatis captandæ, famæ consequendæ, &c. ac sola ubique dominetur, aliàs sequentia opera non essent ejus effectus sed cupiditatis.*

*Q. 3. Quantumcumque matutinis horis ferveat hujusmodi intentio, vix tamen erit causa omnium operum nisi identidem iteretur, præsertim si opera illa varia sint ac disparata, & operans modicam habeat virtutem. Et ratio est, quia corpus, quod corrumpitur, aggravat animam, & caro continuò concupiscit adversus spiritum. Unde sicut aqua ad ignem semel calefacta, paulatim tepescit, ac tandem frigescit propter naturalem ad frigus propensionem; sic & intentio nostra sensim remittitur, nisi per certa temporis intervalla nos ipsos admoneamus, & mentem ad Deum erigamus.*

*Dixi i.*

Dixi 1. *Præsertim si opera illa varia sint ac disparata*: Nam si quis per totam diem vacaret unico operi, v. gr. peregrinaretur motivo Religionis, vel Litteris operam daret ex affectu charitatis, facilius intelligeretur perseverare pia intentio, maximè si initio remissa non fuerit, nec contrario affectu, putà vanitatis, oppugnetur.

Dixi 2. *Et operans modicam habeat virtutem*; diuturnior enim esse potest recta intentio in viris sanctis: tum quia ardentius in Deum feruntur, nec proinde tam citò tepescunt: tum quia passionnes in illis moderatiores sunt, nec ita acriter rationem impugnant; quemadmodum enim globus semel percussus, diutius ac longius volvitur in via declivi, quàm in acclivi; sic & pia affectio constantior esse solet in animo propenso in bonum, quam in repugnante. Hæc est salutis via, quam quisquis non tenuerit, errat, & in vanum currit, *non enim qui spiritu suo agunt, sed quotquot Spiritu Dei aguntur, hi sunt Filii Dei.* Augustinus in Psalm. 118.

## CAPUT V.

### De Circumstantiis actuum humanorum.

Q. 1. *Quid sunt circumstantiæ actuum humanorum?*

R. Sunt quædam conditiones morales, quæ circumstant & comitantur actum humanum, ut tempus quo, & locus ubi producuntur.

Q. 2. *Quare bonitas & malitia actuum humanorum desumuntur ex circumstantiis?*

R. Quia sicut dantur objecta consentanea, aut dissentanea naturæ rationali, ita & circumstantiæ. Si enim decet v. gr. vestire nudum,  
quod

quod est objectum misericordiæ, multò magis si nudus ille sit Sacerdos, quæ est circumstantia hujusce actus misericordiæ. Item si turpe est spoliare proximum, turpius si pauper sit, si Sacerdos. Primum pertinet ad objectum injustitiæ, cætera habent rationem circumstantiarum.

Confirmatur. Bonitas operis naturæ, v. gr. equi, non consistit in sola equi essentia, sed ex variis accidentibus, membrorum proportionem exurgit. Perfectio quoque artefacti præter figuram, quæ est forma artificialis, complectitur varium ornatum, concinnam partium habitudinem & dispositionem. Ergo similiter bonitas moralis actuum humanorum non à solo objecto, à quo formam & speciem accipiunt, ut diximus, sed & ab adjunctarum circumstantiarum concursu petenda est, v. gr. si congruant personæ, loco, tempori, &c.

Q. 3. *Quot sunt circumstantiæ actuum humanorum?*

R. Septem vulgò numerantur, sequenti verfu expressæ:

*Quis, quid, ubi, quibus auxiliis, cur, quomodo, quando.*

*Quis*, significat conditionem operantis, si justus aut peccator eleemosynam tribuat; si conjugatus aut voto astrictus fornicetur.

*Quid*, denotat conditionem objecti, an magna, aut levis plaga sit inflicta; an res furto sublata sit sacra, aut profana; an odium contra totam familiam exarserit, vel contra privatam personam.

*Ubi*, locum designat, an peccatum commissum sit in loco sacro, vel profano.

*Quibus*

*Quibus auxiliis, v. gr. quibus instrumentis usus sit homicida; inde enim colligitur num homicidium fuerit casuale, aut voluntarium: an confusus proximo commodo, mendacium adhibuerit, ex hac quippe circumstantia actus efficitur malus; quia ex sancto Augustino Libro contra mendacium, cap. 7. num. 18. Quæ constat esse peccata, nullo bonæ causæ obtentu, nullo quasi bono fine, nulla velut bona intentione facienda sunt.*

*Cur, Exprimit finem extrinsecum, qui est accidentaliter actui, quique dicitur finis operantis, v. gr. cur largitus est eleemosynam, an ut Deo satisfaceret pro peccatis?*

*Quomodo, notat modum actionis, an facta sit remissè, aut intensè, an ex malitia aut ex ignorantia & infirmitate; an ex negligentia, aut ex contemptu.*

*Quando, significat tempus, utrùm v. gr. die festo quis inebriatus sit? agrum proximi messuerit; quia in posteriori exemplo actus pugnat contra iustitiam simul & Religionem; in priori verò contra temperantiam & Religionem.*

*Q. 4. Quid observandum circa circumstantias?*

*R. Expendendum an novam addant speciem bonitatis, aut malitiæ; an augeant duntaxat, aut minuant, sive notabiliter, sive leviter intra eandem speciem.*

*Q. 5. Quandonam circumstantiæ novam addunt speciem bonitatis aut malitiæ, vel augent duntaxat?*

*R. 1. Addunt novam speciem bonitatis, aut malitiæ, quando efficiunt, ut actus vel pertineat ad diversas virtutes, vel contra eas pugnet. Sic circumstantia Sacerdotis in paupere sublevando efficit, ut eleemosyna pertineat ad misericordiam,*

*&*



& ad Religionem. Similiter malitia furti in loco sacro, est contra iustitiam & Religionem propter circumstantiam loci.

Hinc in genere moris plures peccati species possunt concurrere in uno & eodem actu, propter multiplices ejus circumstantias, ut patet in Sacerdote, qui ad peccandum induxit suam consanguineam conjugem: 1. enim peccavit contra charitatem, ratione scandali, quo induxit aliam personam ad peccandum: 2. contra castitatem: 3. contra Religionem, ut qui sit persona sacra: 4. contra iustitiam erga maritum: 5. contra reverentiam consanguineis debitam, quod peccatum dicitur incestus. Et hæc accuratè sunt observanda, cum in Sacramentali confessione explicari debeant, ex definitione Concilii Tridentini Sess. 14. Can. 7. his verbis: *Si quis dixerit, in Sacramento pœnitentiæ ad remissionem peccatorum necessarium non esse jure divino, confiteri omnia & singula peccata mortalia . . . & circumstantias, quæ peccati speciem mutant . . . anathema sit.*

Dixi, quando pugnat contra aliam specie virtutem, non verò contra duo præcepta eandem virtutem spectantia, ut contingeret in eo, qui jejunium quadragesimale violaret iis diebus, quibus occurrunt jejunia Quatuor Temporum; is enim unius specie peccati reus esset; quia duo illa jejunii præcepta eodem die occurrentia ad unam pertinent virtutem. Secùs si solvens jejunium quadragesimale, ex alia virtute adstringeretur præcepto jejunii, putà ex Religione voti, vel ex injuncta à Confessario satisfactione; cum enim diversa illa præcepta spectent diversas virtutes, violatio jejunii quadragesimalis in illo casu esset duplex specie peccatum.



R. 2. Circumstantiæ augment vel minuunt notabiliter bonitatem, sive malitiam actus intra eandem speciem virtutis sive peccati, quando longè major aut minor est honestas sive turpitudine in cultu, aut violatione ejusdem virtutis. Sic longè laudabilior est qui pauperem sublevat ex necessariis, quàm qui ex superfluis; qui cum fervore perseverat in bono opere arduo & difficili, quàm qui remissè & leviter illud attingit. Contra verò gravius peccat contra justitiam, qui furatur ingentem pecuniæ summam, quàm qui modicam: qui, cùm Sacerdos sit, peccat contra castitatem & Religionem, quàm qui Diaconatu, aut Subdiaconatu duntaxat est initiatus. Utrùm autem ejusmodi circumstantiæ, quæ notabiliter peccatum aggravant, in Confessione Sacramentali sint explicandæ, expendetur ubi de Pœnitentia.

Q. 6. *Quid requiritur, ut actus humanus bonitatem aut malitiam ex circumstantiis trahat?*

R. Ut conferat actui bonitatem, necesse est, ut sint prævisæ, & aliquo modo intentæ, quatenus honestæ sunt; quia ex dictis nulla est bonitas moralis nisi sit voluntaria. Ut autem conferant malitiam, satis est; quòd cùm vitari possint & debeant, nihilominus voluntas illas vitare negligat; malum quippe est nolle declinare à malo. Hinc qui dat eleemosynam Sacerdoti, non attendens circumstantiam personæ, non elicit actum Religionis, sed misericordiæ duntaxat. Qui verò eum percutit, nullam Sacerdotii habens rationem, peccat simul contra justitiam, & Religionem. Et ratio hujusce discriminis est quòd bene agere sit quædam perfectio, quæ in actibus humanis elucere non potest sine aliqua diligentia & conatu

conatu voluntatis : malè verò agere sit defectus qui sequitur negligentiam & socordiam.

Dices : Actio bona ab homine justo elicitæ, est meritoria, etiam si justus non advertat ad meritum : ergo circumstantiæ conferunt bonitatem actioni, quamvis nec cognoscantur, nec intendantur.

Nego consequ. Quia meritum aut demeritum sunt quid necessario consequens opus bonum, vel malum independentè ab intentione agentis; eo enim ipso quis meretur laudem, aut vituperium, quo voluntariè & liberè facit, quæ sunt naturæ rationali consentanea aut dissentanea. Imò plus meretur præmii, si gratuitò velit operari; quia opus ejus est magis voluntarium, & ex intensiori amore proficiscitur.

## CAPUT VI.

### De Fine Actuum humanorum.

**F**inis in moralibus primum locum obtinet : *Non valdè attendas quid facias homo, sed quid, cum facit, aspiciat*, inquit sanctus Augustinus in Psal. 31. & sanctus Thomas 1. 2. qu. 1. art. 3. *Actus dicuntur humani*, inquit, *in quantum procedunt à voluntate deliberata : objectum autem voluntatis est bonum & finis : & ideo manifestum est, quòd principium humanorum actuum in quantum sunt humani, est finis*. Quamobrem operæ pretium est, ut de Fine accuratius differamus. Ac 1. quidem dicemus de varia finis acceptione : 2. de ejus definitione : 3. de effectibus : 4. de divisione : 5. speciatim de ultimo fine, qui est nobilissima finis species, & hominis beatitudo.

## §. I.

## De varia Acceptione Finis.

Q. I. *Quotuplex est finis acceptio?*

R. Finis dupliciter accipitur: 1. improprie pro termino cujusque rei, etiam si ille non intendatur, hoc sensu mors dicitur finis vitæ, vespera finis diei: 2. proprie pro bono, in quod tendit agens, & quo obtento, cessat motus ejus.

Ergo finis proprie dictus habet rationem causæ & termini: causæ quidem, quia incitat & movet ad operandum, v. gr. sanitas intenta ad quærenda & accipienda remedia: termini quoque, quia obtento fine agens quiescit. Ita sanctus Thomas citatus art. 3. *Id ad quod terminatur actus humanus, inquit, est id quod voluntas intendit tanquam finem.*

Dices: Ex præcedenti capite, finis numeratur inter circumstantias actus humani. Ergo non est prima ejus causa.

Distinguo anteced. Actus humani imperati, Conc. Actus humani imperantis, Nego antec. In agente ergo propter finem formaliter, duo sunt distinguendi actus: alter imperans & elicited, nempe intentio seu desiderium efficax obtinendi finis: alter imperatus, scilic. electio & usus mediorum ad obtinendum finem.

Porrò finis est circumstantia actus imperati, tribuitque illi bonitatem, vel malitiam accidentalem; causa verò motiva actus imperantis conferens illi speciem seu bonitatem, vel malitiam essentialem.

Respon-

Responsio elucidabitur quibusdam exemplis. Qui largitur eleemosynam ad obtinendum remissionem peccatorum, duos elicit actus; alterum imperantem, qui versatur circa finem, estque intentio obtinendæ remissionis peccatorum, & hujusce actus causa motiva est remissio peccatorum, quam agens intendit; ideoque actus ille est elicited à virtute pœnitentiæ, ex qua speciem & bonitatem essentialem desumit. Alter verò actus est electio & largitio eleemosynæ: imperata à præcedenti actu pœnitentiæ: hic autem actus elicited à virtute misericordiæ, cujus proprium objectum motivum est sublevare miseriam pauperis, & ex illo objecto habet suam speciem, & bonitatem essentialem. Cum verò accidentale sit illi, quod imperetur à virtute pœnitentiæ, fiatque propter hunc vel alium finem, finis respectu illius est mera circumstantia, nec tribuit illi nisi bonitatem accidentalem. Idem cernere est in actu malo, v. gr. in furto propter adulterium patrato: intentio adulterii in eo, qui sic furatur, est actus adulterii & intemperantiæ imperans furtum quod est actus injustitiæ. Prior actus, qui est imperans, malitiam essentialem haurit ex adulterio, quod habet rationem finis & primi moventis. Posterior verò essentialiter malus est ex proprio justitiæ objecto, accidentaliter autem ex fine, nempe ex adulterio, ex cujus intentione imperatur, & ideo finis respectu illius est circumstantia.

Ergo bonitas & malitia actuum humanorum, potissimum ex fine repetenda est; quia ex dictis actio eatenus est moraliter bona aut mala, quatenus est deliberatè voluntaria: atqui actio maximè ex fine est voluntaria; quia finis propter se



appetitur, cætera verò propter ipsum, per quod autem unumquodque tale, inquiunt Philosophi, & illud magis per se, hoc est, per quod cætera amantur, & illud magis: *Quod enim amatur propter aliud*, inquit sanctus Augustinus, *non illud amatur, sed aliud propter quod amatur*: v. gr. potio medica propriè non amatur, sed sanitas, propter quam potio amara sumitur. Ergo.

Q. 2. *Quotuplici modo finis propriè dictus accipi potest?*

R. Duplici, scilicet in actu primo & in actu secundo.

Finis in actu primo est res ipsa, quæ movere potest ad agendum; virtus autem movendi est ejus bonitas sive vera, sive apparens; in tantum enim allicit ac movet, in quantum est amabilis & appetibilis: atqui allicit quatenus apparet bonus, malum enim quatenus malum non allicit, sed fugat; non appetitur, sed timetur: ergo finis in actu primo est bonum propter se appetibile, saltem apparenter.

Finis in actu secundo est res bonitate sua saltem apparenti actu illiciens, attrahens ac movens. Causalitas ejus seu influxus, est motio seu amor; illud enim est causalitas finis, quo posito, intelligitur finis actu influere, & ut ita dicam, causare; & quo sublato, non influit, atqui posita motione, seu amore & desiderio finis intelligitur actu influere; nam ex S. Thoma qu. 22. de verit. art. 2. *Sicut influere causæ efficientis, est agere; ita influere causæ finalis, est appeti & desiderari*: sublata verò motione, finis non influit; sicut sublata actione ignis, v. gr. calefactione, ignis actu non agit, nec calefacit; sed est tantum in poten-



tentia ad agendum & calefaciendum. Ergo. Porro de fine in actu secundò hic præsertim agitur.

Ergo Deus est omnium finis in actu primo; quia est summum bonum, quo omnes possunt allici, & moveri desiderio illius assequendi; sed non est peccatorum determinatus finis in actu secundo: quia illis non placet, nec ejus bonitate alliciuntur: *Solus non habet quod nobis displiceat*, inquit sanctus Augustinus, concione 2. in Psal. 32. *Et nemo tam multa habet, quæ infidelibus displicent . . . Et . . . (quod piget dicere, sed tamen dicam; nostri enim quàm verum dicam) faciliùs placet Pantomimus quàm Deus.*

## §. II.

## De Definitione Finis.

Q. *Quomodo definitur finis?*

R. Definitur, id cuius gratia aliquid fit. Dicitur 1. *Id*, hoc est res bona, saltem apparenter; quia voluntas, ut jam diximus, non potest allici, aut moveri nisi aliquo bono.

Dicitur 2. *Cujus gratia*, id est, cuius amore & fruendi desiderio agens operatur, quo distinguitur finis propriè dictus, tum à medio, tum à fine impropriè dicto, seu à puro termino.

A medio quidem; quia licet multa fiant propter medium, putà propter præparandum pharmacum, aut lucrandam pecuniam; attamen nec pharmacum, nec pecunia dici possunt finis, cum illa non fiant amore pharmaci, aut pecuniæ, sed amore duntaxat sanitatis, & commodæ sustentationis, in quibus agens requiescere intendit; nam, ut suprà dicebat sanctus Augustinus, *quod amatur*

*propter aliud, non illud amatur, sed aliud propter quod amatur.* Hinc bonum utile, ut utile, non habet rationem finis, quia ad aliud ordinatur.

Dixi, *ut utile*; Quia etsi pecunia non habeat ex se rationem nisi boni utilis, apprehenditur tamen ab avaro, ut bonum delectabile, ideóque illam intendit, ut finem, & ejus amore operatur, cum eam obtentam nedum in proprios usus consumat, quin illam diligenter servet, & in ejus possessione quodammodo requiescat.

Eadem quoque ratione finis distinguitur à puro medio, ad quod agens ita opera sua dirigit, ut illud non appetat, nec illius gratia agat, ut videre est in illo, qui cum multa præparet pro tempore ægritudinis, ad quam novit certò terminandam sanitatem, qua impræsentiarum fruitur, non habet tamen ægritudinem pro fine, sed pro termino; quia illam nec amat, nec appetit; sed quantum potest, propellit. Sic carnales homines quædam bona opera ordinant ad futuram vitam quæ præsentis futurus est terminus: sed finis illorum propriè non est, cum illam non ament, nec appetant; sed timeant duntaxat, ne post præsentis vitæ terminum, miseri evadant.

Dicitur 3. *aliquid fit*, quo significatur finem esse primam omnium operationum sive naturalium, sive artificialium, sive moralium causam.

Et ratio est, quia omnia appetunt bonum suum, & ad illud tendunt moventurque sive à seipsis, ut rationalia, sive à superiore voluntate, nempe divina, ut irrationalia & inanimata, quæ à Deo aguntur, & diriguntur sicut sagitta à sagittante, inquit S. Thomas. Ergo finis est bonum, cujus gratia omnia fiunt. Ex dictis autem

omne

omne bonum est perfectivum, ac proinde finis cujusque rei est ejus perfectio.

Ergo bonum & finis non recipiuntur; quamvis enim omnis finis sit bonus, saltem apparenter, alias non appeteretur; bonum tamen omne non est finis; quia multa sunt bona, propter quæ consequenda nihil fit: victoria, v. g. & scientia sunt quid bonum, sed finis non sunt ignavi & desidioli; quia neuter operatur illarum gratia.

Cum autem homo seipsum moveat ad finem: plurimi refert ad mores, ut à scopo non aberret, noveritque quid sit proprium bonum, in quo finem constituat, quidve amor finis parere debeat. De primo nonnulla jam prælibavimus capite de objecto actuum humanorum, pluraque dicemus sequentibus Paragraphis. De secundo nunc tractandum suadet ordo doctrinæ.

### §. III.

#### *De Effectibus Finis.*

Q. I. *Quot sunt finis effectus?*

R. Octo numerantur. Primus est voluntas seu volitio, & amor finis. Secundus, intentio, seu desiderium efficax. Tertius, consilium. Quartus, consensus. Quintus, electio. Sextus, imperium. Septimus, usus mediorum. Octavus, fruitio, sive quies in fine adepto & bono possessio. Ex his effectibus tres versantur circa finem, nempe voluntas, intentio, & fruitio: cæteri verò circa media.

Dices: Omnes illi actus, sola fruitione excepta, sunt causa finis, cum per eos acquiratur: ergo non sunt ejus effectus.

Distinguo antec. Sunt causa finis in executione, Concedo : Finis in intentione, Nego antec. Finis itaque dupliciter spectatur, scilicet in intentione, & in executione. Finis in intentione est bonum voluntati propositum, ut propter se appetendum, & ut sic movet voluntatem ad amorem sui, & ad efficaciter operandum, ut obtineatur, ac proinde est causa actuum, quos recensuimus. Finis verò in executione est bonum jam obtentum & possessum, ut sanitas, commoda habitatio : quod cum non obtineatur, nisi per inquisitionem, electionem, & usum mediorum, sequitur omnes illos actus esse causam possessionis, quæ vocatur finis in executione.

Q. 2. *Quis ordo illorum actuum?*

R. Bonitate objecti proposita voluntati, i. loco exurgit simplex volitio, seu amor & complacentia. Hic actus cæteris quidem necessariò præsupponitur; nisi enim placeat bonum apprehensum, v. g. castitas, &c. nullus sequitur conatus ad illud consequendum; sed si sit solitarius, non efficit ut bonum evadat finis in actu secundo; quia simplex complacentia potest versari circa bonum apprehensum, ut impossibile, putà circa victoriam, quam imbellis sibi repræsentat, ut impossibile: bonum autem apprehensum, ut impossibile, non habet rationem finis, quantumcunque placeat, cum nihil fiat gratia illius. Nisi ergo simplex illa voluntas, quæ velleitas dici solet, quasi semivoluntas, adjunctam habeat intentionem, effectus finis esse nequit.

Intentio proximè sequitur amorem seu complacentiam; naturale enim est velle possidere, quod placet & amatur. Intentio autem est effi-

cax



cax desiderium finis , seu actus voluntatis efficaciter tendentis in bonum per media consentanea. Ergo intentio continet saltem virtualiter propositum inquirendi , & adhibendi media ; qui enim vult sincerè & efficaciter finem consequi , v. g. vincere cupiditates , intelligitur velle uti mediis , sine quibus finis non potest obtineri. Unde patet ex intentione pendere totam humanorum actuum seriem & æconomiam. Porro qui efficaciter finem intendit , is statim cogitat de mediis , quibus obtineri possit , illaque sollicitè inquit , si non habeat ad manum. Quare.

Tertius finis effectus statuitur consilium seu deliberatio , estque actus mentis inquirentis , & ponderantis media , eorumque proportionem ad finem ; consilium quippe non est de fine , sed de mediis ; id enim est finis in agibilibus , inquit sanctus Thomas , quod prima principia in speculativis ; sicut ergo in speculativis nulla potest esse quæstio circa principia , an , v. g. idem possit simul esse & non esse ; sed circa conclusiones ex iis deductas : similiter in practicis non initur consilium , nec deliberatur de fine , putà , an Deus sit colendus , salus comparanda , superbia , aut fornicatio fugienda , sed de mediis , quibus Deus rectè coli possit , salus obtineri , & superbia aut fornicatio efficaciter vitari. Sine ejusmodi consilio appetitus finis , & propositum illius assequendi quantumcunque vehemens , est inefficax & mera velleitas , quemadmodum sanctus Augustinus in seipso advertit , cum adhuc illicitis amoribus detineretur. Mirum in modum placebat illi pulchritudo castitatis , ad illam conabatur , nec attingebat , & ideo prorumpabant flumina lacrymarum,



rum, sed frustra: *Tam multa feci*, inquit L. 8. Conf. c. 8. & 9. *ubi non hoc erat velle quod posse, & non faciebam quod & incomparabili affectu amplius mihi placebat, & mox ut vellem possem . . . unde hoc monstrum, & quare illud?* Quia nimirum non ex toto volebat, non totus assurgebat veritate sublevatus, consuetudine prægravatus. Ut ergo intentio finis sit plena & efficax, ad deliberandum de mediis moveat necesse est; quia sine mediis finis obtineri nequit, nec proinde efficaciter intendi.

Dices: consilium & deliberatio sunt operationes intellectus: atqui operatio intellectus non potest esse effectus finis: ergo neque consilium, nec deliberatio.

Minor probatur. Finis ex dictis non movet, nisi per bonitatem: atqui bonitas non afficit, nec movet intellectum, utpote quæ non sit objectum intellectus, sed voluntatis.

Nego minorem, cujus confirmationem distinguo, bonitas non afficit, nec movet intellectum immediatè, Concedo: mediatè, hoc est, mediante imperio voluntatis, Nego minorem. Voluntas itaque delinita bonitate finis, excitat intellectum ad inquirenda media, quibus finem assequi possit, applicat, acuitque ad ponderanda quæ ex præcogitatis sint aptiora, & confutanda quæ à proposito eam avocare possent. Intellectus quippe sub imperio voluntatis se habet sicut famulus, qui noctu præferens facem ante dominum, non pergit, nisi quò & quà vult dominus, nec lucem admovet, nisi ubi ille præcipit.

Ergo sicut recta intentione, ita consilio veracitatur tota morum disciplina & bonitas; quia deficiente regula, nimirum sano & prudenti consilio

filio opus quod ad illam dirigitur ac efformatur, vitiosum exire oportet; scriptum quippe est Gen. 4. vers. 7. ut legunt sancti Augustinus & Gregorius juxta septuaginta Interpretes, *si rectè offeras, & non rectè divides, peccasti*, in quem locum sanctus Gregorius Lib. 30. Moral. cap. 14. sic habet: *Rectè non dividitur, si hoc quod piè agitur, etiam subtiliter non discernatur: oblata quippe dividere est quælibet bona studia nostra sollicitè discernendo pensare, quod nimirum qui agere dissimulat, etiam rectè offerens peccat, & nonnunquam hoc fit reatus criminis, quod putatur causa virtutis.* Hinc Spiritus sanctus Eccli. 37. hisce gravissimis verbis monet: *Ante omnia opera verbum verax præcedat te, & ante omnem actum consilium stabile.*

Verùm prudens illud ac stabile consilium non est expectandum à peccatoribus, utpote qui careant prudentia supernaturali, & sæpissimè naturali. Supernaturali quidem, cujus est actus humanos ordinare ad ultimum finem supernaturalem; quia cùm illa sit appendix charitatis, in qua radicatur, sicut cæteræ virtutes morales infusæ, pereunte charitate, pereat ipsa necesse est, regnetque prudentia carnis genuina cupiditatis soboles. Sæpissimè quoque naturali prudentia carere peccatores constans est Philosophorum doctrina; quia juxta tritum illorum effatum, unusquisque judicat secundum quod affectus est; malè autem affecti sunt peccatores erga ultimum finem, ac proinde inordinata eorum voluntas, quæ aliis facultatibus imperat, pervertit rationis judicium, & cogit mentem ad nutum suum cogitare & consulere; cogitare quippe à cogendo dictum vult S. Augustinus Lib. 10. Conf. capit. 11. Sic er-

go, inquit S. Bernardus, vel quivis Auctor Tractatus ad Fratres de Monte Dei cap. 16. *voluntas neglecta facit cogitationes otiosas & indignas Deo: corrupta perversas, quæ separant à Deo, pia efficaces ad fruendum Deo: Et nonnullis interjectis, pergit idem Auctor: In omni genere cogitationis, omnia quæcunque cogitanti occurrunt, conformantur intentioni voluntatis. Ideo homini Deum amare volenti, vel jam amanti, suus semper consulendus est animus, quid sit quod in totum vult & propter quod vult; quia scilicet ad votum voluntatis, si plena sit, mens præoccupata dabit consilium. Unde scriptum est Eccli. 8. v. 20. Cum fatuis consilium non habeas; non enim poterunt diligere, nisi quæ eis placent. Et Sap. 4. vers. 12. Fascinatio enim nugacitatis obscurat bona, & inconstantia concupiscentiæ transvertit sensum sine malitia. Hoc est, cupiditas rerum terrenarum, quæ à Sapiente dicuntur vanitas vanitatum, & à sancto Augustino, nugæ nugarum, mentem decipit, ac fascinat, ut peccati fœditatem, & virtutis pulchritudinem, vel non videat, vel non æstimet; & inconstantia, græcè, agitatio, & impetus cupiditatum ac passionum immutat & evertit sensum hominis, etiam qui alioqui innocens est & sine malitia. Ex quibus discant ipsimet justi tum suspendendum iudicium & consilium, cum pulsari se sentiunt motu iræ, odii, invidiæ, & cujuslibet inordinati affectus; periculum namque est ne concitatus spiritus sine discretionem aliquid decernat. Tolle autem discretionem, inquit S. Bernardus Serm. 49. in Cant. virtus vitium erit, ipsaque affectio naturalis in perturbationem magis convertetur, exterminiumque naturæ. Et Tractatu de Gradibus Humilitatis cap. 4. Amor, sicut & odium, veritatis iudicium nescit. Vis  
iudicium*

*judicium veritatis audire ? Sicut audio, judico (Joan. 5.) non sicut odi ; non sicut amo, non sicut timeo . . . . .*  
*A legibus humanis statutum ; speciales amicos causantium, (litigantium) non debere admitti ad judicium ; ne vel fallant, vel fallantur amore suorum. Quodd si culpam amici tuo judicio amor illius aut minuit, aut prorsus abscondit : quantò magis amor tui tuum contra te judicium fallit ?* Uti igitur in pendendis ponderibus æquantur læces, ne si examini sit aliqua inclinatio, judicium iniquum feratur ; ita qui deliberat (nisi se ipsum decipere velit) omnem privatum affectum seponere debet ; neque enim quid ipse velit, illud inquit ; sed quid efficacius sit, & magis expediat ad intentum finem consequendum, qui sanè non erit legitimus, nisi illum meliorem efficiat, ut patet ex dictis.

Quæ cùm ita sint, unicuique perspicuum esse debet, deliberationem in iis, quæ spectant mores, esse periculi plenam, ac veluti scopulum, quem humana ratio nunquam declinabit, nisi regatur Spiritu Christi, qui idcirco dicitur Consiliarius, magni consilii Angelus. Quin ipsemet Plato agnovit consultationem rem esse planè divinam.

Enimverò plures videas, qui deliberant, non quid ad salutem, sed quid ad præsens negotium expediat, satisque illis esse videtur, si omittant quæ mala sunt & contra salutem evidenter pugnantia, quasi verò beatitudo obveniat sine labore & industria, nihilque pro ea molientibus. Quàm paucos in sæculo reperiās, qui sint indeterminati, ac indifferentes circa matrimonium, vel Clericatum : circa Beneficium, aut officium in Republica : circa hanc aut illam artem : solūque



lūmque interrogent, *quid faciens vitam æternam possidebo?* ita ut cætera spectentur ab ipsis, ut mediantaxat, quæ ut quibusdam possunt esse utilia ad salutem, sic aliis non nisi impedimenta existunt, habita ratione ingenii, indolis, & aliarum dispositionum. Annon omnes, aut ferè omnes, ubi audierint aliquid horum ipsis non congruere, statim opponunt exempla eorum, qui iis in Republica necessariis strenuè & laudabiliter defuncti sunt? Tantumque abest, ut illa respuant uti æger medicamentum sanitati superfluum, vel etiam noxium; quin obstinatiùs illis adhærent, tanquam fini unicè intento, adeo ut tota illorum deliberatio in eo sit, quo modo, & qua via timorem damnationis æternæ probabiliter à se expellant, cœlestisque felicitas terminus sit terrenæ, ad quam omnia studia sua dirigunt. Hæc est prudentia sæculi, quam Apostolus mortem vocat, Rom. 8. quia charitatem extinguunt, ut cupiditas omnes actus humanos sibi vindicet tanquam proprios effectus.

Neque verò existimandum est eos, qui cum Propheta unam à Domino petunt, ac requirunt ex consilio veraci & stabili semper agere, nec unquam in suis deliberationibus decipi. Namque amor sui, quem iusti in hac mortali vita totaliter non exuunt, mentes eorum sæpe præoccupat, fallitque iustitia, & inconstantia concupiscentiæ ad agonem relictæ, transvertit eorum sensum sine malitia; denique Angelus Satanæ transfigurat se in Angelum lucis, ut sagittet in occulto rectos corde; eos enim ad peccatum, quod tantopere exhorrent, non traheret, nisi præcipiti, aut fallaci consilio. *Nec unquam bonus, nisi boni simulatione*



ne deceptus est, inquit S. Bernardus Serm. 66. in Cant. Hic est illud Proverb. 3. *ne innitaris prudentiæ tuæ*, nemo quippe in propria causa Judex. Et merito, inquit sanctus Bernardus Epist. 87. *quia qui se sibi magistrum constituit, stulto se discipulum subdit . . . . . Ego de me expertus sum quod dico; & facilius imperare, & securius possum præesse aliis multis, quam soli mihi.* Et Epist. 82. *Cunctis penè sapientibus contingere solet in rebus videlicet dubiis plus alieno se, quam proprio credere judicio; & qui aliorum facile ambigua quæque elucidant, in suis consueverunt scrupulosius hæsitare.*

Ergo consilium verax & stabile quærendum à sapiente, ad illius judicium morales Philosophi & Theologi singularia referunt; & ratio est, quia cum in aliorum causa omnino liber sit à privatis illis affectibus, qui nos aut fluctuantes reddunt, aut præoccupatos præcipitant, serena & tranquilla mente decernere potest, quid magis expediat, modò tamen notam ipsi faciamus sinceram & candidam nostram mentem, scilicet nos verisimilia non inquirere, sed vera: non blanda & quæ cupiditati faveant, expetere; sed quæ utiliora, & saluti viciniora. Timor enim displicendi & excidendi ab amicitia aut honorifica existimatione, præsertim nobilium, gravissima est tentatio, quæ plerumque conturbat sapientes, & vehementer impellit ad adulatoria consilia, quod Deus testatur Ezech. 14. v. 9. *se permittere in pœnam interrogantis: Propheta cum erraverit, & locutus fuerit verbum: Ego Dominus decepi Prophetam illum.* Et vers. 10. *Juxta iniquitatem interrogantis, sic iniquitas Prophetæ erit.* Sic deceptus est Achab Lib. 3. Reg. cap. 22.

Quartus finis effectus est consensus, qui describi potest, actus voluntariè adhærentis consilio rationis & acceptantis media ab intellectu proposita. Quando ratio consilium dat ex imperio voluntatis, naturaliter placet consilium, & facillè voluntas consentit iis, quæ ratio proponit; quia consentanea sunt ejus inclinationi. Sed si consilium suggeratur exterius, putà à sapiente, voluntas nonnunquam repugnat, momenta opponit contra, & consilium datur incassum, nisi cordis duritia auferatur à Deo interius voluntatem præparante & inclinante per gratiam suam.

## §. IV.

*De quinto & sexto Effectu Finis.*

**E**lectio numeratur quintus finis effectus, describiturque actus liber voluntatis, quo ex pluribus mediis idoneis & placentibus, per consensum unum cæteris præfert in ordine ad finem intentum. Ergo electio versatur circa media.

Dices 1. electio pertinet ad intellectum, cum ipse sit judicare unum alteri præferendum. Ergo non est actus voluntatis.

Nego antecedens. Potest enim esse mentis judicium sine electione, juxta illud Poetæ, *video meliora proboque, deteriora sequor*. Electio itaque formaliter est acceptatio medii, quod mens judicat magis conducere ad finem. Unde Ethicorum 3. dicitur appetitus intellectivus.

Dices 2. Electio nonnunquam est actus necessarius, quando nimirum unicum suppetit medium. Ergo malè dicitur actus liber.

Distin-

Distinguo antecedens. Est actus necessarius in allata hypothesi, necessitate finis, Concedo: necessarius formaliter & in exercitio, Nego anteced. Electio, sive assumptio cibi, v. g. sine quo vita animalis conservari nequit, est necessaria quidem cupienti conservare vitam animalem, sed formaliter & in exercitio est libera; quia sicut potest quis nolle finem, nempe diuturniorem vitam, potest etiam nolle sumere cibum. Ergo liberè Pilatus damnavit Christum Dominum, & reus liberè pejerat, ac proinde neuter à gravi peccato excusandus, quamvis neuter alio modo potuerit vitare ille indignationem Cæsaris, iste mortem; quia uterque finis est liberè intentus, ac proinde liberè eligitur medium unicum ad illum conducens. Fatendum tamen est, quòd ubi unicum est medium, electio non distinguatur à consensu, & minùs propriè dicatur electio.

Dices 3. potest quis deliberare an finem suum constituat in Deo, an in voluptatibus, aut mundi honoribus, ergo electio æquè potest esse de fine ac de mediis.

Nego consequentiam; Quia deliberatio illa (quæ fieri nequit sine gravissimo peccato, cum in ea Deus & creatura ponantur in quodam æquilibrio) non est de fine, sed de mediis. Finis enim qui intenditur in ejusmodi deliberatione, est beatitudo in communi, & perfecta quies deliberantis: medium verò quo possit illum acquirere, est vel Deus, vel bona temporalia. Unde eadem res potest esse finis & medium sub diverso respectu: est finis, cum propter se amatur: est verò medium, cum amatur propter aliud. *Sunt perversi*, inquit sanctus Augustinus Lib. II. de Civitate

Dei, capite 25. *qui frui volunt nummo, uti autem Deo, quoniam non propter Deum nummum impendunt, sed Deum propter nummum colunt.*

Q. 1. *Quid requiritur, ut electio sit recta & honesta?*

R. Generatim debet prudenter fieri; quod enim fit imprudenter, malum est & peccatum; prudentia quippe definitur, habitus recta cum ratione activus, vel recta ratio agibilium: ergo quod fit contra prudentiam, illud fit contra rectam rationem. Porro quod fit contra rectam rationem, malum est & peccatum.

Q. 2. *Quandonam electio censetur prudenter fieri?*

R. Quando eligitur quod efficacius est, & rectius conducens ad debitum finem consequendum. Et ratio est; quia recta electio est fructus ad quem tendit deliberatio; in deliberatione enim prudentia, quæ consiliativa dicitur à sancto Thoma post Aristotelem, inquit media ad finem, & ex iis excogitatis judicat unum præ cæteris eligendum, utpote magis aptum: ergo si voluntas aliud minus idoneum eligat, agit contra prudentiam & rectam rationem.

Confirmatur 1. quibusdam familiaribus exemplis. Proponitur viatori duplex via, qua possit ad patriam, quò tendit, pervenire: altera est brevior, facilior, & securior: altera longior, salebrofa & multis periculis obnoxia. Item Advocato duæ rationes suppetunt evincendi adversarium, altera rem brevi & ferè sine expensis conficiat; altera non nisi longo processu & magnis expensis. In utroque illo exemplo viator & Advocatus, vel alium finem præter eum quem præseferunt, ille patriam, iste justitiam non intendunt, vel alium intendunt: si non intendunt & nihilominus me-  
dium



dium minùs idoneum eligant , non solùm imprudentiæ , sed & stultitiæ notam non effugient : si alium intendant , quod verisimilius est , viator fortè vult invisere amicum , Advocatus lucri cupidus expetit pinguius honorarium , in qua hypothese perspicuum est amorem , sive patriæ , sive justitiæ , non esse causam hujusce electionis , sed privatum finem quem insinuavimus. Idem dixeris de eo , qui profitetur se in omnibus gloriam Dei , & vitam æternam intendere , cùm tamen omissis mediis aptioribus , alia eligit , non quidem inepta , sed minùs idonea , & minùs secunda ; procul dubio amor Dei & desiderium cœlestis patriæ non movet illum ad ejusmodi electionem , sed sub obtentu gloriæ Dei obumbrat negotium cupiditatis , qua incitatur ad præferendum minùs idoneum.

Confirmatur 2. eligere quod est minùs aptum rejecto aptiori , ad consequendum finem honestum , non est actus virtutis : Ergo nec prudentiæ , quæ & ipsa est virtus , & sine qua nulla est vera virtus.

Probatur ant. virtus definitur habitus electivus secundùm rectam rationem : atqui recta ratio non judicat præferendum medium minùs aptum : Ergo.

Nec dicas prudentiam & rectam rationem non consulere quidem ejusmodi electionem , sed eam non prohibere ; nam ex S. Thoma 2. 2. q. 47. art. 8. ex communi Philosophorum Schola , prudentia non solùm est consiliativa , sed etiam præceptiva. *Et quia* , inquit , *iste actus est propinquior finis rationis practicæ* (quod est bonum opus) *inde est quod iste est principalis actus rationis . . . . .* & per



*consequens prudentiæ. Et hujus signum est, quod perfectio artis consistit in judicando, non autem in præcipiendo; ideo reputatur melior artifex, qui volens peccat in arte, quasi habens rectum judicium, quam qui peccat nolens, quod videtur esse ex defectu judicii; sed imprudentia est è converso . . . imprudentior enim est, qui volens peccat, quasi deficiens in principali actu prudentiæ, qui est præcipere, quam qui peccat nolens. Unde articulo 13. concludit veram prudentiam non esse in peccatoribus; quia licet de agendis aliquando benè consulant & judicent, deficiunt in principali actu prudentiæ, qui est efficaciter præcipere.*

Dices 1. Consilia Evangelica sunt de meliori bono & aptiora ad salutem: atqui non peccat contra prudentiam, qui ea non eligit: ergo prudentia non præcipit, ut eligatur medium magis idoneum,

Distinguo maj. Sunt aptiora absolutè, & in se spectata, Concedo: respectivè, & per ordinem ad omnes & singulos homines, Nego major. Namque ex Apostolo 1. Cor. 7. *melius est . . . nubere quam uri.*

Distinguo etiam minor. Non peccat contra prudentiam, qui ea non eligit in quibusdam circumstantiis, Conc. in quibuscumque circumstantiis, Neg. min. Itaque unusquisque proprium donum habet ex Deo, inquit Apostolus, cap. 7. alius quidem sic: alius verò sic: prudentis est primò per consilium inquirere ad quid sit à Deo institutus, deinde eligere ad quod vocatur; alioquin si mundi concupiscentiis attractus vocationi suæ non respondeat, contra prudentiam & rectam rationem graviter peccat.

Dices

Dices 2. ex communi Theologorum sententia, satis est juxta prudentiæ leges amplecti viam tutam, relicta tutiore : Ergo.

Dist. ant. Satis est aliquando, C. Semper, N. ant. Sicut igitur contra prudentiam aliquando peccatur per defectum ; putà per negligentiam ; ita & per excessum, nempe per nimiam sollicitudinem, timorem inutilem & scrupulosam anxietatem : scrupulosus v. g. timet, ne quas passus est inter orandum mentis evagationes, voluntariæ fuerint ; securiusque sibi fore decernit, si orationem repetat : prudentia ejusmodi anxietatem improbat, nec judicat in iis circumstantiis securius esse eligendum, sed per Apostolum Rom. 12. dicit, *rationabile obsequium vestrum* ; & per Regium Prophetam, Psalm. 15. *trepidaverunt . . . . . ubi non erat timor*. Aliquando verò prudentia & recta ratio per eundem Apostolum, 1. Cor. 6. clamat, *omnia . . . licent, sed non omnia expediunt*. Joannes Baptista non præcepit publicanis & militibus ad se venientibus, Luc. 1. ut officia sua dimitterent ; sunt enim licita & tuta, si in se spectentur ; sed respectivè ad aliquos sunt occasiones peccandi ferè proximæ, proindeque prudentia & recta ratio iis consulit præcipitque, ut viam tutiorem eligant. Quare, ubi de salute animæ agitur, multi cupiditate excæcati in suam perniciem abutuntur receptis, iisque verissimis Theologorum sententiis, *liberum est amplecti consilia Evangelica*. Item, *licet sequi opinionem tutam, relicta tutiore* ; quia cùm non attendant quid sibi expediat, corruunt & damnantur in via tuta : cùm contra stetissent & salvati fuissent in tutiore.

Dixi, *ubi agitur de salute animæ*; namque prudentiores sunt filii sæculi in iis, quæ spectant corporis salutem; nec profiterentur artem, v.g. refarciendi tecta domorum; eo prætextu, quod ars illa sit licita, Reipublicæ utilis, sitque necessarium, ut aliqui eam profiteantur, nisi prius expendissent, num caput sit illis satis firmum, ut vertiginem timere non debeant. Ad prudentiam quippe pertinet, inquit S. Thomas 2. 2. qu. 47. art. 3. spectare non solum rationes universales, sed etiam singulares, in quibus est operatio.

Sextus finis effectus dicitur imperium, estque actus practicus intellectus imperantis usum mediorum, quæ post habitam deliberationem electa sunt tanquam ad finem magis idonea. Plerumque enim contingit voluntatem non exequi ea, quæ elegerat, & observanda proposuerat, propter nascentes difficultates, tum ex parte passionum, quæ rebellant; tum ex circumstantiis, quæ in deliberatione & electione non fuerant prævisæ: tum ex parte ipsiusmet voluntatis, quæ inconstans est, quæque remisit ex pristino intentionis fervore, & ita evanescente causalitate seu motione finis, omnes supra numerati effectus inutilis abeunt, & operans quasi in media subsistit via, nisi recta ratio præcipiat, & prudentia stimulis conscientiae voluntatem impellat. Quare S. Thomas, & omnes Philosophi communiter inter partes prudentiæ numerant memoriam, sollicitudinem, sive vigilantiam; rationem, circumspeditionem, & cautionem contra totidem defectus prudentiæ oppositos, scilicet oblivionem, negligentiam, inconsiderationem & inconstantiam.

Dices:

Dices : imperium pertinet ad voluntatem. Ergo non est actus intellectus.

Dist. ant. cum S. Thoma cit. q. 47. art. 8. ad 3. imperium absolute & simpliciter pertinet ad voluntatem, & secundum quid ad intellectum, Conc. pertinet ad voluntatem, & nullatenus ad intellectum, Nego ant. namque recta ratio voluntatem movet, eamque ordinat tanquam regula, cui debet conformari. Sed voluntas simpliciter movet intellectum, eique absolute imperat opus, v. g. meditationem.

## §. V.

*De septimo & octavo Finis Effectu.*

**U**sus septimus finis effectus dupliciter sumitur, scilicet active & passive. Active sumptus, est actus elicitus voluntatis applicantis seipsam & alias potentias ad exequenda media prædicta, ut volitio dandi eleemosynam aut jejunandi. Passive verò spectatus, est ipsa executio, v. g. largitio eleemosynæ aut jejunium.

Fruitio est quies in fine possessio, ultimus effectus causæ finalis, ac veluti fructus operantis; ad fruitionem quippe usus terminatur, sicut motus ad quietem, desiderium & animi contentio ad rei concupitæ possessionem.

Ergo usus est circa media, fruitio verò circa finem. *Ea re dicimur frui*, inquit S. Aug. L. II. de Civ. Dei c. 25. *quæ nos, non ad aliud referenda, per seipsum delectat; uti verò ea re, quam propter aliud querimus. Unde temporalibus magis utendum est, quam fruendum, ut frui mereamur æternis.*



Ergo quies, quæ intelligitur nomine fruitio-  
nis, propriè non est cessatio operationis, sed gau-  
dium & delectatio, ac proinde vitalis actus vo-  
luntatis suaviter quiescentis in possessione boni  
amati. *Fruimur*, inquit S. Augustinus, Lib. 10.  
de Trin. c. 10. *rebus cognitis, in quibus voluntas dele-*  
*ctata conquiescit.*

Q. 1. *Quid est illa finis possessio, ex qua oritur dele-*  
*ctatio & quies?*

R. Est operatio naturæ conveniens: sic per  
cognitionem & amorem possidetur sapientia; per  
visionem oculorum possidentur lux & colorata,  
per auditionem sonora; per gustum sapida; hinc  
langueute operatione, putà, gustu, tactu, minui-  
tur delectatio, cessante verò evanescit omninò.

Q. 2. *Qualis debet esse operatio, ut pariat delectatio-*  
*nem & quietem?*

R. Debet esse 1. connaturalis seu conveniens  
& perfectiva, 2. perfecta & non impedita; alio-  
qui si sit nociva & violenta, v. g. si lædat tempe-  
ramentum, ut nimia potatio, dolorem parit: si  
sit imperfecta & impedita, si v. g. imperfectè au-  
diatur egregius Orator aut Cantor, tædium af-  
fert.

Q. 3. *Quot requiruntur, ut operatio sit perfecta &*  
*causa delectationis?*

R. Tria. Primum est excellentia & bonitas  
objecti; objectum enim excellentius, est magis  
perfectivum, redditque operationem meliorem  
& magis convenientem; ac proinde magis dele-  
ctabilem. Secundum est modus tendendi in ob-  
jectum seu in rem amatam; nam si sit intensus &  
vehemens, operatio erit perfectior & delectatio  
major, ut patet in famelicis, qui avidè cibum ca-  
piunt:



piunt: contra verò, si modus agendi sit remissus & frigidus, si verbi gratia nulla sit ferè cibi appetitio, delectatio erit mediocris, vel etiam nulla. Hinc oratio fervens, est causa delectationis, languida verò fastidii, denique quotquot tepide & negligenter agunt, ex suis operationibus voluptatem non capiunt, sed tædium. Ob eandem rationem delectationes, quæ sensu percipiuntur, diuturnæ esse nequeunt; quia sensatio, quæ initio erat vehemens, paulatim languescit. Tertium, est nobilitas potentiæ; quò enim potentia est nobilior, cæteris paribus, operatio ejus est melior & magis perfectiva, ac proinde magis appetibilis & delectabilis, visio v. g. est operatio olfactione perfectior, ideoque delectabilior; quia facultas visiva, ex qua procedit visio, est olfactiva nobilior.

Dices: ex S. Thoma 1. 2. q. 31. art. 6. delectationes, quæ sensu, præsertim tactu percipiuntur, sunt omnium maximæ: atqui operationes, ex quibus nascuntur, sunt omnium imperfectissimæ: Ergo delectatio non semper respondet perfectioni operationis.

Distinguo majorem, in statu naturæ corruptæ & inordinatæ, in quo animales & ignobiles illæ operationes sunt omnium vehementissimæ, & quidem in dedecus creaturæ rationalis, unde ex eis homo naturaliter erubescit, Concedo: in statu naturæ integræ & ordinatæ, Nego majorem; natura enim rationalis recta & integra non inclinatur ad operationes sensuum, nisi propter operationes mentis, quibus subvenire debent tanquam instrumenta. Quod autem propter aliud appetitur, minùs appetitur, quam quod propter se intenditur;

tur; ac proinde, cum natura rationalis ex primæva sua institutione non feratur in operationes facultatum inferiorum, nisi quatenus juvant operationes superiorum, scilicet intellectus & voluntatis, iis non fruitur nec delectatur, sed utitur duntaxat ad quiescendum in operationibus spiritualibus, ad quas tendit tanquam ad proprium bonum & ultimam perfectionem. Vehemens ergo & effrænis ille impetus, quem nunc habet ad bona sensibilia, ac præsertim carnalia, & delectationes inde consequentes pœna peccati est, & signum immanis corruptionis; rationes enim iudicium impediunt ac pervertunt, nedum illud juvant. Annon ex morbo est quod prægnantes in cibum appetant, & ad delicias utantur iis, quæ sanis nauseam, & horrorem excitant? Quis pruritum libidinis minus malum æstimet, quàm pruritum scabiei, quo qui laborat liberari fatagit, contempta voluptate, quam scalpendo percipit? Itaque ejusmodi delectationes naturales non sunt, sed ægritudines, & meræ deceptiones; *risum reputavi errorem*, ait Sapiens Eccl. 2. & *gaudio dixi, quid frustra deciperis?*

Addere liceat, quia verissimum est, delectationes sensuum non posse dici summas absolutè; 1. quia operationes, ex quibus exurgunt, non delectant, nisi in quadam mediocritate consistant; intensior enim operatio lædit temperamentum, & dolorem parit, juxta illud Prov. 14. *Risus dolore miscebitur, & extrema gaudii luctus occupat.* 2. Delectationes corporeæ, cum motum consequantur, stillatim fluunt, sitim non extinguunt, sed provocant; cibos v.g. voluptate non afficit, nisi in transitu, & voluptuosus ita delectatur ea parte quam

quam gustat, ut desideret frui eo quod sumendum superest: sic qui delectabiliter audit elegantem orationem, non vult stare syllabam, ut in ea quiescat, sed citò transvolare appetit, ut aliæ veniant, cùmque & gulofus ad satietatem pervenit, & auditor longa attentione fatigatus est, delectatio veluti somnium evanescit.

At in delectationibus spiritualibus nullus ex iis defectibus occurrit: 1. enim totæ simul haberi possunt; cùm operationes, ex quibus pendent, successivæ non sint. 2. Mediocritas in illis non requiritur; quia operationes spirituales, quarum sunt fructus, quo intensiores sunt, eo magis animam perficiunt. Verum quidem est, quòd quamdiu mortalem vitam vivimus, operationes spirituales plerumque sunt magis remissæ, quàm corporeæ, ac propterea minùs delectant: sed ille defectus oritur, ut jam diximus, ex corruptione naturæ, cui, ut paulatim reparetur per gratiam Mediatoris, spiritualia & Deus ipse fiunt in dies præsentiora, eamque tam vehementer & suaviter ad se rapiunt, ut in illo raptu & extasi aliud sapere non possit, *intromittis me*, inquebat S. Augustinus Lib. 10. Confess. c. 40. *in affectum multum inusitatum introrsus, ad nescio quam dulcedinem, quæ si perficiatur in me, nescio quid erit, quod vita ista non erit.*

Dices 2. actus virtutum sunt media ad ultimum finem: atqui justus prudenter & rationabiliter fruitur ac delectatur ejusmodi actibus: Ergo fruitio æquè est mediorum ac finis.

Distinguo maj. Sunt media simul & fines, Concedo: sunt media pura: Nego maj.

Distinguo similiter conseq. Fruitio est mediorum, quæ habent etiam rationem finis, Conc. est medio-

mediorum , quæ prudenter & rationabiliter finis esse nequeunt, Nego conseq.

Medium itaque duplex, scilicet purum & non purum. Purum dicitur , quod ita necessarium aut utile est ad finem consequendum , ut propter se nullatenus sit appetibile , ut pharmacum : non purum verò quod & propter se appetibile est, sub quo respectu est finis , & ulterius conducit ad nobiliorem finem assequendum & eatenus habet rationem medii. Porro actus virtutum sunt media non pura ; quia sunt propter se expetibiles ; & simul inserviunt ad obtinendum ultimum finem. Sed ista paulò latius sunt explicanda ; plurimi enim refert ad mores nosse quid liceat amplecti ut medium non purum , & ita eo frui & delectari, quidve ut purum medium , quo solum utendum sit. Nam ex S. Augustino L. 10. de Trin. cap. 10. *non est alia vita hominis vitiosa atque culpabilis , quam malè utens & malè fruens.* Et L. 1. de Doctrina Christiana c. 3. & 4. *Frui autem, inquit, est amore inhærere alicui rei propter seipsam : uti autem quod in usum venerit , ad id quod amas , obtinendum referre , si tamen amandum est.* Nam usus illicitus abusus potiùs, vel abusio nominanda est. Itaque

Q. 4. *Quid in moralibus spectari debet vel ut purum medium nullatenus propter se amabile , sed notabiliter ad aliud referibile ; vel ut medium non purum, hoc est, simul propter se amabile , & ad aliud insuper referendum , vel denique ut purus finis propter se expetibilis , & nullo modo ad aliud referibilis ?*

R. 1. Illud spectari debet ut purum medium , quod naturam rationalem nec perficere, nec meliorem reddere potest. Responsio necessariò sequitur ex dictis ; eatenus quippe rem aliquam appetere



petere licet, quatenus nobis est bona; quia malum velle nefas est: atqui quod naturam rationalem nec perficere, nec meliorem reddere potest, illud secundum se spectatum non est nobis bonum, quo frui & delectari liceat: ergo spectari debet ut purum medium ad illud referendum: sive ut utile, sive ut necessarium.

Ergo temporalia, quantumcunque sensibus delectabilia, ut fama, honor, rerum abundantia, quibus non utimur sine sensu voluptatis, sunt pura media, quibus duntaxat uti licet, nullatenus frui; quia naturam rationalem nec perficiunt nec meliorem reddunt, imò amor illorum, qui dicitur cupiditas, inficit & corrumpit. *Quid intersit*, ait sanctus Augustinus Lib. 2. de Serm. Domini in monte, cap. 24. *inter bonum quod appetendum est, & necessarium quod sumendum est, hac sua sententia declaravit; Quærite primum regnum Dei & justitiam ejus, & hæc omnia adjicientur vobis. Regnum ergo Dei justitia Dei bonum necessarium est: & hoc appetendum, & ibi finis constituendus.* Cætera adjicientur, nempe fama, honores, rerum sufficientia operanti ex charitate, etiamsi ea non intendat, imo etiamsi ea à cogitatione sua repellat, ne fiat transgressor primarii illius præcepti, *non concupisces*. Unde pergit S. Doctor c. 25. *non dicit, deinde ista quærite, quamvis necessaria . . . ne cum ista quæritis, illinc avertamini, aut ne duos fines constituatis, ut & regnum Dei propter se appetatis, & ista necessaria, sed hæc potius propter illud . . . Ergo simplici corde tantummodo propter regnum Dei debemus operari bonum ad omnes, non autem in hac operatione, vel solam, vel cum regno Dei mercedem temporalem cogitare.* Et L. 1. de Doctr. Christ. c. 4. hancce Catholicam Doctrinam, & in Scholis Philosopho-



losophorum celebrem illustrat egregia similitudine ad captum lectorum accommodata: *Quomodo ergo, inquit, si essemus peregrini, eaque peregrinatione, utique miseri, opus esset vel terrestribus, vel marinis vehiculis, quibus utendum esset, ut ad patriam, qua fruendum erat, pervenire valeremus; Quod si amœnitates itineris, & ipsa gestatio vehiculorum nos delectaret, conversi ad fruendum his, quibus uti debuimus, nollemus citò viam finire, & perversa suavitare implicati alienaremur à patria, cujus suavitas faceret beatos: Sic in hujus mortalitatis vita peregrinantes à Domino, si redire in patriam volumus, ubi beati esse possimus, utendum est hoc modo (ut vehiculis necessariis) non fruendum . . . . . ut de corporalibus temporalibusque rebus æterna & spiritalia capiamus.*

Abusus est ergo non usus, ac proinde peccatum, delectari prælationis honore, & nominis celebritate, quia turpis vanitas est: rei alterius amore, quàm vitæ æternæ, lucrum intendere, quia turpis cupiditas est: actibus naturalis appetitus frui, quia turpis voluptas est. *Tu voluptate frueris, ego utor:* inquebat ipse Seneca Epicurum insectans, L. 16. de Vita beata, c. 88. & S. Augustinus L. 10. Conf. c. 31. *his temptationibus quotidie conor resistere & invoco dexteram tuam ad salutem meam.* Denique in sancti Doctoris sententia, aliud hominis peccatum non est, quàm frui utendis, & uti fruendis, ac proinde circa intentionem finis, & quotidianum rerum usum maximè vigilare debet Christiana pietas.

R. 2. Actus Christianæ virtutis sunt media non pura, quibus frui simul & uti licet tanquam fine & mediis.

Proba-

Probatur. Illud habet rationem finis & medii quod naturam rationalem perficit, melioremque reddit, ac insuper inservit ad acquirendum summum bonum & ultimum finem: atqui ejusmodi sunt actus Christianæ virtutis: Ergo. Major constat ex dictis.

Minor quoad posteriorem partem, nempe actus Christianæ virtutis esse media ad acquirendum ultimum finem, est de fide, Matth. 19. *Si vis ad vitam ingredi, serva mandata.* 2. Tim. 4. *Apposita est mihi corona justitiæ, quam reddet mihi Dominus in illa die justus Judex, non solum autem mihi, sed & iis, qui diligunt adventum ejus.*

Quoad priorem verò partem, nimirum quòd ejusmodi actus habeant rationem finis propter se expetibilis, cujus possessione frui & delectari licet.

Probatur 1. ex Scriptura, Psal. 18. *Mandata Dei dicuntur, desiderabilia super aurum & lapidem pretiosum multum, & dulciora super mel & favum.* Psalm. 118. *Quomodo dilexi Legem tuam, Domine, tota die meditatio mea est.* Sap. 6. v. 19. *Custoditio autem Legum consummatio incorruptionis est.*

Probatur 2. ratione. Quod perficit naturam rationalem, melioremque reddit, illud est propter se expetendum, & eo obtento frui licet ac delectari; omnia enim appetunt suam perfectionem, & in ejus possessione quiescunt: atqui actus veræ virtutis perficiunt naturam rationalem, melioremque efficiunt: virtus à Philosophis definitur, habitus laudabilis, qui facit simpliciter bonum habentem se. Vide, quæ in hanc rem diximus suprà cap. 2. Porro delectatio est fructus operationis perfectæ, charitas ex sancto Augusti-

no in Psalm. 76. sine gaudio esse non potest. Gaudes de auro tuo, de cuppa tua plena, & non gaudes Deo plenus? Fructus Spiritus per quem diffunditur charitas in cordibus nostris sunt gaudium, pax, Gal. 5. v. 22. Hanc cordis lætitiā nulla amaritudo turbat, *repletus sum consolatione*, in-  
 quiebat Apostolus 2. Cor. 7. v. 4. *Superabundo gaudio in omni tribulatione nostra*. Denique Deus, qui non mentitur, beatos dicit cultores justitiæ, *beati immaculati in via, qui ambulant in Lege Domini*, Psal. 118. Verum quia opus justitiæ in hac vita non potest esse undequaque perfectum, justus in eo plenè non quiescit, sed ultimam suam perfectionem eò ardentius appetit, & bonis actibus promereri sollicitus fatagit, quò ad eam propius accedit, & hac ratione virtutis operibus tanquam mediis rectè utitur.

Ergo carnales & superbi Philosophi, ut Stoici, malè de virtute sentiunt.

Ac primò quidem carnales, qui solo damnationis timore adaçti utuntur operibus virtutis tanquam puris mediis per se ingratis, non secùs ac æger injucundis remediis ad morbum expellendum, eodemque planè modo animas vulneribus peccatorum faucias tradunt Confessario curandas, quo ille corpus sanandum committit Medico. Nempe cum Confessario disceptant, ne plura bona opera, quàm necessaria ad salutem injungat, eumque præferendum judicant, qui paucioribus & facilioribus remediis veniam peccatorum & vitam æternam pollicetur: iis autem non hilariter, sed patienter obtemperant; quia non amore virtutis, sed ex necessitate finis injuncta perficiunt. Enimverò juxta S. Thomam illud interest  
 finem

finem inter & pura media, quòd finis utpote bonum per se amabile, absque modo & mensura appetatur, desideriumque illius sit illimitatum & quodammodo infinitum: contra verò in mediis mediocritas semper requiratur, adeo ut illud eis superfluum & inutile reputetur, rejiciaturque, sine quo finis obtineri potest. Æger v. g. vult sanitatem absque limitatione, nec unquam contendit cum Medico, ne plus sanitatis procuret, sed ne remedia sine necessitate multiplicet. Sic se habent corda carnalium, voluptati & cupiditati eorum nunquam satis; quia finem in ea constituunt, & ad illam tendunt, ut ad bonum per se expetibile, & aliò non referibile: hoc unum timeant à Confessario, ne quid ex ea minuat, & plura bona opera imponat, quàm absolutè necessaria sint ad remissionem peccatorum, & vitam æternam obtinendam, nec advertunt miseri se cum illa voluntate (quæ sanè mala est, cum non amet quod amandum & naturæ rationali consentaneum) non posse unquam esse beatos. Quid enim est æterna felicitas nisi gaudium de veritate, de Deo totius justitiæ fonte? nisi ergo delectet eos justitia, & mutetur perversa eorum voluntas, miseri essent in patria, in qua unus est actus, nempe frui Deo, qui est veritas, charitas, & omnis virtus: mala autem voluntas non mutabitur post mortem; quia ubi ceciderit lignum, ibi in æternum erit: ante mortem ergo mutetur necesse est, alioquin ipsis claudetur janua Regni cœlestis.

Secundò, malè etiam sentiunt de virtute superbi Philosophi, ut Stoici, qui ita dicunt, frui mea virtute mihi bonum est, ut ad illud nempe ad



Deum, utpote summum bonum eam non referant, sed ea in seipsis fruantur & quiescant, cum veræ virtutis officium sit nos unire Deo totius justitiæ fonti, à quo, & in quo est nostra perfectio, & omnimoda requies. Quare si virtus à Deo sejungatur, idem planè est, ac si separetur radius à suo Sole, rivulus à suo fonte, & ramus à sua radice, *si quis in me non manserit*, ait vera vitis Joan. 15. *mittetur foras sicut palmes, & arefcet, & colligent eum, & in ignem mittent.*

### COROLLARIUM.

Quæ de effectibus finis hætenus diximus, certa sunt, non solum apud Theologos, sed etiam apud Philosophos; nam S. Thomas quem in hac materia Magistrum secuti sumus, suam doctrinam ex Aristotele ubique confirmat, ut cuilibet perspicuum sit se peccare contra lumen rationis simul & fidei, si alicubi à præscriptis morum regulis deflectat.

Accuratiùs autem de iis differendum fuit, quia sunt prima morum rudimenta, ac veluti elementa, ex quibus laudabiles actus humani quodammodo componuntur, & in quæ ultimo resolvi debent; nulla quippe est bona actio, nisi fiat ex amore finis honesti, & boni perfectivi: ex recta intentione, eaque efficaci; ex prudenti consilio & electione, dirigaturque in rerum usu & fruitione juxta regulas præmissas. Qui ergo voluerit actus suos ad examen revocare, & de iis verum judicium ferre, ut solent virtutis studiosi, discurrat necesse est per singulos finis effectus, expendatque ex quo amore processerint: quæ fuerit



rit ejus intentio , an simplex , aut duplex : quæ deliberatio & electio : quis usus & quæ fruitio , seu delectatio ; alioquin externa boni species fallit : multa quippe ad oculum videntur recta , quæ regulis applicata reperiuntur distorta : *Et nonnumquam hoc fit reatus criminis , quod putatur causa virtutis* , inquiebat supra S. Gregorius.

Dixi ea , quæ spectant finis effectus , esse prima laudabilium morum rudimenta , ac veluti elementa , ex quibus actus humani componuntur , & in quæ ultimò resolvi debent , ut quivis intelligat neminem posse absque eorum perfecta notitia , & familiari usu , rectè vivendi artem tenere. Enimverò ut quis in qualibet arte peritus evadat , eum prima tyrocinia ponere oportet : in grammatica v. g. litterarum notas primo distinguere , deinde in syllabas & dictiones conjungere : in pictura similiter umbratiles lineas ducere , situm & proportionem , quam habent inter se membra corporis delineandi observare : ac denique ita scitè colores miscere , ut visum fallat imago , videaturque partim è summa tabella exilire , partim in ima jacere : alioquin frustra & incassum Ludimagister discipulis horum ignaris imitandam proponet egregiam orationem , aut absolutum Archetypum. Eodem ferè modò se habent Pastores , qui in panegyricis Orationibus ad sequenda Sanctorum exempla hortantur plebem , quam nondum imbuerunt rudioribus hisce prudentiæ præceptis , ex quibus , nec aliàs exurgit actus moraliter bonus.

Nec dicas , hujusmodi rudimenta difficiliora esse ac sublimiora , quam ut vulgus Christianorum ea capere possit. Namque i. ars bene vi-

vendi est omnium nobilissima , ac planè divina , nec quisquam sine gratia Christi eam assequitur. Ipse Aristoteles , & alii Philosophi , qui inflatis buccis , ut loquitur S. Augustinus , regulas à nobis hìc expositas , aliis eruditè tradiderunt , eas in praxi secuti non sunt ; & quamvis multa ab eis præclare ac veluti heroicè gesta legamus ; tamen si discutiatur quo fine facta fuerint , vix reperiuntur , quæ juxta regulas ab ipsis præscriptas , veram virtutis laudem mereantur , ut observat idem S. Augustinus Lib. de Spir. & Litt. cap. 27. Vide quæ in hanc rem diximus Tom. 2. Tract. de Gratia Christi. 2. Cùm naturale sit homini rationaliter vivere , & omnes sint à Deo instituti ad virtutem excolendam , repugnat aliquem esse ita rudem , ut incapax sit artis benè vivendi. Esto nonnulli reperiuntur tam stolidi & stupidi , ut alias quasdam artes edoceri nequeant ; quia natura eorum ad alias non est à Deo efformata ; sed cùm in unoquoque ad virtutem sit ordinata , nullus est qui ad eam institui , & in arte bene vivendi excellere non possit , si ad Deum , à quo est sapientia , & omne donum perfectum , suppliciter recurrat , ac proinde quòd quis in hac arte peccet , negligentia illius est tribuendum. 3. Nullus est actus verè bonus , quin sit conformis regulis hìc præscriptis : Ergo omnes suo modo illas tenere debent ; alii quidem , ut vulgus Christianorum , saltem confuse & imperfectè : alii , nimirum Pastores , utpotè insipientium Magistri , distinctè & perfectè , quòd possint discipulorum actus ad normam virtutis expendere , defectus advertere , & corrigere. Ex quibus patet illos Pastores graviter hallucinari , qui sibi satis esse putant , si plebs

*cura*

curæ suæ commissa memoriter teneat rudimenta fidei, prout infantibus tradi solent; cum præcipuum illorum opus sit majoribus tradere regulas rectè vivendi, & instare juxta Apostolum opportunè & importunè, ut ad illos opera sua dirigant. Quàm autem assiduus esse debeat bonus Pastor in hocce docendi munere, Deus ipse per Prophetam declarat Isaïæ 58. ubi sic præcipit: *Clama ne cesses.* Et Patres Tridentini Sess. 5. cap. 2. de reformat. *diebus saltem Dominicis & Festis solemnibus plebes sibi commissas pro sua & earum capacitate pascant salutaribus verbis, docendo . . . vitia, quæ eas declinare, & virtutes, quas sectari oporteat, ut pœnam æternam evadere, & cœlestem gloriam consequi valeant.* Dicendo, saltem, hoc est, ad minimum, innuunt omninò expetendum, ut id fiat frequentius, si possit. Unde S. Augustinus: *Quamvis assiduè prædicemus, inquit, minus tamen reddimus, quàm debemus, dicente Scriptura: Clama ne cesses.*

## § VI.

## De Divisione Finis.

Q. I. *Quomodo finis dividitur?*

R. Dividitur 1. in internum, & externum.

Finis internus est ille, ad quem actus proximè tendit ac terminatur: sic sublevatio pauperis est finis internus eleemosynæ; quia eleemosyna proximè & immediatè tendit ad sublevandum pauperem. Unde finis ille dicitur finis operis, estque planè idem cum objecto.

Finis externus est ille, ad quem actus remotè & mediante fine interno refertur; sic remissio

peccatorum est finis externus eleemosynæ in eum finem collatæ; quia sicut aqua extinguit ignem, ait Sapiens Eccli. 3. ita eleemosyna, mediante sublevatione pauperis, extinguit peccatum. Hic finis dicitur finis operantis, non verò operis, quia actus ex natura sua ad eam non tendit, sed ex intentione operantis. Unde bonitas, quam actus ex fine externo desumit, non est ipsi essentialis, sed accidentalis duntaxat, ut supra diximus.

Dividitur iterum finis in intermedium, & ultimum.

Intermedius finis is est, ad quem actio ita refertur, ut ipse ad ulteriorem finem referatur: sic venia peccatorum, quæ intenditur in allato eleemosynæ exemplo, est finis intermedius; quia ulterius ordinatur, nempe ad beatitudinem.

Ultimus finis dicitur, ad quem omnia ita referuntur, ut ipse ad aliud non referatur; sed eo obtento, omninò quiescat agens, qui, si sit intelligentia præditus, illa quiete efficitur beatus. Namque ex S. Augustino Lib. octoginta trium questionum, quæst. 5. *Non cadit in animalia rationis expertia, ut beata sint*; quia aguntur & possidentur potius, quàm agant & possideant: beatitudo autem est possessio summi boni.

Q. 2. *Quotuplici modo ultimus finis spectari potest?*

R. Duplici, scil. objectivè, & formaliter.

Finis ultimus objectivè spectatus, est res bona, quæ intenditur: formaliter verò sumptus, est ipsa rei possessio.

Porrò res illa debet esse summum bonum, alioquin ultra eam aliud esset appetendum, & ita non omnia ad eam referrentur, nec in ea quiesceret appetitus: ergo finis ultimus, summum bonum,



bonum, beatitudo saltem respectu intellectuum, sunt omnia synonyma, quæ idem prorsus significant.

Q. 3. *Quotuplici modo spectari potest beatitudo objective sumpta?*

R. Duplici. Primò, confusè seu indeterminatè, & secundùm rationem universalem summi boni, abstrahendo ab omni bono specificè sumpto, ut cernere est in eo, qui incertus in quo felicitas ponenda sit, animum ad plura converteret, putà ad divitias, voluptates, experturus an in illis posset quiescere; is enim ageret amore finis ultimi, sed confusè & indeterminatè spectati. Secundò beatitudo seu finis ultimus spectari potest distinctè & determinatè, ut si quis rem determinatam, v. g. Deum, vel gloriam mundi sibi proponat tanquam summum bonum, & ad illud assequendum contendat.

Q. 4. *Homo agitne semper propter ultimum finem?*

R. Semper agit propter ultimum finem spectatum in genere & indeterminatè, non verò spectatum in specie & determinatè.

Prima pars probatur 1. ex sancto Augustino Lib. 10. de Civ. Dei cap. 1. *Omnium certè sententia est, inquit, qui ratione uti possunt, beatos esse omnes homines velle.* Et Lib. 13. de Trinit. cap. 3. *Quidquid autem latenter aliud aliquis velit, ab hac voluntate non recedit.* Sed præsertim Enar. 1. in Psal. 118. ubi sic habet: *Beatum . . . esse tam magnum est bonum, ut hoc & boni velint & mali.* Nec mirum est quòd boni propterea sunt boni; sed illud est mirum, quòd etiam mali propterea sunt mali, ut sint beati: & Lib. 2. Confess. c. 6. *ignavia quasi quietem appetit, quæ verò quies certa præter Deum? Luxuria satietatem atque a-*



*bundantiam se cupit vocari ; tu tamen (Deum alloquitur) es plénitudo & indeficiens copia incorruptibilis suavitatis . . . . perversè te imitantur omnes , qui longè à se te faciunt , & extollunt se adversum te. Sed etiam sic te imitando intimant Creatorem te esse omnis naturæ, & ideò non esse , quo à te omni modo recedatur.*

Probatur 2. ratione duplici, qua utitur sanctus Thomas 2. 2. quæst. 1. art. 6. Namque 1. beatitudo est expletio naturalis appetitus : atqui nihil facit homo, nisi ut expleat naturalem appetitum ; ergo in omnibus actionibus beatitudinem saltem implicite appetit. Illud ipsum agnovit Aristoteles Lib. 1. Ethic. cap. 12. ubi docet beatitudinis causa omnes operari omnia. 2. Ultimus finis se habet ad motum appetitus, sicut se habet in aliis motionibus primum movens: *Manifestum est autem, inquit Angelicus Doctor, quòd causæ secundæ moventes, non movent nisi secundum quod moventur à primo Movente Unde secunda appetibilia non movent appetitum, nisi in ordine ad primum appetibile, quod est ultimus finis.*

Secunda pars probatur ; quia qui de ultimo fine non cogitat, vel etiam ab eo se avertit, ut aliò tendat, is sanè non operatur propter ultimum finem determinatè sumptum : atqui sic se habent peccatores : *Homines, inquit S. Augustinus Lib. 13. de Trinit. cap. 31 ut eos quæque res maximè delectavit, ita in ea constituerunt vitam beatam.* Epicurus ait, frui carne mea bonum est : Stoicus, frui mea mente bonum est. Christianus verò, mihi adhærere Deo bonum est. Denique apud Philosophos Gentiles tanta fuit in hac parte opinandi libido, & sententiarum varietas, ut idem S. Doctor Lib. 19. de Civit. Dei cap. 1. numeret ex Varrone ducentas octoginta

octoginta octo opiniones circa summum bonum. Redite errantes, inquit S. Doctor in Psalm. 33. & Lib. 4. Conf. cap. 12. non est hæc via: bonam rem quæritis, sed non in regione ejus illam quæritis: *Beatam vitam quæritis in regione mortis: non est illic; quomodo enim beata vita, ubi nec vita? Descendit hac vita nostra (Filius Dei) & intonuit clamans, ut redeamus hinc.* Nusquam enim periculosius erratur, quàm in definitione ultimi finis; quia sicut se habet primum principium in speculabilibus; ita ultimus finis in operabilibus, inquit sanctus Thomas ex Philosopho. Sicut ergo constituto semel incerto aut falso principio, totam conclusionum seriem nutare, aut in præcipitium erroris discurrentem trahi necesse est: ita posito fictitiæ beatitudinis fundamento, morum fabrica, ac spiritualis disciplinæ structura stare nequaquam potest.

## §. VII.

*De vera hominis beatitudine objectiva.*

Q. I. *Quænam est determinata hominis beatitudo objectivè spectata?*

R. Solus Deus, quia in eo consistit vera hominis beatitudo, quod est summum hominis bonum; atqui solus Deus est summum hominis bonum, ut supra demonstravimus cap. 2. Ergo.

Confirmatur I. ex S. Augustino pluribus in locis, sed præsertim Epist. 55. aliàs 52. ad Macedonium his verbis: *Neque enim beatum facit hominem, nisi qui fecit hominem. Nam qui tanta creaturæ suæ bonis malisque largitur, ut homines sint, ut vigentes sensibus, valentes viribus, affluentes opibus sint: seipsum bonis dabit, ut beati sint; quia etiam hoc munus ejus est,*

*ut boni sint.* Et Lib. 13. Conf. Cap. 8. Deum sic alloquitur : *Satis ostendis quàm magnam creaturam rationalem feceris, cui nullo modo sufficit ad beatam requiem quidquid minus est, ac per hoc nec ipsa sibi . . . malè mihi est præter te non solum extra me, sed & in me ipso, & omnis mihi copia, quæ Deus meus non est, egestas.* Denique Lib. 1. Conf. cap. 1. *Fecisti nos ad te, & inquietum est cor nostrum, donec requiescat in te.*

Confirmatur 2. ex S. Thoma 1. 2. quæst. 2. art. 8. in quo discurre : *Objectum voluntatis, (quæ est appetitus humanus) est universale bonum, sicut objectum intellectus est universale verum. Ex quo patet, quod nihil potest quietare voluntatem hominis, nisi universale bonum; quod non invenitur in aliquo creato, sed solum in Deo; quia omnis creatura habet bonitatem participatam.*

Q. 2. *Teneturne homo dirigere omnia opera sua ad Deum tanquam ad ultimum finem sibi determinatum, & objectum suæ beatitudinis?*

Constat ex dictis hominem necessariò appetere ultimum finem in communi, & ex illa generali intentione semper agere : liberè verò se determinare ad ultimum finem in particulari, qui alius non est, quàm Deus, principium & finis cujusque rei. Hinc naturaliter oritur proposita quæstio; utrùm homo Deum intendere debeat in omnibus operibus suis.

R. 1. Cum sancto Thoma 1. 2. quæst. 1. art. 6. ad 3. homo non tenetur Deum actuali intentione intendere in omnibus operibus suis; quia actualis intentio requirit actualem mentis attentionem, seu cogitationem: atqui homo, quamdiu mortalem hanc vitam vivit, non potest semper actu de Deo cogitare; hæc perfectio est propria Spirituum

tuum beatorum, qui etsi deputentur ad hominum custodiam, nihilominus in sua administratione semper vident faciem Patris, Matth. 18. *Non oportet*, inquit Angelicus Doctor, *ut semper aliquis cogitet de ultimo fine, quandocunque aliquid appetit, vel operatur; sed virtus primæ intentionis, quæ est respectu ultimi finis, manet in quolibet appetitu cujuscunque rei, etiamsi de ultimo fine actu non cogitetur, sicut oportet quod qui vadit per viam, in quolibet passu cogitet de fine.* Unde ad mentem sancti Thomæ

R. 2. Homo intentione, saltem virtuali, tenetur singula sua opera ad Deum referre.

Probatur 1. ex Scriptura, Psal. 104. *Quærite Dominum, & confirmamini; quærite faciem ejus semper.* In quem locum sic scribit S. Augustinus: *Charitas invenit Deum per fidem; & eum quærit habere per speciem, est enim sine fine quærendus, quia sine fine amandus . . . . Et nimirum hoc est, quærite faciem ejus semper, ut non huic inquisitioni, qua significatur amor, finem præstet inventio, sed amore crescente, inquisitio crescat inventi.* Matth. 6. *Quærite ergo primum regnum Dei, & justitiam ejus: & hæc omnia adjicientur vobis.* Quæ verba expendens sanctus Augustinus Lib. 2 de Serm. Domini in monte cap. 25. hæc habet: *Non dicit, deinde ista quærite, quamvis necessaria . . . ne cum ista quæeratis, illinc avertamini, aut ne duos fines constituatis, ut & regnum Dei propter se appetatis, & ista necessaria, sed hæc propter illud . . . Ergo simplici corde tantummodo propter regnum Dei debemus bonum operari ad omnes.* 1. Cor. 10. *Sive ergo manducatis, sive bibitis, sive aliud quid facitis: Omnia in gloriam Dei facite.* Et Coloss. cap. 3. *Omne quodcunque facitis in verbo aut in opere, omnia in nomine Domini Jesu Christi.*

In



In quem locum sanctus Thomas Lectione 3. sic scribit : *Quidam dicunt quòd hoc est consilium : sed hoc non est verum. Sed dicendum est quòd non est necessarium quòd omnia in Deum referantur actu sed habitu.*

Probatur 2. ratione. 1. Finis ultimus ex omnium consensu est ille, ad quem omnia referuntur : atqui solus Deus est finis ultimus : Ergo. 2. Omnis creatura debet tendere ad id, ad quod movetur à suo actore : atqui Deus ut primus movens omnia ad seipsum movet, & adducit, inanimata quidem, & irrationalia necessariò, rationalia verò liberè : *Omnia propter seipsum operatus est Dominus* ; Ergo creatura rationalis deficit à sua rectitudine, & abutitur sua libertate, nisi omnes actus suos ad Deum dirigat, saltem intentione virtuali, *nemo sit superbus extra viam*, inquit S. Augustinus Præfat. in Psal. 31. *nemo piger in via. Si quis deviasse invenerit, redeat ut in via ambulet. Si se in via invenerit, in ea ambulet ut perveniat.* Adde, quòd gratia sit divina quædam motio in ordine ad vitam æternam ; ac proinde quisquis Spiritu Dei agitur, hic vitam æternam intendit. 3. Appetitus humanus necessariò tendit in beatitudinem incommuni, ut supra diximus : officium ergo sit rectæ rationis investigare, in quo consistat illa beatitudo, cùmque eam extra Deum non consistere invenerit, tum oportet omnes actus humanos ad Deum dirigat juxta pondus, & innatam inclinationem naturæ rationalis ; alioquin actio non esset consentanea naturæ rationali, nec proinde bona. 4. Dominus vitam æternam nobis proponit, ut mercedem bonorum operum : atqui hec mercedem non debet servo, qui propter ipsum non operatur : Ergo bona nostra opera ad  
Deum



Deum referri debent. 5. Regula precandi est regula credendi & operandi : quid autem orantes petere debeamus, docuit Magister noster in Oratione Dominica adeò necessaria, *ut aliter orare, non ignorantia sola sit, sed & culpa*, inquit sanctus Cyprianus Serm. de Oratione. Et S. Augustinus Epist. 138. aliàs 121. c. 12. *Quisquis id dicit, quod ad istam Evangelicam precem pertinere non possit, etiamsi non illicitè oret, carnaliter orat : quod nescio quemadmodum non dicatur illicitè, quandoquidem Spiritu renatos nonnisi spiritualiter decet orare.* Atqui ex eodem sancto Doctore laudata Epist. & ex S. Thoma 2. 2. qu. 83. art. 9. hoc unum in oratione petendum est, nempe vita æterna, & media ad illam consequendam, & quidem continuò, juxta illud Luc. 18. *Oportet semper orare, & non deficere* : quatenus desiderium vitæ æternæ debet in nobis esse virtualiter continuum, ut fusè explicamus Tom. 4. Tract. de Virtute Religionis cap. 4. §. 5.

Dices 1. Præceptum affirmativum, quo præcipitur actus bonus, non obligat pro semper, ut loquuntur Theologi : atqui præceptum, quo jubemur actus nostros ad Deum referre, est affirmativum : Ergo non obligat pro semper.

Distinguo maj. Præceptum affirmativum media duntaxat spectans, Conc. Finem ultimum spectans, Nego major. Et ratio disparitatis est, quòd unus sit ultimus finis, ad quem omnes tendere debent ; plura verò media, respectu quorum est electio juxta prudentiæ regulas ; non enim omnia omnibus semper & ubique conveniunt ; ensis v. gr. non est restituendus domino furibundo, cum prævidetur eo percussurus proximum ; oratio intermittenda, quando familia ope nostra indiget :

indiget : cura pauperum relinquenda , si præceptum superioris ad alia vocet. Ex quibus liquet præceptum de mediis non semper & pro semper obligare ; quia non semper concurrunt omnes circumstantiæ , in quibus media illa prudenter assumi possint. Sed præcepta , quæ ultimum finem spectant , ut fides , spes , & charitas , semper & pro semper obligant ; quia etsi non omni modo , saltem aliquo ad Deum tendere debemus.

Instabis : Præceptum charitatis est affirmativum , & Deum respicit : atqui non tenemur semper & pro semper ex charitate agere , aliàs peccatores , qui charitate carent , & ex gehennæ metu operantur , nullum actum bonum elicere possent , quod est falsissimum & hæreticum : Ergo.

Distinguo major. Est aliquod præceptum affirmativum Deum respiciens , Conc. Est unicum præceptum affirmativum Deum respiciens , Nego major. Spes enim etiam Deum respicit ut ultimum finem , & ex ea saltem peccatores qui se ad justificationem disponunt , divinæ justitiæ timore concussi , ad misericordiam Dei se convertunt , atque vitæ æternæ intuitu laboriosis pœnitentiæ operibus defunguntur.

Dices 2. Opera virtutum moralium , v. g. colere parentes , benefacere amico , habent rationem finis intermedii , licetque iis frui & delectari , ut supra dictum est ; ergo non tenemur ea ulterius referre ; sed satis est quòd per se sint ad Deum referibilia.

Distinguo anteced. Licet iis frui & delectari in Domino , Conc. In seipso , Nego anteced. Illud enim est superbia , & turpis vanitas.

§. VIII.

*De Beatitudine formali.*

Jam diximus beatitudinem formalem esse ipsam summi boni possessionem, quia illud est beatitudo formalis, quo formaliter Beati efficimur: atqui possessione summi boni formaliter Beati efficimur: Ergo possessio summi boni est beatitudo formalis, circa quam.

Q. 1. *In quo consistit illa possessio?*

R. Non consistit nisi in aliqua operatione perfecta.

Probatur 1. Quia beatitudo formalis est ultima hominis perfectio: atqui ultima hominis perfectio est operatio; quæ enim sunt in potentia, censentur imperfecta; sapiens & insipiens eandem habent naturam, iisdem instruuntur potentiis, sola operatione discrepant, à qua ille denominatur perfectus, iste imperfectus.

Probatur 2. in Beatitudine formali intelligitur perfecta quies, & plena delectatio: atqui delectatio ex dictis est consuetudinarium quid, & proprietas perfectæ operationis: delectatio oculorum, aurium, & gutturis, est consentanea & perfecta perceptio lucidi, concentus, & sapidi: insensitiva, ut cognitionis sunt incapacia, ita & delectationis: Ergo beatitudo formalis, seu possessio summi boni, neque in potentiis, neque in habitibus laudabilibus, sed in sola operatione perfecta est repouenda; operatio enim est quid ultimum rei. Unde Aristoteles Lib. 2. de Cælo, docet unumquodque esse propter suam operationem.

Q. 2. *Quæ operatio potest esse formalis beatitudo?*

D. Habert Theolog. Tom. III.

G

R. De-

R. Debet esse potentiae præstantioris, & ver-  
fari perfectissimo modo circa objectum perfectif-  
simum. Et ratio est, quia beatitudo formalis de-  
bet esse ea possessio, quæ quietet & satiet appeti-  
tum; atqui nisi hæc tria concurrant in operatio-  
ne, non explebit appetitum: Ergo.

Minor probatur 1. vilior potentia non perci-  
pit, nisi objecta inferiora, ut auditus sonos:  
quis autem crederet hominem beatum ex suavif-  
simo concentu, cum interim cæcus sit? Idem  
dico de eo qui fruitur gratissimo spectaculo,  
sed amens est, aut stolidus. Natura rationalis  
majori pondere ad altiora fertur, quæ possidere  
nequit, nisi per præstantiorem facultatem, ac  
proinde formalis ejus beatitudo non potest esse  
nisi operatio præstantioris potentiae, & idcirco  
maximè excolendæ: *quid est aliud beatè vivere*, in-  
quit sanctus Augustinus, Libro octoginta trium  
quæst. 35. *nisi æternum aliquid cognoscendo mente habere?* Id autem habere non possumus, nisi ea re, qua præ-  
stantiores sumus, id est, mente. *Quidquid autem mente*  
*habetur, noscendo habetur.* 2. Si objectum sit admo-  
dum mediocre, operatio, quæ circa illud versa-  
tur, erit possessio mediocris boni, ac proinde non  
satiabit appetitum, nec erit beatitudo formalis,  
ut quæ debet esse possessio summi boni. 3. De-  
nique nisi potentia præstantior perfectissimo modo  
atingat objectum, quantumcumque excellens &  
infinite, non quiescit, nec expletur ejus appe-  
titus; quia imperfecta est ejus possessio. Hinc  
est quod in hac mortali vita simpliciter beati esse  
non possumus; quia licet Deum mente noveri-  
mus; per fidem tamen ambulamus, & non per  
speciem: quæ autem relatione & testimonio alio-  
rum



rum cognoscimus, minùs afficiunt, quàm quæ visu percipimus: Ergo operatio non erit formalis nostra beatitudo, nisi hæc tria ad eam concurrant, nempe præstantior potentia, objectum præstantissimum, & modus operandi perfectissimus.

Ergo visio Dei intuitiva est formalis hominum beatitudo, ut quæ sit operatio facultatis præstantissimæ, mentis scilicet: versetur circa objectum in omni genere perfectionis infinitum; sitque perfectissima illius possessio; nosse enim Deum est illum habere: imò ex S. Augustino Lib. 83. quæstionum, quæst. 35. *Illud ipsum est, quod nihil aliud sit habere, quàm nosse.* Sicut aliter non possidetur lumen quàm per visum, nec suavis concentus, quàm per auditum; ita nec veritas & sapientia, quàm per cognitionem. Qui videt aurum, non illud propterea possidet; quia visio auri non tribuit jus & facultatem eo utendi in proprios usus: contra verò, qui veritatem & sapientiam perfectè novit, is possessor illius est, luce ejus refulget, gloria clarescit, suavitate profunditur, & cæteris ejus dotibus amplificatur. Quid est autem Deus, ad quem cor nostrum tam ardentem suspirat, nisi subsistens veritas, ipsamet sapientia? Ergo quibus clarè apparebit, erit illorum Deus & omnia; hoc est, interprete S. Augustino Lib. 22. de Civ. Dei cap. ult. erit unde satientur: erit quæcumque ab omnibus honestè desiderantur, & vita, & salus, & victus, & copia & gloria, & honor & pax, & omnia bona. Denique in divinam transferentur similitudinem, juxta illud 1. Joan. 3. *Cùm apparuerit, similes ei erimus, quoniam videbimus eum sicuti est.*



Confirmatur 1. ex Scriptura Psalm. 16. *Satiabor, cum apparuerit gloria tua.* Psalm. 79. *Ostende faciem tuam, & salvi erimus.* Joan. 17. *Hæc est autem vita æterna, ut cognoscant te, solum Deum verum.*  
 2. Ex SS. Patribus. S. Ambrosius Lib. 2. de Offic. cap. 2. sic scribit: *Scriptura divina vitam beatam in cognitione posuit divinitatis.* S. Chrysostomus Hom. 81. in Joan. *Omnis requies, inquit, est Filium Dei videre.* S. Augustinus quoque Lib. 1. de Trinitate cap. 8. sic habet: *Hæc contemplatio promittitur nobis omnium actionum nostrarum finis.* Et Lib. de Spir. & Litt. cap. 32. *Illà cognitione, illà visione, illà contemplatione satiabitur bonis animæ desiderium; hoc enim ei solum sat est, ultra non habet quod appetat, quò inbietet, quod requirat.*

Dices ex sancto Augustino Lib. de Moribus Eccl. cap. 3. beatus dici non potest, qui non amat, quod habet, etsi optimum sit: *Nam qui non appetit, quod appetendum esset, ægrotat: nihil autem istorum animo contingit sine miseria.* Unde concludit S. Doctor eam esse beatam vitam, *cum id quod est homini optimum, & amatur, & habetur.* Ergo amor ad beatitudinem formalem pertinet.

Distinguo consequens, pertinet ut pars integralis, vel tanquam proprium quid necessario fluens à visione intuitiva, Concedo: pertinet ut pars essentialis, Nego Conseq. Quemadmodum igitur homo v. gr. dupliciter spectari potest, nimirum, vel secundum essentiam, & quatenus est animal rationale: vel secundum integritatem, quatenus est aliquod totum constans ex essentia, partibus integrantibus, & proprietatibus, putà ex natura humana, mente, appetitu, brachiis, pedibus, &c. Ita duobus modis sumitur beatitudo.

1. Inte-

1. Intègrè, & ut sic complectitur visionem intuitivam, amorem, durationem indefectibilem, corporis sanitatem, & immortalitatem. 2. Essentialiter, & sub hoc respectu consistit in sola intuitiva Dei visione, ex qua fluunt cætera veluti proprietates, nempe amor fruitivus, duratio indefectibilis propter impeccantiam, corporis immortalitas, & aliæ dotes gloriosæ.

Ac primò quidem amor fruitivus: Cùm enim ex dictis liberum non sit cohibere innatum beatitudinis appetitum, adeò naturalis est ac præponderans; nemo non intelligit ex visione Dei intuitiva, qua non solum præsens exhibetur, sed & possidetur summum illud bonum tam ardentè, tamque constanter expetitum, statim exurgere impotentis amoris incendium, & immensam voluptatem, *cui comparata omnis aliunde jucunditas*, inquit S. Bernardus Epist. 114. *mæror est: omnis suavitas, dolor: omne dulce, amarum: omne decorum, fædum: omne postremò quodcumque aliud delectare potest, molestum.* Deinde ex operatione perfecta nascitur delectatio & gaudium, sicut ex sole radius, & ex luce fulgor, adeo ut quò perfectior est operatio, eò magis gaudium efflorescat: atqui visio Dei intuitiva est summa & ultima hominis perfectio, nec ultra superest, quo appetitus tendere possit: Ergo in ea plenè quiescit, juxta illud Psalm. 16. *jam laudati: Satiabor, cùm apparuerit gloria tua*, nec in hac satietate timendum est fastidium: quia ex S. Gregorio Hom. 36. in Evang. hoc distare solet inter delicias corporis & cordis, *quòd in illis appetitus placet, experientia displicet: in illis appetitus saturitatem, saturitas fastidium generat: in istis autem appetitus saturitatem, saturitas appetitum parit;*

rit ; Quia quantò magis earum sapor percipitur , eò amplius cognoscitur , quod avidius ametur. Et hoc sensu dicitur , 1. Petr. cap. 1. *In quem desiderant Angeli prospicere ; Quia*, inquit S. Augustinus in Psal. 104. *quem quisque diligit , etiam cum eum videt sine fastidio, semper vult esse præsentem.*

Secundò , visio Dei intuitiva parit in Beatis firmitatem & securitatem de sua perseverantia, quatenus eos reddit impeccabiles ; peccare enim est deficere à summo bono , à quo nullus recedere potest , nisi delusus falsa specie boni apparentis , juxta tritum effatum, *omnis peccans est ignorans* : Et illud Prov. 14. *errant qui operantur malum* : atqui deceptio non cadit in eos , qui omne bonum tam clarè intuentur , tamque perfectè possident , ut nihil extra appetibile appareat ; adeò sunt pro-  
 vecti, inquit sanctus Anselmus Lib. de casu Diaboli cap. 16. *ut sint adepti quidquid potuerunt velle ; nec jam videant quid plus velle possint , & propter hoc peccare nequeunt.*

Dices : in cœlesti patria alii aliis sunt feliciores : Ergo inferiores felicitatem superiorum appetere possunt utpotè majus bonum , ipsis invidere , ac proinde peccare.

Nego conseq. Namque ex sancto Augustino Lib. 22. de Civitate Dei cap. ult. *Id etiam beata Civitas illa magnum in se bonum videbit , quòd nulli superiori nullus inferior invidet : . . . . . quia nec in corpore vult oculus esse, quia est digitus, cum membrum utrumque contineat totius carnis peccata compago.* Sic itaque habebit donum alio minùs , ut hoc quoque donum habeat , nec velit amplius. Inferior itaque beatitudinem superioris apprehendit ut bonum simpliciter & absolutè majus, non verò ut bonum sibi, nec proinde

proinde à se appetibile , quemadmodum nec digitus perfectiones oculi appetit , nec benè vestitus homo vestem hominis grandioris quia latior illa vestis & amplior sibi non est bona & conveniens.

Tertiò , ex intuitiva Dei visione nascitur corporis immortalitas , & cæteræ dotes gloriosæ , ut expressè docet S. Augustinus Epist. 118. alias 5. ad Dioscorum cap. 3. *Tam potenti natura*, inquit, *Deus fecit animam, ut ex ejus plenissima beatitudine, quæ in fine temporum Sanctis promittitur, redundet etiam in inferiorem naturam, quod est corpus, non beatitudo, quæ fruētis & intelligentis est propria, sed plenitudo sanitatis, id est, incorruptionis vigor.* Idem docet S. Thomas 3. p. quæst. 45. art. 2. & in Supplemento quæst. 83. & 85. probat corporis subtilitatem & agilitatem provenire ex dominio absoluto animæ glorificatæ in corpus , cujus est forma , *ratione cujus domini*, inquit, *corpus gloriosum spirituale dicitur quasi omnino spiritui subjectum.* Omnia ergo dici possunt de illa ineffabili perfruitione veritatis , ut notat S. Augustinus Lib. qu. Evang. quæst. 39. *Et tantò magis omnia dici possunt, quantò minùs dignè dici aliquid potest.* Nam ipsa est lux illuminatorum , requies exercitatorum , patria redeuntium , esca indigentium , & corona vincentium.

### §. IX.

*De Beatitudine , quæ homini in hac vita competere potest.*

Q. 1. *Estne aliqua hujusce status beatitudo ?*

R. 1. Non potest esse perfecta , & simpliciter dicta , 1. quia beatitudo habet rationem termini , est enim ultimus finis : atqui in



hoc statu sumus semper peregrini & viatores: vœ nobis, si hîc quiescere appetimus, quin nostrum sit votum velocius currere, & citius apprehendere. 2. Quia, ut habetur Job 7. militia est vita hominis super terram: non est nobis pax à lege peccati, quæ est in membris nostris: à tentationibus, quæ nos continuò infestant: à conscientia, quæ pungit: à metu judicii, qui angit: à morbis & aliis miseriis, quæ cruciant. Denique exclamat Apost. Rom. 7. *Infelix ego homo, quis me liberabit de Corpore mortis hujus?* Nihilominus,

R. 2. In hocce statu agnoscenda est aliqua beatitudo inchoata, & imperfecta, 1. Quia Scriptura, quæ neminem fallit, nonnullos hîc beatos prædicat. Psalm. 111. *Beatus vir qui timet Dominum.* Psalm. 118. *Beati immaculati in via.* Math. 5. *Beati pauperes spiritu.* Unde sanctus Augustinus. Libro 11. de Civitate Dei cap. 12. *Quis, inquit, primos illos homines in Paradiso negare audeat beatos fuisse ante peccatum, cum hodie non imprudenter beatos vocemus, quos videmus justè, ac piè cum spe futuræ immortalitatis hanc vitam ducere sine crimine vastante conscientiam, facîle impetrantes peccatis hujus infirmitatis divinam misericordiam?* 2. Quia qui summum bonum imperfectè possidet, ille est imperfectè beatus: atqui homo in hoc statu summum bonum imperfectè possidere potest: *Qui manet in charitate, in Deo manet, & Deus in eo,* Joan. 4. *Misit Deus Spiritum Filii sui in corda vestra,* Gal. 4. Fructus autem Spiritus est gaudium, pax, ut dicitur Gal. 5. pax, inquam, quæ exuperat omnem sensum, & quam Apostolus vult esse in justis continuam: *Gaudete, inquit, in Domino semper, iterum dico, gaudete,* Phil. 4. & Psal. 33. *Gustate, & videte quoniam suavis est Dominus.*

Ergo



Ergo iusti, non solum propter spem futuræ beatitudinis nunc dicuntur beati, quomodo beatum dicimus ægrum, qui sub manu medici utiliter secatur, & uritur ad sanitatem; sed insuper propter aliquam participationem beatitudinis, secundum aliqualem summi boni fruitionem, ut loquitur S. Thomas 1. 2. quæst. 5. art. 3. ad 1. Porro ista prælibatio tanta suavitæ afficit animam, ut omnia mundi oblectamenta arbitretur veluti detrimenta, Philip. cap. 3.

Dices: Ex Apostolo 1. Corinth. 15. *Si in hac vita tantum in Christo sperantes sumus, miserabiliores sumus omnibus hominibus.* Ergo veri Christiani ex sola spe futuræ mercedis felices sunt censendi.

Distinguo anteced. Miserabiliores sub aliquo respectu, & in circumstantiis, in quibus loquebatur Apostolus, Concedo: Absolutè, & ex ipso Christianæ vitæ instituto, Nego anteced. Apostolus igitur, dum hæc scriberet, præ oculis habebat miseram sub Principibus ethnicis Christianorum sortem, ac præsertim Apostolorum, ad quos nonnulli Interpretes laudatum textum restringunt; hi quippe, præter quotidianas contra vitiorum incentiva conflictationes omnibus pietatis cultoribus communes, ubique exosi, maledictis laceffiti, plagis affecti, ac tandem excarnificati, mortalium miserrimi videbantur, quamvis invictæ suæ virtutis delectationibus intus reficerentur, teste ipsomet Apostolo 2. Cor. 1. *Sicut abundant passionibus Christi in nobis; ita & per Christum abundat consolatio nostra.* Et cap. 6. *quasi tristes semper autem gaudentes*; ipsa quippe virtus ipsi amplissimum erat præmium, felicioresque sunt boni, etiam dum hic vivunt, quàm mali, quantumlibet for-

tunati : Si (quod absit) illius tanti boni spes nulla esset, inquit S. Augustinus Lib. 21. de Civitate cap. 15. *malle debuimus in hujus conflictationis molestia remanere, quàm vitiis in nos dominationem permittere.* Illud ipsum senserunt etiam Philosophi, qui, licèt animas mortales statuerint, nihilominus definierunt felicius esse secundùm virtutem vivere, quàm cupiditatibus obsequi. Unde meritò Christus Marc. 10. vers. 30. Sectatoribus suis amplam mercedem non modò in futura, sed etiam in præsenti vita promittit, *nemo est, inquit, qui non accipiat centies tantum nunc in tempore hoc . . . . cum persecutionibus, & in seculo futuro vitam æternam.* Ergo.

Q. 2. *In quo consistit inchoata illa præsentis vitæ felicitas?*

Tria constant ex dictis: Primum, nulla rerum creatarum possessione nos effici beatos: quia res creatæ nec meliores, nec perfectiores nos reddere queunt. Secundum, Deum solùm, utpotè summum bonum, esse beatitudinem nostram objectivam, sive in præsenti, sive in futura vita. Tertium, beatitudinem formalem non consistere, nisi in aliqua operatione perfectâ; quia beatitudo formalis est quid ultimum, ad quod tendit natura rationalis: atqui sola operatio ex dictis habet rationem ultimi. Quæritur autem hîc (quod maximè refert) quænam sit illa operatio, cui præcipuè vacandum, ut in terris inchoetur nostra felicitas.

R. 1. Cum S. Thoma 1. 2. qu. 3. art. 5. & 2. 2. qu. 182. art. 1. beatitudo formalis præsentis vitæ non consistit in actibus virtutum moralium; quæ dici solent vita activa. 1. Quia ejusmodi actio-

nes

nes proximè non attingunt Deum, qui est summum bonum nostrum, sed versantur circa objecta creata, ut misericordia circa miseriam proximi depellendam, fortitudo circa adversa toleranda, temperantia circa voluptates refrænandas; *vita contemplativa*, inquit S. Doctor, *est secundum divina; vita autem activa secundum humana.* 2. Quia major est delectatio vitæ contemplativæ, quam activæ; perfectior enim operatio ex dictis magis delectat: atqui contemplatio est operatio perfectior operatione practica: *Martha turbabatur, Maria epulabatur*, inquit S. Augustinus Serm. 103. aliàs 26. de Verbis Domini. 3. Contemplatio propter se diligitur, vita verò activa ordinatur ad contemplationem, tanquam medium ad finem, *mores*, inquit S. Augustinus Tract. 18. in Joan. *perducunt ad intelligentiam.* Beati quidem dicuntur qui lugent, sed sicut beatum dicimus ægrum qui invenit salutaria remedia, non in quibus quiescat, sed per quæ perveniat ad sanitatem: *Opera justitiæ*, pergit S. Doctor, *sunt veluti collyria, quibus sanatur oculus mentis*, ut veritas nobis suaviter eluceat, quæ est illud necessarium, propter se expetendum: *Quamobrem*, Lib. 19. de Civ. Dei cap. 19. *otium sanctum quærit charitas veritatis, negotium justum suscipit necessitas charitatis. Quam sarcinam si nullus imponit, percipiendæ atque intuentæ vacandum est veritati. Si autem imponitur, suscipienda est propter charitatis necessitatem: sed nec sic omnimodo veritatis delectatio deferenda est, ne subtrahatur illa suavitas, & opprimat ista necessitas.* Ex quibus colligere licet eos à recta via aberrare, qui inutili otio torpent, si desint exteriora opera, quibus proximi necessitatibus serviant. 4. Quia vita activa transit, utpotè quæ  
fit

fit temporalis: *beatitudo verò hic incipit*, inquit S. Gregorius Homil. 14. in Ezech. *ut in cœlesti patria perficiatur; quia amoris ignis, qui hic ardere inchoat, cum ipsum, quem amat, viderit, ampliùs ignoscit.* Unde Christus ad Martham, interprete S. Augustino Serm. 104. aliàs 27. de Verbis Domini: *Maria meliorem partem elegit, non tu malam, sed ista meliorem. Unde meliorem? quia quod elegit, non auferetur ab ea; à te autem quod elegisti, auferetur, sed bono tuo aufertur, ut quod melius est, detur; auferetur enim à te labor, ut requies detur.* Absit ergo à pietate fidelium, maximè Clericorum, ut tædio afficiantur, si desint ignorantes, quos doceant: errantes quos reducant: esurientes, quos pascant; ista quidem debita officia suscipit necessitas charitatis, sed otium sanctum quærit charitas veritatis, ut ampliùs patebit ex sequenti responsione. Itaque

R. 2. Inchoata beatitudo vitæ præsentis consistit in Dei contemplatione. Probat; quia beatitudo consistit in operatione omnium perfectissima: atqui contemplatio est operatio omnium perfectissima. 1. Versatur circa summum bonum, estque ejus inchoata possessio, ac proinde maximè delectat. 2. Habet rationem finis, ad quem cæteræ actiones referuntur. 3. In exitu non auferetur, sed perficietur: Ergo.

Dices 1. Nonnulli vocantur à vita contemplativa ad regimen animarum, quod pertinet ad vitam activam: Ergo vita activa est perfectior, & ratio finis magis ipsi competit, quàm contemplationi.

Nego conseq. Quia ex S. Thoma 2. 2. q. 182. art. 1. ad tertium: *Cum aliquis à contemplativa vita ad activam vocatur, hoc non fit per modum subtractionis, sed*



*sed per modum additionis.* Et quidem ad mentem S. Augustini, supra sic monebat: *Si imponitur (cura animarum) suscipienda est propter charitatis necessitatem, sed nec sic omnino veritatis delectatio deferenda est, ne subtrahatur illa suavitas, & opprimat ista necessitas.* Articulo autem quarto docet Angelicus Doctor vitam activam addi contemplativæ, ut ab ea moveatur & dirigatur: *Ratio enim superior, quæ contemplationi deputatur, comparatur ad inferiorem, quæ deputatur actioni, sicut vir ad mulierem, quæ est per virum regenda, ut Augustinus dicit 12. de Trinitate.*

Dices 2. Vita activa majoris est meriti, quàm contemplativa, juxta illud S. Gregorii Hom. 12. in Ezech. *Nullum sacrificium est Deo magis acceptum, quàm zelus animarum.* Ergo vita activa est melior & præferenda.

Nego anteced. Namque ex S. Gregorio Lib. 6. Moral. cap. 28. *Magna sunt vitæ activæ merita, sed contemplativæ potiora.* Et Hom. 3. in Ezech. Contemplativa major est merito: quia, ut ratiocinatur S. Thomas art. 2. ejusdem quæstionis, vita contemplativa directè & immediatè pertinet ad dilectionem Dei; activa verò ad dilectionem proximi: atqui quod directè pertinet ad dilectionem Dei, est magis meritorium ex suo genere, quàm quod pertinet ad dilectionem proximi: Ergo vita contemplativa comparatè ad activam, est majoris meriti. Sed si quis utraque conjungat, & igne charitatis succensus, rapiat ad amorem Dei quos potest, hortando, rogando, portando cum mansuetudine, & lenitate, ut loquitur S. Augustinus in Psal. 33. habet utriusque meritum, nec est sacrificium magis acceptum, quàm si Deo animam tuam offeras per contemplationem, agasque



que insuper, ut alii simile munus ipsi exhibeant. Hoc docuit Christus suo exemplo, ipsum imitati sunt Apostoli, & qui deinceps sanctitate eminuerunt: *Bonum acquirit gradum* (inquit S. Bernardus Serm. 3. de Assumptione Beatæ Mariæ) *qui benè ministraverit: fortè meliorem, qui benè vacaverit Deo: optimum autem, qui perfectus est in utroque.*

Dices 3. Beatitudo debet esse continua: atqui contemplatio est admodum rara & brevis, ut docent communiter Sancti Patres: *Aliquando,* inquit sanctus Augustinus Lib. 10. Confess. c. 40. *intromittis me in affectum multum inusitatum introrsus ad nescio quam dulcedinem, . . . . . sed recido in hac ærumnosis ponderibus, & resorbeor solitis, & teneor, & multum fleo.* Sanctus Gregorius Hom. 14. in Ezech. sic habet: *Furtim & tenuiter anima quiddam attingit de incircumscripto lumine, sed ad semetipsam protinus reverberata revertitur.* Et S. Bernardus Serm. 31. in Cant. in eandem rem scribit: *desiderium cordis ejus tribuetur ei . . . . . ex parte tamen, idque ad tempus & tempus modicum.* Nam cum vigiliis & observationibus, & multo labore, & imbre lachrymarum quæsitus affuerit, subito dum teneri putatur, elabatur: & rursum lachrymanti & insectanti occurrens comprehendi patitur, sed minimè retineri, dum subito iterum quasi à manibus evolat. Denique Innocentius XI. damnavit vanam Quietistarum præsumptionem, qua docebant contemplationem in hac vita posse esse continuam, animamque à sensibus abstractam, & divinitate delibutam non debere è tanta sublimitate descendere, ad compescendas sensuum ludificationes, & refrænandas libidinis insanias, utpote quæ non imputentur in peccatum animæ sic in Deum transformatæ: Ergo.

Distin-

Distinguo min. Contemplatio est admodum rara & brevis, quoad aliquem specialem actum, Concedo: quoad omnes & singulos actus, quos complectitur, Nego min. In vita itaque contemplativa plures sunt distinguendi actus. Primus est Fides, cui justus quantumcumque perfectus semper attendere debet tanquam lucernæ in caliginosa nostra peregrinatione lucenti, alioquin facile in Fanaticorum somnia & deliria declinaret; scriptum est enim Habac. 2. justus ex fide vivit. Beatus verò exultat in specie: *Nunc quidem*, inquit S. Bern. Serm. 31. in Cant. *apparet quibus vult, sed sicuti vult, non sicuti est: non Sapiens, non Sanctus, non Propheta videre illum sicuti est, potest.* Secundus actus, isque præcipuus est charitatis, quæ juxta S. Thomam 2. 2. qu. 118. art. 7. ad primum, rationem habet primi moventis seu principii & finis in vita contemplativa. Finis quidem; quia delectari in Domino, & gustare quàm suavis sit, propriè sunt actus charitatis, ad quos ultimò tendit vita contemplativa. Charitas habet etiam rationem primi moventis & principii, quia ex dictis intentio & desiderium fruendi Deo, est primus ultimi finis effectus, qui in actu ponit omnes animæ facultates & laudabiles habitus; Fides enim & cæteræ virtutes sine charitate sunt mortuæ: Verbum Dei insipidum, lectio injucunda, oratio languida & frigida, meditatio penè nulla; sed fervor charitatis iis admotus idem præstat, inquit Richardus à sancto Victore Lib. 4. de Contemplatione cap. 7. quod ignis suppositus vasi aqua semipleno, nimirum aquam nativo ejus frigore expulso leviolem reddit, ebullientem ad superioris vasis partes effert, ac tandem supereffluere facit.

facit. In hunc modum cœlestis desiderii ardor, cum vehementer exæstuat animam humanam divino amore fervidam, supra semetipsam ad superna contuenda rapit, fidem vivam efficit, mentem ad pias & sanctas cogitationes exacuit determinatque dona Spiritus Sancti, quæ diximus esse charitatis appendices ab ea inseparabiles, scilicet intelligentiam, scientiam, & sapientiam; movet ad proprios actus, qui mirum in modum considerationem juvant vitamque contemplativam perficiunt ac delectant. Namque per intelligentiam anima, Spiritu Sancto specialiter operante, clariùs videt, quàm credibilia sint quæ Fides obscure proponit de rebus divinis, & inde amplius incitatur, ad illa appetenda. Per scientiam meliùs percipit, quæ Fides docet de vanitate rerum creaturarum, doletque usque ad lacrymas, quoad meliora contendenti importunè se ingerant, ac sensus demulceant: sed ejusmodi lacrymæ tam suaviter fluunt ut numerentur inter singularia Spiritus Sancti dona, nec Christus dubitaverit pronuntiare beatos, qui cœlesti illo rore perfunduntur, ait enim Matth. 5. *Beati qui lugent.* Denique per sapientiam anima gustat quàm suavis sit Dominus, quàm dulcia ejus eloquia, ex quo sapore nascitur ultimus & perfectissimus contemplationis actus, qui est perspicax & liber contuitus animi res divinas degustantis; ut enim ratiocinatur Gerson, Tract. de Monte contemplationis c. 2. *idiotam, qui mel gustu percipit, melius novit ejus dulcedinem, quàm superbus Philosophus, qui illam non expertus, de ejus natura & proprietatibus subtiliter differit.* Porro ultimus ille actus est quidem brevis, nec ita frequens; sed actus charitatis potest esse continuus,

tinuus, saltem virtualiter; namque ex S. Augustino ep. 130. aliàs 121. in ipsa fide, spe, & charitate continuato desiderio semper oramus, ut fusiùs demonstramus tract. de Religione, ubi de Oratione continua, cap. 4. §. 7.

Q. 3. *In quo actu ex recensitis consistit inchoata formalis beatitudo vitæ præsentis?*

R. 1. Non consistit in actibus scientiæ acquiræ: tum quia natura humana non accepit ut per seipsam beata esse possit, quemadmodum argumentatur S. Augustinus contra Manichæos tum quia hæc scientia sine charitate inflat, non ædificat: ingurgitat, non confortat, nec fatiat, ut loquitur S. Bern. Serm. 9. in Cantica: tum quia beatitudo, ex dictis, est quid optimum: scientia autem acquisita minus est bonum, quàm habitus infusi & supernaturales. Ergo.

R. 2. Neque etiam consistit in actibus donorum Spiritus Sancti, scilicet, intelligentiæ, scientiæ & prudentiæ; quia ex S. Thoma 1. 2. qu. 168. art. 8. virtutes Theologicæ meliores sunt, & præferendæ donis Spiritus Sancti; perfectius est enim veritates divinas, & Deum ipsum immediate, quamvis obscure, cognoscere, quàm de sola credibilitate rerum revelatarum habere claritatem. Atqui dona Spiritus Sancti versantur circa rationes & motiva, quibus res revelatæ cernuntur credibiles & amabiles. Unde evidentia, quæ competit donis, & reddit actus fidei clariores & perfectiores, spectat solum animæ dispositiones, per quas anima fit magis expedita ad credendum, sperandum & amandum, & faciliùs mobilis à Spiritu Sancto, per ea quippe videt credibilia omni-



nò esse, quæ Deus dixit & promisit, sed illa non attingit, nisi per fidem, spem & charitatem.

R. 3. Neque in actibus fidei inchoata beatitudo formalis hujus vitæ præcisè consistit, quamvis illos non excludat, sed ipsos supponat. 1. Quia fides invenitur in peccatoribus: beatos autem esse impios & iniquos, quis vel impius dixerit, inquit S. Augustinus Concione prima in Psal. 118. cum sit malitiæ individua comes miseria; nam beatitudo & perfectio reciprocantur: atqui peccatum opponitur perfectioni, cum sit defectus: ergo & beatitudini. 2. Quia fides magis habet rationem laboris quam præmii, credimus quod non videmus, ut mereamur intelligere: charitas verò ipsa sibi præmium, ipsa sibi merces, fructus ejus sunt gaudium, pax Gal. 5. Deinde ex Apostolo 1. Cor. 13. Fidei visio succedit, *sive scientia*, inquit, *destruetur*; *ex parte enim cognoscimus, & ex parte prophetamus, cum autem venerit quod perfectum est, evacuabitur quod ex parte est.* At charitas nunquam excidit, non evacuatur per gloriæ perfectionem, sed eadem numero manet, ut docet sanctus Thomas 1. 2. quæst. 67. art. 6. Quia imperfectio, quæ ei competit in via, est ipsi accidentalis; non est enim de ratione amoris, quod sit imperfectus: nihil autem prohibet, quominus idem numero quod prius ex accidenti fuit imperfectum, postea perfectum evadat; idem enim homo imperfectus in infantia crescit, & vir evadit. Sed imperfectio cognitionis est essentialis fidei; definitur enim ab Apostolo, Hebr. 11. *argumentum non apparentium.* Unde perspicuum est fidem non posse esse perfectam cognitionem, destruendamque illucescente visione intuitiva.

R. 4.



R. 4. Inchoata beatitudo formalis præsentis vitæ in actibus charitatis consistit.

Probatur 1. ex dictis in præcedenti responsione. 2. Quia charitas facit simpliciter bonum habentem se; *cum quæritur*, inquit S. Augustinus Enchirid. cap. 117. *utrum quis sit homo bonus, non quæritur quid credat, aut quid speret, sed quid amet.* Et Ep. 167. aliàs 29. *ubi illa plena & perfecta est, nihil ex vitio remanebit . . . . . & tantò quis invenitur in peccando minor, quantò in diligendo Deum & proximum major.* 3. Quia dilectio Dei est actus hujus vitæ perfectissimus: ergo & maximè delectabilis: delectatio enim ex dictis sequitur operationem, ac proinde in dilectione Dei reponenda est inchoata hujus vitæ beatitudo.

Antecedens probatur. Ille actus est omnium perfectissimus, quo plenius & perfectius possidetur summum bonum, & appetitus rationalis magis quiescit, atqui per actus charitatis Deus, qui est summum bonum, plenius & perfectius possidetur, appetitusque rationalis magis delectatur & quiescit, quàm per actus cæterarum virtutum sive Moralium, sive Theologicarum: Ergo.

Minor constat quoad actus virtutum moralium, ut qui versentur circa media & objecta creata: demonstratur verò quoad actus virtutum Theologicarum, nempe fidei & spei, quæ quidem versantur circa Deum, sed longè imperfectiori modo, quàm charitas; namque 1. spes respicit Deum ut absentem, & ut bonum revera summum, sed obtentu difficile; charitas verò ut præsentem, quia *qui manet in charitate, in Deo manet, & Deus in eo.* 1. Jo. 4. 2. Per fidem assentimur Deo de se loquenti, sed non videmus, quæ

ab illo audimus, & inde appetitus accenditur desiderio videndi quid sit, & quomodo se habeat quod dicitur. Mens quidem illud, quo potest modo, sibi repræsentat; nam assensus fidei non est sine cognitione: omnis autem cognitio est repræsentatio objecti. Porro mens in hac vita non potest sibi repræsentare Deum per propriam speciem, sed per alienam, scilicet per creaturas, per quas tendit ad primam veritatem; sed cum illa habitet lucem inaccessibilem, hæret quasi ad ejus januam; ibique excipitur ab assensu fidei credens vera esse quæ audit, etsi ea capere non possit. In illo autem cognitionis termino incipit dilectio, ut docet sanctus Thomas 2. 2. quæst. 27. art. 4. & omni scientia supereminens attingit Deum ut in se est, eique tanquam summo bono conjungit amantem, *qui plenus est charitate*, inquit S. Augustinus in Psalm. 118. *plenus est Deo*, & Lib. 15. de Trin. c. 18. *nullum est isto Dei dono excellentius, solum est quod dividit inter filios regni æterni & filios perditionis æternæ. Dantur & alia per Spiritum Sanctum munera, sed sine charitate nihil profunt.*

Dices 1. Proprius actus charitatis in hac vita est desiderium videndi Deum, juxta illud Psal. 104. *Querite faciem ejus semper*: atqui beatitudo non potest esse desiderium; neque enim ille dici potest beatus, qui non habet quod amat, ex S. Augustino Lib. de Morib. Eccl. c. 3. cum beatitudo sit fruitio, & quies in summo bono possessio: ergo nullus actus charitatis potest esse beatitudo præsentis vitæ.

Distinguo maj. actus aliquis, isque præcipuus charitatis est desiderium videndi Deum, Conc. unicus, Nego maj. namque ex S. Gregorio Hom. 30. in

in Evang. Qui mente integra Deum desiderat, profectò jam habet quem amat; neque enim quisquam posset Deum diligere, si eum quem diligit, non haberet. Et sanctus Augustinus in Psalm. 104. Charitas, inquit, invenit Deum per fidem, & eum quærit habere per speciem. Est enim sine fine quærendus, quia sine fine amandus . . . Proinde quem quisque diligit, etiam cum eum videt sine fastidio, semper vult esse præsentem, hoc est semper quærit eum esse præsentem . . . ut non huic inquisitioni, qua significatur amor, fidem præstet inventio, sed amore crescente, inquisitio crescat inventi. Porro ex eodem S. Doctore in Psal. 76. Charitas sine gaudio esse non potest; scriptum est enim Gal. 5. Fructus Spiritus est gaudium, pax, &c. Gaudes de auro tuo; de cuppa tua plena, & non gauderes Deo plenus?

Dices 2. fides se habet ad virtutes Theologicas, sicut prudentia ad virtutes Morales: atqui prudentia est perfectior virtutibus moralibus, quas dirigit: ergo & fides charitate, cui lucem præstat.

Nego maj. namque ex S. Thoma 1. 2. q. 66. art. 6. ad prim. Prudentia moderatur motus appetitivos ad morales virtutes pertinentes; sed fides non moderatur motum appetitivum tendentem in Deum, qui pertinet ad virtutes Theologicas, sed solum ostendit objectum, motus autem appetitivus in objectum excedit cognitionem humanam, secundum illud ad Ephes. 3. supereminentem scientiam charitatis Christi.

Instabis: beatitudo formalis vitæ futuræ consistit in operatione intellectus, utpote facultatis præstantissimæ: ergo inchoata beatitudo vitæ præsentis in actibus fidei, quæ est virtus intellectualis, ac proinde præstantior virtutibus appetitivæ facultatis.

Nego conseq. quia ad beatitudinem fatis non est quòd actus sit præstantissimæ facultatis, nisi ipse sit perfectus, habeatque rationem finis, in quo appetitus quiescat: atqui actus fidei informis, ut ajunt, hoc est, charitate destitutæ, adeo est imperfectus, ut nequidem ad perfectionem virtutis pertingat, ex S. Thoma 2. 2. qu. 4. art. 5. Nedum appetitum satiet, quin illum magis accendit desiderio videndi ea quæ dicuntur. Contra verò actus charitatis est maxima hominis perfectio, quam in hac vita consequi possit: habet rationem ultimi finis, cùm sit inchoata Dei possessio & fruitio; qui enim manet in charitate, in Deo manet, & Deus in eo; *totum habet*, inquit S. Aug. Tract. 7. in Joan. *qui habet charitatem*; quæcunque enim verè bona sunt, ab illa fluunt tanquam à radice: sine illa fides & spes mortuæ sunt, & per illam duntaxat vivunt: sine illa nulla in homine vera prudentia, nulla virtus moralis infusa & supernaturalis: ipsa adveniente, sequuntur omnes virtutes, & Spiritus Sancti dona tanquam ejus proprietates, *sit in te charitas*, inquit S. Aug. Conc. 27. in Psal. 118. *& necesse est plenitudo scientiæ consequatur*, quia charitas non est sine dono intelligentiæ, scientiæ & sapientiæ. Et in Psal. 149. *Quisquis habet charitatem conscientiam suam attendat, & ibi videt Deum*: nec tantùm videt, sed & gustat quàm suavis sit Dominus, unde identidem exclamare cogitur cum Propheta Psalm. 30. *quàm magna multitudo dulcedinis tuæ!* Magna sanè ac prorsus ineffabilis illa ferventis charitatis suavitas: ut quæ omnes peccati illecebras inanes reddat, nulla adversitatis amaritudine turbetur, *superabundo gaudio in omni tribulatione nostra*, inquit Apostolus



postolus 2. Cor. 7. *Quapropter in nullis scripturis aliud (præter charitatem) inquiratis*, Augustinus in Psalm. 140.

Urgebis : fidei succedit visio intuitiva tanquam ejus præmium & merces : ergo fides est inchoata hujus vitæ beatitudo.

Distinguo antec. quoad priorem ejus partem : succedit, sicut dies succedit nocti, quam expellit, Conc. succedit sicut clara lux auroræ, quam perficit, Nego ant. evacuatur enim fides, adveniente visione beatifica, charitas verò perficitur.

Distinguo etiam alteram partem antecedentis, visio intuitiva est præmium & merces fidei formatæ, ut ajunt, hoc est, fidei quæ per dilectionem operatur, Concedo : fidei informis charitate destitutæ, Nego ant. nam ex S. Thoma 1. 2. q. 114. art. 4. *Meritum vitæ æternæ primò pertinet ad charitatem, ad alias verò virtutes secundariò, secundum quod earum actus à charitate imperantur* ; scriptum quippe est Jac. 1. *cum probatus fuerit, accipiet coronam vitæ, quam repromisit Deus diligentibus se.*

Sit ergo charitas primum movens in moribus, prima in intentione, præsit nostris consiliis & deliberationibus, applicet ad opus, & omnia ex ejus fiant imperio ; quia est totius moralis disciplinæ finis, juxta illud Apostoli 1. Timoth. 1. *finis autem præcepti est charitas*, & Psalm. 72. *mibi autem adhærere Deo bonum est*, addit sanctus Augustinus, *hoc est totum bonum*, ac proinde vera beatitudo : quia qui manet in charitate, in Deo manet, & Deus in eo, 1. Joan. 4.

Ergo mirare mentis humanæ depravationem in quibusdam modernis Theologis, qui eò sunt progressi, ut docuerint, 1. hominem non teneri



amare ultimum finem neque in principio, neque in decursu vitæ mortalis. 2. Præceptum amoris Dei per se tantum obligare in articulo mortis. 3. Præceptum affirmativum amoris Dei & proximi non esse speciale, sed generale, cui per aliorum præceptorum adimpletionem satisficit. Quid enim rationi magis repugnans, quam media assumere, & finem non intendere, v. g. pugnare sine desiderio victoriæ, remedia adhibere, neglecta sanitate? Sed quid impium magis quam docere creaturam non teneri amare suum Creatorem, filium patrem, servum dominum beneficum, captivum redemptorem? Quare Clerus Gallicanus anno 1700. meritò damnavit ejusmodi propositiones, primam ut hæreticam, secundam & tertiam ut scandalosas, erroneas, impias, atque Evangelicæ Legis spiritum extinguentes: præiverant Alexander VIII. anno 1690. Innocentius XI. anno 1679. & Academia Parisiensis anno 1665.

## CAPUT VII.

### De Merito Actuum humanorum.

**A**gitur hic duntaxat de Actibus bonis; constat enim apud omnes, etiam infideles, actus moraliter malos non mereri nisi pœnam. Sed gravis est controversia Catholicos inter & Heterodoxos, circa actus bonos, utrùm scilicet præmiis sint digni ac meritorii.

Pelagiani contendunt actus bonos viribus naturæ elicitos esse meritorios vitæ æternæ, contra quem errorem acriter pugnavimus Tract. præcedenti de Gratia, & iterum nobis pugnandum erit, ubi de conditionibus ad meritum requisitis.

Luthe-

Lutheranis verò & Calvinistis nomen Meriti adeo exosum est, ut Calvinus L. 3. Instit. cap. 15. §. 2. & sequentibus, audeat scribere, veteres Patres pessimè consuluisse fidei sinceritati, dum usi sunt vocabulis meriti & mercedis. Sed vel ipsum Spiritum Sanctum reprehendat, qui in Scripturis sanctis vocabula illa usurpat, ut Matth. 5. vers. 12. *merces vestra copiosa est in cælis*: vel, quod æquius est, fateatur se pessimè consuluisse sectæ Calvinianæ, dum scripsit illam esse contrariam veterum Patrum Traditioni. Hinc Sectatores ejus in hac parte illum deserunt, agnoscuntque bona justorum opera meritoria esse, non quidem vitæ æternæ, ad quam per solam fidem perveniri contendunt, sed alicujus præmii temporalis etiam spiritualis: idque non ex dignitate operum, quæ secundum ipsos sunt vera peccata, sed ex indulgentia Dei tegentis eorum fœditatem.

Ut autem radicitus evellatur ejusmodi perniciosus error, operæ pretium est advertere Novatores duobus niti principiis iisque falsissimis. 1. docent actus Spiritu Christi inspirante, & movente elicitos infici concupiscentia, & privati amoris fœditate, ac proinde vera esse peccata, in reprobis quidem mortalia, in prædestinatis verò venialia. Venialia autem dicunt, non eo sensu, quo Catholici venialia vocant peccata, levia; hanc enim divisionem peccatorum in gravia & levia rejiciunt, contenduntque nullum esse peccatum, quod non mereatur damnationem æternam; sed dicunt venialia esse in electis sacrilegia, homicidia; & gravissima quæque, quatenus Deus illa non imputat prædestinatis: verbum verò otiosum, mendacium jocosum, & cætera leviora in

reprobis esse mortalia, & pœnis æternis vindicanda. 2. Definiunt non sine injuria Christi meritum aliquod tribui bonis operibus ex gratia elicitis, quia si opera nostra essent alicujus meriti, in iis confidere liceret; atqui omnis nostra fiducia in meritis Christi est collocanda. Ergo. Hinc Calvinus Lib. 3. Institut. c. 2. §. ultimo tragicè exagitat Magistrum Sententiarum, ex eo quod scripserit spem in nobis gigni ex gratia Dei, & meritis præcedentibus; *Deus, inquit, non immeritò tales bestias excretur. O Magistrum talibus discipulis dignum, quales infanis tabularum scholis nactus est!*

Quàmobrem nobis inquirendum est, 1. utrùm opera ex gratia elicita, sint verè bona? 2. utrùm sint meritoria? 3. an sit honestum operari intuitu mercedis æternæ? 4. an liceat in bonis operibus fiduciam ponere? 5. quotuplex sit meritum. 6. quot requirantur conditiones ad meritum. 7. quænam cadant sub meritum de condigno? 8. quæ sub meritum de congruo?

### §. I.

*Utrùm opera ex gratia elicita, sint verè bona?*

R. **D**e fide est opera ex gratia elicita, sive ante, sive post justificationem, verè esse bona, nec dici posse peccata. Ita definiit Concilium Trident. Sess. 6. Can. 7. *Si quis dixerit opera omnia, quæ ante justificationem sunt quacumque ratione facta sint, verè esse peccata, vel odium Dei mereri . . . . . anathema sit.* Et Can. 25. *Si quis in quolibet bono opere justum saltem venialiter peccare dixerit, aut (quod intolerabilius est) mortaliter, atque idèd pœnas æternas mereri, tantumque ob id non damnari:*

*nnari : quia Deus ea opera non imputet ad damnationem, anathema sit.*

Probatur 1. ex Scriptura, Job cap. 1. & 2. dicitur vir rectus, simplex, ac timens Deum, & recedens à malo, nec in omnibus, quæ ipsi acciderunt, peccasse labiis suis, in quem locum sic scribit sanctus Gregorius Lib. 2. Moral. capit. 8. *Si in sermonibus suis dicimus Job deliquisse, Deum (quod sentire nefas) dicimus in sua propositione victoriam perdidisse.* Matth. 7. *Videant opera vestra bona.* Luc. 7. *Laudatur peccatricis pœnitentia, remittuntur ei peccata multa (ait Christus) quoniam dilexit multum.*

Probatur 2. ex Patribus. S. Hieronymus L. 3. contra Pelagianos, *hoc nos diximus, inquit, posse hominem non peccare, si velit, quamdiu intentus est animus.* S. Aug. Lib. de bono conjugii cap. 6. sic habet: *Conjugalis concubitus generandi gratia, non habet culpam; concupiscentiæ verò satiandæ, sed tamen cum conjuge, venialem habet culpam; adulterium verò, sive fornicatio lethalem habet culpam.* Mitto alios textus §. sequenti laudandos.

Probatur 3. ratione duplici. Prima, si omnia bona opera essent peccata, vera esset ista argumentatio: nullum peccatum est faciendum: atqui omnia bona opera sunt peccata: ergo nulla bona opera sunt facienda, Deus non est amandus, nec colendus, non est tribuenda eleemosyna. Secunda, si actus ex gratia elicitī essent peccata, id certè oriretur, vel ex innata concupiscentia, vel ex defectu charitatis intensioris, vel ex admixtione peccati venialis; adversarii quippe aliud non proferunt adversus bona opera: atqui nihil horum vitiat actus supernaturales.

Non primum; quia, ex dicendis, ubi de peccatis



catis primi concupiscentiæ motus, quibus resistitur, peccata non sunt; nullum quippe est peccatum, quod non sit voluntarium.

Non secundum; quòd enim minùs ferveat charitas in via, quàm in patria, peccatum non est, sed defectus, ut docet S. Augustinus Lib. de Spiritu & Littera cap. ultimo. *Neque enim, inquit, si esse nondum potest tanta dilectio Dei, quanta illi cognitione plena, perfectaque debetur, jam culpæ deputandum est.*

Non tertium; nam ex S. Hieronymo cit. Lib. 3. contra Pelagianos, *qui cautus est, & timidus, potest ad tempus vitare peccatum.*

Dices 1. Eccles. 7. *Non est . . . homo justus . . . qui faciat bonum, & non peccet.* Isaïæ 64. *Facti sumus ut immundus omnes nos, & quasi pannus menstruatae universæ justitiæ nostræ: ergo omnia opera nostra motibus concupiscentiæ, & privato amore sunt inquinata.*

Nego conseq. namque 1. non dicit sapiens; hominem justum in singulis actibus cadere, imò Prov. 25. asserit eum aliquando surgere, *septies enim cadit justus, & resurgit.* 2. Loquitur Isaïas nomine Civitatis Jerosolymitanæ, in qua plures erant impii, propter quos Civitas hostibus erat tradenda; ait enim, *non est qui invocet nomen tuum, qui consurgat, & teneat te.* Deinde justitiæ, de quibus est sermo, sunt interprete sancto Hieronymo, cæremoniæ, sacrificia, & alia Legis exteriora opera, quibus Judæi Idololatræ & peccatores impœnitentes Deum placare contendebant, cùm tamen Deus illa rejiceret propter offerentium corruptos mores, *incensum abominatio est mihi . . . sabbatum & festivitates alias non feram.* Isaïæ 1.

Insta-



Instabis : Matth. 6. omnibus præscribitur hæc orandi forma , *sanctificetur nomen tuum . . . fiat voluntas tua* ; unde sic argumentatur Lutherus ; petimus quod non habemus , ut nomen Dei sanctificetur in nobis , ejusque voluntas fiat : ergo in nobis polluitur nomen Dei , & ejus voluntati sumus rebelles.

R. 1. Retorquendo argumentum contra Lutherum : Christus non jubet nos petere quod nunquam sumus impetraturi : ergo per orationes possumus à Deo obtinere, ut sanctificemus nomen ejus ; impleamusque ejus voluntatem.

R. 2. Peccatores , per quos nomen Dei blasphematur petunt quod nullatenus habent ; petunt justi , ut perseverent in eo , quod jam habent , & perficiatur in eis quod acceperunt.

Dices 2. constans est SS. Patrum doctrina, omnia justorum opera esse vitiata ; sic enim habet S. Hieronymus Dialogo 1. contra Pelagianos , *tunc ergo justi sumus , quando nos peccatores fatemur , & justitia nostra non ex proprio merito , sed ex Dei misericordia consistit.* Sanctus Augustinus Epist. 167. aliàs 29. *Illud , inquit , quod minus est (charitatis) . . . . . ex vitio non est . . . . . qui faciat bonum , & non peccet.* Et Lib. 9. Confess. cap. 13. *Væ etiam laudabili vitæ hominum , si remota misericordia discutias eam.* S. Gregorius Lib. 9. Mor. cap. 1. sic de Jobo scribit : *Sanctus vir , quia omne virtutis nostræ meritum esse vitium conspicit , si ab æterno arbitro districte judicetur , subjungit , &c.* Denique S. Bernardus Serm. 5. de verbis Isaïæ ait , *nostra . . . si quæ est , humilis justitia , recta forsitan , sed non pura , nisi fortè meliores nos esse credimus , quam patres nostros , qui non minus veraciter , quam humiliter ajebant , omnes*

mnes justitiæ nostræ tanquam pannus menstruatae mulieris. *Quomodo enim pura justitia, ubi adhuc non potest culpa deesse? ergo omnia bona opera sunt peccato infecta.*

Nego anteced. Nam laudati Patres per justitiam 1. non intelligunt unum aut alterum opus, sed totam vivendi rationem, qua homo denominatur justus; quæ cum admixta habeat multa peccata venialia, justii indigent Dei misericordia, & ad pœnitentiæ remedia semper confugere debent. Hanc esse mentem SS. Hieronymi & Augustini, patet ex laudatis eorum textibus in confirmationem nostræ sententiæ, quæ est Catholica. 2. Docent ex vitio esse, quòd minor sit nostra justitia; quia quando concupiscentia consensum sive perfectum, sive imperfectum à nobis extorquet, culpa nostra est. S. Gregorius laudato cap. 1. loquitur de justitia, in qua confidimus quasi ex nobis sit, sic enim scribit: *quisquis se auctori bonorum comparat, bono se, quod acceperat, privat, qui enim accepta bona sibi arrogat, suis contra Deum donis pugnat, sanctus autem vir, quia omne virtutis nostræ meritum esse vitium conspicit, si ab æterno arbitro judicetur, rectè subjungit, qui voluerit contendere cum eo, non poterit ei respondere unum promille; cum Deo autem contendere, est non ei, sed sibi gloriam suæ actionis tribuere.*

## §. II.

*Utrum bona opera gratiæ auxilio elicitæ sint meritoria?*

R. De fide est, esse meritoria; sic enim definiit Concilium Tridentinum Sess. 6. Can. 32. *Si quis dixerit, hominis justificati bona opera ita esse dona Dei*

*Dei ut non sint etiam bona ipsius justificati merita . . . anathema sit.*

Probatur 1. ex Scriptura, Matth. 5. *Gaudete, & exultate, quoniam merces vestra copiosa est in cælis: & cap. 2. venite benedicti Patris mei, possidete . . . Regnum, &c. esurivi enim, & dedistis mihi manducare. Rom. 2. reddet unicuique secundum opera ejus, iis quidem, qui secundum patientiam boni operis gloriam . . . & incorruptionem quærent, vitam æternam. 2. ad Tim. 4. bonum certamen certavi, cursum consummavi, fidem servavi. In reliquo reposita est mihi corona justitiæ, quam reddet mihi Dominus in illa die justus Judex.*

Probatur 2. ex Patribus; S. Cyprianus Lib. de Unitate Ecclesiæ ait, *præceptis ejus (Dei) obtemperandum est, ut accipiant merita nostra mercedem.* Sanctus Basilius Lib. de Spiritu Sancto cap. 24. sic scribit: *homo ex operibus justitiæ salvatur.* S. Chrysostomus Hom. 4. de Lazaro: *si justus est Deus, inquit, & illis reddet pro meritis, id est bonis & malis.* S. Hilarius: *de nostro est beata illa æternitas promerenda.* S. Ambrosius l. 1. de Officiis cap. 15. *nonne evidens est meritorum aut præmia, aut supplicia manere post mortem?* Sanctus Augustinus Ep. 194. aliàs 105. ad Sixtum: *nullane sunt merita justorum? sunt planè, quia justi sunt; sed ut justi fierent; merita non fuerunt . . . Sicut merito peccati tanquam stipendium redditur mors, ita merito justitiæ tanquam stipendium vita æterna.* Sanctus Bernardus Serm. 68. in Cantic. *merita habere cures, habita . . . data noveris, perniciofa paupertas, penuria meritorum.*

Dices 1. Roman. 6. *habetur, gratia autem Dei vita æterna: & Psalm. 102. qui coronat te in misericordia & miserationibus.* Unde sanctus Augustinus Concione 2. in Psalm. 70. sic scribit: *Cum præmium venerit,*

venerit, sua dona coronabit; & sanctus Bernardus Serm. 1. de Annuntiatione: *neque, inquit, talia sunt hominum merita, ut propterea vita æterna debeatur ex jure, aut Deus injuriam aliquam faciat, nisi eam donaret; ergo.*

Distinguo anteced. vita æterna est gratia, & miseratio, quatenus Deus gratuito ad eam eligit, vocat, & auxiliis efficacibus, aliàs indebitis, perducit, Conc. est gratia & miseratio duntaxat, nullamque habet rationem mercedis, aut præmii, quasi ea mercede digna non sint bona justorum opera, Nego ant. & quidem juxta interpretationem S. Augustini Lib. de Corrept. & Grat. c. 15. in quo sic habet: *Vita æterna, quam certum est bonis operibus debitam reddi, à tanto Apostolo gratia Dei dicitur, cum gratia non operibus reddatur, sed gratis detur: sine ulla dubitatione confitendum est ideo gratiam vitam æternam vocari, quia his meritis redditur, quæ gratia contulit homini.*

Instabis 1. ex Apostolo Rom. 8. *non sunt condignæ passionēs hujus temporis, ad futuram gloriam, quæ revelabitur in nobis: Ergo.*

Distinguo anteced. Non sunt condignæ, si secundum entitatem, & veluti materialiter spectentur, Concedo: si secundum virtutem & influxum Christi Capitis nostri, per quem voluntariè sustinentur, Nego anteced. Sic Passio Christi v. gr. secundum entitatem spectata similis est passioni plurium Martyrum, qui per crucis tormentum, & alia atrocissima supplicia consummati sunt, nec sub illo respectu condigna fuit exaltatione, quæ subsequuta est. Sed si spectetur secundum valorem & dignitatem personæ, quæ facta est obediens usque ad mortem, meritum ejus, præmium infinitè excedit.



excedit. Porro Christus vivit in Justis tanquam caput in membris, illos movet & regit per communicationem sui spiritus, qui fit in eis fons aquæ salientis in vitam æternam, ut dicitur Joan. 4. Nimirum aqua fontis in canali compressa ascendit ad altitudinem sui principii, seu scaturiginis: atqui Spiritus Sanctus est Deus & vita æterna, ad quam ordinat & dirigit actiones justorum: ergo cum non deficiat in suis consiliis & operationibus, dubium non est quin illas actiones ad tantum præmium promoveat.

Confirmatur: semen quercus secundum entitatem & materiam spectatum non habet proportionem cum procera quercu, virtute tamen continet illam, cum illam producat. Sic in moralibus, qui brevi tempore insignem victoriam retulit, ex qua salus Reipublicæ pendebat, omnium iudicio meritis est illustriores Reipublicæ Dignitates, quamvis ejus actio materialiter spectata non sit cum illis conferenda.

Instabis 2. Lucæ 17. ait Christus, *cum feceritis omnia . . . . . dicite: servi inutiles sumus*; Ergo.

Nego conseq. Ideo enim servos inutiles nos existimare debemus, 1. quia nihil utilitatis per nostra bona opera Deo conferimus: 2. quia cum natura Dei servi simus, potest quidquid libuerit præcipere, etiam nulla proposita mercedis spe. Hinc S. Augustinus Sermone 163. alias 3. de verbis Apostoli, sic exclamat: *O magna bonitas Dei! cui pro conditione reddere debeamus obsequium, utpote servi Domino, amicitiarum præmia nobis reppromittit, ut a nobis obsequia debitæ servitutis extorqueat.* Præterea advertit S. Chrysostomus, Christum Dominum non dixisse nos inutiles servos esse, cum omnia præ-



cepta perfecerimus ; sed iussisse, ut id dicamus ad cavendam superbiam.

Dices 2. S. Augustinus Serm. 164. aliàs 15. de verbis Apostoli in illud Psalmi, *pro nihilo facies illos*, sic scribit : *Nihil invenis unde salves*. Et S. Bernardus cit. Serm. 15. in Psalm. *Qui habitat : totum*, inquit, *hominis meritum est*, *si totam spem suam ponat in eo, qui totum hominem salvum facit* : Ergo.

Nego conseq. Hæc enim & similia intelligenda sunt eo sensu, quo laudata Scripturæ loca, i. e. licet vitam æternam jure non dari meritis, quia merita nostra supponunt gratiam, & gratuitam Dei promissionem : Deus quippe bona opera poterat à nobis exigere absque ulla mercedis pollicitatione, quæ S. Aug. fusiùs explicat l. de Grat. & lib. arbitr. c. 6. 7. & 8. & nos infra demonstrabimus, ubi de conditionibus meriti.

Dices 3. non potest sine Christi injuria aliquid tribui meritis nostris ; quia videremur partiri cum ipso gloriam, dum salutem nostram partim ad ejus merita, partim ad nostra referremus : Ergo.

Nego antec. & ejus confirmationem. Merita quippe nostra sunt ejus dona, cum ipse in nobis operetur velle & perficere, ac proinde non in nobis, sed in ipso solo gloriamur.

Confirmatur responsio. Hoc Christus Salvator est in ordine gratiæ & morum, quod Deus Creator est in ordine naturæ : atqui Deus in eo manifestat suam omnipotentiam, & infinitam virtutem, ne dum insufficientem ostendat, quòd causis secundis efficaciam tribuat : ergo à pari gloria Christi, & infinita vis passionis ejus in eo maximè elucet, quòd non solum sibi, sed & nobis sit merendi principium.

Ergo,

Ergo, inquires, sicut Christus dicitur in nobis operari, rectè etiam diceretur in nobis mereri.

Nego sequelam; quia Christus expleto redemptionis opere, non est in statu merendi, cum non sit amplius viator, sed ex omni parte comprehensor. Itaque jam in nobis non meretur, quia per Passionem suam omnia nobis promeritus est; sed nobis applicat Passionis suæ merita, & est in nobis principium benè operandi & merendi.

### §. III.

*Utrum honestum sit operari intuitu mercedis æternæ?*

R. De fide est, id licitum esse & honestum; ita enim definiit Concilium Tridentinum Sess. 6. Can. 31. *Si quis dixerit, justificatum peccare, dum intuitu æternæ mercedis bene operatur; anathema sit.*

Probatur 1. ex Scriptura Psal. 118. *Inclinavi cor meum ad faciendas justificationes tuas in æternum propter retributionem.* Matth. 6. *Quærite ergo primum regnum Dei, & justitiam ejus.* Luc. 16. *Facite vobis amicos de mammona iniquitatis, ut cum defeceritis, recipiant vos in æterna tabernacula.*

Probatur 2. ex S. Augustino in Psal. 120. *Quid est, inquit, nesciat sinistra, quid faciat dextera tua? id est, quando facis opus bonum, propter vitam æternam fac; nam si opus bonum propterea feceris in terra, ut terrena tibi in cibum Deus tribuat, scit sinistra tua, quid faciat dextera tua; miscuisti sinistram dexteræ tuæ. Noli facere nisi propter vitam æternam: hoc fac, & ideo securus facias, hoc enim mandavit Deus.*

Probatur 3. ratione : cuilibet operanti licet intendere finem, pharmacum videlicet sumere intuitu sanitatis, decertare propter victoriam : atqui finis bonorum operum supernaturalium, est vita æterna : Ergo.

Dices : mercenarium est intueri mercedem : atqui Christus damnat mercenarios, Joan. 10. & S. Thomas 2. 2. q. 19. art. 4. ad 3. docet amorem mercenarium cum vera charitate non posse subsistere : Ergo.

Distinguo maj. Mercenarium est intueri mercedem tanquam finem principalem, ita ut nisi proposita mercede quis injunctum opus non perficeret, Concedo : tanquam finem secundarium, Nego majorem.

Porro justus ita affectus est, ut Deo impetranti obsequeretur, etiamsi mercedem non proponeret.

Instabis 1. sordidum & servile est operari propter mercedem : Ergo.

Distinguo antec. Propter mercedem ipso opere viliores, v.g. evangelizare propter bona temporalia, Concedo : propter mercedem, ad quam naturaliter ipsum opus tendit, scilicet beatitudinem, Nego antecedens.

Instabis 2. Deus debet diligi amore amicitiae, non concupiscentiae, unde S. Bern. 1. de diligendo Deo, *non sine præmio diligitur Deus, etsi absque præmii intuitu diligendus sit*, ergo.

Distinguo antec. Deus non debet diligi amore concupiscentiae non referibili ad amorem amicitiae, quemadmodum concupiscimus alimenta, Concedo : referibili, Nego antec. Deus enim spe & charitate amatur; spes autem est amor concupi-

cupiscentiæ: charitas verò amor amicitiae, ad quem spes introducit, in quantum, inquit S. Thomas 2. 2. q. 17. a. 8. *aliquis sperans remunerari à Deo accenditur ad amandum Deum; & ideo in via generationis spes est prior charitate.* Vera quidem est S. Bernardi sententia, Deum absque præmii intuitu esse diligendum, & ita charitate diligitur: sed charitas non excludit amorem spei, seu concupiscentiæ, imò illum perficit, quia, ut docet S. Thomas loc. cit. *de amicis maxime speramus.*

## §. IV.

*Utrum liceat fiduciam ponere in propriis meritis?*

**N**ota 1. fiduciam nihil aliud esse, quam spem perfectam, ex S. Thoma 2. 2. qu. 129. art. 6.

Nota 2. aliud esse fiduciam nasci ex bonis operibus, aliud fiduciam ponere in bonis operibus. Fiduciam ponit in bonis operibus, qui ea intuetur, ac numerat, atque ex iis confidit, quemadmodum Apostolus dum scriberet 2. ad Timoth. cap. 4. *bonum certamen certavi, cursum consummavi, fidem servavi; in reliquo reposita est mihi corona justitiæ.* Sed quamvis ignoremus an opera nostra sint in Deo facta, proptereaque in iis non confidamus: attamen ex iis fiducia nasci potest; quia Spiritus Sanctus qui habitat in justis, & per quem benè operantur, ex Apostolo Rom. 8. reddit testimonium spiritui eorum, quòd sint filii Dei; datque illis fiduciam clamandi: *Abba, Pater.* Sic Job, etiamsi diceret cap. 9. *verebar omnia opera mea,* nihilominus ex bonis operibus cor ejus



ita paratum erat sperare in Domino, ut nulla adversitate commoveretur ejus fiducia, *etiamsi occiderit me*, inquit c. 13. *sperabo in ipso*. His observatis, ad propositam quæstionem,

R. 1. Ex bonis operibus nascitur fiducia in Deum.

Probatur 1. ex Scriptura. Tobiae 4. *Fiducia magna erit coram summo Deo eleemosyna omnibus facientibus eam*. Rom. 5. *Tribulatio patientiam operatur, patientia autem probationem, probatio verò spem*. 1. ad Tim. 3. *Qui enim benè ministraverint, gradum bonum sibi acquirent, & multam fiduciam in fide, quæ est in Christo Jesu*. 1. Jo. 3. *Si cor nostrum non reprebenderit nos, fiduciam habemus ad Deum*.

Probatur 2. ex sanctis Patribus. Sanctus Cyprianus Tract. de Eleemosyna, *præclara & divina res*, inquit, *salutaris operatio, solatium grande credentium, securitatis nostræ salubre præsidium*.

Sanctus Chrysostomus Hom. 2. in 2. ad Cor. ait: *Optamus ut ex benefactis habeas fiduciam*. Et Hom. 15. Operis imperfecti: *sicut oleum accendit lumen, ita & bona opera excitant fidem cordis, & dant confidentiam animæ*. S. Augustinus Præfat. in Psalm. 31. *Ille sperat, qui bonam conscientiam gerit: ut ergo speret regnum, & credat, operetur*.

Probatur 3. ratione. 1. Ex bonis operibus nascitur bona conscientia, sicut ex malis mala: atqui ex bona conscientia nascitur fiducia: Ergo. 2. Actus boni virtutes generant ac perficiunt: Ergo spes, quæ est virtus Theologica, ex bonis operibus crescit, ac perficitur.

R. 2. Absolutè potest poni fiducia in operibus verè bonis: in praxi tamen multis de causis non est ponenda.

Prima



Prima pars probatur 1. ex Scriptura Lib. 2. Esdræ c. 5. ait Nehemias vir sanctus: *Memento mei, Deus meus, in bonum, secundum omnia, quæ feci populo huic.* Psal. 17. David ex multa fiducia dicit: *Retribuat mihi Dominus secundum justitiam meam.* Et Apostolus c. 4. 2. ad Tim. *Bonum certamen certavi, cursum consummavi, fidem servavi, in reliquo reposita est mihi corona justitiæ, quam reddet mihi Dominus in illa die iustus Iudex.*

Probatur 2. ratione; quia fidelis est Deus in promissis suis. Ergo qui conscius est se perfecisse ea, pro quibus Deus pollicitus est mercedem, potest fidenter dicere, juxta S. August. feci quod jussisti, imple quod promissisti.

Secunda pars, nempe multis de causis fiduciam in bonis operibus non esse ponendam.

Probatur 1. ex auctoritate Ecclesiæ, quæ hanc orandi formam nobis præscribit, *Deus, qui conspicias, quia ex nulla nostra actione confidimus.*

Probatur 2. multiplici ratione. Prima, quia *nescit homo utrùm amore, an odio dignus sit.* Eccl. 6. Secunda, quia nobis non constat an opera nostra sint in Deo facta, & ex recta intentione procedant; namque *pravum est cor omnium & inscrutabile; quis cognoscet illud?* ait Dominus Jeremiæ c. 17. & S. Greg. *sæpe opus nostrum causa est damnationis, quod putatur esse profectus virtutis.* Tertia, quia nullum opus est meritorium, ex dicendis, nisi sit supernaturale, & à Spiritu Sancto movente: atqui ex dictis Tract. de Gratia nullus absque speciali Dei revelatione certò scire potest, an Spiritu Dei moveatur: Ergo. Quarta, quia tam frequentes sunt nostri lapsus, ut veniam petere videatur tota nostra justitia, meritòque timere debeamus, ne Deus

nos projiciat à facie sua, & Spiritum Sanctum suum auferat à nobis, ac retrahat auxilia efficacia, sine quibus nemo perseverat. Quinta, quia periculum est, ne ex bonis operibus inflemur, gloriemurque in nobis, sicut Phariseus Luc. 18. namque ex S. Chrysostomo Hom. 3. in illud, *elevatum est cor ejus* (Oziæ) 2. Paral. c. 26. *nihil perinde gignit superbiam, ut bona conscientia, nisi advigilemus.* Unde & Christus sciens, quod post benefacta nos hic morbus adoritur, dicebat discipulis: cum feceritis omnia, dicite, quia servi inutiles sumus. Quando nihil arbitramur operatos egregium, amplius etiam ob talem meremur affectum quam propter opera ipsa, quæ fecimus. Minimum itaque de se sensisse tam magnum est, quam magnas res fecisse. Et S. Bernardus Serm. 68. in Cant. *Habet merita* (Ecclesia) *sed ad promerendum, non ad præsumendum.* Ipsum non præsumere, nonne promereri est? Ergo eò præsumit securius, quò non præsumit.

Atque ex his responsionibus facile conciliantur, qui inter se pugnare videntur textus, tum Scripturæ, tum SS. Patrum, ubi sermo est de merito & fiducia bonorum operum.

#### §. V.

#### *Quotuplex sit meritum?*

R. **D**uplex, aliud de condigno, aliud de congruo. Meritum de condigno necessario præsupponit gratiam sanctificantem, estque iustorum proprium: meritum verò de congruo nonnunquam justificationem præcedit, estque commune iustis & peccatoribus, qui ad justificationem disponuntur; nam iustus gratiam alteri mereri

mereri potest de congruo, ut infra dicetur, & bona opera peccatoris pœnitentis sunt meritoria de congruo. Ita Theologi communiter, paucis exceptis, ut Durando, & Soto.

Ac 1. quidem Durandus in 2. dist. 27. qu. 2. contendit nullum posse esse in creatura condignum meritum, quia Deus non potest illi constitui ita debitor, ut nisi mercedem redderet, injustus foret.

Sotus verò Lib. 2. de Natura & Gratia cap. 4. probat ex S. Augustino nullum ante justificationem agnoscendum meritum. Sic enim habet S. Doctor Epist. 186. aliàs 106. *Si aliquid boni operatur homo, ut gratiam mereatur, non ei merces imputatur secundum gratiam, sed secundum debitum. Si autem credit in eum, qui justificat impium, ut deputetur Fides ejus ad justitiam, profectò antequam gratia justificetur impius, quid est, nisi impius?* Deinde S. Thomas, qui 1. 2. quæst. 104. artic. 6. concesserat justum alteri mereri posse de congruo primam gratiam, negat art. 7. posse similiter sibi mereri reparationem post lapsum; *Desiderium*, inquit, in responsione ad primum, *quo quis desiderat reparationem post lapsum, justum dicitur, & similiter oratio: quia tendit ad justitiam; non tamen ita quòd justitiæ innitatur per modum meriti, sed solum misericordiæ.* Et ratio est, quia qui meretur, acquirit jus ad id quod meretur; atqui peccator nullum habet jus ad gratiam sanctificantem, & remissionem peccatorum; aliàs esset ei debita.

Confirmatur Durandi simul & Soti sententia ex Concilio Tridentino; namque Patres Can. 32. Sess. 6. simpliciter docent hominis justificati bona opera ita esse bona Dei, ut sint etiam bona

ipsius justificati merita; de condigno autem nihil prorsus. Et Can. 7. cavent dicere opera, quibus peccatores disponuntur ad justitiam esse meritoria. Sed satis ipsis est definire non esse peccata. Ergo ex Concilio Tridentino nec bona justorum opera sunt meritoria de condigno, nec pœnitentium de congruo. Nihilominus

Probatur utrumque membrum allatæ divisionis, ac primò quidem contra Durandum, quòd in justis benè operantibus agnoscendum sit meritum de condigno; quia ad meritum de condigno necesse non est, quemadmodum supponit Durandus, ut debeatur merces, seu præmium ex stricta justitia; sed satis est, quòd opus proportionem habeat ad mercedem, & intercedat promissio ex parte remuneratoris. Ista duo tam necessario requiruntur, ut si alterutrum desit, nullum sit meritum propriè dictum, nec merces debita: aliquis v. gr. magna animi fortitudine, & singulari prudentia hostes patriam devastantes profligaverit, dignus quidem est, qui Imperator à Rege præficiatur exercitibus; sed illud imperium non est illi debitum, si nullum intercesserit pactum, aut promissio: contra verò Rex promiserit ejusmodi imperium Medico, qui filium à lethali morbo sanaverit, curatio illa non erit meritum, sed mera conditio sine qua non; quia nec ordinem, nec proportionem habet ad tantam dignitatem. Atqui opus justì ex gratia elicitum est proportionatum, & æquivalens vitæ æternæ; justus enim, utpotè Filius Dei adoptivus, per gratiam sanctificantem factus consors naturæ divinæ, ut loquitur S. Petrus Epist. 2. cap. 1. & in esse divino constitutus, jus habet ad vitam æternam, tanquam



quam ad hæreditatem paternam, opera ejus per motionem Spiritus Sancti ad eam tendunt ac diriguntur, ut ad proprium terminum, exceduntque quodlibet aliud inferius præmium, adjunctam insuper habent Dei promissionem: Ergo sunt vitæ æternæ meritoria de condigno.

Confirmatur ex S. Thoma 1. 2. qu. 114. art. 3. in quo sic scribit: *Si autem loquamur de opere meritorio, secundum quod procedit ex Gratia Spiritus Sancti, sic est meritorium vitæ æternæ ex condigno; sic enim valor meriti attenditur secundum virtutem Spiritus Sancti moventis nos in vitam æternam, secundum illud Joan. 4. Fiet in eo fons aquæ salientis in vitam æternam: Attenditur etiam pretium operis secundum dignitatem gratiæ, per quam homo consors factus naturæ divinæ, adoptatur in Filium Dei, cui debetur hæreditas ex ipso jure adoptionis, secundum illud, Rom. 8. Si Filii & hæredes.*

Probatur 2. contra Sotum opera supernaturalia, quibus peccator disponitur ad justificationem, esse meritoria de congruo, 1. ex sancto Augustino Libro de Prædestinatione Sanctorum: *Quis, inquit, dicet eum, qui jam cæpit credere, ab eo, in quem credidit, nihil mereri?* Et Epist. 194. aliàs 105. *Nec ipsa peccati remissio sine aliquo merito est: neque enim nullum meritum fuit illius, qui dicebat, propitius esto mihi peccatori.* Denique Epist. 186. aliàs 106. *Si quis dicat quòd gratiam bene operandi Fides mereatur, negare non possumus, imò gratissimè confitemur.* Quando ergo S. Doctor in textu, quem laudat Sotus ex eadem Epistola, negat impium aliquid boni operari, ut gratiam mereatur, manifestè loquitur de prima Gratia ad credendum necessaria, quam nullo bonum opus præcedit saltem meritorium, cum



cùm Fides sit prima radix meriti; *Hanc fidem*, inquit, *volumus habeant* (Semipelagiani) *ut impetrent charitatem.* 2. S. Augustinus, & alii sancti Patres, qui contra Semipelagianos decertarunt, constanter docent pium credendi affectum, & primum salutis desiderium habere rationem alicujus meriti, nec proinde in nobis exurgere solis viribus liberi arbitrii, alioquin gratiam non fore gratiam, sed mercedem. Ergo in eorum sententia quoddam imperfectum meritum in peccatoribus præcedit justificationem.

Ex silentio autem Concilii Tridentini hoc unum colligi potest, scilicet Patres nihil circa præsentem controversiam definiisse, quod ultrò fatemur. Quanquam favere videtur communi sententiæ, cùm Can. 32. Sess. 6. definit justificationem bonis operibus verè mereri augmentum gratiæ, & vitam æternam; nam particula, *verè*, denotat meritum de condigno, utpotè simpliciter dictum meritum; quippe de congruo est meritum secundum quid; nemo enim absolute & simpliciter dixerit peccatorem bonis suis operibus mereri remissionem peccatorum, quæ est opus misericordiæ, non verò justitiæ, licet eam præcedant bona opera, tanquam dispositiones in adultis requisitæ, & de congruo meritoria.

Quod autem opponitur ex sancto Thoma, illud intelligendum est de justo, qui post multa bona opera lapsurus est in grave peccatum, à quo neque de condigno, neque de congruo meretur resurgere, propter illa opera, quæ ejus lapsum præcesserunt: quod verissimum est, quia præcedentia illa merita extincta sunt per peccatum subsequens, juxta illud Ezech. capite 18. quod laudat

dat sanctus Doctor : Si . . . . . averterit se justus à justitia sua , & fecerit iniquitatem . . . . . omnes justitiæ ejus , quas fecerat , non recordabuntur.

## §. VI.

*De Conditionibus ad meritum de condigno requisitis.*

**R**em aggredimur in praxi maximè necessariam, & sine qua non proderunt quæ hætenus tradidimus tum in hocce Tractatu de bonitate, & sine actuum humanorum, tum in præcedenti de Gratia. Namque, ut argumentatur sanctus Augustinus tract. 45. in Joan. *Cui non datur semper vivere, quid prodest bene vivere?* Annon in vacuum gratiam accipit, qui fructum, ad quem data est, hoc est, meritum condignum ex ea non colligit? ad quid felicitatem nostram longè aspiciamus, si desit quo eam promereamur? Proponitur autem ut merces, nonnisi pretio ac merito bonorum operum comparanda: *Carere meritis, satis ad judicium est . . . . . perniciofa paupertas, penuria meritorum,* inquit S. Bernardus Serm. 68. in Cant. Servus, qui inutilem servaverat pecuniam Domini sui, projicitur in tenebras exteriores, Matth. 25. Quin Tertullianus, & post eum S. Gregorius Lib. 33. Moral. cap. 26. Deum in futuro judicio nobis exhibent veluti nummularium, qui examinat, ponderatque monetam, ne adulterina sit, aut levior: *Qui, inquit, numisma percipiunt, prius qualitatem illius, post figuram, ad extremum pondus examinant, ne sub auri specie æs lateat, aut hoc quod veraciter aurum est, monetæ reprobæ figura debonestet, aut quod & aurum, & rectæ figuræ est, hoc non integrum pondus levitet.*

*tet.* Singulorum ergo plurimi interest nosse, & Pastorum docere, qui sint proprii characteres meriti condigni, & præveniendū iudiciū Dei perpendere, utrum in bonis nostris operibus nulla desit ex conditionibus ad verum meritum requisitis. Itaque

Q. *Quot sunt conditiones ad meritum de condigno requisitæ?*

R. Ex constanti Catholicorum doctrina sex requiruntur, & sufficiunt. 1. Opus debet esse bonum. 2. Supernaturale. 3. Ab homine iusto. 4. Liberum. 5. In statu viæ elicited. 6. Denique merces debet ei promitti.

Probatur responsio quoad singula, quamvis in catechesibus satis fuerit tria priora exponere; quia præterquam quod memoria puerorum, ac rudiorum non est nimis oneranda, si tria illa in nostro opere adfuerint, cætera non deerunt, etiam si de illis non cogitemus.

## PRIMA CONDITIO.

**E**st cuique naturali lumine notum non esse opus laudabile, ac præmio dignum, nisi fuerit bonum; nam ex Tertulliano natura omne malum pudore & timore perfudit, adeo ut qui mali operis conscius est, naturaliter de eo erubescat, & inde puniri timeat, si non ab hominibus, saltem à Deo: *Tribulatio & angustia in omnem animam hominis operantis malum*, inquit Apostolus Rom. cap. 2. Et cap. 6. *stipendia enim peccati, mors, & quidem æterna*, nisi Deus misereatur; malitiæ enim individua comes est miseria. Quod si quis contendat dari opus in exercitio, seu individuo, nec bonum,

bonum, nec malum, sed prorsus indifferens, quod supra negavimus; concedat necesse est illud non esse laude ac præmio dignum, sicut nec pœna, aut vituperio. Deinde ex communi omnium sensu, nemo mercedem ab eo expectaverit, in cuius gloriam & obsequium non fuerit operatus; longè enim absurdissimum foret, si quis à te remunerari expeteret, ex eo quòd suam vineam in proprium commodum diligenter excoluisset; atqui nullum opus cedit in Dei gloriam & obsequium, nisi fuerit bonum: Ergo.

Huc autem revocare necesse est, quæ de bonitate actuum humanorum præmittenda duximus; cum ex iis nostrum pendeat meritum, neque enim satis est operari bonum, nisi & benè. Annon artifex, qui injunctum opus elaboravit, laudabilem materiam adhibuit, putà pretiosum pannum, sed malè, & præter artis regulas concinnavit, pœnam meretur, nedum mercedem? Sic se habent apud Deum, qui operibus ex objecto bonis vacant, publicam rem administrant, familiam regunt, agrum colunt, & quæ sunt honesti sui status ac conditionis, exequuntur; sed aliò, quàm ad vitam æternam ista referunt, putà ad lucrum, auram popularem, & favorem humanum: *Officium quippe nostrum*, inquit S. Augustinus Conc. 12. in Psal. 118. *non initio, sed fine pensandum est, ut scilicet, non tantum si bonum est quod fecimus, sed præcipue si bonum est propter quod fecimus, cogitemus.* Hinc Psalmista Deum enixè rogat, & ex illo Ecclesia, dicens: *Averte oculos meos, ne videant vanitatem, in via tua vivifica me*; hoc est temporalia non intendam, sed spiritualia; vanitas enim vanitatum omnia quæ sub Sole geruntur, Eccli. 1. *in qua vanitate,*  
pergit



pergit S. Doctor, præcipuum locum obtinet amor laudis humanæ, propter quam multa magna fecerunt, qui Magni in hoc sæculo nominati sunt, multumque laudati in civitatibus gentium quærentes, non apud Deum, sed apud homines gloriam . . . . ad quam pervenientes perceperunt mercedem suam vani vanam. Ab hac vanitate volens Dominus avertere oculos suorum: Attendite, inquit, ne justitiam vestram faciatis coram hominibus, ut videamini ab eis, alioquin mercedem non habebitis apud Patrem vestrum, qui in cœlis est . . . . Monuit ne etiam propter pecuniam, dicens: Non potestis Deo servire & mammonæ? Monuit ne propter ipsum necessarium victum, atque vestitum, dicens: Ne solliciti sitis animæ vestræ quid manducetis, neque corpori vestro, quid induamini: Si enim vanum est propter hominum laudes bona facere, quanto vanius propter adipiscendam pecuniam, vel augendam, sive retinendam, & si quid ejusmodi est commodi temporalis, quod nobis accidit extrinsecus, quia omnia vanitas? Ex quibus concludit Lib. 2. de Serm. Domini in monte cap. 25. Ergo simplici corde tantummodo propter regnum Dei debemus operari bonum ad omnes. Non autem in hac operatione vel solam, vel cum regno Dei mercedem temporalem cogitare; alioquin mercedem non habebimus apud Patrem nostrum, qui in cœlis est, quin ab illo audituri sumus tristem illam vocem: Amen dico vobis, receperunt mercedem suam.

Oremus igitur, & multum oremus, cum opus aliquod meditamur, ut quod propriis viribus non licet, avertat Deus oculos nostros, ne videant vanitatem, vigilemusque ejus auxilio nixi, ne quod in nobis remaneat cupiditatis, in decursu operis  
sensum



fenfim germinet, inficiatque quod ad ejus gloriam duro corde fufceperamus; fuccidua enim est illa arbor, feu radix mala, quæ non potest bonos & condignos fructus facere.

Næque verò timendum est, ne regnum cœlorum, & justitiam ejus unicè quærentibus vitæ hujus necessaria defint, cum scripto teneamus Dei promissum. Matth. 6. *Hæc omnia adjicientur vobis*, etiam de iis non cogitantibus; sicut enim semen mandatum terræ, dormiente agricola, germinat, crescit, & in messiem maturefcit; sic quodlibet opus strenuè elaboratum, naturaliter parit commodum temporale, etiamsi nonnisi regnum Dei, & justitiam ejus intenderit. An caupo v. g. qui desiderio consequendæ vitæ æternæ accensus, diverfantes ad se hospites humanè excipit, minus emolumenti capiet, quàm qui lucro inhians, hocce officio defungitur, aut quivis operarius minorem mercedem consequetur, ex eo quòd omnem laborem & industriam ad Deum referat? Imò multò ampliùs lucrabitur; tum quia finis nobilitas, ac præmii magnitudo acuit diligentiam & solertiam; sicut autem umbra corpus, ita diligentem operarium fama fequitur, & multitudinem ad ipsum trahit: tum præsertim, & magis ad sensum textus mox laudati; quia Deus ut providus Pater Filiis sibi obsequentibus necessaria suppe- ditat, rectam eorum intencionem remunerat benedictionibus, etiam temporalibus; harum quippe meritoria sunt de congruo bona justorum opera: *Pietas autem*, inquit Apostolus, 1. Timoth. 4. *ad omnia utilis est, promissionem habens vitæ, quæ nunc est, & futuræ.*

Quæ cum ita sint, lugendi profectò, & quàm sapissimè à Pastoribus commonendi innumeri homines, quibus pereunt opera, alioquin ex officio bona, & condigna vitæ æternæ pretia, si ad illam, ut par est, referrentur. Namque ad comparandum regnum cœlorum necessarias impensas faciunt agricolæ, nec plura exiguntur, quàm impenduntur ab artificibus, & aliis, qui utiliter pro Republica laborant, ac divinæ providentiæ diu noctuque sudantes deserviunt, finem tantummodo mutent, non contemplantes quæ videntur, sed quæ non videntur, ut loquitur Apostolus, & æternum gloriæ pondus in præmium certò consequentur. Verùm quia ad ejusmodi opera sola incitat cupiditas, sola vires & animos subministrat, meritis exeunt vacui, tandemque ad lucem veritatis evigilantes exclamare coguntur cum illo, qui dicebat: *Præceptor per totam noctem laborantes nihil cepimus*, Luc. 5.

## SECUNDA CONDITIO.

Quodlibet opus moraliter bonum meritorium non est, etiam de congruo, nisi sit supernaturale. Est Fidei dogma, variis in Conciliis definitum contra Pelagianos & Semipelagianos, & confirmatum in Tridentino, Sess. 6. Can. 1. 2. & 3. *Omnem palmitem*, inquit Christus Joan. 15. *in me non ferentem fructum, tollet eum* (Pater). Et vers. 5. *qui manet in me & ego in eo, hic fert fructum multum: quia sine me nihil potestis facere*. Unde Patres Tridentini cap. 16. ejusdem Sessionis sic docent: *Cum ille ipse Christus Jesus, tanquam caput in membra, & vitis in palmites, in ipsos justificatos jugiter*  
virtu-

*virtutem influat, quæ virtus bona eorum opera semper antecedit, & comitatur, & subsequitur, & sine qua nullo pacto Deo grata & meritoria esse possent. Et ratio est, quia debet esse proportio, & quædam æqualitas inter opus & mercedem, inter meritum & præmium; nemo enim dixerit vile opus bajuli v. gr. mereri primos Reipublicæ honores: atqui nulla est proportio inter opus naturale, & præmium supernaturale; multoque magis distat gloria cœlestis, ab actu moraliter bono, etiam heroico, quàm prima regni dignitas à vilissimo bajuli opere, cum gloria cœlestis sit divinum quid, excedatque omnem ordinem creatum. Ergo nullus actus potest esse tanti præmii meritorius, nisi sit supernaturalis & ordinis divini: Opus meritorium hominis, inquit S. Thomas 1. 2. qu. 104. art. 3. dupliciter considerari potest: uno modo secundum quod procedit ex libero arbitrio: alio modo secundum quod procedit ex Gratia Spiritus Sancti. Si consideretur secundum substantiam operis, & secundum quod procedit ex libero arbitrio; sic non potest esse condignitas, propter maximam inæqualitatem. Si autem loquamur de opere meritorio secundum quod procedit ex Gratia Spiritus Sancti, sic est meritorium de condigno vitæ æternæ: sic enim valor meriti attenditur secundum virtutem Spiritus Sancti moventis nos in vitam æternam; attenditur enim pretium operis secundum dignitatem gratiæ, per quam homo consors factus naturæ divinæ adoptatur in Filium Dei, cui debetur hæreditas ex ipso jure adoptionis.*

Q. 1. Quot requiruntur ut actus sit supernaturalis?

R. Duo, nempe principium supernaturale, & objectum, seu finis supernaturaliter movens.

Principium quidem; quia causa naturalis non nisi naturaliter operatur. Ut ergo voluntas humana, quam diximus esse principium actuum moralium, supernaturaliter agat, Christo tamquam capiti jungatur, unumque cum ejus Spiritu principium efficiatur necesse est, juxta illud Joan. 15. *Qui manet in me, & ego in eo, hic fert fructum multum; quia sine me nihil potestis facere.* In Christo autem manendum, non habitu duntaxat, & per gratiam sanctificantem, sed & actu, & per actualem ejus Spiritus influxum. Sicut enim oculus plenissimè sanus, ex S. Augustino, sine corporali lumine videre nequit; sic anima quantumcumque per gratiam habitualementem, seu sanctificantem sanata, absque actuali Spiritus Sancti influxu & lumine, supernaturaliter non operatur.

Attrahitur autem vivificus ille Spiritus per orationem, juxta illud Psal. 118. *Os meum aperui, & attraxi Spiritum,* quàm ideò virtualiter continuam esse debere docet S. Thomas, & nos fusè explicamus Tractat. de Religione, §. 70. de Oratione. Ergo qui propria nituntur industria, & neglecto orationis studio, toto naturæ impetu feruntur ad opera exteriora, putà mercaturam, agriculturam, lectionem, &c. non videntur operari supernaturaliter, nec proinde apud Deum mereri; quia principium, ex quo procedunt ejusmodi opera, est merè naturale.

Objectum quoque, seu finis supernaturaliter movens, concurrere debet ad actum supernaturalem, quia omnis actus speciem & essentiam desumit ab objecto motivo, ac proinde actus erit naturalis, si motivum sit naturale, qualis est civilis honestas, familia alenda, captanda hominis be-  
nevo-



nevolentia, lucrum faciendum, scientia acquirenda. Cùm autem certò scire non possimus, utrùm ista duo ad actus nostros concurrant, nonnisi ex quibusdam conjecturis colligimus nos supernaturaliter operari. Unde verò id conjicere liceat, jam diximus suprà, cap. 3.

Q. 2. *Ad meritum de condigno requiritur ut opus supernaturale nulla lege sit præceptum, sitque, ut ajunt, supererogationis?*

R. Minimè, imò affirmans sententia communiter à Theologis damnatur ut temeraria, & erronea.

Probatur 1. ex Scriptura, quæ servantibus mandata vitam æternam in mercedem promittit, Luc. 6. *Diligite inimicos vestros . . . & erit merces vestra multa.* Matth. 16. *Si . . . vis ad vitam ingredi, serva mandata.* Et cap. 25. datur regnum Dei propter opera misericordiæ, & quidem præcepta; qui enim ea omiserunt, mittuntur in gehennam ignis. 2. Tim 4. *Fidem servavi, in reliquo reposita est mihi corona justitiæ, quam reddet mihi . . . justus Judex.*

Probatur 2. Ex Concilio Tridentino Sess. 6. cap. 16. Ubi docet nihil justificatis deesse; *Quominus plenè illis quidem operibus, quæ in Deo sunt facta, divinæ legi pro hujus vitæ statu satisfecisse, & vitam æternam suo etiam tempore (si tamen in gratia decesserint) consequendam, verè promeruisse censeantur.*

Probatur 3. ratione; Quia laudabile est implere præceptum cum recta intentione, & pio affectu. Ergo.

Dices Luc. 19. habetur: *Cùm feceritis omnia quæ præcepta sunt vobis, dicite, servi inutiles sumus, quod debuimus facere, fecimus.* Enimverò servus nec do-



minum sibi debitorem constituit, dum facit quod debet, nec debitor creditorem, cui solvit debitum: Ergo.

Nego conseq. Quia meritum apud Deum non fundatur in commodo & utili, quod ei conferamus, sed in voluntaria honestate operis, quæ in ejus gloriam cedit, alioquin nec mereremur amplectendo divina Consilia; cùm nihil utilitatis Deo inde accrescat.

Ad confirmationem respondeo, apud homines meritum non repeti, sicut apud Deum, ex honestate operis, sed ex labore in eorum utilitatem impenso, ac proinde par non est utrobique ratio.

Q. 3. *Actus supernaturalis cujuslibet virtutis, estne in homine justo meritorius de condigno?*

R. Theologi in oppositas abeunt sententias; alii affirmant, alii negant, contenduntque nulum in homine justo actum esse meritorium de condigno vitæ æternæ, nisi sit elicitus, aut imperatus à charitate. Ita S. Thomas 1. 2. qu. 114. art. 4. Bellarminus, & plures alii, quibus in re tanti momenti adhærendum videtur, cùm hæc sententia sola in praxi sit tuta: *Meritum vitæ æternæ*, inquit Angelicus Doctor, *primò pertinet ad charitatem; ad alias autem virtutes secundariò secundum quoddam earum actus à charitate imperantur.* Et in responsione ad tertiam objectionem, nempe quoddam actus Fidei, patientiæ, & fortitudinis sint maxime meritorii, ut patet in Martyribus, sic habet: *Fidei actus non est meritorius, nisi Fides per dilectionem operetur, ut dicitur Gal. 5. similiter etiam actus patientiæ & fortitudinis non est meritorius, nisi aliquis ex charitate hæc operetur, secundum illud 1. ad Cor. 13. Si tradidero corpus meum, ita ut ardeam, charitatem*

tem autem non habuero, nihil mihi prodest. Quæ responsio excludit effugium Patronorum oppositæ sententiæ, qui S. Thomam in Corpore articuli interpretari conantur de actibus virtutum acquisitarum. In hac enim responsione expressè meminit actus Fidei, quem negat esse meritorium vitæ æternæ, nisi imperetur à charitate.

Probatur autem illa sententia 1. ex Scriptura, quæ disertis verbis beatitudinem charitati promittit. Joan. 14. *Qui autem diligit me, diligitur à Patre meo, & ego diligam eum, & manifestabo ei meipsum.* 1. Cor. 2. *Oculus non vidit, nec auris audiuit, nec in cor hominis ascendit, quæ præparavit Deus iis, qui diligunt illum.* Jac. 1. *Beatus vir qui suffert tentationem, quoniam cum probatus fuerit, accipiet coronam vitæ, quam repromisit Deus diligentibus se.*

Quando igitur regnum cælorum promittitur pauperibus spiritu, misericordibus, persecutionem passis propter justitiam, subintelligi debet conditio, ut supra interpretabatur S. Thomas, modò ista bona imperentur, diriganturque à charitate; quia ex Apostolo cit. Epist. ad Corinth. cap. 13. *Si habuero omnem fidem . . . . . si distribuero in cibos pauperum omnes facultates meas, & si tradidero corpus meum, ita ut ardeam, charitatem autem non habuero, nihil mihi prodest.*

Probatur 2. ratione duplici. Prima, quia debet esse proportio inter meritum & præmium. Cum ergo gloria æterna sit præmium præstantissimum, per actum præstantissimum, scilicet charitatis, obtineri debet. Secundus, quia major gloria non retribuetur præcisè ei, qui plus pro Christo laboraverit, sed qui plus eum dilexerit, ut patet in beata Virgine, quæ tot labores non sustinuit, quot Apostoli.

Ergo.

K 4

TER-

## TERTIA CONDITIO.

**B**ajus Doctor Lovaniensis absoluto Concilio Tridentino, cui interfuerat, docuit propositione decima tertia sententiam, quæ docet opus bonum citra gratiam adoptionis factum, non esse regni cœlestis meritorium, inter errores Pelagii numerandam. Et propositione 16. rationem meriti in eo solùm consistere, quòd quis obediat Legi Divinæ; quas propositiones cum pluribus aliis proscripserunt Summi Pontifices Pius V. Gregorius XIII. & Urbanus VIII.

Certum est igitur statum gratiæ sanctificantis esse conditionem necessariam meriti de condigno.

Probatur 1. ex Scriptura Ezech. 18. Si . . . . .  
*averterit se justus à justitia sua . . . . . omnes justitiæ ejus, quas fecerat, non recordabuntur.* Porro si peccatum subsequens delet merita prius acquisita, à fortiori impedit, quo minus nova acquirantur. Joan. 15. *Sicut palmes non potest ferre fructum à semetipso, nisi manserit in vite; si nec vos, nisi in me manseritis:* Atqui Christus non manet in nobis, nisi per charitatem, & gratiam sanctificantem, juxta illud, 1. Joan. 4. *Qui manet in charitate, in Deo manet, & Deus in eo.* Enimverò peccatum lethale animam separat à Deo, Isaïæ 59. *iniquitates vestræ diviserunt inter vos & Deum vestrum.*

Probatur 2. auctoritate tum Concilii Tridentini Sess. 6. ,, cap. 16. suprà laudato, ubi ad meritum prærequirit gratiam sanctificantem: tum Summorum Pontificum, qui oppositam Baji sententiam proscripserunt: tum sanctorum Patrum; sanctus enim Augustinus Lib. 1. ad Bonifacium  
 cap. 2.

cap. 2. sic scribit : *Non vivunt rectè homines, nisi effecti filii Dei.* Et Lib. de Fide & Operibus cap. 14. *Sequuntur bona opera hominem justificatum ; non præcedunt justificandum.* Sanctus quoque Gregorius Lib. 22. Moral. cap. 2. expendens illud Genes. 4. *Respexit . . . . ad Abel & ad munera ejus*, docet eum ab omni malitia debere esse purgatum, qui cupit ut sua munera Deo placeant.

Probatur 3. ratione multiplici. Prima: vita æterna promittitur, ut hæreditas: atqui hæreditas non servatur nisi filiis: *Si . . . . . filii & hæredes*, inquit Apostolus, Rom. 8. *Servus . . . . non manet in domo in æternum.* Joan. 8. Secunda, si ad meritum de condigno status gratiæ sanctificantis non esset necessarius, sequeretur peccatorem posse mereri de condigno remissionem peccatorum, & infusionem gratiæ sanctificantis; qui enim meretur hæreditatem, eo ipso meretur adoptari in filium, quia, ut jam observavimus, hæreditas non datur nisi filiis, atqui à sensu Catholicorum omninò alienum est peccatorem veniam mereri de condigno: *Dicat peccator*, inquit S. August. in Psalm. 7. *Salvum me fac, Domine, propter misericordiam tuam . . . . quia nullum habet meritum peccator, qui adhuc justificari desiderat.* Tertia, quia idem simul mereretur vitam æternam, & damnationem: vitam quidem, ut contendit opposita sententia: damnationem verò, quia peccator est, & reus pœnæ æternæ: atqui ista duo sunt manifestè contradictoria: Ergo. Quarta, si personæ dignitas nihil conferret ad meritum, actiones Christi non fuissent infiniti meriti; nam secundum entitatem spectatæ erant finitæ, & ejusdem speciei cum bonis justorum operibus. Sicut ergo suum valorem



hauriebant ab ejus persona infinitè digna ; sic bona justì opera sunt apud Deum accepta ; quia procedunt à persona grata & amica. Deus, Genes. 4. 1. respexit ad Abel justum, deinde ad munera ejus. Idipsum in hominum moribus positum cernimus ; si enim munuscula ad aliquem deferantur , prius interrogant à quo fuerint missa : si ab amico , gratanter accipiuntur : si verò ab inimico , contemnuntur.

Dices 1. Scriptura illud unum proponit ad consequendam vitam æternam, nempe mandatorum observationem : *Si . . . . vis ad vitam ingredi, serva mandata.* Ergo.

Distinguo anteced. Proponit hominibus justificatis, & in Christo regeneratis, Conc. Peccatoribus, Nego anteced. *Nisi enim quis renatus fuerit ex aqua & Spiritu Sancto, non potest introire in regnum Dei.*

Dices 2. Hæc doctrina peccatores eo ipso à bonis operibus avocat, quo eos spe remunerationis dejicit : Ergo.

Nego antecedens. Quamvis enim bona opera non sint in peccatoribus condigna vitæ æternæ merita, sunt tamen necessariæ dispositiones ad justitiam : debitæ satisfactiones, sine quibus Deus justè iratus non placatur : salutaria remedia, quibus neglectis, nec morbi animi depelluntur, nec sauciata conscientia pristinae sanitati restituitur. Unde peccator eò instantius piis operibus incumbere debet, quò in majori periculo versatur, quàm justus. Ille dura Diaboli servitute premitur, iste in spe filiorum Dei gloriatur : illi extrema minatur Deus, nisi resipiscat, & læsæ suæ justitiæ satisfaciatur, hunc pollicitationibus recreat,



recreat, accenditque: ille stat ad veniam incertus, & misericordiam implorat timidus: iste coronam gloriæ expectat justo Dei adjutorio innixus, juxta illud Psal. 7. *Justum adjutorium meum à Domino.* Quot igitur in peccatoribus incentiva boni operis; quot stimulis urgendi à Pastoribus, ut per pœnitentiam in gratiam Dei quàm citissimè redeant, & bonæ arbores effecti fructus ferant dignos vitæ æternæ!

## QUARTA CONDITIO.

Opus condignum debet esse liberum à necessitate, ut constat ex Constitutionibus ubique receptis Summorum Pontificum Innocentii X. & Alexandri VII. qui hanc Jansenii propositionem ut hæreticam damnarunt: *Ad merendum & demerendum in statu naturæ lapsæ; non requiritur in homine libertas à necessitate, sed sufficit libertas à coactione.*

Probatur 1. ex Scriptura Eccli. 31. justus dicitur mereri laudem & gloriam, quia *potuit transgredi, & non est transgressus: facere mala, & non fecit.* 2. Ex S. Augustino, qui Lib. 5. de Civit. cap. 7. docet nulla à justitia bonis præmia, & malis supplicia esse constituta, si à Dei præscientia necessitas imprimatur. 3. Ratione; quia, ut quis sit præmio vel pœna dignus, debet habere dominium suæ actionis, & de ea disponere prout vult; idè enim est laudandus, aut vituperandus, quòd seipsum moverit, ac determinaverit ad opus bonum vel malum, à quo abstinere poterat: atqui agens ex necessitate absoluta, non habet dominium suæ actionis, nec de ea disponit prout vult tanquam dominus: ergo nec præmio nec  
pœna

pœna est dignus. Plura vide in hanc rem Tom. 2. Tract. de Gratia, cap. 6. §. 3.

## QUINTA CONDITIO.

**A**d meritum requiritur ex Dei ordinatione status viatoris.

Probatur 1. ex Scriptura, quæ in morte figit meriti terminum, Joan. 9. *Venit nox, quando nemo potest operari.* Gal. 6. *Dum tempus habemus, operemur bonum.* 2. Ex S. Hieronymo in cap. 9. Eccl. *Viventes, inquit, possunt bona opera perpetrare; mortui verò nihil valent adjicere ad id, quod secum tulere de vita.* Nulla autem ratio afferri potest, cum id totum pendeat à libera Dei voluntate, & quidem congruenter; quia cum beati & reprobi sint in termino, ultra progredi nequeunt: progredierentur autem, si illi nova merita, isti demerita congererent.

Dices: Beati in cœlis multa nobis obtinent suis orationibus: Ergo merita locum habent in Patria.

Distinguo anteced. Obtinent per modum impetrationis, Conc. Per modum meriti, Nego anteced. Oratio itaque dupliciter spectari potest, 1. ut supernaturale Religionis opus in honorem Dei, & ejus obsequium: & sub eo respectu est in viatoribus meritoria, vel de condigno, si sint just; vel de congruo, si peccatores, 2. ut mera petitio, sicut in paupere efflagitante eleemosynam, & sub ea ratione est impetratoria duntaxat; nam pauper obsecrationibus suis non meretur aliquid accipere, cum nihil faciat in obsequium nostrum. Porro orationes Sanctorum spectantur ut meræ petitio-

petitiones, quibus Sancti multa nobis impetrant, non verò merentur, propter momenta supra allata. Sic Christus semper vivens ad interpellandum pro nobis. Hebr. 7. Nova nobis non meretur; sed impetrat solummodò, ut merita vitæ suæ mortalis nobis applicentur.

## SEXTA CONDITIO.

**A**d meritum de condigno intercedere debet gratuita Dei promissio.

Probatur 1. Ex sæpiùs laudato Can. 16. Sess. 6. Concilii Tridentini; in quo Patres docent justificatis proponendam esse vitam æternam, tamquam mercedem à Deo promissam bonis eorum operibus.

Probatur 2. ex Bullis Summorum Pontificum Pii V. & Gregorii XIII. qui secundam hanc Baji propositionem proscripserunt: *Sicut opus malum ex sua natura est mortis æternæ meritorium: sic bonum opus ex sua natura est vitæ æternæ meritorium.*

Probatur 3. ex S. August. Serm. 158. aliàs 16. de verbis Apostoli: *Debitor, inquit, factus est Deus, non à nobis aliquid accipiendo, sed aliquid quod ei placuit, promittendo. Aliter enim dicimus homini, debes mihi, quia promissisti mihi: & aliter dicimus, debes mihi, quia dedi tibi. Possumus exigere dominium nostrum, ut dicamus, redde quod promissisti, quia fecimus quod jussisti.*

Probatur 4. ratione duplici. Prima, quia cum simus natura servi Dei, jure potest à nobis omnia opera exigere, & tenemur reddere, etiam nulla mercede proposita. Unde S. August. Serm. 169. aliàs 15. de verbis Apostoli, sic loquitur: *Nil addi ad istam benevolentiam potest: (qua nempe mercedem*

cedem repromittit) *quis est, qui dicat, sanem me, & do tibi mercedem?* Secunda quia nemo tenetur rem suam vendere offerenti justum pretium, nisi pactum vendendi præcesserit, nec mercenario merces debetur, si non conductus laboraverit.

Dices: Peccatum meretur pœnam, etiamsi nullum intercefferit pactum: ergo & bonum opus mercedem.

Nego conseq. Disparitas est, quòd per peccatum Deus non fiat debitor homini peccanti, quin ipse peccator redditur debitor justitiæ divinæ; unde peccata dicuntur debita; potest autem creatura se obligare Creatori absque ejus promissione.

## §. VII.

*De iis, quæ cadunt sub meritum de condigno.*

Q. I. *Quænam cadunt sub meritum de condigno?*

R. Vita æterna, & augmentum gratiæ sanctificantis. Ita definiit Concilium Tridentinum Sess. 6. Can. 32. his verbis: *Si quis dixerit, hominis justificati bona opera ita esse dona Dei: ut non sint etiam bona ipsius justificati merita, aut, ipsum justificatum bonis operibus . . . . . non vere mereri augmentum gratiæ, vitam æternam, & ipsius vitæ æternæ (si tamen in gratia decesserit) consecutionem, atque etiam gloriæ augmentum; anathema sit.*

Probat: Tùm quia ex conditionibus ad meritum de condigno requisitis, & mox recensitis nulla deest bonis justi operibus in Deo factis: tum quia id expressè docet Scriptura sacra. De vita quidem æterna habetur 2. Timoth. 4. *Reposita est mihi corona justitiæ, quam reddet mihi Dominus*

*in*

*in illa die justus Judex, non solum autem mihi, sed & iis, qui diligunt adventum ejus. De augmento etiam gratiæ sanctificantis legitur Ps. 83. ibunt de virtute in virtutem, in quem locum sic scribit S. Augustinus: Quanto plus amaveris, tanto plus ascendis. Coloss. 1. At ambuletis dignè, Deo per omnia placentes: in omni opere bono fructificantes, & crescentes in scientia Dei.*

Dixi: augmentum gratiæ sanctificantis, quia primus ejus gradus non cadit sub meritum de condigno; cum ante illum homo non sit justus & filius Dei adoptivus, sed peccator.

Dices: ergo neque primus gloriæ gradus cadit sub meritum de condigno, utpotè qui debeatur tanquam hæreditas primo gradui gratiæ sanctificantis, qui ex dictis necessariò præsupponitur ad omne meritum de condigno.

R. 1. Graves Theologi ejusmodi ratione permoti concedunt primum gloriæ modum non cadere sub meritum de condigno, sed posteriores duntaxat. Nihilominus

R. 2. Cum communiori sententia negando sequelam, & quidem ad mentem Concilii Tridentini. Patres enim laudato Can. 32. expressè distinguunt inter vitæ æternæ consecutionem, & ejus augmentum, definiuntque justum verè mereri utrumque. Et ratio est, quia primus gloriæ gradus possideri potest duplici titulo, nempe titulo hæreditatis debitæ filiis adoptionis, & titulo mercedis propter bona opera, quæ justificationem subsequuntur.

Instabis: si homo potest mereri de condigno primum gloriæ gradum per merita, quæ justificationem consequuntur; quidni poterit similiter mereri



mereri primum gradum gratiæ sanctificantis per actus subsequeutes?

R. Disparitas est, 1. quia Scriptura & Patres simpliciter & absolutè docent vitam æternam retribui meritis, nusquam autem peccatorum remissionem & justificationem; sed eam constanter referunt ad Dei misericordiam: 2. quia justificatio, seu primus gratiæ sanctificantis gradus ex dictis est principium meriti de condigno, atqui principium meriti non cadit sub meritum: sed ei necessario præsupponitur.

Confirmatur: si justificatio daretur propter bona opera eam secutura, idem æquè dici posset de gratia vocationis, & prima gratia actuali, nempe eam concedi intuitu futurorum bonorum operum, quod tamen est hæreticum.

Q. 2. *Quoties augetur gratia sanctificans, augenturne pariter omnes virtutes infusæ, ut fides, prudentia, temperantia, &c.*

R. Augentur, quia gratia postulat illas virtutes tanquam proprietates, per quas justus disponitur ad omnia bona opera: ergo eo ipso, quo justus per intensiorem gratiam sanctificantem ad illa magis inclinatur, consentaneum est, ut ad illa per virtutes ampliùs disponatur, & expeditior fiat. Unde Concilium Tridentinum docet in justificatione simul infundi gratiam, virtutes, & dona.

Q. 3. *Potestne justus semper in gratia proficere, quamdiu est in via?*

Negarunt Beguardi, & Beguinæ, asserentes hominem in præsentī vita eum perfectionis gradum posse acquirere, quo redderetur prorsus impeccabilis, & ampliùs in gratia proficere non posset: quem

quem errorem damnavit generale Concilium Viennense sub Clemente quinto anno 1311.

Quare

R. Justus in hac vita potest semper proficere in gratia.

Probatur 1. ex Scriptura, Prov. 4. *Iustorum . . . semita quasi lux splendens procedit & crescit usque ad perfectam diem*, quæ est in altera vita, ut interpretantur S. Gregorius, Venerabilis Beda, & alii, Eccli. 18. *Ne verearis usque ad mortem justificari, quoniam merces Dei manet in æternum*. Apoc. ultimo, *qui justus est, justificetur adhuc*, quod universaliter dicitur de omnibus justis.

Probatur 2. ex SS. Patribus. S. Augustinus, Serm. 169. aliàs 15. de verbis Apostoli sic habet: *Perfecti viatores, nondum perfecti possessores: & novēritis quod perfectos viatores dicat, qui jam in via ambulant. Quid est ambulare? breviter dico, proficere. Si dixeris, sufficit, periisti, semper adde, semper ambula, semper profice*. S. Leo, Serm. 2. de Quadragesima, *hæc est, inquit, perfectorum vera justitia, ut nunquam præsumant se esse perfectos; ne ab itineris nondum finiti intentione cessantes, decidant in deficiendi periculum, ubi proficiendi deposuerint appetitum*.

Probatur 3. ratione, quia semper justī tenentur præcepta implere: atqui opus præceptum, ex dictis, est meritorium: Ergo.

Objiciebant Beguardi; si semper justī proficerent, Christo perfectiores evadere possent, quod est absurdum & impium.

Nego sequelam; Quia causa meriti est gratia, supra cujus motionem nemo supernaturaliter operari, nec proinde mereri potest: atqui nullus secundum ordinariam Dei potentiam, tantam gra-

tiam habere potest, quanta collata est Christo, ut diximus Tractatu de Incarnatione : ergo nullus quantumcumque crescat in virtute, ad perfectionem Christi pervenire potest.

Q. 4. *Bonum opus injustis estne meritorium de condigno, alterius boni operis?*

R. Minimè ; quia in hoc statu nullum bonum opus perficitur, nisi auxilio efficaci : atqui justus non potest mereri de condigno auxilium efficax : Ergo.

Q. 5. *Quare justus piis operibus non meretur de condigno gratiam efficacem?*

R. 1. Quia nulla de ea extat Dei promissio. 2. Quia Scriptura & SS. Patres docent continuò implorandum Dei auxilium, ut acceptis ejus donis benè utamur, & in bonis operibus perseveremus, ut fusè probamus Tom. 4. Tract. de Religione, ubi de necessitate orationis, cap. 4. §. 7. Atqui quod obtinetur per orationem non habet rationem mercedis, sed gratuiti doni. 3. Quia si gratia efficax deberetur cuilibet justorum bono operi, omnes justi perseverarent ; quia gratia efficax semper habet effectum, nec unquam ei resistitur. Unde perspicuum est, quòd si justus per primum opus bonum mereretur de condigno gratiam efficacem, infallibiliter alterum bonum opus sequeretur, quod similiter meritorium gratiæ efficacis tertium exciperet, & sic deinceps usque ad ultimum vitæ terminum. Quæ autem contra obijci possunt solvimus Tom. 1. Tract. de Attributis cap. 19. §. 9. ubi pluribus ostendimus donum perseverantiæ, quod in adultis complectitur auxilia efficacia, cadere quidem sub meritum de congruo, minimè verò sub meritum de condigno.

Q. 6.

Q. 6. *Iustus mereturne de condigno augmentum gratiæ sanctificantis per quodlibet opus à charitate elicitum aut imperatum?*

R. Duplex est in scholis sententia : alii, ut S. Bonaventura, & Durandus, negant justum per actus gratia sanctificante remissiores mereri ejus augmentum ; quia habitus non augentur per actus se remissiores , sicut corpus calidum ut quatuor non potest calefieri per aliud corpus , quod sit duntaxat calidum ut duo. Alii magis communiter affirmant, justum mereri illud augmentum per ejusmodi actus etiam remissos ; sed mentem suam non uno modo explicant. Alii quippe contendunt augmentum gratiæ habitualis seu sanctificantis non statim rependi ejusmodi actibus remissis, sed differri donec vel conferatur gloria , vel justus producat actum intensiorem, ad quem disponit actus remissus : hanc suam sententiam colligunt ex sancto Thoma , qui 1. 2. qu. 114. art. 8. sic respondet ad tertium , *dicendum*, inquit , *quoddam quolibet actu meritorio meretur augmentum gratiæ ; sed sicut vita æternæ non statim redditur , sed suo tempore, cum scilicet fuerit sufficienter dispositus ad gratiæ augmentum.* Et 2. 2. qu. 24. art. 6. ex professo quærit, utrum quolibet charitatis actu habitus charitatis augeatur , & ita statuit ; *non quolibet actu charitatis, charitas actu augetur ; sed quilibet actus charitatis disponit ad charitatis augmentum, in quantum ex uno actu charitatis homo redditur promptior iterum ad agendum secundum charitatem : Et habilitate crescente homo prorumpit in actum ferventiorum dilectionis . . . Et tunc charitas augetur in actu.* Alii volunt augmentum gratiæ sanctificantis statim retribui actibus charitatis etiam remissis ; probantque , quia nec Scriptura , nec



Concilia, nec SS. Patres hujusce dilationis meminere, imò Concilium Tridentinum videtur illam excludere, dum disertè docet justum renovari de die in diem; in gratia accepta crescere, & ire de virtute in virtutem. Sed illud est notatu dignum, quòd Patres definiant Canone 32. Sess. 6. piis justì operibus gloriam retribuendam cum hac conditione: *Si in gratia decesserit*, nullam verò conditionem apponant, ubi sermo est de augmento gratiæ, sed simpliciter & absolutè statuunt justificatum bonis operibus mereri augmentum gratiæ.

Confirmatur 1. quia absurdum videtur justum, qui præviis charitatis actibus in justificatione abundantiorē gratiam accepit, propter tria simul Sacramenta ipsi collata, scilicet Baptismum vel Pœnitentiam, Confirmationem, & Eucharistiam, iisdem charitatis actibus utpote remissis, non mereri augmentum gratiæ, quibus alter gratia inferior illud mereretur. 2. Quia actus supernaturales physicè non augent habitus infusos, sicut actus naturales habitus acquisitos, sed moraliter duntaxat & meritoriè: atqui negari non potest quin Deus aliquando pro actibus remissioribus in præmium rependat habitum longè intensiorem; namque in glorificatione augetur perficiturque habitus charitatis in mercedem præcedentium actuum, qui in via fuerunt longè remissiores amore beatifico. Et ita corruiit fundamentum primæ sententiæ, quamquam non pauci Philosophi doceant habitus acquisitos intendi per actus etiam remissiores.

Q. 7. *Iustus potestne alteri mereri gratiam & vitam æternam?*

R. Non



R. Non potest de condigno, potest de congruo, non tamen ipsam prædestinationem. Responsio quoad singulas partes probata est, ubi de Prædestinatione, Tractatu de Attributis, cap. 19. §. 6.

### §. VIII.

*De iis, quæ pertinent ad meritum de congruo.*

Plura jam supra diximus circa meritum de congruo, ac primò quidem de ejus existentia §. 5. de iis, quæ sub meritum de congruo cadere possunt, tum citato §. tum §. 7. immediatè præcedenti. Superfunt duntaxat nonnullæ difficultates nunc solvendæ. Itaque

Q. I. *Quot sunt conditiones ad meritum de congruo?*

R. Quatuor; 1. opus debet esse bonum, 2. supernaturale: 3. liberè elicitum, 4. ab homine viatore. Probatur iisdem planè momentis, quibus supra demonstravimus easdem conditiones requiri ad meritum de condigno; pro utroque enim merito æquè sunt efficacia, ut legenti patebit.

Quod verò spectat cæteras conditiones ad meritum de condigno necessarias, nempe statum gratiæ sanctificantis & Dei pactum seu promissionem, absolutè non requiruntur ad quodlibet meritum de congruo, utpote quod præcisè fundetur in motione Spiritus Sancti, & in bonitate operis proportionata beneficio accipiendo; nam Cornelius Act. 10. suis eleemosynis & orationibus meruit de congruo, quod Deus ipsi non promiserat.

Dixi duas illas conditiones absolutè non requiri ad quodlibet meritum de congruo, ut in-

nuerem eas aliquando intervenire ; nam Ezech. 18. v. 21. Deus peccatori pœnitenti veniam promittit : Sanctus quoque Jacobus c. 5. supponit necessarium justitiæ statum , ut quis alteri mereatur , *multum . . . . . valet* , inquit , *deprecatio justî assidua*. Et sanctus Ambrosius : *Si diligis Dominum Deum tuum , non solum tibi , sed etiam aliis , poteris mereri*. Denique constat apud omnes neminem , nisi sit justus , posse sibi mereri de congruo donum perseverantiæ.

Q. 2. *Donum sequiturne infallibiliter meritum de congruo ?*

R. Sequitur , si meritum habeat rationem ultimæ dispositionis : secus , si se habeat ut remota dispositio ; quia motio Spiritus Sancti semper consequitur finem , nisi creatura impedimentum opponat : atqui nullum est impedimentum ex parte creaturæ , quæ mota à Spiritu Sancto , extremam manum operi imponit ; secus , si retrahat ; hinc bona , quæ justus aliis meretur , iis non semper obveniunt ; quia plerumque ponunt obicem.

Q. 3. *Potestne quis sibi vel alteri mereri bona temporalia ?*

R. Potest per actus supernaturaliter & ex gratia elicitos mereri saltem de congruo , tum sibi , tum aliis , ea bona temporalia , quæ ad propriam vel aliorum salutem sunt divinitus ordinata. 1. Quia Christus præcepit , ut nobis & aliis petere-  
mus panem nostrum quotidianum , quo nomine intelliguntur omnia vitæ præsentis necessaria : at-  
qui hujusmodi præceptum supponit Deum ut optimum Patrem filiis rogantibus & promerenti-  
bus ea subsidia velle concedere : quæ aliquando negligentibus & immeritis denegat. 2. Quia con-  
gruum

gruum est (nisi ponamus obicem) ut sequatur effectus, ad quem promerendum Deus nos sua gratia movet. 3. Quia bona temporalia quatenus à Deo ordinata ad nostram salutem, pertinent ad gratias exteriores, quas Christus nobis promeruit: Ergo.

Dixi 1. *saltem de congruo*, illud quippe communiter admittunt Theologi, sed difficultas est circa meritum condignum; quia quod cadit sub meritum de condigno, habet rationem præmii & mercedis, ex S. Thoma 1. 2. qu. 114. art. 10. atqui bona temporalia non sunt præmium virtutis; cum bona & mala æquè eveniant bonis & malis, ut habetur Eccl. 9. Attamen S. Doctor cit. art. videtur concedere justos posse sibi mereri temporalia de condigno; ait enim, *si temporalia bona considerentur prout sunt utilia ad opera virtutum, quibus perducimur in vitam æternam, secundum hoc directè & simpliciter cadunt sub merito, sicut & augmentum gratiæ . . . tantum enim dat Deus viris justis de bonis temporalibus, & etiam malis, quantum eis expedit ad vitam æternam, & in tantum sunt simpliciter bona hujusmodi temporalia.* Unde dicitur Psal. 33. timentes autem Dominum non minuentur omni bono: atqui juxta S. Doctorem & omnes Catholicos, justi merentur de condigno augmentum gratiæ: Ergo & bona temporalia quatenus gratiæ augendæ subserviunt, proptereaque dicit ea simpliciter cadere sub meritum, cum contra meritum congruum supra vòcet meritum secundum quid, & eam sententiam amplectuntur Gamacheus, Sylvius & alii.

Dixi 2. *per actus supernaturales*; quia quamvis in statu naturæ puræ homo mereri potuisset etiam

de condigno bona temporalia per actus moraliter bonos, & viribus naturæ elicitos, utpote præmio proportionatos; in hoc tamen statu non agnoscitur meritum propriè dictum, nisi sit ex meritis Christi, & ex influxu Spiritus ejus; atqui merita Christi nobis non applicantur per opera moraliter bona solis naturæ viribus elicita: Ergo.

Dixi 3. *quæ ad salutem æternam sunt ordinata*, scilicet à Deo simul & ab ipso operante; ut innuerem orationes, eleemosynas, & alia opera ex objecto bona, quæ fiunt ex cupiditate pro adipiscendis bonis temporalibus, nedum esse alicujus meriti apud Deum, quin esse peccata, & iram ejus provocare; sed de his plura Tom. 4. Tract. de Religione, ubi de Oratione, c. 4. §. 4.

Dices 1. Exodi 1. Deus benefecit obstetricibus, quæ contra præceptum Pharaonis non interfecerant nascentes Hebræorum masculos, proptereaque ædificavit eis domos: atqui opus illud non fuit sine vitio; in eo quippe mentitæ sunt obstetrices: ergo ad promerenda bona temporalia, bonum opus non requiritur.

Nego min. Peccarunt quidem obstetrices, cum per mendacium occultarunt Pharaoni opus misericordiæ erga Hebræos, sed ipsum opus fuit in eis laudabile, & moraliter bonum; quis enim dixerit filium peccasse audiendo sacrum; quia ad declinandam iram patris hæretici falso postea negavit se audisse sacrum? Deus autem non remuneravit mendacium obstetricum, sed bonum earum opus, quod præcesserat.

Instabis: Ezech. 29. dicitur: *Rex Babylonis servire fecit exercitum suum servitute magna adversus Tyrum* (quia per annos 13. oppugnavit eam, tandemque



demque vastavit, Deo ita ordinante, in vindictam ejus scelerum) . . . . & merces non est reddita ei . . . . Erit merces exercitui illius, & dedi terram Ægypti, pro eo quòd laboraverit mihi : atqui obsidio illa, ac vastatio fuit opus malum & injustum in Nabuchodonosore, utpote ex impotenti libidine dominandi : Ergo per actus moraliter malos potest quis mereri saltem de congruo bona temporalia.

Distinguo maj. Erit merces exercitui illius improprie & materialiter, quemadmodum Deo materialiter, & præter intentionem in illa obsidione servivit, Concedo ; erit merces proprie & formaliter, Nego maj. Deus itaque in hac narratione probat se esse rerum omnium Dominatorem, & pro infinita sua sapientia ac justitia, ad quos voluerit, transferre regna terræ ; sibi adscribendas Nabuchodonosoris, & aliorum Regum victorias, dicitque eos per ejusmodi opera sibi servire, sed veluti instrumenta irrationalia ; cum nec Nabuchodonosor, nec Alexander Macedo, nec Romani illum agnoverint. Dedit ergo eis mercedem improprie dictam, quemadmodum pabula pinguiora dantur jumentis, ex multo & utili labore defatigatis.

Dices 2. ex cit. cap. 9. Eccles. *Universa æquè eveniunt justo & impio* ; Ergo bona temporalia non cadunt sub meritum.

Distinguo antec. æquè eveniunt in diversum usum & finem, Concedo : æquè eveniunt in eundem usum & finem, Nego antec. *quia*, inquit S. Thomas cit. art. 10. ad 4. *boni per hujusmodi munus ducuntur ad beatitudinem*, non autem mali. Impiis mala est sive prosperitas, sive adversitas : prosperitas quidem, quia si miser est, qui malè concupi-



cupiscit, sanè miserior dicendus est, ex S. Augustino, qui habet quod malè concupiscit; inde enim exardescit superbia & cupiditas, sicut ex majori lignorum copia crescit incendium. Contra verò electis prosperitas est instrumentum bonorum operum, & adversitas veluti fornax, in qua probantur, & excoquantur eorum virtutes. Unde, juxta S. Augustinum Tract. 73. in Joan. Deus malis concedit iratus, quod justis negat propitius; *Novit enim Medicus, inquit, quid pro sua, quid contra suam salutem poscat agrotus. Quod si fecerit, non ut Salvator facit, quod est nomen ejus fidelibus ejus. Est quippe impiis & damnator.*

## CAPUT VIII.

### De Divisione Actuum humanorum.

Q. I. *Quomodo dividuntur actus humani?*

R. Dividuntur 1. in elicitos, qui immediate à voluntate procedunt, ut amor; & imperatos, qui mediante alia facultate, à voluntate exeunt, ut ambulatio, quæ imperatur à voluntate, sed immediate procedit à facultate motrice. 2. in interiores, v. g. velle dare eleemosynam, appetere vindictam: & exteriores, ut actu dare eleemosynam vel vindictam sumere. 3. in bonos & malos. Boni subdividuntur in bonos moraliter, & bonos supernaturaliter. Et hi rursus sunt meritorii, vel de condigno, vel de congruo.

Circa actus malos plura sunt exponenda Tractatu sequenti, qui est de peccatis. De bonitate autem actuum humanorum generatim spectata, ac de eorum merito satis superque diximus in hocce

Tra-

Tractatu. De bonitate verò morali ex professo egimus Tom. 2. Tractatu de Gratia c. 5. §. 2. de supernaturali, ibidem cap. 1. Superfunt duntaxat nonnullæ difficultates solvendæ circa actus interiores & exteriores. Itaque

Q. 2. *Utrum actibus exterioribus competat specialis bonitas, aut malitia?*

R. 1. Actus exterior, putà eleemosyna, non est bonus moraliter, nisi extrinsecè, & denominatione petita ab interiori voluntatis actu. Ita S. Chrysostomus Hom. 19. in Matth. *Voluntas est, inquit, quæ aut remuneratur pro bono, aut condemnatur pro malo: opera autem testimonia sunt voluntatis.* Et sanctus Thomas 1. 2. qu. 28. art. 4. ad 2. sic scribit: *Bonitas actus exterioris . . . . . non est alia à bonitate voluntatis, quam habet ex ipso actu voluto.* Et ratio est, quia actus exterior eatenus est bonus moraliter, quatenus est voluntarius, liber, & tendens ad honestatem, ut patet ex dictis: atqui per se formaliter nec est voluntarius, nec liber, nec tendens ad honestatem, sed quatenus imperatur, & dirigitur ab interno voluntatis actu libero, à quo denominatur voluntarius, liber, & moralis: ergo extrinsecè tantum & denominativè est bonus.

R. 2. Actus exterior indirectè & occasionaliter auget bonitatem actus interioris, quatenus difficultas, diuturnitas laboris, defatigatio, & alia, quæ solent comitari opera externa, occasionem voluntati præbent exerendi vires, majorem conatum adhibendi, actus internos multiplicandi, quamdiu perficitur opus externum, quamdiu v. gr. martyris corpus per varia tormenta dilaniatur. Ergo simpliciter & absolutè melius est esse

Mar-

Martyrem in re, quàm in voto; longam & difficilem peregrinationem conficere Religionis causa, quàm proponere tantum, aut vovere; quia nimirum propter ejusmodi opera exteriora, voluntas plures & intensiores actus repetit.

Advertit tamen sanctus Thomas cit. articulo, quòd si voluntate existente plena & perfecta, desit occasio vel possibilitas ponendi actum exteriorum, nihil minuitur de ejus merito & præmio; quia, inquit, *involuntarium absolutum non minuit meritum*. Quod autem dictum est de bonitate actuum exteriorum, idem cum proportionem ceniendum de eorum malitia, nempe malos esse moraliter extrinsecè tantum, & denominatione petita ab actu interiori voluntatis malæ, indirectè tamen & occasionaliter augere malitiam actus interioris; qui enim cruentat manum sanguine proximi, crudelior est, majori & diuturniori flagrat odio, quàm qui solum voluit occidere.

Ergo in Confessione Sacramentali actus exterior exprimendus, meritòque Alexander VII. proscriptit hanc propositionem, *qui habuit copulam cum soluta, satisfacit Confessionis præcepto, dicens, commisi grave peccatum cum soluta contra castitatem, non explicando copulam*.

Adde quòd actus exterior, ex sancto Thoma cit. art. 4. pertinet ad interiorem, tanquam materia ad formam, efficitque cum illo unum actum completum; ac proinde qui reticeret actum exteriorum, non integrè peccatum confiteretur.

Q. 3. *Unde petenda est unitas, vel multiplicitas actuum humanorum?*

Hæc quaestio non videtur esse alicujus momenti, nisi propter Confessionem Sacramentalem, in qua

qua secundum definitionem Concilii Tridentini, debent explicari peccata secundum speciem & numerum. Cui quæstioni ut fiat satis,

Nota 1. unitatem & multipliciter actuum humanorum duplicis esse generis, aliam specificam, aliam numericam; actus enim humani aliquando distinguuntur specie, ut furtum, & ebrietas; aliquando solo numero, ut duo furta, qui sunt actus ejusdem speciei, sed numero distincti.

Nota 2. actus humanos dupliciter spectari posse, scilicet physicè, & moraliter; ita ut nonnunquam plures actus physicè numero distincti, moraliter reputentur unus actus. His præmissis,

R. 1. Unitas, vel diversitas specifica actuum humanorum sumitur ab unitate, vel diversitate objecti formalis; quia objectum formale, seu motivum ex dictis dat speciem & formam actui. Hinc peccata non differunt specie, etiamsi pugnent contra distincta præcepta, quibus eadem virtus præcipitur: secus si diversa; quia in priori hypothese est idem objectum formale: in posteriori verò diversum. Sic fornicatio, v. gr. in Sacerdote & Diacono, est ejusdem speciei; quia est contra eandem virtutem Religionis, quamvis gravior sit in Sacerdote propter circumstantiam Sacerdotii notabiliter aggravantem, in Confessione Sacramentali exprimendam; Sacerdotium enim, utpote sacratius, majorem requirit munditiam, quàm Diaconatus. In Sacerdote verò & Laico fornicatio differt specie, quia in illo castitatem lædit simul & Religionem, in isto verò castitatem duntaxat.

R. 2. Actus humani physicè spectati, multiplicantur numero pro mutatione objecti & circumstan-




cumstantiarum : sic in illo sunt duo actus physicè distincti , qui post inflictum semel vulnus , aliud iterum eidem infligit : si verò moraliter spectentur actus , plures physicè reputantur unus moraliter ; & ideo non numerandi in Confessione, si ex natura sua, vel ex communi hominum consuetudine ordinentur ad eundem actum principalem ; & absque ulla fere mora. Statuit quis v. g. percutere inimicum , enssem accipit, iter aggreditur, & dum pergit ad locum , sæpius iterat propositum occidendi, tandemque exequitur ; hi omnes actus censentur moraliter unus actus. Idem dicendum de adulterio , in quo satis intelliguntur actus , qui præcedunt tanquam dispositiones.

Dixi 1. *si ex natura sua , vel ex communi hominum consuetudine ordinentur* , &c. quia si actus insolitus , & contra specialem virtutem pugnans , ad alium præcipuè intentum disponderet , in Sacramentali Confessione esset exponendus ; ut si quis in allato exemplo homicidii enssem furatus esset ad occidendum , peccatum illud furti moraliter esset ab aliis distinctum, tum numero, ut patet, tum specie ; quia est contra aliam virtutem , nec solet adhiberi ejusmodi actus ad homicidium patrandum.

Dixi 2. *ad eundem actum præcipuè intentum* ; nam si sint duo actus principales , qui ad se invicem non ordinentur , v. gr. si in eadem pugna occidantur duo homines, duæ habeantur copulæ cum eadem, & eodem tempore, erunt duo numero actus, etiam moraliter ; ac proinde exprimendi in Confessione. Idem dicendum de eo , qui sævi-  
ret in cadaver hominis mox à se occisi , teneturque hunc actum declarare , cum sit alterius speciei,

ciei, pertineatque ad crudelitatem, nec soleat intelligi in homicidio.

Dixi 3. & absque ulla ferè mora fiunt; quia si tam longum temporis intervallum intercedat, ut actus illi censi non possint moraliter conjuncti, multiplicantur numero, & in Confessione sunt numerandi. Ita sanctus Thomas 1. 2. quæst. 20. artic. 4. ubi sic habet: *Cum aliquis vult aliquid facere, bono fine vel malo, & tunc quidem non facit, postmodum vult & facit, duplicatur actus voluntatis: & sic fit duplex bonum, vel duplex malum.* Hinc qui per plures dies meditatur homicidium, furtum, adulterium, plura numero peccata etiam moraliter committit, nec facit Confessionem integram, si dicat se reum esse unius homicidii, furti, adulterii; sed insuper exprimere debet, quoties voluerit homicidium, furtum, adulterium perpetrare.



Tracta-



# Tractatus DE VITIIS ET PEC- CATIS.

---

## CAPUT PRIMUM.

De varia Acceptione Vitii & Peccati.

- Q. 1. *Quotuplici modo vitium & peccatum sumuntur?*  
 R. Duplici, 1. latè pro quolibet defectu sive naturæ, sive artis. 2. stricte pro morali rationis defectu. Priores defectus dicuntur vitia & peccata secundum quid, v. g. vitia & peccata naturæ, aut artefacti: posteriores simpliciter vocantur vitia & peccata. Et ratio est; quia, cum natura, aut artifex deficit, peccat

peccat solum contra finem particularem; nec effectus utriusque, licet vitiosus, repugnat Legi æternæ, reduci potest ad Deum ultimum rerum omnium finem: contra verò defectus moralis adversatur Legi æternæ, nec potest ad Deum referri.

Ergo peccatum seu vitium strictè sumptum, est deordinatio voluntaria naturæ rationalis in iis, quæ spectant mores.

Q. 2. *Vitium & peccatum suntne unum & idem?*

R. Aliquando promiscuè accipiuntur: propriè tamen differunt.

Q. 3. *In quo differunt?*

R. Differunt sicut actus & habitus. Peccatum quippe est actus moraliter malus: vitium verò est habitus, seu dispositio per se inclinans ad actum moraliter malum.

Ergo peccatum est quid pejus vitio; quia malè agere pejus est, quàm dispositum esse ad malè agendum. Primum punitur, non secundum.

Dices: ab habitu homo denominatur simpliciter bonus aut malus, non verò ab actu; mendax v. g. non dicitur, qui semel mentitur, sed qui dispositus est ad mentiendum: ergo vitium pejus est peccato.

Nego conseq. ideo enim quis ab habitu, non ab actu dicitur bonus vel malus; quia habitus est permanens, actus verò transiens. Unde qui semel mentitus est, si habitum mentiendi non contraxit, præsumi debet non velle mentiri; fortè enim consilium mutavit. Sed si per impossibile quis continuò mentiretur, aut Deum diligeret nullo contracto habitu, potiori jure dicendus es-



set malus aut bonus, quàm si retinens habitum mentiendi, aut Deum diligendi, ab omni actu mendacii vel dilectionis abstineret.

Ergo vitium & virtus sunt duo contraria: quia virtus est habitus inclinans ad actus bonos; vitium verò est habitus inclinans ad actus malos.

Dices: illi habitus non sunt contrarii, qui se ab eodem subiecto non expellunt: atqui virtutes, quæ in justificatione infunduntur, non expellunt à pœnitente vitia, quæ per malam consuetudinem contraxerat, cùm justificatus eandem experiatur difficultatem circa prosecutionem boni, & fugam mali: Ergo vitium non est contrarium virtutibus saltem infusis.

Distinguo majorem, qui se non expellunt in gradu intenso, Concedo: in gradu remisso, Nego majorem. Nam calor remissus non expellit frigus remissum.

Porrò in justificatione remittuntur, ac debilitantur pravæ dispositiones, quæ præcesserant. *Qui habuit habitum intemperantiæ*, inquit sanctus Thomas quæst. I. de virt. art. 10. ad 16. *cùm conteritur, non remanet in virtute temperantiæ infusæ habitus intemperantiæ in ratione habitus, sed in via corruptionis.* Quemadmodum enim, recedente anima, cadit corpus, continuæque subjacet corruptioni, donec in pulverem resolvatur: sic habitus vitiosi, cùm per contritionem desinunt esse voluntarii, lethale accipiunt vulnus, inquit sanctus Doctor; quia voluntate jam contra ipsos renitente, sensim minuuntur, donec prorsus desinant.

Ergo vitium est contra naturam: tum quia adversatur & opponitur virtuti, quæ est naturæ  
ratio.

rationalis perfectio : tum quia pugnat contra rationis ordinem. *Omne vitium*, inquit S. Augustinus Lib. 3. de libero arbitrio cap. 14. *eo ipso, quo vitium est, contra naturam est. Si enim naturæ non nocet, nec vitium est . . . nullius ergo rei rectè vituperatur vitium, nisi cujus naturā laudatur.*

Ergo natura est admodum in iis corrupta, qui nedum peccato repugnent; quin potius non lætantur, nisi malè fecerint.

Dices 1. Ea peccata duntaxat dicuntur contra naturam, quæ sunt enormia, ut sodomia, bestialitas : Ergo.

Distinguo antecedens; contra naturam genericam, Concedo : contra naturam specificam, Nego antecedens. Itaque quodlibet vitium & peccatum est contra naturam rationalem, licet non semper pugnet contra universalem animalium naturam, juxta illud sancti Augustini, *vitium est hominis, quod est natura pecoris.* Sed enormes illæ luxuriæ species simpliciter dicuntur peccata contra naturam; quia non solum adversantur speciei hominis, sed etiam animalium generi.

Dices 2. quæ sunt contra naturam admodum rara sunt, ut monstra : atqui vitium & peccatum in pluribus reperiuntur : ergo non sunt contra naturam.

Distinguo majorem. Si natura sit integra, Concedo : si sit corrupta, Nego majorem. Morbus enim est contra naturam, attamen, grassante peste, in pluribus reperitur. Porro homo, *cum in honore esset, non intellexit; comparatus est jumentis insipientibus, & similis factus est illis : Psalm.*  
148.

## CAPUT II.

## De Definitione Peccati.

Q. I. *Quid est peccatum?*

R. Ex dictis est deordinatio voluntaria naturæ rationalis in iis, quæ spectant mores.

Definitur autem à S. Augustino Lib. 22. contra Faustum cap. 27. dictum vel factum, vel concupitum contra Legem æternam. Hæc definitio probatur à S. Thoma 1. 2. qu. 71. art. 6. & obtinuit in Scholis.

Dices 1. Neque peccatum originale est factum, sed congenitum: neque peccatum omissionis, quo omittitur actus præceptus; sed est negatio actus debiti: neque peccatum habituale; habitus enim opponitur actui. Ergo hæc definitio non convenit omni peccato.

Respondeo ad singula.

Ad primum. Peccatum originale dici potest factum voluntarium voluntate primi parentis, quæ non solum erat voluntas privatæ personæ, sed etiam communis omnium hominum, tanquam membrorum, quorum Adamus constitutus erat caput. Ita sanctus Augustinus Lib. 1. Retract. cap. 11. ubi sic habet: *Illud quod in parvulis dicitur originale peccatum, cum adhuc non utantur arbitrio voluntatis, non absurdè vocatur etiam voluntarium; quia ex prima hominis voluntate contractum, & factum est quodammodo hæreditarium.*

Ad secundum respondet S. Thomas qu. 76. art. 2. ad primum, ex communi hominum usu in istis nominibus, *factum, dictum, concupitum*, intelliguntur negationes oppositæ. Hinc dicimus de

de aliquo , quòd malè faciat : dum omittit officium , non respondet interroganti , & non amat quæ ipsum decent.

Ad tertium. Peccatum habituale est moraliter concupitum seu volitum , quatenus est macula remanens ex actu voluntario , & non retractata , ut mox dicetur.

Dices 2. Peccata, quæ sunt contra Leges humanas , sive Ecclesiasticas , sive Civiles , non sunt contra Legem æternam. Ergo.

Nego antecedens. Lex quippe æterna , sicut & recta ratio , jubet ut filii obediant parentibus , subditi superioribus , servi dominis suis. Rom. 13. *Omnis anima potestatibus sublimioribus subdita sit , non est enim potestas nisi à Deo . . . Itaque qui resistit potestati , Dei ordinationi resistit.* Ephes. 6. *Servi , obedite dominis carnalibus cum timore , & tremore , in simplicitate cordis vestri , sicut Christo : non ad oculum servientes . . . . . facientes voluntatem Dei ex animo.*

Ergo falsa est hæc propositio quorundam Theologorum Moralium & sæpius damnata , *Leges humanæ non obligant in conscientia.* Cum enim emanent à Lege æterna , transgressio illarum verè est Dei offensa , sive mortalis , sive venialis secundum materiæ gravitatem , aut levitatem , ut infra explicabitur.

Ergo obligatio est sub peccato , solvendi & Ministris Ecclesiæ debita stipendia , & Principibus tributa per legem taxata ; omnes enim in suo ordine Ministri Dei sunt , ad hoc ipsum missi & servientes , ut subditi quietam & tranquillam vitam agant in omni pietate & castitate , 1. ad Timoth. 2. Unde meritò proscripta est hæc propositio , 1. à Facultate Parisiensi , deinde à Clero Gallicano :



*Subditi possunt iusta tributa non solvere.* Pugnāt enim contra illud Apostoli Rom. cap. 13. *Reddite ergo omnibus debita : cui tributum, tributum : cui vectigal, vectigal.*

Nec dicas plura esse edicta, quæ transgressores non obligant, nisi ad pœnam, præsertim quando subditos nimis onerant. Namque 1. omnis vera lex sub peccato obligat, cum sit regula actionum humanarum, & sit contra rectam rationem non obedire Superiori præcipienti. *Subditi estote*, ait Apostolus Rom. 13. *non solum propter iram, sed etiam propter conscientiam.* 2. Subditi judicare non debent onera esse nimis gravia, quandoquidem ipsis perspectum non est, quæ & quanta sit Reipublicæ necessitas, quibus indigeat impensis, ut communi saluti sufficienter provideat, amoveatque pericula imminētia.

Dices 3. Peccatum veniale veram habet peccati rationem : atqui ex S. Thoma peccatum non est contra Legem, sed præter Legem : Ergo.

Distinguo minorem. Non est contra Legem simpliciter & absolutè, Concedo : non est contra Legem secundum quid, Nego minorem. Nam idem S. Doctor scribit qu. 74. art. 10. ad primum, peccatum veniale esse contra rationes æternas. Itaque sicut servus tum absolutè & simpliciter non agit contra præceptum domini, cum injectum opus, v. g. peregrinationem suscipit & perficit, quamvis non ea, qua par esset, diligentia, & celeritate ; sic fidelis Deo præcipienti, v. g. *falsum testimonium non dices*, absolutè obtemperat, dum cavet omne mendacium contrarium fini legis, qui est charitas, licet non ita cautus sit, ut minima quæque mendacia non subrepant. *Peccatum veniale,*



niale, inquit S. Thomas qu. 7. de malo art. 1. ad primum, *etsi in aliquo recedat ab ordine Legis, non tamen ipsam corrumpit, quia non corrumpit dilectionem, quæ est plenitudo Legis.*

## CAPUT III.

## De Macula Peccati.

Q. 1. *Peccatum inducitne maculam?*

R. Inducit, probaturque ex Scriptura, Isaïæ 4. *Si abluerit Deus sordes filiorum suorum.* Tit. 1. *Inquinatæ sunt eorum & mens, & conscientia.* Jac. 1. *Abjicientes omnem immunditiam.*

Q. 2. *Per quos actus inducitur illa macula?*

Respondet S. Thomas q. 86. art. 1. ad secundum, non induci præcisè per cognitionem, sed per amorem rerum inferiorum; quia proprium est intellectus per cognitionem assimilare sibi objecta, & eorum materialitatem, & imperfectiorem quodammodo eliquare & expurgare, adeo ut ex objectis materialibus & obscænis, sola veritas in intellectu refulgeat; unde eis non inficitur, sed perficitur. Pertinet v. g. ad perfectionem intellectus divini, quod illi nuda & aperta sint abscondita tenebrarum, de quibus ipsi peccatores erubescunt. Amor verò est motus voluntatis ad res ipsas, ut in se sunt, illisque animam conglutinat, ac proinde, si turpes sint, commaculat. Quemadmodum enim vestis tum maculari dicitur, cum perdit suum nitorem: perdit autem per contactum alicujus impuri, putà luti; sic anima amittit suam pulchritudinem adhærendo creaturæ, quod fit per amorem.

Dixi, animam non maculari præcisè per cognitionem; quia occasionaliter per eam aliquando fœdatur. Nam attentio ad turpia inflamat libidinem; ad superflua causat teporem & negligentiam; ad injuriam acceptam provocat iram & vindictam. Hinc inter peccata numerantur cogitationes morosæ, sic dictæ, propter moram, quæ in iis trahitur, ex qua exurgit delectatio in appetitu sensitivo.

Q. 3. *Quid est peccati macula?*

R. Primò, non est habitus relictus ex præcedenti actu culpabili: tum quia unico actu producit macula, non verò habitus: tum quia habitus malus ex parte remanet in homine justificato, in quo nulla est peccati macula.

Secundò, non est reatus, seu obligatio ad pœnam: tum quia reatus ille est posterior macula, ideo enim peccator est reus pœnæ, quia est macula peccati inquinatus; tum quia reatus ille est à Deo, utpote justitiæ consentaneus, quod de macula dici nequit: tum quia sæpè remanet reatus pœnæ temporalis, post deletam maculam peccati.

Tertiò, non est actus malus præteritus, aliquin sequeretur hominem esse peccatorem extrinsecà tantum denominatione, petita ab actu culpabili præterito, ac proinde remissionem peccati fieri per extrinsecam Dei condonationem, absque renovatione interiori, quod hæreticum esse diximus, ubi de gratia habituali.

Quartò, non est sola privatio gratiæ præcisè sumpta: tum quia privatio gratiæ ut sic non habet rationem culpæ, sed pœnæ à Deo justissimè inflictæ: tum quia una & eadem est privatio gratiæ

tiae in omnibus peccatoribus, diversae verò peccatorum maculae pro diversitate peccatorum.

Q. 4. *Quid est ergo peccati macula?*

R. Est privatio gratiae, non præcisè ut diximus sed cum relatione & ordine ad actum malum præteritum, qui quamdiu non fuerit sufficienter retractatus, moraliter remanet, & privatio gratiae censetur voluntaria conversio habitualis ad creaturam, quin & habitualis aversio à Deo, si actus fuerit lethaliter malus. Namque propter actum præteritum non retractatum voluntas habitualiter adhæret objecto illicitè amato, privaturque vel gratia sanctificante, & habitu charitatis, si actus fuit lethaliter malus; vel ejus fervore, si venialiter duntaxat. Unde S. Thomas 3. part. q. 87. art. 2. ad tertium, concludit ad abluendam maculam peccati mortalis requiri infusionem gratiae sanctificantis; ad tollendam verò maculam peccati venialis, sufficere motum charitatis.

Ergo omnia peccata non sunt æqualia, ut soli Stoici ausi sunt disputare contra omnem sensum generis humani, inquit S. Augustinus Ep. 167. alias 29. Namque peccans convertitur ad objecta magis vel minus turpia, quibus plus minusve maculatur.

Stoicis tamen adstipulatus est Jovinianus contra sensum, non solum generis humani, sed & Scripturæ, ut Matth. 7. ubi peccata comparantur, alia festucæ, alia trabi, & Joan. 19. Christus ad Pilatum ait: *Qui me tradidit tibi, majus peccatum habet.*

Dices: peccatum est privatio rectitudinis: atqui privatio non suscipit magis & minus; mors v. g. non est major in uno, quàm in alio.

Respondet sanctus Thomas distinguendo majorem, privatio totalis, ut mors, non suscipit magis & minus, Concedit: privatio partialis, quæ aliquid de forma opposita relinquit, ut ægritudo, negat maj. Nam ægritudo, quæ est inchoata privatio sanitatis, potest esse major aut minor. Porro peccatum ita est recessus ab ordine rationis, ut non tollat totum illum ordinem; alioquin si per peccatum nihil remaneret rationis, peccatum seipsum destrueret, nec esset peccatum, juxta illud Aristotelis Lib. 4. Eth. capite 50. *malum si sit integrum, destruit seipsum.*

Brevius responderi posset, peccata ratione averfionis à Deo & privationis gratiæ sanctificantis, quæ est mors animæ, esse paria; sed ratione conversionis ad creaturam, esse inæqualia; quia malitia actus repetitur ex objecto.

Q. 5. *Quotuplex est peccati macula?*

R. Triplex. Cum enim macula sit privatio nitoris animæ, totuplex distingui debet peccati macula, quotuplex est animæ nitor; atqui nitor ille triplex est. Primus refulget ex lumine naturali rationem dirigente: Secundus ex lumine supernaturali fidei & gratiæ. Tertius, ex actibus elicitis charitatis, & virtutum infusarum, quibus interior gratiæ nitor exterius splendescit. Ergo ex peccato generatim sumpto, nascitur triplex animæ macula. Prima consistit in privatione rectitudinis & conformitatis ad rectam rationem, rectitudo quippe illa pulchritudo est & naturalis animæ decor. Secunda in privatione gratiæ sanctificantis, quam inducit peccatum mortale, ratione cujus maculæ homo denominatur, & verè est malus, peccator, & inimicus Dei. Tertia, quam



quam inducit peccatum veniale, consistit in privatione fervoris, qui est decor & pulchritudo in homine relucens, ex actibus charitatis & aliarum virtutum; juxta illud Matth. 5. *Luceat lux vestra coram hominibus, ut videant opera vestra bona, & glorificent Patrem vestrum, qui est in cælis.*

Ergo macula unius peccati mortalis tolli non potest sine alia, quia homo non potest esse simul privatus & ornatus gratia sanctificante. Secus de macula peccati venialis; quia absolutè quis potest fervere circa unum objectum, & non circa aliud.

Dices: justi in Scriptura dicuntur mundi & immaculati, ut Psal. 118. & Joan. 15. cùm tamen non sint absque peccato veniali. Ergo peccatum veniale non inducit maculam.

Distinguo antecedens. Justi sunt mundi & immaculati simpliciter propter nitorem gratiæ sanctificantis, & omnium virtutum ornamenta, quæ illam sequuntur, Concedo: sunt mundi & immaculati perfectè, Nego antecedens; Nam ex sancto Leone, *de pulvere mundano etiam religiosa corda sordescunt*, & ab illis levioribus sordibus, quas sanctus Thomas vocat maculas secundùm quid, per pœnitentiam quotidianam abluuntur.

## CAPUT IV.

### De Divisione Peccati.

Q. 1. *Quotuplex est peccatum?*

R. Duplex. Originale, quod in Adamo contrahitur, & personale, quod propria voluntate committitur.

Q. 2.

Q. 2. *Quotuplex est peccatum personale?*

R. Multiplex.

Primò, aliud est actuale, & est ipsemet actus inordinatus & inhonestus: aliud habituale, quod est macula ex actu inordinato consequens.

Ergo peccatum habituale aliter sumitur à Philosophis, aliter à Theologis. Apud Philosophos quippe peccatum habituale est habitus vitiosus ex actibus malis sæpius repetitis productus. Apud Theologos verò peccatum habituale est macula in anima remanens vel ex uno actu malo non retractato.

Secundò, peccatum aliud dicitur commissionis, aliud omissionis. Commissionis est contra præceptum negativum, quo prohibetur malum, v. g. mendacium. Omissionis est contra præceptum affirmativum; quo præcipitur actus bonus, estque omissio actus præcepti, v. g. non audire Sacrum die festo, non jejunare tempore Quadragesimæ. *Duobus modis esse constat peccatum, inquit S. August. Lib. de Perfectione Justitiæ cap. 3. si aut fiant illa, quæ prohibentur, aut illa non fiant, quæ jubentur.*

Q. 3. *Utrum ex illis peccatis est gravius?*

R. Peccatum commissionis cæteris paribus est gravius; quia in eo major est recessus ab ordine rationis. Sic pejus est odisse Deum, quàm non amare, in illum blasphemare, quàm illum non laudare.

Dixi, *cæteris paribus*; nam pejus est omittere Sacrum die festo, quàm ad momentum voluntariè mente distrahi tempore Sacri.

Tertiò, aliud est peccatum simpliciter dictum; aliud peccatum in Spiritum Sanctum, quod teste ipsa

ipsa Veritate Matth. 12. *non remittetur neque in hoc sæculo, neque in futuro.*

Q. 4. *Quid est peccatum in Spiritum Sanctum?*

R. Est peccatum ex malitia procedens, quo repelluntur impugnanturve spiritualia gratiæ dona, quæ cum sint effectus amoris Dei erga homines, appropriantur Spiritui Sancto, utpote qui sit ratione processioneis suæ amor Patris & Filii.

Q. 5. *Quot sunt peccata in Spiritum Sanctum?*

R. Sex numerantur, nempe desperatio, præsumptio, impœnitentia, obstinatio, impugnatio veritatis agnitæ, & invidentia fraternæ gratiæ.

Q. 6. *Quomodo peccata in Spiritum Sanctum dicuntur irremissibilia, cum ex S. Augustino in Psal. 100. omnipotenti Medico nullus insanibilis languor occurrat, & ex definitione Ecclesiæ contra Novatianos, omne peccatum per Sacramentum Pœnitentiæ deleri possit?*

Respondet S. Thomas hic art. 3. peccatum in Spiritum Sanctum ita dici irremissibile, quomodo morbus corporalis per se sanabilis, tum curari non potest, cum phreneticus non admittit salubria remedia. Nam ex sancto Augustino Lib. 1. de Sermone Domini in monte, qui sic peccat, humilitatem deprecandi non subit, nec spe veniæ, nec timore pœnæ movetur ad pœnitentiam, sed vel de se præsumit, vel desperatione dejicitur: non acquiescit sanis consiliis, sed obstinato animo veritati resistit, aut detrahit: non accenditur aliorum exemplis, sed eorum gratiæ invidet. Porro si ne minima quidem peccata absque pœnitentia remitti queunt, quantò minùs graviora?

Quartò, alia sunt peccata capitalia, alia quæ ex illis nascuntur.

Capi-

Capitalia septem numerantur à S. Gregorio Lib. 31. Moral. cap. 31. scil. inanis gloria, invidia, avaritia, ira, luxuria, gula, & acedia: de quibus plura nobis hîc dicenda essent scitu maxime necessaria ad curandos animi morbos tum proprios, tum alienos, nisi fusè de illis egissemus in praxi Sacramenti Pœnitentiæ gallicè edita Parisiis apud *Spiritum Billiot*.

Quintò. Peccata alia dicuntur spiritalia, alia carnalia: illa perficiuntur in delectatione spiritali, ut superbia, invidia: hæc in carnali, ut gula, luxuria. In latiori tamen significatione nonnunquam omnia ferè peccata dicuntur opera carnalia, ut Gal. 5. quia ex carne saltem occasionaliter oriuntur.

Sextò. Alia sunt ignorantiae, alia infirmitatis, alia malitiæ, de quibus diximus ubi de voluntario.

Septimò. Peccatùm dividitur in peccatum cordis, oris, & operis, quæ divisio non est peccati in species, sed in diversos gradus ejusdem speciei. Peccatùm enim incipit in corde, deinde foras prodit per vocem, denique ipso opere consummatur.

Octavò. Celebris & præcipua est peccati divisio in mortale & veniale, de quibus separatim tractandum est.

## CAPUT V.

### De Peccato mortali & veniali.

Q. I. *Estne legitima peccati divisio in mortale & veniale?*

Negant



Negant Lutherani & Calvinistæ, contenduntque omnia peccata esse mortalia ex sua natura; sed in prædestinatis gravissima quæque dici venialia; quia ipsis non imputantur propter eorum fiduciam in Deum; in reprobis verò minima etiam peccata esse mortalia.

Joannes Gerson, celeberrimus Academiae Parisiensis Cancellarius, decimo quinto sæculo contra communem Theologorum sententiam, docuit Libro de Vita spirituali, lect. i. peccata venialia ex natura sua mereri damnationem æternam, tribuendamque misericordiae Dei, quòd non ita severè puniantur.

Michael Bajus Lovaniensis Theologus 16. sæculo plures edidit propositiones, inter quas hæc fuit vigesima cum cæteris damnata à Pio V. Gregorio XIII. & Urbano VIII. *Nullum est peccatum natura sua veniale, sed omne peccatum meretur pœnam æternam.*

Itaque circa propositam quæstionem de solo peccato veniali controversia est, utrùm scil. detur; nam concors est omnium sententia dari peccatum mortale.

R. De fide est, dari peccata natura sua venialia.

Probatur 1. ex Scriptura, Matth. 7. quædam peccata in se spectata, & sine ordine ad subjectum in quo reperiuntur, sive sit ex prædestinatis, sive non, comparantur, alia festucæ, utpotè levia; alia trabi, utpote gravia. Deinde Adam, David, sanctus Petrus erant fideles & prædestinati: nihilominus quædam eorum peccata in Scripturis reputantur mortalia, non venialia. Adamo dicitur Genes. 2. *In quocunque die comederis ex eo, morte morieris*, quod de morte etiam animæ intelligunt sanctus

sanctus Ambrosius Libro de Paradiso cap. 9. & S. Augustin. Lib. 13. de Civit. cap. 12. Mortale quoque fuisse peccatum Davidis, docet idem sanctus Augustinus in Psalmum quinquagesimum, ubi sic illum describit deprecantem, *de meo tam lethali vulnere desperarem, nisi tantum Medicum reperirem: & de peccato S. Petri ait Tract. 66. in Joannem, mortuus est negando, & revixit plorando.*

Probatur 2. ex Traditione. Concilium Africanum in sua Epistola asserit multos esse fideles, qui post suam conversionem ad Deum vivunt tota vitæ suæ tempore sine crimine, neque tamen sunt sine quotidianis & levibus offensionibus. Patres Tridentini Sess. 6. cap. 11. sic docent: *Licet in hac mortali vita quantumvis sancti & justi in levia saltem & quotidiana, quæ etiam venialia dicuntur, peccata quandoque cadant, non propterea desinunt esse just.* Sanctus Augustinus Serm. 351. alias 50. ex Lib. 50. Homiliarum hæc scribit: *Quamvis singula non lethali vulnere ferire sentiantur, tamen omnia simul congregata velut scabies nostrum decus ita exterminant, ut ab illius sponsi speciosi forma præ filiis hominum castissimis amplexibus separent, nisi medicamento quotidianæ poenitentiae refecentur. Quod si falsum est, unde quotidie tundimus pectora, quod nos quoque antistites ad altare assistentes cum omnibus facimus? unde etiam orantes dicimus quod in vita ista oportet, ut dicamus: Dimitte nobis debita nostra. Non enim ea dimitti precamur, quæ in Baptismo dimissa sunt: pro quibus etiam sacrificia elemosynarum, jejuniorum, & ipsarum orationum ac supplicationum quisquis pro suis viribus offerre non cessat: Eadem docent S. Cyprianus Sermone de Eleemosyna, S. Ambrosius Lib. 2. de Pæn. c. 10. S. Gregorius Lib. 21. Moral. cap. 9.*

cap. 9. S. Bernardus Serm. 1. in Cæna Domini, & Lib. de Præcept. & Disp. cap. 11.

Dices 1. Matth. 5. Christus sic pronuntiat: *Si quis solverit unum de mandatis istis minimis, minimus vocabitur in regno cælorum*, id est nullus, interprete S. Thoma: ergo omnia peccata sunt mortalia.

Nego conseq. Tum quia eo loci non dicitur simpliciter, *qui solverit*, sed additur: & *docuerit sic homines*: grave autem peccatum est Verbum Dei adulterare, & corrumpere etiam in minimis: tum quia minima mandata hîc dicuntur comparatè ad graviora, & ad Scribarum mentem, apud quos grave erat adulterium, amicorum odium: leve verò concupiscentia uxoris alienæ, & odium inimicorum, quamvis reverà sint peccata lethalia.

Dices 2. Grave peccatum est, non diligere Deum ex toto corde: atqui omnis peccans, etiam mendacio officioso non diligit Deum ex toto corde: *Quæ enim vitiosa cogitatio obrepet in hominis animo*, inquit Calvinus, *si totus Dei amore occupetur?* Ergo nullus leviter peccare potest.

Distinguo maj. Cum S. Augustino: grave est peccatum non diligere Deum ex toto corde, præponendo, aut æquando ipsi aliud quidpiam, Conc. Non diligere actu continuo & intensissimo, Nego maj. Primus modus diligendi Deum ex toto corde est proprius justorum in terris peregrinantium. Secundus Beatorum. Hic excludit omne peccatum etiam veniale: sed est impossibilis in hoc vitæ statu, & ideò non præcipitur. Proponitur tamen tamquam finis & scopus, ad quem peregrinantes tendere debent quotidie proficiendo, & quotidianos defectus minuendo: chari-

tas enim nascitur ut crescat ; crescit donec perficiatur.

Dices 3. S. Basilius in regulis brevioribus docet nulla peccata existimanda esse minuta , nec differentiam minorum & majorum peccatorum reperiri in Evangelio : Ergo.

Respondeo 1. Dubium est quibusdam , an opus illud sit S. Basilii. 2. Auctor , sive S. Basilius , sive quivis alius , vult duntaxat peccatum veniale non esse contemnendum , tanquam aliquid leve ; Probatque ex Scriptura , quæ indiscriminatim deterret à quolibet peccato tanquam à malo præ cæteris temporalibus fugiendo. In novo quoque Testamento sic Fides peccatorum leviorum & venialium stabilitur , ut simul ab iis committendis lectores vehementer deterreantur : *De Verbo otioso* , inquit Christus , Matth. 12. *rationem reddent in die judicii. Qui irascitur fratri suo, reus erit iudicio* , Matth. 5. *Væ vobis qui ridetis* , Luc. 6. *Attendite ne iustitiam vestram faciatis coram hominibus , ut videamini ab eis ; alioquin mercedem non habebitis apud Patrem* , Matth. 6. *Habeo adversus te pauca . . . . pœnitentiam age : si quominus , veniam tibi citò* , Apocal. 2. Hunc scribendi modum de peccatis venialibus sic tenuerunt sancti Patres in scriptis suis , ut ex iis lectores reddantur timidiore , nedum audaciores ad illa committenda , quod imprimis observare debent Theologi morales , ubi definiunt peccatum aliquod esse leve & veniale.

Enimverò non sine magno animarum periculo hæc legerentur. Peccata levia in quolibet numero non excludunt ab amicitia Dei , nec à regno cœlorum ; facile eorum obtinetur remissio ; non necessario in confessione sacramentali sunt decla-



declaranda; absolute non reddunt sacrilegam Sacramentorum perceptionem, aut administrationem; charitatem non extinguunt, sed fervorem & devotionem duntaxat impediunt. Levia autem peccata sunt superbia, ambitio, vanitas, avaritia, voluptas, modò in iis finis ultimus non constituatur. Hæc quidem verissima sunt: sed destruunt potius, quàm ædificant, nisi ulterius progrediatur Libri auctor, sparsimque doceat exemplo sanctorum Patrum, imò & ipsiusmet Christi Domini, quàm grave sit malum, quamque timendum, Deum etiam in minutissimis offendere; quàm horrendæ pænæ maneant eos, qui ista leviora negligunt, & in quanto versetur periculo eorum salus, hoc quippe scribendi modo mens lectoris illustratur, & voluntas ad proficiendum accenditur.

Dices 4. Minima opera bona iusti merentur vitam æternam: ergo & minima peccata supplicium æternum.

Nego conseq. 1. Quia Deus ultra condignum remunerare potest, utpotè infinite misericors, punire verò non potest, cùm iustitiæ ejus repugnet. 2. Sicut minimum opus bonum vitam æternam per se non meretur, sed propter charitatem, ex qua proficiscitur; sic peccatum ex objecto leve, non est dignum pœna æterna, nisi ex Dei contemptu procedat.

Dices 5. Peccatum veniale infinitam Dei majestatem offendit: ergo est malitiæ infinitæ, ac proinde æterna pœna dignum.

Distinguo anteced. Offendit secundum quid, & in re levissima; Concedo: Offendit simpliciter, & in re gravi, Nego anteced. Neque enim

neceſſe eſt quamlibet offeſſam tantam habere malitiam, quanta eſt dignitas in perſona quæ læditur, ut videre eſt in aulico, qui propter leve aliquod dictum aut factum Regi minùs acceptum, non dicitur reus læſæ majeſtatis.

Instabis : Malum culpæ etiam leviffimæ, majus eſt malo pœnæ graviffimo, aliàs licitum eſſet aliquando peccare leviter, verbi gratia mentiri, quando neceſſarium videretur ad vitandum grave malum temporale : Ergo peccatum veniale juſtè puniri poteſt pœna graviffima, ſcilicet damnatione æterna.

Nego conſeq. Quamvis enim malum culpæ ſit ſuperioris ordinis reſpectu cujuſcunque mali pœnæ etiam infinitæ, inde tamen rectè non concluditur nullam pœnam eſſe juſtam vindictam peccati etiam leviffimi, quemadmodum non ſequitur argentum vel aurum, in qualibet quantitate appendatur, non poſſe eſſe juſtum pretium animalis, putà oviculæ, ex eo quòd minutiffimum animal perfectius ſit quovis corpore inanimato. In his itaque ſervanda eſt aliqua proportio ſecundum juſtitix Leges, ita ut pro culpa leviori decernatur pœna levior ; ſicut pro animali ignobiliſſimo ſtatuitur minus pretium.

Instabis iterum : quamdiu peccatum veniale non eſt remiſſum, tandiu puniri poteſt : remitti autem non poteſt ſine gratia : ergo quòd non ſemper puniatur, miſericordiæ divinæ eſt tribuendum.

Distinguo conſeq. Miſericordiæ divinæ eſt tribuendum, quòd gratiam juſto concedat ad ſatiſfaciendum pro venialibus, Concedo : Quòd juſtum in æternum non puniat, Nego conſeq.  
Neque

Neque enim aulico Regi acceptissimo perpetua debetur pœna propter leviozem offensam ; ex eo quodd veniam sperare non possit, nisi ex indulgentia Principis.

## C A P U T V I.

### De Peccati mortalis differentia à veniali.

Q. I. *In quo differt peccatum mortale à veniali ?*

R. In eo quodd homo per peccatum mortale simpliciter avertitur à Deo tanquam à fine ultimo, & consequenter suum finem ultimum constituit saltem implicite in creatura : per peccatum autem veniale non avertitur simpliciter à Deo, neque suum ultimum finem in creatura constituit : paratus quippe est illa, quæ inordinatè diligit, & in quibus venialiter peccat, potius dimittere, quàm à Deo separari.

Peccatum itaque mortale in duobus essentialiter consistit, nempe in aversione à Deo, & conversione ad creaturam tanquam ad ultimum finem ; peccatum verò veniale in sola conversione ad creaturam, salvo ordine ad Deum, ut ad ultimum finem.

Probatur. Illud censetur essentialiter, quod primum intelligitur in re qualibet, & ex quo cætera fluunt : atqui aversio à Deo, & conversio ad creaturam tanquam ultimum finem, primo loco intelligitur in peccato mortali, & ex illa veluti ex radice cætera fluunt : Ergo.

Minor probatur. Sex potissimum sunt propria peccati mortalis. I. Solvit amicitiam cum Deo, destruitque charitatem, & omnes virtutes

morales infusas. 2. Inducit mortem animæ. 3. Infert peccanti malum aliquo modo infinitum. 4. Est malum natura sua irreparabile. 5. Est offensa Dei infinita. 6. Peccatorem constituit reum pœnæ æternæ. Atqui hæc omnia veluti naturaliter fluunt ex aversione à Deo : Ergo.

Primò, aversio à Deo solvit Dei amicitiam, destruitque charitatem. Quid est enim charitas, nisi unio & conjunctio cum Deo, à quo aversio illa separat? Deinde charitas cuncta ordinat ad Deum : ex aversione autem sequitur amor sui, per quem peccator omnia ad se convertit : *Unde hæc aversio*, inquit sanctus Augustinus Libro 3. de libero arbitrio cap. 24. *nisi dum ille, cui bonum est Deus, sibi ipse vult esse bonum suum, sicut sibi est Deus.* Hinc avaritia vocatur ab Apostolo Gal. 5. Idolorum servitus ; & Philip. 3. Venter dicitur carnalium Deus. In Commentario quoque in Psalmum 80. inter opera sancti Hieronymi scribit Auctor : *Quæcunque vitia habemus, & quæcunque peccata, tot recentes habemus Deos . . . . . unusquisque enim quod cupit & veneratur, hoc illi Deus.* Porro cum virtutes morales infusæ charitati innitantur tanquam ejus proprietates, sublato per peccatum mortale earum fundamento, ipsas consequenter ruere necesse est.

Secundò, aversio à Deo inducit animæ mortem, à qua peccatum grave dicitur mortale : *Sicut enim expirat corpus*, inquit sanctus Augustinus, Serm. 61. aliàs 5. de Verbis Domini : *cum animam emittit ; ita expirat anima, cum Deum amittit. Deus amissus, mors animæ ; anima emissa, mors corporis.* Levia verò peccata non sunt mortalia, sed venialia ; quia non avertunt peccatorem à Deo,  
nec



nec destruunt charitatem : Si *charitas excludatur*, ait S. Thomas , qu. 7. de malo art. 1. *est peccatum mortale : si autem sit talis defectus rectitudinis , qui charitatem non excludat , est peccatum veniale.*

Tertiò , illa averfio , quatenus hominem privat Deo , infert illi malum quodammodo infinitum ; privatio quippe tantum æftimatur malum , quantum est oppofitum bonum. Infamia v. gr. pejor eft paupertate , quia melius eft nomen bonum , quàm divitiæ multæ : mors plus eft timenda , quàm cæcitas , quia vita , cujus mors eft privatio , eft quid longè melius visu , cui oppofita eft cæcitas. Deus autem eft bonum infinitum , à quo per averfionem feperatur peccator : ergo propter averfionem à Deo , peccatum mortale infert homini malum infinitum , quod de peccato veniali dici nequit.

Si autem quæras , quod homini detrimentum fequatur ex peccato veniali , facilis erit refponfio. Cùm enim peccatum veniale fit converfio ad bonum commutabile , inordinatusque affectus ad creaturam , falvo femper ordine ad Deum , ut ultimum finem , opponitur gratiæ actuali , quæ eft motio fupernaturalis in Deum. Ergo peccatum veniale privat hominem actuali motione charitatis , quæ non eft bonum infinitum , licèt fic fuperioris ordinis , plusque timenda fit ejus jactura , quàm cujuscunque rei naturalis.

Quartò ex averfione à Deo fequitur inordinatio per fe irreparabilis ; quia destruxit principium vitæ fpiritualis , nempe charitatem & ordinem ad ultimum finem. Ita S. Thomas 1. 2. qu. 72. art. 5. ubi fic habet : *Deordinatio mortis , quæ eft per remotionem principii vitæ , eft irreparabilis fe-*

cundum naturam, inordinatio autem ægritudinis reparari potest propter id, quo salvatur principium vitæ. Similiter est in his quæ pertinent ad animam; nam in speculativis, qui errat circa principia, imperfuasibilis est; qui autem errat salvatis principiis, per ipsa principia revocari potest. Et similiter in operativis, qui peccando avertitur ab ultimo fine quantum est ex natura peccati, habet lapsum irreparabilem; & idè dicitur peccare mortaliter, æternaliter puniendus: qui verò peccat citra aversionem à Deo, ex ipsa ratione peccati reparabiliter deordinatur; quia salvatur principium; & idè dicitur peccare venialiter, quia scilicet non ita peccat, ut mereatur interminabilem pœnam. Hactenus sanctus Thomas. Idipsum repetit 3. part. qu. 88. art. 1.

Quintò ex aversione à Deo nascitur infinita Dei offensa; quia per illam peccator aufert à Deo (saltem quoad affectum) rationem ultimi finis, ut eam vilissimæ creaturæ asserat: *Proprium Dei est*, inquit sanctus Thomas lect. 3. in cap. 3. Epist. ad Philipp. *ut sit primum principium & finis ultimus.* Unde qui pro fine habet aliud, illud est Deus suus. Similia habet in cap. 5. ad Ephes. his verbis: *Idololatria est, quando honor soli Deo debitus impenditur creaturæ; Deo autem duplex honor debetur, scilicet, ut in eo finem nostrum constituamus, & ut in eo fiduciam nostram finaliter ponamus: ergo qui hoc in creaturis ponit, reus est idololatriæ. Hoc autem facit avarus (idem dicito de aliis peccatoribus) qui finem in re creata ponit, & totam fiduciam.* Porro Rex non potest majori affici injuria, quàm cum à regiæ majestatis dignitate ad vilis mancipii conditionem deprimitur.

Sextò, cum ex aversione à Deo nascatur offensa infinita, ex eadem etiam sequitur reatus pœnæ

pœnæ infinitæ; quia secundum justitiæ Leges pœna respondet offensæ.

Dices 1. Peccans mortaliter non semper præfert creaturam Deo, ut patet in S. Paulo adhuc infideli, qui ex inordinato zelo Dei Ecclesiam persequebatur: *Per zelum Legis*, inquit S. Petrus Chrysolog. Serm. 157. *impugnabat Legem, & in Deum, Dei amore peccabat.*

Nego antecedens, & ejus confirmationem. Nam zelus ille & ignorantia vincibilis oriuntur ex inordinato amore, saltem sui ipsius, propter quem peccans negligit inquirere ea, quæ scire tenetur.

Instabis: finis ultimus est ille, ad quem omnia referuntur, nec ipse ad aliud refertur: atqui peccans mortaliter non refert omnia ad creaturam propter quam peccat; fur v. gr. non ordinat omnia ad pecuniam, quam subripit.

Nego minor. Qui enim peccat mortaliter, omnia refert ad bonum privatum: Deum etiam, cum videtur illum appetere, appetit sibi ipsi: *Præsumptuosus*, inquit Aristoteles 9. Eth. cap. 8. *sui gratia cuncta agit, tantò magis, quantò præsumptuosior.* Et sanctus Thomas in 2. dist. 42. qu. 1. art. 2. sic scribit: *Finis ultimus in amore commutabilium bonorum est ipse homo, propter quem alia quærit: & ideo si radix peccati accipiat ex parte ipsius peccantis, erit una: si autem sumatur ex parte eorum, quæ propter se peccans quærit, erunt plures.*

Urgebis: Peccator est capax amicitiae: atqui amor amicitiae non procedit ex appetitu boni privati, aliàs esset amor concupiscentiae: ergo peccans non refert omnia ad seipsum.

Distinguo minorem ; Amor amicitiae propriè dictæ , qualis est in homine justo , Conc. Impropriè dictæ , qualis est in peccatore , Nego minor. *Charitas*, inquit Apostolus , 1. Cor. 13. . . . . *non quærit quæ sua sunt.* Cùm enim sit quædam participatio naturæ divinæ , semper inclinât justum in bonum Dei : inordinatus verò amor sui , qui charitati opponitur , quique in peccatore dominatur , omnia ordinat ad bonum privatum. Unde amicitia , nisi ex amore Dei procedat , bonum amici ultimè refert ad privatum appetentis commodum , *amicabilia ad alios , ex his quæ sunt ad seipsum profecta esse videntur* , 9. Ethic. cap. 4.

Instabis iterùm : Sequeretur eum qui peccat venialiter ex deliberata voluntate constituere suum ultimum finem in creatura. Nam omnis actio humana ex motione alicujus finis ultimi procedit : atqui actio , quæ fit ex deliberata voluntate , est humana : ergo est propter aliquem ultimum finem. Porro ille ultimus finis non potest esse Deus ; cùm peccatum veniale non sit referibile ad Deum : ergo est bonum privatum.

Distinguo sequel. Sequeretur constituere secundùm quid ultimum finem in creatura , & in bono privato , Concedo : Constituere absolutè , & simpliciter , Nego. Verum quidem est quòd quicumque venialiter peccat inordinatè se diligit , refertque ad seipsum quidquid utilitatis apprehendit in objecto. Sed inordinatus ille amor sui non procedit usque ad contemptum Dei , quemadmodum in eo qui peccat mortaliter ; quia non excludit charitatem , per quam homo seipsum ulterius ordinat ad Deum. Ita S. Thomas in primum dist. 1. quæst. 3. art. unico ad quartum.

Dices 2.



Dices 2. Actus charitatis tantum Deo tribuit, quantum peccatum mortale detrahit; sicut enim per peccatum mortale tollitur à Deo ratio ultimi finis, & asseritur vilissimæ creaturæ; ita per actum charitatis supremus ille honos Deo conferitur, & creaturæ denegatur. Atqui actus charitatis non est infinitus nisi extrinsecè; Ergo peccatum mortale est offensa Dei extrinsecè tantum infinita.

Nego primam propositionem, & quidquid ex ea concluditur. Qui enim Regem in throno sedentem veneratur, non est comparandus ei, qui illum inde deturbaret. Et ratio est, quia honor est in honorante: injuria verò in persona læsa; hoc est, tantum honorat quis, quantum subjicit alteri; & contrà, tantum lædit personam, quantum illam deprimit. Per peccatum autem mortale Deus infinitè deprimitur, quatenus vilissimæ creaturæ postponitur: per charitatem verò vix quidquam Deo subjicitur, cum creaturæ omnes comparatæ Deo sint tanquam nihilum: *Quicumque*, ait sanctus Thomas, quæst. 28. de Verit. artic. 2. *rem aliquam digniorem digniori postponit, injuriam ei facit, & tantò amplius, quantò res illa est dignior. Quicumque autem in re temporali finem sibi constituit, quod facit omnis mortaliter peccans, ex hoc ipso quantum ad affectum suum postponit Creatorem creaturæ, diligens plus creaturam quam Creatorem: finis enim est, qui maxime diligitur. Cum ergo Deus in infinitum creaturam excedat, erit peccatum contra Deum infinita offensa ex parte dignitatis ejus, cui peccatum injuria fit, dum ipse contemnitur.*

Confirmatur responsio. Honor quem Christus Deo Patri exhibuit, est infinitus simpliciter; quia

quia habet pro subiecto personam simpliciter infinitam, honor enim est in honorante, qui se subicit. Ergo peccatum mortale est simpliciter infinitum in ratione offensæ Dei, quia subiectatur in persona infinita; injuria enim est in persona læsa, quæ deprimitur.

Q. 2. *Malitia peccati mortalis, & malitia peccati venialis differuntne essentialiter?*

R. Differunt: Quia malitia quæ opponitur fini ultimo, & destruit charitatem, differt specie, & essentialiter ab illa, cui ista non competunt: atqui sola peccati mortalis malitia est opposita fini ultimo, & destructiva charitatis habitualis: Ergo.

Dices: Illa peccata essentialiter non differunt, quorum objecta sunt ejusdem speciei: atqui objecta peccati mortalis, & venialis sunt ejusdem speciei: nec differunt nisi secundum majus & minus: Ergo.

Minor probatur. Motus indeliberatus odii circa Deum, est peccatum veniale; deliberatus verò mortale: atqui illi duo motus habent idem objectum, nempe Deum. Item objecta furti levis & gravioris non differunt nisi secundum magis & minus: Ergo.

Distinguo maj. Objecta formalia, Conc. Materialia, Nego maj. Nam eadem pecunia potest esse objectum materiale vanitatis, avaritiæ, & injustitiæ, quæ sunt peccata specie distincta propter diversa objecta formalia.

Distinguo similiter minor. Peccata venalia & mortalia habent sæpissimè objecta ejusdem speciei materialia, Conc. Formalia, Nego minor. Si quis v. gr. die Jovis scienter produceret cœnam carnibus instructam ultra mediam noctem,  
circa

circa unum & idem objectum materiale peccaret venialiter ante mediam noctem, in hypothesi quodd edisset cum levi intemperantia, & mortaliter post mediam noctem, quia tunc adveniret nova transgressio Legis, novaque deordinatio in voluntate. Idem advertetur in odio Dei indeliberato, si comparetur cum deliberato, & in furto levi cum gravi collato; voluptas quippe in deliberato motu odii, & in levi furto, non vult separari à Deo, neque constituere suum ultimum finem in creatura, ad quod mutato consilio se determinat in odio deliberato, & in furto gravi.

Instabis: Idem est specie actus charitatis in via & in patria, licet mutetur cognitio Dei: nam obscuritati Fidei succedit claritas visionis beatificæ. Ergo major aut minor advertentia difformitatis, quæ est in objecto, non efficit actum specie distinctum.

Quidquid sit de antecedente, distingo consequens: major vel minor advertentia non efficit actum specie distinctum, si eadem difformitas ubique deprehendatur, Conc. Si alia, Nego consequ. Cum igitur Beati, quando erant in via, crediderint & amaverint quæcumque vident in Deo, non desunt Theologi, qui doceant amorem Dei in via & in patria esse ejusdem speciei. Sic duo superbiæ motus circa idem objectum materiale & formale sufficienter cognitum, non differunt nisi accidentaliter, licet unus procedat ex clariori cognitione, alter verò ex obscuriori: quia in utroque eadem turpitudine apprehenditur, licet diversimodè: sed si per cognitionem perfectiorem alia detegeretur turpitudine, actus inde consequens esset alterius speciei propter diversum objectum formale.

Ergo

Ergo fieri nequit, ut unum numero peccatum veniale evadat mortale, & contra; quia peccatum mortale & veniale essentialiter differunt, habentque objecta formalia specie distincta. Ergo delectatio venerea, quæ est venialis ante sufficientem advertentiam, mortalis post, licet in sensualitate, sive in appetitu concupiscibili perseveret idem numero motus, in voluntate tamen rationali est duplex specie actus; vult quippe post sufficientem advertentiam quod ante noluit, nimirum separari à Deo, & constituere suum ultimum finem in creatura.

Dices: ex sancto Augustino Tractatu 12. in Joan. *Plura minuta peccata, si negligantur, occidunt: quemadmodum minuta grana arenæ, si multa sint, premunt, atque opprimunt, & aqua paulatim per sentinam intrando, si non exhauriatur, mergit navim. Ergo plura peccata venialia mortalia evadunt.*

Distinguo antecedens: Occidunt dispositive, quemadmodum levis febris; si non curetur, tandem extinguit calorem naturalem, & mortem affert, Concedo; Occidunt per se formaliter, Nego antecedens.

Q. 3. *Quibus signis discerni potest peccatum mortale à veniali?*

R. 1. Ad peccatum mortale duo requiruntur. Primum, ut sit materia gravis. Secundum, ut sit sufficiens advertentia & deliberatio, unde si alterutrum desit, non erit nisi peccatum veniale. Quare mendacium jocosum, & furtum unius assis, licet ex deliberata voluntate procedant, sunt peccata duntaxat venialia propter levitatem materiæ: contra verò delectatio turpis, quamvis sit



fit materia gravis, si tamen desit sufficiens advertentia, aut libertas venialis censetur.

R. 2. Cum S. Augustino Lib. Enchir. cap. 77. & seqq. aliquando in praxi difficile est determinare, an, & quale sit peccatum: *Quæ sint autem levia, inquit, & quæ gravia peccata, non humano, sed divino sunt pensanda iudicio . . . . . putari possent non esse peccatum misceri conjugii non filiorum procreandorum causa, quod bonum est nuptiale, sed carnalis etiam voluptatis; ut adulterii sive cujusquam alterius immunditiæ mortiferum malum devitet infirmitas. Quis autem jam esse peccatum neget, cum dare veniam facientibus Apostolica auctoritas fateatur . . . . sunt autem quædam, quæ levissima putarentur, nisi in Scripturis demonstrarentur opinione graviora? Quis enim dicentem fratri suo, fatue, reum gehennæ putaret, nisi Veritas diceret? aut quis æstimaret quàm magnum peccatum sit dies observare, sicut observant qui certis diebus, sive mensibus, sive annis volunt, vel nolunt aliquid inchoare, eo quod secundum vanas doctrinas hominum fausta vel infausa existiment tempora, nisi hujus mali magnitudinem ex timore Apostoli pensarem, qui talibus ait, timeo ne fortè sine causa laboraverim in vobis? Hinc accidit quod peccata, cum in consuetudinem venerint, aut parva, aut nulla esse creduntur. Væ peccatis hominum, quæ sola inusitata exhorrescimus, &c.*

Itaque ad ponderandam peccatorum gravitatem, imprimis consulenda S. Scriptura, præsertimque novum Testamentum, ubi Christus Legem naturalem explicuit, vindicavitque à falsis interpretationibus hominum. Attendenda verba, quibus ibidem res aliqua prohibetur, an sub gravi pœna; ex gravitate enim pœnæ colligitur gravitas culpæ.

Cum

Cùm autem omnia, quæ servanda & vitanda sunt, expressè non contineantur in Scriptura Sacra, consulenda est etiam Traditio Ecclesiæ, videndum quid sancti Patres & Theologi communiter circa difficultatem propositam senserint, quemadmodum præscribit Concilium Trident. Sess. 4. *Ad coercenda, inquit, petulantia ingenia . . . nemo suæ prudentiæ innixus in rebus Fidei & morum . . . Sacram Scripturam ad suos sensus contorquens . . . interpretari audeat.*

## CAPUT VII.

### De Peccato originali.

**V**ersamur in materia accuratiùs pertractanda; cùm in mente sancti Augustini notitia peccati originalis, & Fides redemptionis humanæ per Christum sint duo veluti cardines, circa quos vertitur Christiana Religio: *Vide, inquit sanctus Doctor, Epistola 157. aliàs 89. quemadmodum commendat (Apostolus) unum & unum, id est, Adam & Christum: illum ad condemnationem, hunc ad justificationem, cùm tantò post Adam Christus venerit in carne; ut sciamus etiam antiquos justos, quicumque esse potuerunt, nonnisi per eandem fidem fuisse liberatos, per quam liberamur & nos, scilicet: Incarnationis Christi, quæ illis prænuntiabatur. Enimverò an medicum admittet, qui se sanum existimat, aut redemptorem agnoscet, qui nescit se fuisse captivum? Ut ergo sciamus, quæ, & quanta nobis attulerit Christus, priùs noscamus oportet quid in Adam amiserimus.*

Hæc autem circa peccatum originale nobis investiganda sunt. 1. Utrum reverà existat. 2. Quid sit, & in quo consistat. 3. Quomodo traducatur in Adæ posteros. 4. Utrum ita necessariò in omnes transmittatur, ut nullus excipi possit. 5. Quæ sint illius pænæ, tum in præsentī vita, tum in futura.

## §. I.

*Utrum existat peccatum originale?*

**N**egarunt Pelagiani, docueruntque 1. Adamum peccando sibi soli nocuisse, morbos, mortem, & concupiscentiam non esse effectus peccati illius, sed naturales naturæ humanæ defectus. Postea tamen argumentis Catholicorum coacti sunt confiteri mortem corporis ex Adamo trahi, non verò peccatum. Priorem Pelagianorum errorem XVI. sæculo amplexi sunt Anabaptistæ, & Sociniani; posteriorem Zwingliani: contra utrumque

Respondeo: De fide est, per Adæ prævaricationem omnes homines nasci peccato, morti, & aliis miseriis obnoxios. Ita enim definiit Concilium Tridentinum contra Anabaptistas & Zwinglianos Sess. 5. Can. 2. his verbis: *Si quis Adæ prævaricationem sibi soli & non ejus propagini asserit nocuisse . . . aut inquinatum illum per inobedientiæ peccatum, mortem & pœnas corporis tantum in omne genus humanum transfudisse, non autem & peccatum, quod est mors animæ; anathema sit.*

Probatur 1. ex Scriptura, Psal. 50. *Ecce enim in iniquitatibus conceptus sum, in quem locum sic scribit sanctus Augustinus Enarrat. in Psal. quid est, D. Habert Theolog. Tom. III. O quod*

*quod se dicit in iniquitate conceptum, nisi quia trahitur iniquitas ex Adam? Job 14. Quis potest facere mundum de immundo conceptum semine, nonne tu qui solus es? Quem locum sic vertunt septuaginta Interpretes: Nemo mundus à sorde, cujus est unius diei vita super terram. Agitur hinc de sordibus, quas solus Deus mundare potest; atqui sordes pannorum infantilium emundare possunt homines: ergo textus ille non potest intelligi ad mentem Socinianorum de sordibus corporeis, sed intelligendus est de peccato, & ita interpretati sunt Patres antiquissimi, ut sanctus Clemens Alexandrinus Lib. 3. Strom. Origenes Hom. 12. in Levitic. sanctus Augustinus in Psalmum 50. Rom. 5. Per unum hominem peccatum in hunc mundum intravit, & per peccatum mors; & ita in omnes homines mors pertransiit; in quo omnes peccaverunt.*

Nec dicant Pelagiani & Sociniani Adamum transmisisse peccatum, non propagine, sed imitatione, quatenus suo exemplo posteros ad peccatum induxit; nam, ut argumentatur S. Augustinus Lib. 3. de Peccat. mer. c. 9. si Apostolus peccatum illud commemorare voluisset, quod in hunc mundum, non propagine, sed imitatione intraverit, ejus principem, non Adam, sed Diabolum diceret, de quo scriptum est, *ab initio Diabolus peccat.* Deinde mors intravit per peccatum; cum ergo ipsa in parvulos defæviat, sequitur peccatum in eos fuisse transmissum non imitatione, sed propagine.

Denique, ex Apostolo, peccatum Adæ derivatur ad parvulos, sicut justitia Christi ad regeneratos; atqui justitia Christi non per solam imitationem, sed per veram in illo regenerationem commu-



communicatur fidelibus, ut constat vel ex solo exemplo parvulorum, qui in Christo regenerantur, etiamsi illum imitari non possint.

Probatur 2. ex omnibus Conciliis, quæ in Oriente, in Occidente & Africa contra Pelagianos celebrata, errorem, quem impugnamus, proscripserunt: *Ubique diffusus Christi exercitus*, inquit sanctus Augustinus Lib. 3. contra Julian. cap. 1. *debellavit apud Carthaginem Cælestium*, quando ipse non eram, & rursus *Constantinopoli longè à regionibus Africanis*. Adde & Diospoli in Palæstina, ubi sequentes Pelagii propositiones anathemate sunt percussæ. Prima, quod peccatum Adæ ipsum solum læserit. Secunda, quod infantes nuper nati in illo statu sint, in quo Adam fuit ante prævaricationem. Tertia, quod neque per mortem, vel prævaricationem Adæ omne genus hominum moriatur. Quarta, quod infantes, etsi non baptizentur, habeant vitam æternam. Denique Concilium Arausicanum in Gallia sic habet Can. 2. Si quis soli Adæ prævaricationem suam, & non ejus propagini asserit nocuisse, aut certè mortem tantum corporis, quæ pœna est peccati, non autem & peccatum, quod est mors animæ per unum hominem in omne genus hominum transisse testatur, injustitiam Deo dabit, contradicens Apostolo dicenti, per unum hominem, &c.

Probatur 3. ex Patribus, S. Irénæus, Lib. 3. cap. 20. Quemadmodum, inquit, per inobedientiam unius hominis . . . . . peccatores facti sunt multi, & amiserunt vitam; ita oportuit & per obedientiam unius hominis . . . . . justificari multos, & percipere salutem.

Origenes Hom. 14. in Lucam sic habet: *Parvuli baptizantur in remissionem peccatorum. Quoriam peccatorum? vel quo tempore peccaverunt? aut quando potest ulla lavacri in parvulis ratio subsistere, nisi juxta illum*

*illum sensum, de quo paulò antè diximus, nemo mundus à sorde, nec si unius diei, &c. & Lib. 4. contra Celsum, in Adamo omnes moriuntur, & damnati sunt in similitudinem prævaricationis Adami, nec tam de uno quopiam, quàm de toto humano genere Scriptura divina loquitur.*

Sanctus Cyprianus Epist. 59. *Quanto magis, inquit, prohiberi non debet infans (à baptisinate) qui recens natus nihil peccavit, nisi quòd secundum Adam carnaliter natus, contagium mortis antiquæ primæ natiuitate contraxit. Qui ad remissionem peccatorum accipiendam hoc ipso facilius accedit, quòd illi remittuntur non propria, sed aliena peccata. Similia habet sanctus Firmilianus Epistola, quæ est 75. inter Epistolas sancti Cypriani.*

S. Augustinus Lib. 3. de Peccatorum meritis cap. 6. asserit hanc esse antiquam & universalem Ecclesiæ Traditionem, peccatum & mortem ab Adamo in ejus posteros propagine transmitti: *Non aliud, inquit, de peccato originali, ex quo Christi Ecclesia constituta est, divinarum Scripturarum Tractatores scripserunt, non aliud à majoribus acceperunt, non aliud posteris tradiderunt.*

Dices 1. Ezechielis 18. habetur: *Anima, quæ peccaverit, ipsa morietur: filius non portabit iniquitatem patris sui: Ergo.*

Nego consequ. Nam ex dicendis, peccatum originale non est peccatum Adami, sed cuique inest proprium. Unde S. Augustinus Lib. 3. de pecc. mer. cap. 8. Pelagianis eundem textum objicientibus, sic respondet: *Inputat non jam aliena, sed propria: carnali generatione jam eorum sunt, quibus nondum spirituali regeneratione dimissa sunt.* Et Lib. 6. contra

tra Julianum cap. 12. *Aliena sunt proprietate actionis, & nostra sunt contagione propagationis.*

Dices 2. *Ubi non est lex*, inquit Apostolus, Rom. 4. v. 5. *nec prævaricatio*; atqui infantes non acceperunt legem: Ergo nulla in eis prævaricatio, nec proinde peccatum.

Distinguo min. Non acceperunt legem in sua conceptione & nativitate, Conc. Non acceperunt legem in primo parente, in quo continebantur, & in quo audierunt, *in quocumque die comederis, morte morieris.* Nego minor.

Distinguo similiter conseq. nulla in eis prævaricatio, nec proinde peccatum, per propriam voluntatem, Conc. Per voluntatem Adami, quæ & ipsorum fuit, Nego conseq. Ita S. Augustin. c. 7. lib. 3. de pec. mer. *Nec illud*, inquit, *liquidè dici potest, quòd peccatum Adæ etiam non peccantibus nocuit, cum Scriptura dicat, in quo omnes peccaverunt. Nec sic dicuntur ista aliena peccata, tanquam omnino ad parvulos non pertineant: siquidem in Adam omnes tunc peccaverunt, quando in ejus natura illa insita vi, qua eos gignere poterat, adhuc omnes ille unus fuerunt; sed dicuntur aliena, quia nondum ipsi agebant vitas proprias; sed quidquid erat in futura propagine, vita unius hominis continebat.*

Dices 3. Rom. 5. *Regnavit mors ab Adam usque ad Moysen, etiam in eos, qui non peccaverunt in similitudinem prævaricationis Adæ*: Ergo mortem duntaxat, non peccatum ex Adamo trahimus.

Distinguo anteced. Qui non peccaverunt propria voluntate, sive, ut loquitur Apostolus, in similitudinem prævaricationis Adæ, Concedo: Qui non peccaverunt simpliciter, & voluntate Adami, Nego antecedens. Mors enim, quæ regnavit usque ad Moysen, est pœna justa: atqui non esset

justa, nisi supponeretur peccatum. Unde Apostolus expressè dicit, *usque ad legem peccatum erat in mundo : peccatum autem non imputabatur*, id est, non agnoscebatur ; per Legem enim cognitio peccati. Ita S. Augustinus Lib. 6. contra Julianum cap. 4.

Instabis I. Apostolus ibidem subdit : *Si unius delicto multi mortui sunt, multò magis gratia Dei . . . . . in plures abundavit* : Ex quibus sic argumentari licet : Plures sunt, ex Apostolo, qui in Christo justificantur, quàm qui in Adamo peccaverunt ; atqui plures illi in Christo justificati paucissimi sunt respectu Infidelium, & eorum, qui sine Baptismo decedunt : ergo paucissimi admodum sunt, ad quos peccatum Adami transmittitur.

R. I. In Græco non habetur, *plures*, sed *multos*, πολλοὺς. 2. Termini illi, *multi*, *plures*, *omnes*, promiscuè hîc usurpantur ab Apostolo, ut legenti patebit ; ait enim, *in omnes homines mors pertransiit : in quo (Adamo) omnes peccaverunt*. Item, *si unius delicto multi mortui sunt, per unius justitiam in omnes homines in justificationem vitæ* : & paucis interjectis : *per unius obedientiam justi constituentur multi*. Cum dictum est, inquit sanctus Augustinus, Lib. 6. contra Julianum cap. 24. *per unum in omnes transisse peccatum ; & postea, per unius inobedientiam peccatores constitutos multos, ipsi sunt multi, qui & omnes*. Nec singulare est Apostolo voces illas promiscuè usurpare ; nam, ut ibidem observat sanctus Doctor, Deus sic illas usurpavit, Genes. 22. ubi dictum est Abrahæ : *in semine tuo benedicentur omnes gentes, & patrem multarum gentium posui te*. Hîc quippe easdem omnes, multas, inquit S. Doctor, & easdem multas omnes esse monstratum est. Quanquam dici potest cum Estio per vocem *plures*, Apostolum non attendere



tendere ad multitudinem eorum, qui Christi gratiæ participes fiunt, sed ad copiam gratiæ, quæ superabundavit, adeò ut plus nobis restituerit Christus, quàm in Adamo perdiderimus, scilicet donum perseverantiæ, auxilia efficacia; hæc enim non fuerunt in statu innocentiae.

Instabis 2. 1. Cor. 15. v. 22. Apostolus hanc comparisonem Adamum inter & Christum instituit: *Sicut in Adam omnes moriuntur, ita & in Christo omnes vivificabuntur*: atqui non omnes in Christo vivificabuntur: ergo neque in Adamo omnes moriuntur.

R. In hoc stare comparisonem Apostoli: sicut quotquot ex Adamo generantur, ii reatum peccati & mortis contrahunt; ita quotquot in Christo regenerantur, ii iustitiam & vitam supernaturalem percipiunt; & si perseverent, felicitatem æternam: & è converso sicut qui ex Adamo via ordinaria non nascitur (quemadmodum Christus) in Adamo non moritur; ita qui in Christo non renascitur, spiritualiter non vivificabitur.

Dices 4. Ex Apostolo 2. Cor. 5. *Omnes nos manifestari oportet ante tribunal Christi, ut referat unusquisque propria corporis sui, prout gessit, sive bonum, sive malum*: atqui parvuli, subsumebant Pelagiani, nihil mali in corpore gesserunt: ergo nullam poenam referent.

R. 1. Retorquendo argumentum contra Adversarios, parvuli, qui decedunt sive ante, sive post Baptismum, nihil boni in proprio corpore gesserunt: ergo nullum præmium recipient, nec regno cælorum, nec vita æterna donabuntur: quod est longè absurdissimum, etiam in sententia Adversariorum.

R. 2. cum S. Aug. Lib. 6. contra Julianum cap. 10. locum illum intelligendum de adultis tantum, ut patet ex contextu capituli, *propria corporis sui dixit, quod ad unumquemque in seipso jam viventem pertineat.*

Dices 5. Veteres, præsertim Græci, disertè negarunt peccatum originale; sic enim scribit sanctus Gregorius Nyssenus Oratione de infantibus, qui præmatura morte abripiuntur, *nec ab initio quidem (parvulus) prorsus in animum morbum admisit.* Sanctus Chrysostomus Homilia ad Neophytos, *infantes, inquit, baptizamus, cum non sint coinquinati peccato, ut eis detur, vel addatur sanctitas.* Et Theodoretus Lib. 5. Hæreticarum Fabularum cap. 18. *quorsum infantes baptizamus, qui peccatum nondum gustarunt?* Ergo.

Distinguo antecedens; Infantes peccatum in animum non admiserunt, non gustarunt; peccatum, inquam, actuale, & personale, Concedo: peccatum originale, Nego antecedens. Ita sanctus Augustinus Lib. 1. contra Julianum verba sancti Chrysostomi objicientem cap. 6. *Peccata dixit parvulos non habere, sed propria. Unde illos innocentes meritò nuncupamus, secundum id, quod ait Apostolus nondum natos nihil egisse boni sive mali: non secundum id, quod ait, per unius inobedientiam peccatores constituti sunt multi.*

Probatur solutionem esse ad mentem laudatorum Patrum.

Ac primò quidem sancti Gregorii Nysseni, qui in Psalmos cap. 16. sic loquitur: *Sordes hominis peccatum est, quod una cum humana orditur natura, quoniam in peccatis concepit me mater mea.*

Secundò; S. Chrysostomi plura testimonia profert S. Augustinus cit. cap. 6. quibus disertè adstruit

adstruit peccatum originale; sic enim scribit sanctus Chrysostomus ad Olympiam: *Quando Adam peccavit, illud grande peccatum omne genus humanum in commune damnavit*, Hom. 10. in Epist. ad Romanos. *Manifestum*, inquit, *quoniam non ipsum peccatum, quod ex legis transgressione, sed illud peccatum, quod ex Adæ inobedientia, hoc erat quod omnia contaminavit*. Et infra, *ut cum tibi dixerit Judæus: Quomodo unius virtute Christi mundus salvatus est? possis eis dicere, quemadmodum uno inobediente Adam mundus damnatus est .... nam alium pro alio damnari, non valde videtur habere rationem; alium autem pro alio salvari, & decentius magis & rationabilius apparet*. Si igitur illud factum est, multò magis hoc. Quin ex ipsamet Homilia ad Neophytos, quam Julianus opponebat, sanctus Augustinus eruit validissimum argumentum pro peccato originali; ait enim sanctus Chrysostomus, *venit semel Christus, invenit nostrum chirographum paternum, quod scripsit Adam. Ille induxit initium debiti, nos sænus auximus posterioribus peccatis*. Quæ verba sanctus Augustinus contra Julianum sic contorquet: *nunquid contentus fuit dicere, paternum chirographum, nisi adderet, nostrum, ut sciremus antequam sænus peccatis nostris posterioribus augeremus, jam illius chirographi paterni ad nos debitum paternum pertinere?*

Tertiò, de mente etiam Theodoreti constat: tum quia scripsit post profligatam ubique Pelagianorum hæresim, & maxime in Concilio Ephesino generali, quod ignorare non potuit: tum quia in caput 5. Ep. ad Rom. hæc habet: *Dicit itaque divinus Apostolus, quod cum Adam peccavisset, & mortalis propter peccatum factus fuisset, utrumque ad genus pervenit*. *Ad omnes enim homines mors pervasit, quate-*

*nus omnes peccaverunt. Non enim propter primi parentis peccatum, sed propter suum (quia ex Tridentino est unicuique proprium) unusquisque mortis decretum suscepit. Etiam infantes, quamvis voluntate propria non peccaverint.*

Instabis : Sanctus Chrysostomus agnoscit quidem omnes homines in Adamo incurrisse mortis reatum, & damnationem ; sed constanter negat in ipso constitutos esse peccatores ; ait enim Hom. 17. in Epist. ad Corinth. *Quid ergo faciam ego ? propter illum pereo ? Certè non propter illum. Neque enim tu mansisti non peccans : sed si non idem peccatum, alterum certè admisisti. Alioqui autem neque à supplicio (mortis) accepisti damnum, sed lucrum. Et Homil. 39. in eandem Epistolam, expendens illud, sicut in Adam omnes moriuntur, sic habet, omnesne, dic quæso, mortui sunt in Adam morte peccati ? Quomodo ergo Noe justus in generatione sua ? quomodo alii omnes ? . . . . . Nam si hoc quidem dictum est de corpore, stat quod dicitur : *sin autem de justitia & peccato, nequaquam.* Ergo.*

Nego antecedens ; In laudatis enim textibus vult duntaxat S. Doctor peccatum Adami, & posterorum ejus non esse irreparabile, quemadmodum peccatum Angelorum : mortem quidem, quæ inde influxit, esse ineluctabilem ; sed non ita peccatum, cum Noe, Abraham & plures alii in Scripturis justî prædicentur.

Urgebis, atqui sanctus Chrysostomus disertè asserit homines reatum mortis duntaxat contraxisse : nullatenus verò peccati ; Hom. quippe 10. in Ep. ad Romanos ad illa verba capitis 5. *Sicut enim per inobedientiam unius hominis peccatores constituti sunt multi, quæstionem movet, & solvit his verbis :*



bis: videtur quæstionem non pusillam habere quod dictum est; sed si quis accuratè attenderit, & hoc quoque per facile solvetur. Quenam igitur quæstio fuerit? dicere videlicet multos ob unius inobedientiam peccatores extitisse. Illo enim peccante, ac mortali effecto, & qui ex eo orti sint, eos tales esse, nihil absurdum. At ex illius inobedientia alterum peccatorem extitisse, id verò quam (obsecro) congruentiam & consequentiam habeat? invenietur enim sic nec pœnas quidem debere qui talis fuerit, si quidem non ex seipso peccator extiterit. En difficultas proposita, sequitur responsio. Quid igitur hoc loco, verbum hoc peccatores, significat? Mibi videtur tantundem significare, quantum illud, supplicio obnoxii ac mortis rei.

Nego subsumptum; quæ enim opponuntur, astruunt Doctrinam Catholicam, nedum destruunt. Concedit quippe sanctus Doctor, nec mortis pœnam debere, qui peccator non extiterit, & inde concludit nos in Adamo factos esse peccatores & mortales, vocemque illam, peccatores, in mente Apostoli tantundem significare, id est, æquè patere ac mortales, ut cum tibi Judæus dixerit, quo pacto uno rectè agente Christo, universus orbis salvus factus est, possis illi respondere, quo pacto uno inobediente Adam universus orbis condemnatus est? quamquam nihil simile inter se habeant peccatum & gratia, mors & vita. Quibus posterioribus verbis sanctus Chrysostomus supponit peccatum & mortem conjungi in Adæ posteris, sicut gratiam & vitam in filiis Dei adoptivis; unde pergit in eadem Homilia, nam & supplicio liberati sumus, & vitiositatem omnem deposuimus, & de integro regenerati sumus, & resurreximus sepulto vetere homine, & redempti sumus, & sanctificati.

Dices

Dices 6. Tertullianus Lib. de Bapt. c. 18. probans Baptismum in parvulis differendum, donec adoleverint, sic scribit: *quid festinat innocens aetas ad remissionem peccatorum?* Ergo.

Nego conseq. Nam ex sancto Augustino supra laudato, *peccata dixit parvulos non habere, sed propria.* Unde illos innocentes meritò nuncupamus, secundum id, quod ait Apostolus, *nondum natos nihil egisse boni sive mali.*

Dices 7. S. Clemens Alexandrinus Lib. 3. Stromatum, apertè negat peccatum originale; sic enim habet post medium: *Dicant ergo nobis ubi fornicatus est infans natus? vel quando sub Adæ cecidit execrationem, qui nihil est operatus? . . . . Et quando dixit David, in peccatis conceptus sum, &c. dicit quidem propheticè matrem Evam, sed Eva fuit mater viventium, & si in peccatis fuit conceptus, sed non ipse in peccato, neque verò ipse peccatum . . . non accusat eum, qui dixit: Crescite & multiplicamini, sed primas impulsiones (concupiscentiæ) & motus ex generatione, per quos Deum non agnoscimus, dicit impietates.*

R. 1. Locum illum esse adeo difficilem, ut multis Theologis videatur in eo contineri objectionem Cassiani, contra quem pugnat S. Clemens, non ipsam S. Doctoris sententiam; sed contrarium suadet libri contextus. 2. ut benignè interpretemur S. Doctorem plura movent. 1. singularis ejus eruditio. 2. ex Schola ejus prodiit Origenes, peccati originalis eximius assertor, ut constat ex laudatis suprà ejus textibus. 3. Nullus hætenus accusavit S. Doctorem de peccato originali malè sensisse, nec Pelagiani illum in suum patrociniū appellarunt, ut colligitur ex scriptis S. Augustini. 4. Ex scopo mens ejus est elucidanda.

danda. Infectatur quidem Cassianum, qui sicut Marcionitæ, & postea Manichæi, duo rerum principia statuebat, alterum spiritualium, & quidem bonum: alterum corporalium, & ipsum malum. Contra insurgit S. Clemens, probatque non accusandum, sed laudandum eum, qui dixit: *Crescite & multiplicamini*, matrimonium non esse fornicationem, ut contendebat Adversarius; nec generationem esse malam, alioqui non corpus duntaxat, sed & anima ipsa esset peccatum, quod posterius negabat Cassianus; non enim generatur solum corpus, sed totus homo constans ex corpore & anima: accusandas solummodo primas impulsiones & motus ex generatione, id est, concupiscentiam, quam S. Thomas, & plures Theologi peccatum originale asserunt, non tamen eo sensu, eoque hæretico, quo Pseudo-Reformati, ut infra ostendemus: illas autem impulsiones non esse ipsam hominis substantiam, sed accessiones ad hominis substantiam, quemadmodum ex S. Basilio loquitur S. Augustinus cit. Lib. I. contra Julianum. Detorquet quidem textus, quibus astruitur peccatum originale, scilicet *nullus est à sorde mundus*, Job. 14. *In iniquitatibus conceptus sum*, Psal. 50. *Execranda dies, in qua natus sum*, Jerem. 20. ut novum & acrius bellum declinet; quis enim nesciat Catholicos peccati originalis defensores à Pelagianis traduci solitos, quasi cum Marcionitis & Manichæis duo rerum principia inveherent? Fatendum tamen est quòd ex ejusmodi argumentandi ratione videatur posse inferri peccatum originale non existere; sed illationem hanc non debuit præcavere S. Clemens, ut qui ea ætate scriberet, qua nondum exortierant

erant hæretici, qui deinceps fidem peccati originalis labefactarunt, *disputans in Catholica Ecclesia*, inquit S. August. Lib. 16. contra Julianum cap. 6. *non se aliter intelligi arbitrabatur, tali quaestione nullius pulsabatur, vobis (Pelagianis) nondum litigantibus, securius loquebatur.*

Instabis: ille directè & perspicuè negat peccatum originale, qui negat infantem, qui nihil operatus est cecidisse sub execrationem Adæ: atqui S. Clemens disertis verbis id negat, *quando*, inquit, *sub Adæ cecidit execrationem, qui nihil operatus est?* Ergo.

Distinguo maj. qui negat ad mentem Catholicorum, Concedo, qui negat ad mentem Adversarii, Nego maj.

Distinguo similiter minorem, S. Clemens negat infantem cecidisse sub prævaricationem Adæ, quasi substantia ejus secundum corpus sit mala, Concedo: quasi vitiositas non accesserit ejus substantiæ, Nego minorem; accusat enim *primas impulsiones & motus ex generatione*, quæ secundum reatum peccati in Baptismo delentur, quamvis secundum quod in eis est materiale, in baptizatis remaneant, ut docent SS. Augustinus & Thomas; & colligitur ex ipso sancto Clemente, qui eodem Lib. 3. Stromatum, dicit nos per Baptismum regenerari, *cum hæc sit*, inquit, *alia ratio in creatione.* Et Lib. 4. *non tales esse vult, quales etiam genuit ex matrice aquæ*: atqui generatio supponit mortem peccati.

Instabis iterum, quæ fuerit mens S. Clementis conjicere licet ex suis Discipulis: Atqui Origenes ab ipso edoctus, non agnovit peccatum originale, ut patet ex ejus Commentario in Epist. ad Roma-



Romanos, in quo illud Apostoli, *peccatum in hunc mundum intravit*, sic interpretatur, ut velit per mundum intelligendos homines terrenos, qui exemplo & in similitudinem Adæ, propria voluntate Legem transgrediuntur. Enim verò quomodo Origenes peccatum originale agnoscere potuisset, cum docuerit animas deliquisse, priusquam infunderentur in corpora tanquam in carceres? Unde sanctus Hieronymus Lib. 3. contra Pelagianos, qui auctoritate Origenis gloriabantur, sic scribit: *Transite ad Amasium vestrum, qui præterita in cælis, & antiqua delicta solvi dicit in Baptismo.*

Nego minorem; Origenes quippe in illo Commentario verba Apostoli pro more allegoricè exponit: allegoria autem non destruit sensum litteralem, quem luculenter confirmavit locis supra laudatis. Unde in ejus sententia priora animarum delicta, & peccatum originale simul in Baptismo delentur.

Dices 8. cum Juliano apud S. Augustinum Lib. 2. de Nupt. & Concup. cap. 28. non peccat iste, qui nascitur, non peccat iste, qui genuit, non peccat ille, qui condidit: per quas igitur rimas inter tot præsidia peccatum fingitur ingressum?

Confirmatur 1. Damnantur nuptiæ, si aliquid habere credantur, unde filii damnabiles generantur. 2. Non omnia peccata dimittuntur in Baptismo, si in baptizatis conjugibus remanet malum, ex quo generentur mali; non enim possunt parentes quod non habent in liberos transfundere. 3. Non peccat, qui non potest aliud esse quàm creatus est; *Nemo namque*, inquit Aristoteles

les Lib. 3. Eth. c. 5. *exprobrabit cuiquam si sit aut natura aut ægitudine, aut vulnere cæcus, quod si ebrietate, aut aliquo flagitio captus sit oculis, omnes utique carpent, ac increpabunt: vitia igitur corporis ea quidem, quæ in nostra sunt potestate, reprehenduntur; ea verò quæ non sunt, non increpantur.*

Respondet S. Augustinus cit. cap. 28. *quid quærit latentem rimam, cum habeat apertissimam januam? per unum hominem, ait Apostolus; per unius debitum, ait Apostolus; per inobedientiam unius hominis, ait Apostolus. Quid quærit amplius? quid quærit apertius? quid quærit inculcatius? Itaque per voluntatem, qua peccavit Adamus à Deo constitutus caput generis humani, peccatum in ejus posteros tranſiit. Omnes homines, inquit S. Thomas I. 2. q. 81. art. 1. qui nascuntur ex Adam possunt considerari ut unus homo, in quantum conveniunt in natura, quam à primo parente accipiunt . . . sic igitur multi homines ex Adam derivati, sunt tanquam multa membra unius corporis: actus autem unius membri corporalis, puta manus, non est voluntarius voluntate ipsius manus, sed voluntate animæ, quæ prius movet membrum. Unde homicidium, quod manus committit, non imputaretur manui ad peccatum, si consideraretur manus secundum se, ut divisa à corpore, sed imputatur ei, in quantum est aliquid hominis, quod movetur à primo principio . . . hominis. Sic igitur inordinatio, quæ est in isto homine ex Adam generato, non est voluntaria voluntate ipsius, sed voluntate primi parentis, qui movet motione generationis omnes, qui ex ejus origine derivantur, sicut voluntas animæ movet omnia membra ad actum. Unde peccatum, quod sic à primo parente in posteros derivatur, dicitur originale. Sicut peccatum, quod ab anima derivatur ad membra corporis, dicitur actuale. Et sicut*

sicut peccatum actuale, quod per membrum aliquod committitur, non est peccatum illius membri, nisi in quantum illud membrum est aliquid ipsius hominis, propter quod vocatur peccatum humanum: ita peccatum originale, non est peccatum hujus personæ, nisi in quantum hæc persona recipit naturam à primo parente; unde & vocatur peccatum naturæ, secundum illud Ephes. 2. Erasmus natura filii iræ.

Non peccat igitur parvulus dum nascitur, sed peccatum contrahit, quod in Adamo commisit; nam ex S. Aug. Lib. 2. de Nupt. cap. 5. per unius illius voluntatem malam omnes peccaverunt, quando omnes ille unus fuerunt. Hinc Apostolus Rom. 5. non dicit de Adamo, in quo omnes peccant, sed in quo omnes peccaverunt, moxque subdit, peccatores constituuntur multi, nempe per generationem, in qua contrahitur macula peccati originalis, à qua actu denominantur peccatores.

Ergo præceptum non comedendi de ligno scientiæ boni & mali datum fuit Adamo, non ut singulari duntaxat homini, sed ut capiti totius generis humani; ita ut ipso obediente, ejus posterii censerentur obedientes, & ipso transgrediente, transgredientes. Utrum autem intercesserit pactum propriè dictum inter Deum & Adamum, disputant Theologi. Alii affirmant, alii, ut nobis videtur, verisimilius negant, contendentes satis fuisse, Deum decreto suo absoluto (quod pactum utcunque dici potest) justitiam originalem, tanquam donum totius naturæ humanæ in Adamo reposuisse ea conditione, ut voluntas ipsius habenda esset pro voluntate posterorum: quantum ad observationem & transgressionem præcepti, ex quo pendeat conservatio & amissio justitiæ ori-

ginalis. Hanc Dei ordinationem colligunt ex Scripturis. Sanctus Hieronymus ex cap. 6. Osee, *ipsi autem sicut Adam transgressi sunt pactum*; & S. Augustinus Lib. 16. de Civit. Dei cap. 19. & Lib. 2. de Nupt. cap. 11. ex illo Genes. 17. *Masculus cujus præputii caro circumcisa non fuerit, peribit anima huius de populo Dei; quia Testamentum meum dissipavit.* In quæ verba sic scribit sanctus Doctor, *tunc dissipavit Testamentum Dei, non hoc de imperata circumcissione, sed illud de ligni prohibitione.* Hinc sanctus Basiliius Hom. de Jejuniis, ait; (quasi nos ipsi in Adamo comederimus) *quoniam non jejunavimus, exulamus à Paradiso.*

Neque verò illud Dei decretum iniquum videri debet, ex eo præsertim, quòd posterorum non fuerit expectatus consensus. 1. Quia Deus magis habet in sua potestate voluntates hominum; quàm ipsi suas. Si ergo Respublica inconsultis pupillis, statuit voluntatem tutoris pro voluntate pupillorum; ita ut quidquid ille egerit, ab illis actum censeatur; quantò magis Deus utpote supremus Dominus, id poterit? 2. quia sicut nos suo præcepto obligavit in Adamo, ita etiam nos in ipso donis suis exaltavit; illa quippe ad posteros erant transmittenda, si Adamus ea conservasset, quod facillè poterat, nulla tentatione pulsus, nulla difficultate præpeditus, præceptum erat servatu facile, & transgressio illius peccatum immane; verisimile enim est pactum, seu Dei decretum ipsi innotuisse, tum ut præcepti gravitatem agnoscens, nihil negligeret in re tanti momenti, tum ut transgressio ejus esset voluntaria, quatenus obnoxios reddebat posteros.

Neque



Neque etiam sequitur damnandas esse nuptias aut peccare parentes, dum generant; quia nec actus conjugalis, nec ipsi parentes sunt vera causa peccati originalis, sed tantum conditio, sine qua non traduceretur peccatum originale: *sicut creanti Deo*, inquit sanctus Augustinus Lib. 3. contra Julianum cap. 24. *non imputatur, quod rationales naturæ à bono deficiunt, sed quod bonum sunt, sic parentibus gignentibus, & malo concupiscentiæ benè utentibus non imputandum est, quod cum eo malo filii nascuntur, sed quod bonum sunt.*

Ad id verò, quod objiciebat Julianus, parentes à labe peccati originalis per Baptismum purgatos, non posse transfundere in liberos peccatum quod non habent; respondet sanctus Augustinus, triticum licet à paleis purgatum, generare tamen aliud triticum paleis involutum, & semen oleæ producere oleastrum, seu oleam sylvestrem. Ideo autem parentes baptizati communicant peccatum, quod non habent; quia non sunt illius origo, sed instrumenta, ac veluti canales, per quos peccatum à primo parente transmittitur.

Instabis: licet Deus sit omnipotens, & supremus omnium Dominus, non potest facere quod repugnat: atqui repugnat actionem ab alio elicitam sine meo consensu, quin & invincibiliter me ignorante, ex dispositione Dei ita esse in me voluntariam, ut ex ea sim vel laudandus & præmio donandus, si bona sit; vel vituperandus, & damnandus, si mala. 1. Quia voluntarium definitur id, quod fit à principio interno cognoscente singula, in quibus est actio. Hinc actio alterius, quam non approbo, non est voluntaria respectu

mei, quia est à principio mihi extraneo. Similiter quod facio per ignorantiam invincibilem, non est in me voluntarium, multò minus quod fit ab alio me prorsus ignorante. 2. Quid absurdius, magisque repugnans fingi possit, quàm me idèò vituperandum, & damnandum esse propter blasphemiam hominis apud Indos constituti; quia Deus pro suo supremo dominio in omnium voluntates, meam in illo homine reposuit, me non consentiente & ignorante? 3. quia per veterem Adam peccatores constituti sunt multi, sicut per novum Adam justi constituuntur multi: atqui fideles non ita justificantur in Christo, ut per ullum ejus opus bonum fiant laude digni, mereanturque vitam æternam; parvuli enim recens baptizati illam non consequuntur, tanquam præmium aut mercedem, sed tanquam hæreditatem: Ergo.

R. 1. Si nulla esset difficultas in explicando peccato originali, traductio ejus non esset mysterium, nec fide indigeremus ad aliud credendum.

Hic ergo, sicut in aliis mysteriis, agnoscenda est imbecillitas ingenii humani, exclamandumque cum Apostolo Rom. 11. *O altitudo divitiarum sapientiæ & scientiæ Dei: quàm incomprehensibilia sunt judicia ejus, & investigabiles viæ ejus! Quis enim cognovit sensum Domini; aut quis Consiliarius ejus fuit?* Nimirum ut rationem reddat eorum omnium, quæ infinita sua sapientia profert de Thesauris suis. Verùm cum Theologi sit respondere argumentis, quæ contra Religionis nostræ mysteria ab infidelibus proponuntur, ostendereque ea non esse contra, sed solum supra rationem;

R. 2. Argumenta in objectione collecta, concludere

cludere duntaxat pro peccato personali, non pro peccato naturæ, quale est peccatum originale. Equidem ad peccatum personale requiritur usus & libertas propriæ voluntatis: sed ad peccatum naturæ, sufficit voluntas naturæ, seu capitis, in quo erat natura. Ita S. Thomas in 2. dist. 30. q. 2. art. 2. ubi sic scribit: *Oportet, quodd secundum hoc, quod aliquid rationem culpæ habet, secundum hoc ratio voluntarii reperiatur. Sicut autem est quoddam bonum, quod respicit naturam, & quoddam quod respicit personam; ita etiam est quædam culpa naturæ, & quædam personæ. Unde ad culpam personæ requiritur voluntas personæ, sicut patet in culpa actuali, quæ per actum personæ committitur: ad culpam verò naturæ, non requiritur, nisi voluntas in natura illa.* Juxta quam doctrinam

R. 3. In forma ad objectionem, distinguendo minorem, repugnat actionem ab alio elicitam sine meo consensu esse in me voluntariam voluntate personali, Concedo: voluntate naturæ, Nego minorem; quid enim repugnat naturam in capite peccatricem, ideoque vituperabilem spoliari donis supernaturalibus, vulnerari in naturalibus, quatenus nempe propter peccatum originale appetitus sensitivus, & inferiores potentiæ fiunt acrius impetere rationem, quam si homo in puris naturalibus conditus fuisset? Quod si cui durum nimis videatur, propter hujusmodi peccatum naturæ homines æterno igne cruciandos, responsio in promptu est, quod tale obsequium fides à nobis non exigat, liceatque unicuique credere cum pluribus Catholicis, parvulos propter peccatum originale privandos duntaxat æterna beatitudine; sed de pœnis peccati originalis postea.

## §. II.

*Quid sit peccatum originale ; & in quo formaliter consistat ?*

**R**espondeo cum sancto Augustino Lib. de Moribus Ecclesiæ cap. 22. *Hoc peccato antiquo nihil est ad prædicandum notius , nihil ad intelligendum secretius.* Hinc nascitur opinionum diversitas circa essentiam peccati originalis ; nam ex Tertulliano , varietas opinionum venit ex ignorantia veritatis.

Ac 1. ex Heterodoxis Matthias Illyricus Lutheranus docuit peccatum originale esse quandam substantiam malam à Diabolo productam , ita ut homo per peccatum originale fuerit substantialiter mutatus. Cæteri verò Lutherani & Calvinistæ sentiunt peccatum originale esse formaliter ipsam concupiscentiam , seu naturæ humanæ corruptionem , & quandam pravitatem in omnes animæ partes diffusam. Ita Calvinus Lib. 2. Institut. capite 1. *Videtur ergo , inquit , peccatum originale hæreditaria naturæ nostræ pravitas , & corruptio in omnes animæ partes diffusa , quæ primum facit reos iræ Dei , tum etiam opera in nobis profert , quæ Scriptura vocat opera carnis , atque id est propriè , quodd à Paulo sæpius peccatum nominatur.*

Dixi , *formaliter* , ut innuerem , concupiscentiam in mente Novatorum habere veram rationem peccati , cum contra Catholici constanter propugnent eam non dici peccatum , nisi metaphoricè , vel ad summum materialiter , ut nonnulli contendunt.

Atque ex hoc falso principio Adversarii deducunt peccatum originale per Baptismum non deleri,



deleri, sed tegi duntaxat in prædestinatis; cum in iis concupiscentia remaneat, ac in illorum sententia, bona etiam iustorum opera inficiat, ut diximus Tractatu de Gratia.

Ut autem pateat, in quo situs sit Novatorum error,

Nota, duplicem distingui concupiscentiam, actualem scilicet, & habitualem. Actualis sunt affectus inordinati, & indeliberati, qui contra rationem & Legem Dei exurgunt: habitualis verò est naturalis propensio in bonum privatum.

Rursus concupiscentia habitualis tripliciter sumi potest. 1. Pro propensione ad bonum sensibile, quatenus est conveniens naturæ rationali; voluntas enim est inclinatio in bonum totius suppositi, quod cum sit sensibile & rationale, naturaliter propendet in bonum honestum & sensibile; *In tantum concupiscere est homini naturale*, inquit sanctus Thomas 1. 2. quæst. 82. art. 3. ad 1. *in quantum est secundum rationis ordinem: concupiscentia autem quæ transcendit limites rationis, inest homini contra naturam, & talis est concupiscentia originalis peccati.* 2. Strictius pro qualibet inordinatione virium animæ, & hoc sensu concupiscentia diffunditur in omnes animæ potentias, voluntatem scilicet, intellectum, & appetitum sensitivum. 3. Strictissime pro inordinatione membrorum corporis, vel ipsius animæ, qua vitiosè propensa est ad voluptates carnis, quæ ex tactu percipiuntur.

Porro in mente Adversariorum, neque concupiscentia actualis, neque habitualis primo modo sumpta, est formaliter peccatum originale. Non quidem actualis, quia est aliquid consequens ad peccatum originale, & est verus ejus effectus.

Neque habitualis primo modo spectata ; quia ut sic est homini naturalis competebatque Adamo in statu innocentiae : ergo concupiscentia secundo & tertio modo duntaxat est formaliter peccatum originale, juxta Novatorum doctrinam.

Catholici explosa Hæreticorum impietate, in varias abeunt sententias circa formalem peccati originalis rationem.

Prima, est eorum, qui reponunt peccatum originale in morbida quadam qualitate, quæ ex carne per peccatum infecta derivatur in animam. Ita Henricus à Gandavo quodlib. 2. quæst. 11. & Gregorius Ariminensis in 2. dist. 20. qu. 2. art. 1.

Secunda, est Alberti Pighii in Controversia de peccato originali & Catharini in Opusculo de peccato originali, disput. 6. qui definiunt peccatum originale esse denominationem extrinsecam petitam ab actuali prævaricatione Adami, in quo omnes eramus, adeo ut peccatum originale non sit unicuique proprium.

Tertia, est plurium Theologorum, & maxime Thomistarum, qui docent peccatum originale matérieliter esse concupiscentiam habitualement secundo & tertio modo spectatam, formaliter vero defectum justitiæ originalis. Et in hanc sententiam inclinare videtur S. Thomas 1. 2. q. 82. art. 3. ubi sic habet : *Oppositorum oppositæ sunt causæ : est igitur attendenda causa originalis peccati ex causa originalis justitiæ, quæ ei opponitur : tota autem ordinatio originalis justitiæ ex hoc est, quod voluntas hominis erat Deo subiecta, quæ quidem subiectio primò & principaliter erat per voluntatem, cujus est movere omnes alias partes in finem. Unde ex aversione voluntatis à Deo consecuta est inordinatio in omnibus aliis animæ viribus.*

*bus. Sic ergo privatio originalis iustitiæ, per quam voluntas subdebatur, est formale in peccato originali: omnis autem alia inordinatio virium animæ se habet in peccato originali, sicut quiddam materiale . . . . quæ quidem inordinatio communi nomine potest dici concupiscentia.*

Quarta Sententia in Scholis admodum communis; statuit peccatum originale materialiter esse privationem iustitiæ originalis inadæquatè sumptæ, hoc est, gratiæ sanctificantis, formaliter verò esse ipsummet peccatum actuale, quod in Adamo commisimus, quodque moraliter in unoquoque permanet, tanquam vera macula, donec Baptismo, vel perfecta conversione ad Deum fuerit absterfa; namque, inquiunt illi Theologi; peccatum originale est in posteris Adam per modum habitus; ergo de eo idem sentiendum, quod de peccato habituali: atqui ex dictis peccatum habituale est privatio gratiæ sanctificantis propter actum malum, qui præcessit; homicidium, inquit sanctus Augustinus, transit actu, sed manet reatu, hoc est, licet percussio injusta præterita sit, præsens tamen est illius macula, à qua percussor denominatur homicida & peccator; nec deleri potest nisi per infusionem gratiæ sanctificantis: ergo similiter peccatum originale, cum sit habituale, est privatio gratiæ sanctificantis propter actualem prævaricationem, cujus rea est posteritas Adami, in quo omnes unus homo erant, quæque in non renatis moraliter manet. Pressius dici potest in hac sententia peccatum originale esse privationem iustitiæ originalis quatenus est habitualis aversio à Deo propter prævaricationem, quæ præcessit in Adamo.

Dixi, *privationem justitiæ originalis inadæquatè sumptæ*; tria enim complectitur justitia originalis. Primum, est perfecta subjeçtio voluntatis ad Deum per gratiam sanctificantem. Secundum, integra subordinatio virium inferiorum ad rationem. Tertium, obedientia corporis ad animam, per quam corpus incorruptibile animam non gravabat, nec ullis molestiis premebat. Primum autem est causa secundi & tertii, ut docet S. Augustinus in Psalm. 143. *Agnosce ordinem, inquit, quære pacem; tu Deo, tibi caro. Quid justius? quid pulchrius? tu majori, minor tibi: servi tu ei, qui fecit te, ut tibi serviat, quod factum est propter te. . . . si autem contemnis tu servire Deo, nunquam efficies, ut tibi caro. Qui non obtemperas Domino, torqueris à servo. Et S. Thomas opusculo 2. cap. 192. Quia, inquit, tam ordinata integritas tota causabatur ex subjeçtione humanæ voluntatis ad Deum, consequens fuit, ut subducta humana voluntate à subjeçtione divina, deperiret illa perfecta subjeçtio inferiorum virium ad rationem, & corporis ad animam; unde consecutum est, ut homo sentiret in inferiori appetitu sensibili concupiscentiæ, & iræ, & cæterarum passionum inordinatos motus, non secundum ordinem rationis, sed magis repugnantes, & eam plerumque obnubilantes, & quasi perturbantes. Consecutum est etiam, ut in corpore sentiretur corruptionis defectus, ac per hoc homo incurreret necessitatem moriendi quasi anima jam non valente corpus in perpetuum continere.*

Si privatio justitiæ originalis spectetur tertio modo, nullus dixerit eam esse formaliter peccatum originale; cùm Christus habuerit corpus mortale, & doloribus obnoxium: si secundo modo, soli Hæretici asserunt eam esse formaliter peccatum originale. Restat ergo,

ut



ut in hac quarta sententia privatio iustitiæ originalis primo modo duntaxat sit ratio formalis peccati originalis.

### §. III.

*Expenduntur sententiæ Hæreticorum circa rationem formalem peccati originalis.*

**Q. I.** *Utrum peccatum originale sit substantia mala à Diabolo producta, ut concedit Illyricus?*

**R.** Minimè 1. quia Joan. 1. omnia per ipsum facta sunt, & sine ipso factum est nihil: ergo nulla est substantia, nisi sit à Deo, atqui peccatum non est à Deo: ergo peccatum originale non est substantia. Hinc sanctus Augustinus Concione 1. in Psal. 68. *Quia per iniquitatem, inquit, homo lapsus est à substantia, in qua factus est: (iniquitas quippe ipsa non est substantia; non enim iniquitas est natura, quam formavit Deus: sed iniquitas est perversitas, quam fecit homo) venit Filius Dei ad limum profundi, & non est substantia: omnia per ipsum facta sunt, & sine ipso factum est nihil: Naturæ omnes per ipsum factæ sunt, iniquitas per ipsum facta non est; quia iniquitas facta non est.* 2. Quia illa impia sententia olim damnata est in Manichæis, qui, teste S. August. volebant malum esse aliquam substantiam naturæ nostræ admixtam: 3. quia inde sequeretur peccatum originale non auferri per Baptismum, cum in illo nulla auferatur forma substantialis.

Dices 1. Sunt actus essentialiter mali & peccata formaliter, ut blasphemia, qui secundum esse materiale & physicum sunt à Deo, secundum verò moralem inordinationem à mala voluntate: ergo à pari absque injuria Creatoris,  
potest

potest dari aliqua substantia essentialiter mala, producta à Deo quidem, si spectetur ejus entitas physica, quia ut sic creatura est: à voluntate verò mala sive Dæmonis, sive primi parentis, si ratio habeatur inordinationis moralis, quæ in ipsa inest.

R. 1. Retorquendo argumentum contra Illyricum: omnis actus inordinatus secundum entitatem, & physicè spectatus, est bonus: ergo & omnis substantia: ergo nulla est natura substantialiter mala, nec proinde peccatum formaliter.

R. 2. Inordinatio consequens naturam humanam origine vitiatam, est ipsamet concupiscentia, quæ, quatenus rationi & legi repugnans est mala, sed ut sic non est substantia, sed defectus, nec potest dici peccatum originale, nisi materialiter; quia manet in renatis, in quibus deleta est macula peccati originalis.

Instabis: ex præcedentibus actibus malis generatur habitus erroris & vitii; quidni & substantia mala?

R. 1. Quæstio est inter Philosophos, an habitus mali sint qualitates realiter distinctæ? Plures negant, contenduntque esse meras modificationes. 2. Si sint qualitates realiter distinctæ, certè non sunt peccata formaliter, sed propensiones duntaxat ad peccatum, utpote quæ aliquandiu remaneant in homine à peccatis justificato. Quòd autem sunt habitus vitiosi, idipsum est habitualis inordinatio concupiscentiæ.

Dices 2. Peccatum originale dicitur radix omnium peccatorum; corpus peccati, *vetus homo noster*, inquit Apostolus Rom. 6. *simul crucifixus est;*  
ut

*ut destruaturs corpus peccati*: atqui radix & corpus denotant substantiam: Ergo.

Nego minorem; namque 1. cupiditas, quæ sanè substantia non est, dicitur ab Apostolo 1. Tim. 6. *radix omnium malorum*: 2. corpus peccati propriè est collectio plurium peccatorum, quæ destruitur per gratiæ adjectionem, non per substantiæ interitum, ut loquitur Tertullianus Lib. de Resurrectione Carnis c. 47. *uti evacuetur corpus delinquentiæ per emendationem vitæ, non per interitum substantiæ*.

Dices 3. Quod est Divinæ Legi contrarium, illud est peccatum propriè dictum: atqui natura humana per peccatum originale vitiata, est Legi contraria: Ergo.

Distinguo minorem, Est contraria propter peccatum ipsi inhærens, Concedo: est contraria per seipsam & propriam substantiam, Nego minorem.

Dices 4. Natura humana creata fuit imago Dei: atqui peccatum originale destruxit imaginem Dei.

Distinguo minorem, destruxit imaginem Dei accidentalem, quæ consistit in donis supernaturalibus, Concedo: imaginem substantialem, quæ consistit in anima rationali, quæ spiritalis est, intellectu & voluntate prædita, sicut & ipse Deus; Nego minorem.

Q. 2. *Peccatum originale estne formaliter ipsa concupiscentia?*

R. De fide est, non esse concupiscentiam; ita enim definiit Concilium Tridentinum, Sess. 5. Can. 5. *Si quis, per Jesu Christi Domini nostri gratiam, quæ in Baptismate confertur, reatum originalis peccati*

cati remitti negat, aut etiam asserit non tolli totum id, quod veram & propriam rationem peccati habet, sed illud dicit tantum radi, aut non imputari; anathema sit . . . . . manere autem in Baptizatis concupiscentiam vel fomitem, hæc sancta Synodus fatetur, & sentit; quæ cum ad agonem relicta sit nocere non consentientibus, sed utiliter per Jesu Christi gratiam repugnantibus non valet . . . . . hanc concupiscentiam quam aliquando Apostolus peccatum appellat, sancta Synodus declarat Ecclesiam Catholicam nunquam intellexisse peccatum appellari, quod verè & propriè in renatis sit, sed quia ex peccato est, & ad peccatum inclinat. Si quis autem contrarium senserit, anathema sit.

Probatur 1. ex Scriptura, Rom. 8. *nihil ergo damnationis est iis, qui sunt in Christo Jesu.* Et cap. 6. *Qui mortui sumus peccato, quomodo vivemus in illo?* 1. Joan. 1. *Sanguis ejus emundat nos ab omni peccato.*

Nec dicant adversarii, nihil esse damnationis in renatis, quia peccatum, quod in ipsis inest, per justitiam Christi tegitur, nec imputatur.

Nam Apostolus Coloss. 3. dicit, nos exuere veterem hominem, & induere novum, expoliantes vos, inquit, *veterem hominem cum actibus suis, & induentes novum.*

Deinde c. 6. v. 2. & 4. Epist. ad Rom. confert renovationem, quæ fit in Baptismo cum resurrectione Christi: *Mortui sumus peccato, inquit, ut quomodo Christus surrexit à mortuis per gloriam Patris, ita & nos in novitate vitæ ambulemus:* atqui Christus resurgens corruptionem carnis & mortalitatem non texit per indumentum gloriæ, sed prorsus deposuit. Ergo pariter in mente Apostoli ita Christum in Baptismo induimus, ut omnem prorsus peccati  
maculam



maculam exuamus. Plura vide in tractatu de Gratia cap. 4. §. 1.

Probatur 2. ex S. Aug. Lib. 1. de nupt. & concup. cap. 23. ubi sic habet: *Nam ipsa quidem concupiscentia jam non est peccatum in generatis, quando illi ad illicita opera non consentitur, atque ut ea perpetrent à regina mente membra non dantur: ut si non fit, quod scriptum est, non concupiscas, fiat saltem quod alibi legitur, post concupiscentias tuas non eas. Sed quia modo quodam loquendi peccatum vocatur, quod & peccatum factum est, & peccatum (si vicerit) facit, reatus ejus valet in regenerato: quem reatum Christi gratia per remissionem omnium peccatorum in regenerato (si ad mala opera ei quodammodo jubenti non obediat) valere non finit. Sic autem vocatur peccatum, quia peccato facta est, cum jam in regeneratis non sit ipsa peccatum, sicut vocatur lingua locutio, quam facit lingua, & manus, vocatur scriptura; quam facit manus. Itemque sic vocatur peccatum, quia peccatum (si vincit) facit sicut vocatur frigus pigrum, non quodd à pigris fiat, sed quodd pigros faciat. Quæ verba adeo clara sunt, ut Calvinus non possit ea obscurare, faterique cogatur Lib. 3. Institut. capit. 3. §. 10. Augustinum in hac parte sibi esse contrarium.*

Dices 1. concupiscentia est peccatum, ex Apostolo Rom. 7. *Jam non ego, inquit, operor illud, sed quod habitat in me peccatum, id est, concupiscentia. Ergo.*

Distinguo antecedens; est peccatum metaphoricè, Concedo: est peccatum verè & propriè, Nego anteced. Ita S. Augustinus, & Patres Tridentini supra laudati.

Dices 2.

Dices 2. Sanctus Augustinus Lib. de Nupt. & Concup. capite 26. dicit concupiscentiam in renatis jam non esse peccatum: ergo supponit fuisse peccatum in non renatis. *In eis ergo, inquit, qui regenerantur in Christo, cum remissionem accipiunt prorsus omnium peccatorum, utique necesse est, ut reatus etiam hujus licet adhuc manentis concupiscentiæ remittatur, ut in peccatum (sicut dixi) non imputetur.* Tum eam conferens cum peccato habituali adulterii subdit, *manet, si non remittatur, sed quomodo manet, si præteritum sit, nec amplius fiat, nisi quia præterit actus, manet reatus?* Ergo secundum sanctum Augustinum concupiscentia propriè peccatum est; non actuale: ergo habituale & originale; & Lib. 5. contra Julianum cap. 3. scribit, *sicut cæcitas cordis & peccatum est, quo in Deum non creditur; & pœna peccati, quæ cor superbum digna animadversione punitur: & causa peccati, cum aliquid mali cordis errore committitur: Ita carnis concupiscentia, adversus quam bonus spiritus concupiscit, & peccatum est, quia inest illi inobedientia contra dominatum mentis: pœna peccati est; quia reddita est meritis inobedientis: & causa peccati defectione consentientis, vel contagione nascentis; ergo concupiscentia peccatum est, non solum quia est à peccato & pœna peccati præcedentis, & causa subsequendum, sed verè & propriè ipsamet est peccatum.*

Confirmatur: ex sancto Augustino, concupiscentia non est à Patre, odio habetur à Deo: atqui omnia sunt à Patre, præter peccatum propriè dictum, nihilque odit Deus eorum, quæ fecit: ergo concupiscentia propriè est peccatum.

R. 1. Reatus concupiscentiæ, qui tollitur per Baptismum, est inordinatio, & habitualis aversio à Deo,

Deo, in qua dicemus §. sequenti, consistere formaliter peccatum originale. Tollitur autem hæc averfio per gratiam sanctificantem, qua voluntas est habitualiter conversa ad Deum, eique subdita: ita ut cæteri defectus, qui remanent post Baptismum sub nomine concupiscentiæ, jam censeantur involuntarii, & contra inclinationem voluntatis per gratiam renovatæ. Unde

R. 2. Distinguendo: in renatis concupiscentia est peccatum metaphoricè tantum; quia est involuntaria si ei non consentiatur: est pœna peccati, quod in Adamo præcessit: & causa peccati, cum extorquet consensum, Concedo: est peccatum formaliter, Nego. Hæc omnia patent ex laudato cap. 23. Lib. de concup. ut agnoscit ipse Calvinus.

Ad confirmationem respondeo, concupiscentia quatenus spectatur, ut simplex inclinatio ad bonum sensibile, est à Deo & ab eo diligitur, ut sic enim est bonum quoddam naturale, & consentaneum creaturæ rationali, ut præcedenti §. diximus. Sed quatenus deficit, & est inordinata propensio in bonum sensibile, non est à Deo, nec ab eo diligitur; est enim defectus, qui refundi non debet in auctorem, sicut nec rubigo ferri in artificem; quia ejusmodi defectus non oriuntur ex aliqua culpa opificis, sed ex ipsamet natura defectibili. Unde ex eodem sancto Augustino Lib. 1. Retractionum cap. 9. *Quamvis ignorantia, & difficultas essent primordia naturalia, nec sic culpandus Deus, sed laudandus esset.*

Instabis: Deus non potest esse auctor habitus vitiosi, putà intemperantiæ, quia inclinatur ad malum: ergo nec concupiscentiæ.

*D. Habert Theolog. Tom. III.*

Q Nego

Nego conseq. & paritatem. In eo differt habitus vitiosus à concupiscentia, quòd ille per se inclinēt ad malum: intemperantia, v. gr. est formaliter inclinatio ad fumendum cibum & potum contra rationis ordinem, quod est per se malum, cùm ex dictis Tractatu præcedenti, malitia sit ipsa difformitas contraria naturæ rationali. At concupiscentia per se inclināt duntaxat ad bonum sensibile quod est conveniens naturæ sensitivæ, quæ cùm in homine sit etiam rationalis, debet regi à ratione, tanquam inferior à superiore.

Confirmatur responsio: Nullus potest benè uti habitu vitioso, quia per se malus est, & contrarius rationi: at concupiscentia benè utuntur sancti conjuges, ex sancto Augustino Lib. 2. de nupt. & concup. cap. 21. ergo per se mala non est, sed per accidens, quatenus impedit rationis officium; sed ad id per se non tendit, sicut habitus vitiosi.

#### §. IV.

*Expenduntur sententiæ Catholicorum circa formalem rationem peccati originalis.*

Q. I. *Peccatum originale estne qualitas morbida?*

R. Est fictitia illa qualitas, & prorsus impossibilis; vel enim naturaliter produceretur ex actuali Adæ peccato, vel supernaturaliter: neutrum dici potest: non primum; quid enim habuit speciale prævaricatio Adami, quod non habeant cæteræ prævaricationes? atqui aliæ prævaricationes, putà homicidia, adulteria, non producunt qualitatem morbidam in corpore peccantis, quæ transeat ad ejus posteros: ergo neque



que prævaricatio Adami. Non secundum; quia si supernaturaliter à Deo produceretur, Deus esset auctor peccati, quod impium est dicere: Ergo.

Q. 2. *Peccatum originale consistitne formaliter in denominatione extrinseca, petita à peccato actuali Adami?*

R. Non consistit: Probaturque 1. ex Scriptura, Rom. 5. *Per unum hominem peccatum intravit in mundum, & per peccatum mors*: atqui peccatum actuale Adami, cum fuerit actus immanens non intravit in mundum: ergo præter peccatum actuale Adami, datur aliquid intrinsecum ad posteros ejus transiens. Deinde Apostolus ibidem docet, peccatum, sicut mortem, in omnes transiisse: ergo sicut mors est in unoquoque, ita & peccatum; neque enim quis potest magis dici peccator peccato alterius, quam mortalis alterius mortalitate. Denique Apostolus eo loci comparat peccatum, quod trahimus ex Adamo, cum justitia, quam haurimus ex Christo: atqui illa justitia non est formaliter ipsa Christi justitia, à qua intrinsecè justii denominantur; sed est justitia intrinsecè inhærens, ergo peccatum originale non est actuale Adami peccatum, à quo parvuli formaliter denominantur peccatores.

Probatur 1. ex Concilio Tridentino, Sess. 5. Can. 3. in quo sic definit: *Si quis hoc Adæ peccatum, quod origine unum est, propagatione, non imitatione transfusum omnibus inest, unicuique proprium . . . per aliud remedium asserit tolli, quàm per meritum mediatoris Domini nostri Jesu Christi . . . anathema sit.* Hinc sententia Pighii & Catharini, quam hic impugnamus, communiter rejicitur, ut erronea, & in fide periculosa, quin & à quibusdam, ut à Sua-

rez, habetur tanquam hæretica. Sed benignè explicatur à Bellarmino hoc sensu, quòd ita docuerint illi auctores, peccatum originale esse denominationem extrinsecam petitam à peccato actuali Adami, ut non negaverint inde consecutam maculam habituales; quæ in unoquoque inest, nisi renascatur in Christo.

Q. 3. *Concupiscentia estne propriè peccati originalis quiddam materiale?*

R. Minimè, tum quia concupiscentia, in omnium sententia est pœna peccati originalis: atqui omnis pœna præsupponit peccatum, & est quid ad illud consequens: tum quia concupiscentia, ex Concilio Tridentino, manet in renatis, nec per Baptismum tollitur: atqui ex eodem Concilio per Baptismum tollitur omne quod habet rationem peccati: ergo concupiscentia non propriè est essentialis ejus materia.

Dices: Hæc responsio apertè pugnat contra manifestam doctrinam sancti Augustini & sancti Thomæ. De mente sancti Thomæ constat ex articulo tertio supra laudato, cap. 7. §. 2. in quo ex professo statuit concupiscentiam esse materiale peccati originalis: *Privatio, inquit, originalis justitiæ, per quam voluntas subdebatur, est formale in peccato originali, omnis autem alia inordinatio virium animæ se habet in peccato originali sicut quiddam materiale . . . quæ quidem inordinatio communi nomine potest dici concupiscentia.*

Quòd autem hæc sit ipsissima sancti Augustini doctrina, probant omnes Libri, quos, pro stabiliendo dogmate de peccato originali, scripsit contra Pelagianos, ex quibus duos textus duntaxat proferemus.

Primus petitur ex Lib. 5. contra Jul. cap. 3. in quo sic habet: *Concupiscentia carnis & peccatum est, quia inest illi inobedientia contra dominatum mentis, & pœna peccati est, quia reddita est meritis inobedientis, & causa peccati est defectione consentientis, vel contagione nascentis.* Similia habet Lib. 1. de nupt. & concupisc. cap. 25. *Ad hæc, inquit, respondetur, dimitti concupiscentiam carnis in Baptismo, non ut non sit, sed ut in peccatum non imputetur. Quamvis autem reatu suo jam soluto, manet tamen, donec sanetur omnis infirmitas: Ergo.*

Distinguo anteced. Concupiscentia in peccato originali est quiddam materiale improprie, Concedo: Proprie, Nego anteced. Ait enim S. Thomas, quod concupiscentia in peccato originali se habeat sicut quiddam materiale; quæ vox, *sicut*, denotat non esse ejus materiam essentialem, nec includi in conceptu formali peccati originalis: dicitur autem concupiscentia esse velut quiddam materiale peccati originalis; quia illud comitatur, & cum eo conjungitur in renatis, in quibus propterea à S. Augustino vocatur peccatum, non quod ipsa præcisè sic peccatum, cum maneat in renatis, in quibus nullum est peccatum proprie dictum. Unde sic argumentari licet: ex sancto Augustino, reatus peccati per Baptismum ita solvitur, ut concupiscentia ipsa secundum se spectata maneat: atqui concupiscentia, quæ manet in mente ejusdem sancti Doctoris, non est peccatum, sed quoddam peccati confectarium, nempe pœna & effectus peccati: ergo concupiscentia secundum se spectata non est materia essentialis peccati originalis: repugnat enim idem respectu ejusdem esse causam & effectum, pecca-

tum & pœnam ; cùm hæc sint correlativa , quæ inter se opponuntur.

Q. 4. *In quo igitur consistit formalis ratio peccati originalis?*

R. In habituali averfione à Deo , quæ intelligitur in privatione iustitiæ originalis primo modo spectatæ , hoc est , in privatione gratiæ sanctificantis , propter actualem prævaricationem Adæ , in quo omnes eramus , ita ut ipsa privatio gratiæ sanctificantis sit materiale peccati , & averfio à Deo , quam Sanctus Augustinus vocat reatum peccati seu culpæ , sit ipsum formale peccatum originale.

Probatur 1. ex refutatione aliarum opinionum.

Probatur 2. ex S. Anselmo , qui Lib. de conceptu Virginis cap. 26. accuratiùs inquit formalem rationem peccati originalis , cùm S. Augustinus sollicitus fuerit duntaxat ejus existentiam statuere contra Pelagianos. Sic autem habet S. Anselmus : *Hoc peccatum , quod originale dico , aliud intelligere nequeo in ipsis infantibus , nisi ipsam , quam supra posui factam per inobedientiam Adæ , iustitiæ debitæ nuditatem , per quam omnes Filii sunt iræ.* In eodem quoque sensu accipienda sunt verba S. Thomæ cit. art. 3. *Privatio originalis iustitiæ per quam voluntas subdebatur Deo , est formale originalis peccati.*

Probatur 3. Duplici ratione. Prima, peccatum originale non est actuale , sed habituale , cùm permaneat in parvulis donec regenerentur : atqui peccatum habituale , ex dictis est privatio gratiæ sanctificantis cum relatione ad aliquem actum malum præcedentem , ratione cujus est voluntarium : Ergo secunda in eo consistit essentia peccati originalis , à quo



quo tanquam à radice, fluunt cætera, quæ ad peccatum originale pertinent : atqui ex privatione gratiæ sanctificantis, seu justitiæ originalis primo modo sumptæ, sequuntur aliæ omnes inordinationes ex peccato Adami in nos per generationem transfusæ : Ergo.

Minor probatur ex S. Thoma 1. 2. quæst. 85. art. 3. in quo probat quatuor esse vulnera naturæ inflicta per peccatum originale; nempe infirmitatem, ignorantiam, malitiam, & concupiscentiam: *Sunt, inquit, quatuor potentiæ animæ, quæ possunt esse subiecta virtutum; scilicet ratio, in qua est prudentia: voluntas, in qua est justitia: irascibilis, in qua est fortitudo: concupiscibilis, in qua est temperantia. In quantum ergo ratio destituitur suo ordine ad verum, est vulnus ignorantie: in quantum verò voluntas destituitur ordine ad bonum, est vulnus malitiæ: in quantum verò irascibilis destituitur suo ordine ad arduum, est vulnus infirmitatis: in quantum verò concupiscentia destituitur ordine ad delectabile moderatum ratione, est vulnus concupiscentiæ. Sic igitur ista quatuor sunt vulnera inflicta toti humanæ naturæ ex peccato primi parentis: atqui quatuor illa vulnera procedunt ex privatione justitiæ originalis, quatenus subdebat mentem Deo, seu, quod idem est, ex aversione à Deo, quemadmodum docet sanctus Augustinus Serm. 30. aliàs 12. de Verbis Apostoli: Ipse, inquit, quando hominem creavit, utrumque fecit, utrumque conjunxit, carnem animæ subdidit, animam sibi: si semper illa staret sub domino suo, semper & ista obediret dominæ suæ. Noli ergo mirari, si ea quæ deseruit superiorem pœnam, patitur per inferiorem. Ergo ratio formalis peccati originalis consistit in habituali aversione à Deo.*

Dices : Privatio justitiæ originalis seu gratiæ sanctificantis , est effectus & pœna peccati : ergo non est ipsum peccatum.

Distinguo anteced. Est effectus & pœna peccati actualis, quod in Adamo præcessit, Concedo : Peccati originalis , Nego anteced. Est enim ipsummet peccatum originale , quemadmodum in adultis peccatum habituale est ipsamet privatio gratiæ sanctificantis propter actum malum , qui præcessit.

Instabis : Privatio gratiæ sanctificantis est à Deo subtrahente influxum, quo conservabatur justitia originalis : atqui peccatum non est à Deo : ergo privatio justitiæ originalis non potest dici peccatum originale.

Distinguo major. Privatio gratiæ sanctificantis est à Deo physicè , Concedo : Moraliter, tanquam à causa particulari determinante secundam, Nego major. Quemadmodum enim actus malus, v. gr. homicidium materialiter & physicè spectatus, est à Deo tanquam à causa universali concurrente cum causa secunda ; nec propterea Deus potest dici auctor peccati ; quia defectus est refundendus in creaturam, tanquam in causam moralem, quæ voluntariè & liberè se determinavit ad actum illum : ita privatio , seu subtractio gratiæ sanctificantis materialiter & physicè est à Deo , quatenus est cessatio divini influxus conservantis supernaturalem illum habitum, sed quatenus est voluntaria aversio, seu separatio à Deo, est à deficiente voluntate sive propria, si peccatum sit personale ; sive capitis, si originale. Porro in hac aversione consistit formale peccati habitualis & originalis ; est enim turpe, vituperabile

bile & damnabile, quòd voluntas deficiat à Lege æterna, & ab ultimo suo fine avertatur. Censetur autem voluntas permanere in illa aversione, quamdiu actus malus præcedens non est retractatus: *Adulterium*, inquiebat supra S Augustinus, *præterit actu, remanet reatu.*

Ergo peccatum originale est mortale: quia est habitualis aversio à Deo: sicut enim recedente anima moritur corpus, ita Deo deserente moritur anima, non quidem amittendo vitam naturalem, sic enim est immortalis; sed supernaturalem, quæ consistit in unione cum Deo.

Ergo peccatum originale inducit pœnam damni, hoc est, privationem æternæ beatitudinis, quæ est hæreditas paterna: hæreditas enim non pertinet nisi ad Filios. Porro gratia sanctificans est adoptio, qua formaliter privat peccatum originale. Hinc ab Apostolo dicimur nasci Filii iræ.

Ergo peccatum originale minus est peccato habituali personali; quia minus habet voluntarii, cum non sit voluntarium nisi voluntate Adami. Utrùm autem sit gravius peccato veniali, quæstio est, ad quam Bellarminus cum nonnullis aliis respondet, Libro 4. de amissione gratiæ cap. 10. peccatum veniale gravius esse in ratione voluntarii, minus verò in ratione mali, quia peccatum originale est privatio gratiæ sanctificantis, & consequenter æternæ felicitatis. Sed cum peccata ista sint diversi generis, vix inter se comparari possunt.

Hinc nascitur alia quæstio, utrùm peccatum actuale & originale convenient univocè. Alii probabilius affirmant; quia utrique convenit de-

finitio peccati in genere, utrumque enim est privatio rectitudinis, quæ secundum rectam rationem deberet inesse: ex eo autem, quod unum sit voluntarium voluntate propria; alterum voluntate capitis, solum concluditur illa peccata differre specie.

## §. V.

*Quomodo traducatur peccatum originale?*

**R**espondet S. Augustinus Lib. 5. contra Julianum cap. 3. *Hic libentiùs disco, quàm dico; nec audeo docere quod nescio.* Additque Epist. 167. aliàs 29. idè Scripturam hìc obscuriùs loqui, quàm cùm agitur de existentia peccati originalis; quia prius non est ita ad salutem necessarium, ac posterius: *Eleganter autem*, inquit, *dictum esse narratur, quod huic rei satis aptè convenit.* Cùm quidam ruiisset in puteum . . . . accessit alius, & eo viso, admirans ait: *Quomodo huc cecidisti?* At ille: *Obsecro*, inquit, *cogita quomodo hinc me liberes, non quomodo huc ceciderim quæras.* Ita quoque fatemur, & Fide Catholica tenemus, de reatu peccati, tanquam de puteo, etiam parvuli infantis animam Christi gratia liberandam; satis est ei, quod modò quomodo salva fiat novimus; etiamsi nunquam quomodo in malum illud devenerit, noverimus. Nihilominus ad propositam quæstionem cum communi Schola

**R.** Traducitur peccatum originale per generationem & seminalem propagationem. Ita sanctus Thomas 1. 2. qu. 81. art. 4. *Peccatum originale*, inquit, *à primo parente traducitur in posteros, in quantum moventur ab ipso per generationem, sicut membra moventur ab anima ad peccatum actuale.* Non autem est  
motio



motio ad generationem, nisi per virtutem activam in generatione. Unde illi soli peccatum originale contrahunt, qui ab Adam descendunt per virtutem activam in generatione originaliter ab Adam derivatam, quod est secundum seminalem rationem ab eo descendere; nam ratio seminalis nihil aliud est, quam vis activa in generatione. Si autem aliquis formaretur virtute divina ex carne humana, manifestum est quod vis activa non derivaretur ab Adam; unde non contraheret peccatum originale; sicut nec actus manus pertineret ad peccatum humanum, si manus non moveretur à voluntate hominis, sed ab aliquo extrinseco. Hinc si Eva ex costa Adæ post ejus peccatum formata fuisset, peccato originali non fuisset inquinata; quia non extitisset in Adam secundum feminalem rationem.

Confirmatur responsio 1. ex cap. 14. Job. ubi vir sanctus sic loquitur: *Quis potest facere mundum de immundo conceptum semine?* 2. Ex Concilio Tridentino, Sess. 6. cap. 1. Sicut, inquit, reverà homines, nisi ex semine Adæ propagati nascerentur, non nascerentur injusti, cum ea propagatione per ipsum, dum concipiuntur; propriam injustitiam contrahant.

Nec dicas, per semen intelligi posse carnem, aut sanguinem, juxta illud Apostoli, Rom. 1. *Qui factus est ei ex semine David secundum carnem:* Hæc enim Concili verba, cum ea propagatione per ipsum, dum concipiuntur, non sinunt aliud intelligi per semen, quam feminalem rationem. Christus quippe factus ex semine David & Adam secundum carnem, dici nequit conceptus sive per Davidem, sive per Adam.

Dices: Sola anima est subiectum peccati; semen autem, utpotè corporeum, non attingit animam

nimam, quæ, cùm sit spiritalis, non producitur generatione, sed à Deo immediatè creatur.

R. Etsi anima non traducatur ex carne, nihilominus vi generationis producitur natura humana, verèque dicitur homo generare hominem, quatenus virtute feminis eas dispositiones in materiam inducit, quas infallibiliter anima consequitur. Porro natura humana, quæ sic producitur, infecta est in Adamo, communicaturque cum peccato. Nec aliud vult S. Augustinus, cap. 4. Lib. 5. contra Julianum, ubi dicit: *Alterum in altero* (hoc est animo in corpore) *tanquam in vase vitiato corrumpitur, ubi occulta justitia divinæ Legis includitur.* Sensus enim est animam non pollui, quatenus creatur à Deo, sed quatenus conjungitur cum carne ex Adamo tracta; tunc enim efficitur pars hominis, qui in Adamo peccavit: conjungitur autem anima virtute feminis disponentis corpus ad animam rationalem.

Nec propterea fingas cum Gregorio Ariminensi qualitatem quandam morbidam ex sibilo venenoso serpentis derivatam, propter quam Adamus peccator generet peccatorum, sicut in semine leprosi est quædam realis corruptio, propter quam generat leprosum: tum quia serpens non est allocutus Adamum, sed Evam: tum quia physica illa qualitas per tot sæcula permanisset sine speciali Dei concursu, ad quem nefas est recurrere; Deus enim nec auctor nec fautor est peccati. Corruptio igitur, & infectio est in semine moralis quidam defectus, quemadmodum si status innocentiae permanisset, virtus transmittendi justitiam originalem fuisset quiddam morale in semine.

Instabis:

Instabis: Concupiscentia, seu ardor libidinis, est causa propagationis peccati originalis, atqui concupiscentia non est quid morale, sed physicum.

Major probatur ex S. Augustino: sic enim habet Lib. 1. de peccatorum meritis, cap. 9. *Ille, in quo omnes moriuntur . . . . occulta tabe carnalis concupiscentiæ suæ tabificavit in se omnes de sua stirpe venientes.* Et Lib. 1. de Nupt. cap. 24. *Ex hac concupiscentia carnis quæcumque nascitur proles originali est obligata peccato.* Atque inde includit Lib. 5. contra Julianum cap. 9. Conceptionem Christi Domini fuisse sine peccato; quia nullus fuit motus concupiscentiæ: *Quod attinet, inquit, ad peccati originalis in omnes homines transitum, quoniam per concupiscentiam carnis transit, transire in eam carnem non potuit, quam non per illam Virgo concepit.*

Nego major. 1. Quia homo in puris naturalibus conditus non generaret sine ardore libidinis, & motu concupiscentiæ, neque tamen peccatum transmitteret: contra verò qui ex posteris Adæ singulari Dei privilegio Filios absque sensu libidinis procrearet, nihilominus peccatum transfunderet: ergo libido, seu concupiscentia, tanquam morbida qualitas generantium, non est vera, & actualis causa peccati originalis. 2. Quia idèd parvuli præcisè contrahunt peccatum, quia nascuntur ex Adamò, in quo omnes peccaverunt, & natura humana vitiata est. Signum autem hujusce vitii est concupiscentia, sine qua ne sanctissimi quidem conjuges generare solent.

Unde sanctus Augustinus ex uno alterum certò concludit supposito hocce rerum statu. Cum ergo conceptio Christi Domini fuerit sine ullo

concu

concupiscentiæ motu , S. Doctor colligit fuisse quoque sine peccato.

Vera itaque & propria ratio , cur Christus Dominus non peccaverit in Adamo , nec ab eo peccatum in sua conceptione traxerit , ea est , quòd in Adamo fuerit materialiter duntaxat ; quemadmodum ipse Adamus fuit in limo , ex quo formatus est , & Eva in costa Adami , ex quo educta est. Ita S. Anselmus Lib. de Conceptu Virginis cap. 23. in quo sic habet : *In illa (Maria) nec voluntas creaturæ prolem seminavit , nec natura germinavit , sed Spiritus Sanctus , & virtus Altissimi de Virgine muliere virum mirabiliter procreavit. Valdè itaque diverso modo Christus erat in Adam , quando peccavit , quàm erant alii , qui voluntario & naturali cursu procreantur. Istos quodammodo facit Adam , quos per acceptam potestatem humana voluntas seminando , & natura germinando procreavit. Istum verò nonnisi Deus fecit , quamvis de Adam ; quia non per Adam , sed per se velut de suo.*

Urgebis : idem sanctus Anselmus cap. 7. ejusdem Libri de Conceptu Virginis , ait : *Non magis est in semine culpa , quàm in sputo , vel sanguine , si quis mala voluntate expuit , aut de sanguine suo aliquid emitit. Non enim sputum aut sanguis , sed mala voluntas arguitur : Ergo peccatum originale non traducitur per viam feminalem.*

Distinguo anteced. Non magis est culpa formaliter in semine , quàm in sputo vel sanguine , Concedo : Virtualiter , & instrumentaliter , Nego anteced.

Distinguo similiter consequens : Peccatum originale non traducitur per viam feminalem , tanquam per causam principem , Concedo : Tanquam



quam per instrumentum , per quod communicatur natura humana infecta ex mala voluntate primi parentis , in quo omnes eramus. Nego consequens.

Duo itaque docet sanctus Anselmus , nempe peccatum traduci per aliquid corporeum vitaliter seminatum , & nihilominus corporeum illud non esse formaliter malum , nec peccatum in eo habere semen , sed in voluntate : *Patet igitur* , inquit , *quomodo & in infantibus non statim ab ipsa conceptione* (scilicet inchoata , & nondum perfecta) *non sit peccatum , quia nondum est anima , seu voluntas ; & vera sint , quæ de Divina Scriptura opposui , quippe non est in illis* (nondum animatis) *peccatum ; quia non habent* (sine qua non inest peccatum) *voluntatem : & tamen dicitur inesse ; quoniam in semine trabunt peccandi* (cum homines jam erunt) *necessitatem.*

## § VI.

*Utrum peccatum primi parentis transeat ad omnes sine exceptione homines , qui via ordinaria ex ipso nascuntur.*

R. 1. **D**eus potest speciali privilegio aliquem eximere ab hac communi lege ; quia quamvis statutum sit omnibus semel mori , doceatque Apostolus Rom. 6. mortem ab Adamo in omnes homines pertransiisse , liberum est tamen Deo , stante illa lege , quempiam à morte servare ; quidni similiter & à peccato ? sed difficultas est utrum de facto aliquem tanto privilegio donaverit.

R. 2. Temerarium est id de aliquo asserere , nisi faveat , vel Scriptura , vel Traditio , & Ecclesiæ

clesiæ auctoritas ; cum enim Scriptura universaliter affirmet omnes in Adamo peccasse, Roman. cap. 5. non licet privato quemquam excipere, nisi Ecclesia cujus est judicare de vero sensu, & interpretatione Scripturarum sanctarum, ejusmodi exceptioni faveat, eamque tanquam piam propugnari permittat : *Ego, inquit sanctus Bernardus Epist. 174. quod ab illa ( Ecclesia ) accepi, securus & teneo, & trado : quod non, scrupulosius, fateor, admiserim.*

R. 3. Ecclesia hætenus non definivit, an excipienda sit beata Virgo, fueritque concepta sine peccato.

Probatur 1. auctoritate Gregorii XV. in Epist. ad Regem Hispaniæ, qui urgebat ejusmodi definitionem : *Cum nondum, inquit summus Pontifex, æterna sapientia Ecclesiæ suæ tanti mysterii penetralia patefecerit, in Dei, Romanorumque Pontificum auctoritate debent fideles populi conquiescere.* 2. Sixtus IV. in sua Bulla, quæ incipit, *Grave nimis*, & confirmata est à Concilio Tridentino Sess. 5. liberam cuique facultatem reliquit tenendi partem affirmantem, vel negantem, prout, vel magis pium, vel magis probabile judicaverit. Idem docent Pius V. in Bulla edita anno 1570. Paulus V. anno 1616. & Gregorius XV. anno 1622.

Advertes autem circa prædictas Bullas & Constitutiones, quòd cum dissensiones & discordiæ circa Conceptionem B. Mariæ Virginis Ecclesiam turbarent, graviaque scandala excitarent, Sixtus IV. primò prohibuit sub pœna excommunicationis, ne quis crimen hæreseos impingeret asserentibus immaculatam B. Virginis Conceptionem. Deinde Pius V. prohibuit sub pœna suspensionis, ne publicè, ubi promiscua virorum & mulierum  
multi-

multitudo convenire solet, sententia negans Immaculatam Conceptionem propugnaretur : id tamen permisit in publicis Academiae Disputationibus, ubi nulla subest scandali occasio. Idipsum postea præscripsit Paulus V. Sed cum ex ejusmodi Disputationibus pax turbaretur, tandem Gregorius XV. prohibuit sub ejusdem pœnis, ne in Scholis & privatis Colloquiis quisquam auderet asserere B. Virginem in peccato fuisse conceptam : *Nisi*, inquit, *aliquibus fuerit specialiter indul-tum*. Cavent autem omnes illi Pontifices, ne quis ex prædictis Bullis & Constitutionibus colligat contrariam sententiam ab iis esse damnatam, aut improbatam.

R. 4. Absque ulla temeritatis nota licet tenere, beatam Dei Genitricem ex speciali Dei privilegio sine peccato originali fuisse conceptam.

Probatur. Eatenus illa opinio videri posset temeraria quatenus sine fundamento B. Virginem exciperet à regula fidei, quam tradit Apostolus Rom. 5. ubi universaliter affirmat omnes in Adamo peccasse : atqui hæc exceptio non est sine fundamento : ergo opinio, quæ asserit beatam Virginem sine peccato originali fuisse conceptam, non est temeraria.

Minor probatur 1. ex Concilio Tridentino Sess. 5. ubi expressè excipit beatam Virginem ab illa generali regula. Postquam enim ex Apostolo definiit Can. 2. omnes in Adamo peccasse, ista subjicit ad calcem Canonis 5. *Declarat tamen hæc ipsa sancta Synodus, non esse suæ intentionis comprehendere in hoc Decreto, ubi de peccato originali agitur, beatam immaculatam Virginem Mariam Dei Genitricem ; sed observandas esse Constitutiones felicitis recordationis Sixti Pa-*  
*D. Habert Theolog. Tom. III.*

R. pa

*pæ IV. sub pœnis in eis Constitutionibus contentis, quas innovat.*

Probatur 2. ex sancto Augustino, qui Lib. de Natura & Gratia, cap. 36. sic habet: *Excepta sancta Virgine Maria, de qua propter honorem Domini nullam prorsus, cum de peccatis agitur, habere volo questionem. Inde enim scimus, quod ei plus gratiæ collatum fuerit ad vincendum omni ex parte peccatum, quæ concipere ac parere meruit eum, quem constat nullum habuisse peccatum.*

Nec dicas, S. Augustinum agere duntaxat de peccato actuali. Namque 1. nullam vult habere questionem de beata Virgine, ubi de peccatis agitur. Hæc autem exceptio est generalis. 2. Sanctus Doctor B. Virginem excipit propter honorem Domini: atqui honor Domini non minùs postulare videtur, ut Mater ejus fuerit immunis à peccato originali, quàm ab actuali etiam veniali. 3. In mente sancti Augustini non minùs est universalis hæc peccandi formula: *Dimitte nobis debita nostra*, quàm ista fidei regula, *ecce in iniquitatibus conceptus sum*: Atqui S. Augustinus non vult asserere illam precandi formulam B. Virgini fuisse præscriptam: ergo in ejus mente fidei regula peccatum originale spectans, pati potest aliquam exceptionem. Denique idem S. Doctor ex peccato originali colligit illam impotentiam moralem, quæ inest in singulis, vitandi omnia & singula peccata venialia: ergo cum concedat eam gratiam beatæ Virgini collatam, qua omni ex parte vinceret peccatum actuale, supponit similem ei negatam non fuisse, qua vitaret peccatum originale: *Propterea*, inquit Lib. 5. contra Julianum cap. 9. *nullus est hominum præter ipsum (Christum) qui peccatum non fecerit grandioris ætatis accessu; quia nullus est homi-*



*hominum præter ipsum, qui peccata non habuerit infantilis ætatis exortu.* In priori comparationis membro non continetur beata Virgo, ut profitetur S. Augustinus cit. Lib. de Natura & Gratia. Ergo nec in posteriori.

Dices: De fide est, B. Virginem fuisse per Christum redemptam; ait enim Apostolus Roman. 5. *Sicut per unius delictum in omnes homines in condemnationem; sic & per unius justitiam in omnes homines in justificationem vitæ:* Atqui si beata Virgo non contraxit peccatum originale, non fuit per Christum redempta; quia, ut ait Zozimus Summus Pontifex, quem S. Augustinus laudat Epist. 191. aliàs 157. *nullus, nisi qui peccati servus est, liber efficitur, nec redemptus dici potest, nisi qui verè per peccatum fuerit ante captivus:* Christus enim non venit vocare justos, sed peccatores: Ergo. Ut solvatur hæc difficultas,

Nota tribus modis posse dici aliquem in Adamo peccasse; 1. Quatenus erat in lumbis Adæ secundum rationem seminalem, quando transgressus est legem. 2. Quatenus in prima conceptione, priusquam anima rationalis infunderetur, vi generationis suæ fuit peccato obnoxius, utpotè via ordinaria seminatus. 3. Quatenus conceptione jam perfecta, accepit animam rationalem justitia originali nudatam, & à Deo averfam. His præsuppositis,

Distinguo minor. Si non contraxit neque primo, neque secundo modo, Concedo: Si non contraxit tertio modo, Nego minorem. Porro beata Virgo primo & secundo modo peccavit in Adamo, sed à Christo Domino redempta est, quatenus anima ejus in primo suæ creationis instanti

fuit ornata gratia sanctificante, & ita à peccati macula liberata, quam quidem actu & de facto non incurrit, sed quam incurrisset, nisi gratia Dei per merita Christi fuisset præventa. Redempta est igitur, *quemadmodum*, inquit S. Augustinus in Psalm. 85. *si Medicus videat tibi imminentem ægritudinem fortè ex aliquo labore, & dicat, parce tibi, requiesce: rectè dicis Medico, liberaſti me ab ægritudine, non in qua jam eras, sed in qua futurus eras. Nescio quis habens causam moleſtam, mittendus erat in carcerem; venit alius, defendit eum. Gratias agens, quid dicit? Eruiſti animam meam de carcere. Suspendendus erat debitor; ſolutum eſt pro eo, liberatus dicitur de ſuſpendio. Similiter beata Virgo in Adamo contraxit debitum; voluntas ejus, ſicut cæterorum hominum, continebatur in voluntate Adami vi conceptionis ſuæ, quæ fuit per viam ſeminalem, contractura erat peccatum; ſed per Chriſti merita actu & de facto non contraxit; quia in primo inſtanti unionis animæ cum corpore jam organizato ſanctificata eſt. Hoc modo ſolve omnes textus, tum Scripturæ, tum SS. Patrum, in quibus definitur omnes in peccato conceptos, ſolo Chriſto Domino excepto; ſolus enim Chriſtus nec primo, nec ſecundo modo peccavit.*

Non deſunt Theologi, qui doceant B. Virginem ne primo quidem aut ſecundo modo peccaſſe, exiſtimantes legem ita datam fuiſſe primo parenti pro ſe, & poſteris ejus, ut ab illa exciperetur B. Virgo per merita Chriſti futura: ex quo ſequitur eam in conceptione nequidem habuiſſe debitum contrahendi peccati.

Verùm hæc ſententia, quæ pauciſſimorum eſt, ſtare non poteſt; quia ſi beata Virgo prædeſtinata

ta est sancta ante prævisum Adæ peccatum, per Christum non fuit redempta; cum decretum Incarnationis præsupponat Adæ peccatum, quemadmodum probavimus Tractatu de Incarnatione. 2. Quia hæc sententia nulla fulcitur auctoritate; quæ enim ex libera Dei voluntate pendent, ea non ex humana ratione, & quibusdam convenientiis pensanda sunt, & determinanda; sed ex Ecclesiæ auctoritate, cujus est explanare, quæ à Deo revelata fuere, sive in Scriptura, sive in Traditione: *Periculose præsumimus*, inquit sanctus Bernardus, Epist. 174. *quidquid ipsorum (Patrum) in talibus prudentia præterivit*. Enimverò periculosum est ratione humana definire, quæ decora & insignia Deus B. Virgini conferre debuerit, ut dignum Filii sui habitaculum effici mereretur, quia si Deus altiori consilio fortè ea non contulerit, quæ debita judicaverimus, jam invenimur Divinæ Sapientiæ censores, quasi defecerit in suis consiliis: ergo in iis ante omnia consulenda est auctoritas, per quam Dei consilia nobis innotescunt: atqui nihil extat in Scriptura aut in Traditione, unde fulciri possit illa opinio: Ergo. 3. Quia non modò huic opinioni non favet Patrum authoritas, quin ei omnes una voce contradicunt. S. Irenæus Lib. 5. *Plaga serpentis*, inquit, *omnes homines sunt vulnerati, sed per crucem Christi, qui solus sine peccato venit in similitudinem carnis peccati*, &c. S. Hilarius à S. Augustino laudatus Lib. 2. contra Julianum cap. 4. ait: *Omnis caro, excepta illa quæ sine peccato venit in similitudinem carnis peccati, sub peccati origine, & sub peccati lege nata est*. Sanctus Hieronymus Dialogo 2. contra Pelagian. *Absque omni peccato esse*, inquit, *soli Christo competit, omnisque humana*

*creatura peccato subjacet. S. Ambrosius in Isaiam : Nemo sine peccato , nisi unus solus Deus. Servatum est igitur , ut ex viro & muliere , per illam corporum mixtionem nemo conceptus expers sit delicti : qui autem expers est delicti , expers est & ejusmodi conceptionis. S. Augustinus in Psal. 34. sic de Christo scribit : Inde carnem assumpsit de massa ipsa , quæ mortem meruerat ex peccato. Etenim , ut celerius dicam , Maria ex Adam mortua propter peccatum. Et Lib. 2. de Peccat. mer. c. 24. Solus ergo ille etiam homo factus , manens Deus ; peccatum nullum habuit unquam , nec sumpsit carnem peccati , quamvis de materna carne peccati. Et Lib. 5. de Nupt. cap. 12. docet carnem omnem , quæ de concubitu nascitur , carnem esse peccati ; quandoquidem sola , quæ non inde nata est , non fuit caro peccati. S. Fulgentius Lib. de Incarnatione & Gratia cap. 6. Caro quippe Mariæ , inquit , quæ in iniquitatibus fuerat concepta , caro fuit utique peccati , quæ Filium Dei genuit in similitudinem carnis peccati. Petrus Damiani , Opusc. 6. cap. 19. sic habet. Ex ipsa Carne Virginis , quæ de peccato concepta est , caro (Christi) sine peccato prodiit. Ergo ex constanti Patrum Traditione , Beata Virgo peccatum originale aliquo modo contraxit , si non actu , saltem debito. Quæstio jam superest , utrum actu non contraxerit. Cui ut fiat satis ,*

R. 5. Beata Virgo peccatum originale actu non contraxit.

Probatur 1. Ex Concilio Basileensi , quod Sess. 36. de Conceptione Beatæ Virginis sic statuit anno 1439. *Doctrinam illam differentem gloriosam Virginem Dei Genitricem Mariam præveniente & operante Divini Numinis gratia singulari , nunquam actualiter subjacuisse originali peccato , sed immunem semper fuisse ab omni originali , & actuali culpa , sanctamque & immaculatam ,*  
*tanquam*



*tanquam piam, & consonam Cultui Ecclesiastico, Fidei Catholicæ, rectæ rationi, & sacre Scripturæ ab omnibus Catholicis approbandam, tenendam, & amplexandam definimus, & declaramus, nullique de cætero licitum esse in contrarium prædicare, & docere.*

Tria autem advertes circa hoc Decretum. Primum, Concilium non definiit doctrinam illam esse de fide, sed fidei consonam, & piam. Secundum, hæc definitio non habet auctoritatem Concilii Oecumenici; divisi enim erant tunc Episcopi, & magna eorum pars Florentiam convenerat ad Eugenium IV. Summum Pontificem, qui totis viribus Concilio Basileensi se opponebat, & aliud Florentiæ celebrabat, quod dicitur Florentinum Generale XVII. Tertium, definitio illa maximi est ponderis: tum quia in Basileensi Concilio aderant viri non pauci, eruditione conspiciui: tum quia Academia Parisiensis statim amplexa est doctrinam ea definitione contentam, atque ad eam tenendam suos alumnos solemni juramento hactenus astrinxit: tum denique quia ejusmodi definitio nedum à Summis Pontificibus, & à subsequentibus Conciliis fuerit reprobata, quin solemniter confirmata. Unde

Probatur 2. Auctoritate Summorum Pontificum. Sixtus IV. Constitutionem emisit an. 1483. in qua prohibet sub pœna excommunicationis lætæ sententiæ, ne quis hæreseos damnet asserentes Conceptionem Beatæ Virginis fuisse immaculatam. Pius V. Paulus V. & Gregorius XV. in suis Bullis supra laudatis sententiæ oppositæ Patronis silentium imponunt, nostramque duntaxat publicè propugnari permittunt juxta Decretum Basileense. Alexander VI. approbavit, nemine reclamante.

clamante, Ordinem institutum in honorem Immaculatæ Conceptionis B. Virginis. Sed quod gravius est, Concilium Tridentinum Sess. 5. supra laudata sanxit observandas esse Constitutiones Sixti IV. quas & innovat.

Nec dicas, ascititiam esse ejusmodi declarationem, cum non habeatur in editionibus sex primarum Sessionum excusis Lutetiæ ann. 1546. & 1551. Nam reperitur in editione, quæ Romæ facta est anno 1564. statim post absolutum Concilium, & ita ubique terrarum promulgatum est Concilium, nullis reclamantibus, etiam ex iis, qui Concilio interfuerant: quin & Calvinus hanc eandem declarationem, ut genuinum Concilii fœtum impugnat in suo Antidoto circa annum 1547.

Confirmatur. Ecclesia celebrat solemne Festum Conceptionis: Græca quidem ante mille annos, Latina verò ante quingentos. Quamvis enim dici possit Festum illud fuisse institutum in gratiarum actionem, quòd Deus per hujus Virginis Conceptionem viam paret ad promissa complenda: quo sensu conceptio Beati Joannis Baptistæ olim fuit festiva; maximè cum Gregorius XV. in sua Constitutione caveat, ne in officio illius Festi voci Conceptionis quidquam addatur, quale posset esse nomen adjectivum, *immaculata*; negari tamen non potest, quin Festum illud maximè faveat sententiæ affirmanti. Quin S. Bernardus Epist. 174. scribit, ejusmodi festivitatem esse professionem publicam, B. Virginem sine peccato fuisse conceptam, quod privilegium illi adjudicat; unde totis viribus insurgit in Canonicos Lugdunenses, qui contra antiquum morem Festum illud instituerant, *cum hæc*, inquit, *ita se habeant* (nempe solum

solum conceptum Christi, qui est de Spiritu Sancto, esse sanctum) quænam jam erit ratio festivæ Conceptionis? quo pacto, inquam, aut sanctus asseretur conceptus, qui de Spiritu Sancto non est, ne dicam, de peccato est; aut Festus habebitur, qui minimè sanctus est? libenter gloriosa hoc honore carebit, quo, vel peccatum honorari, vel falsa videtur induci sanctitas.

Mitto miracula, & revelationes, quæ circumferuntur in confirmationem immaculatæ Conceptionis; ad hæc enim respondet S. Bernardus laudata Epist. *Ipse mihi facile persuadeo scriptis talibus non commoveri, quibus nec ratio suppeditari, nec certa invenitur favere auctoritas.*

Dices: Novitas doctrinæ est mater temeritatis, soror superstitionis, filia levitatis, ex S. Bernardo ibidem: atqui sententia de Immaculata Conceptione est nova in Ecclesia: Ergo.

Minor probatur testimonio sancti Bernardi, qui in præfata Epistola sic carpit Canonicos Lugdunenses, quod inducerent opinionem immaculatæ Conceptionis: *Numquid Patribus doctiores, aut devotiores sumus? periculose præsumimus quidquid ipsorum in talibus prudentia præterivit. Non ita precipitanter atque inconsulte paucorum sequenda simplicitas imperitorum. Ante quidem apud aliquos errorem compere-ram; sed dissimulabam, parcens devotioni, quæ de simplici corde, & amore Virginis veniebat. Verum apud sapientes, atque in famosa nobilique Ecclesia & cujus specialiter filius sum, superstitione deprehensa, nescio an sine gravi offensa, etiam vestri omnium dissimulare potuerim. Hactenus sanctus Bernardus de iis, qui ipsum præcesserant, & qui sua ætate florebant, ut Rupertus, sanctus Anselmus, qui cum S. Bernardo ejusdem fuerunt sententiæ, sicut qui eum*

subsecuti sunt Scholæ principes, Albertus Magnus, Alexander Alensis, S. Thomas, & S. Bonaventura.

R. 1. Sanctum Bernardum non impugnare nostram sententiam tanquam perniciosam, & periculosam in fide, sed sobriè, &, ut ita dicam, subdubitanter contra eam scribere: sic enim Epistolam suam concludit: *Quæ autem dixi, absque præjudicio sanè dicta sint sanius sapientis. Romanæ præsertim Ecclesiæ auctoritati atque examini totum hoc, sicut, & cætera, quæ ejusmodi sunt, universa reservo; ipsius, si quid aliter sapiat, paratus judicio emendare: ex quibus vides, & quid sentiret piissimus Pater, si viveret hoc tempore, quo Ecclesia Romana recipit doctrinam immaculatæ Conceptionis, & quo sensu novam dixerit, nimirum quia quæstio nondum ejus ætate enucleata fuerat. Unde*

R. 2. Distinguo majorem: novitas doctrinæ est nota temeritatis & falsitatis: si doctrina, quoad materiam sit nova, & ab antiqua traditione prorsus aliena, Concedo: si sit nova, quoad explicationem duntaxat, Nego majorem: alioquin omnes ferè definitiones & explicationes Ecclesiæ saperent novitatem; multa enim successu temporis propter controversias identidem nascentes Ecclesia elucidat & definit credenda fide divina, quæ perspicua non erant in Traditione.

Distinguo similiter minorem, Sententia affirmans immaculatam Conceptionem, est nova quoad explicationem, hoc est, clariùs & expressiùs proposita, Concedo: quoad materiam, Nego minorem. Itaque nostra sententia nititur Veterum traditione, nedum ab ea recedat ut simpliciter & absolutè nova dicatur. Nam ex S. Augustino  
Lib.



Lib. de Nat. & Grat. cap. 36. supra laudato Matri Dei plus gratiæ collatum fuit ad vincendum omni ex parte peccatum: ex S. Ambrosio in Psal. 118. integra fuit ab omni labe peccati: ex S. Hieronymo, seu quovis alio auctore in Psal. 77. nunquam fuit in tenebris, sed semper in luce; ex S. Sophronio in Ep. ad Sergium; quæ lecta est in Concilio generali VI. ab omni contagione corporis & animæ liberata est. Quæ momenta licet intelligi possint de peccato actuali, ex iis tamen eruitur immunitas à peccato originali; cum constet tum ex Scriptura, tum ex Patribus, neminem ex iis, qui concepti sunt in iniquitatibus, esse sine peccato actuali. Nec desunt ex Antiquis, qui Beatam Virginem expressè eximant à labe originali. Sedulius 5. sæculo de ea cecinit Lib. 3. Paschalis operis.

*Et velut è spinis mollis rosa surgit acutis,  
Nil, quod lædat habens.*

S. Joannes Damascenus in Oratione 1. de Nativitate B. Mariæ Virginis sic loquitur: *Natura gratiam antevertere ausa non est, sed tantisper expectavit, dum gratia fructum suum produxisset . . . o beatos Joachimi lumbos, è quibus immaculatum semen effluxit! o præclaram Annæ vulvam, in qua tacitis incrementis formatus fuit sanctissimus fœtus! . . . o sanctissima, quæ Principatus & Potestates fefellisti, immaculata conservata in Dei sponsam!* Auctor cognomento Idiota, cap. 2. in contemplatione Beatæ Mariæ scripsit initio octavi sæculi B. Virginem totam pulchram esse, non in parte, sed in toto, & maculam peccati in ea non extitisse, sive mortalis, sive venialis, sive originalis. In Libro de Operibus Car-  
dina-

dinalibus inter opera S. Cypriani, Mater Dei dicitur à cæteris differre, *quia natura communicabat, non culpa.* Ad textus verò, in quibus antiqui Patres asserunt carnem Mariæ fuisse carnem peccati, solumque Christum non sustinuisse contagia humanæ originis, jam respondimus, inde erui duntaxat Beatam Virginem contraxisse debitum peccati originalis, & carnem ejus fuisse carnem peccati, quatenus nimirum non sine libidine formata est tanquam vas vitiatum quod ejus animam infecisset, nisi Deus eam prævenisset in benedictionibus, infundens gratiam simul & sanctitatem cum anima rationali. Atque hoc sensu S. Bernardum scripsisse ad Canonicos Lugdunenses, contendunt nonnulli, ut Bellarminus Lib. 4. de Amissione Gratiæ cap. 16. & Mabillonius in Notis ad S. Bernardi Epistolam; nempe piissimum Patrem, voluisse duntaxat Beatæ Virginis Conceptionem in suis primordiis, & ante infusionem animæ rationalis fuisse vitiatam; non verò in ipso termino, hoc est, in ipsa infusione animæ rationalis. Verum, nec verba, nec scopus Epistolæ patiuntur benignam ejusmodi interpretationem. Non verba, ut legentibus satis patet: non etiam scopus. S. quippe Bernardus probare intendit contra Canonicos Lugdunenses Conceptionem Beatæ Virginis non esse veneratione aut ullo cultu dignam, ex eo quod non sit sancta; *quo pacto, inquit, sanctus asseretur conceptus, qui de Spiritu Sancto non est, ne dicam, de peccato est; aut festus habebitur, qui minimè sanctus est?* atqui ejusmodi ratio nullius esset ponderis in hypothese, quòd anima non fuerit infusa sine gratia sanctificante; in promptu enim fuisset Canoniorum excusatio, se non celebrare immun-

immundam seminationem, in qua nondum erat B. Virgo, sed sanctificationem, à qua cœpit existere.

Nec mirum, quòd S. Bernardus, alioquin in laudes Beatæ Mariæ Virginis profusus, hunc ei honorem non detulerit, sicut & plerique Scholæ Principes, qui eum proximè secuti sunt; traditio enim in hac parte adeò obscurè fuit, ut ipse Gregorius XV. Philippo III. Regi Hispaniarum urgenti Ecclesiæ definitionem scripserit, æternam sapientiam nondum Ecclesiæ suæ tanti Mysterii penetralia patefecisse, & cuilibet liberum esse sentire sub religioso silentio quod verisimilius judicaret.

Nihilominus nostra sententia ita obtinuit à quadringentis annis, hoc est, ab ineunte decimo quarto sæculo, quo Scotus in tertium Sent. dist. 3. q. 1. eam probabilem asseruit, ut anno 1385. Academia Parisiensis hancce propositionem Joannis de Montesono Dominicani, *est expressè contra fidem, Beatam Virginem Mariam, & Dei Genitricem non contraxisse peccatum originale*, sua censura notaverit in hunc modum: *Hæc propositio revocanda est tanquam falsa, scandalosa, præsumptuose asserta, & piarum aurium offensiva.* Cum autem anno sequenti Guillelmus Ebroicensis Episcopus, ex familia Dominicanorum propositionem Joannis de Montesono propugnare ausus fuisset, agente eadem Academia, compulsus est revocare quæ dixerat contra sacræ Facultatis censuram: quæ ulterius progressa anno 1497. statuit, neminem deinceps ad gradum Doctoralem promovendum, nisi prius Sacramento solemni ad tenendam hanc doctrinam se obstrinxisset. Idipsum postea præstiterunt  
Acade-

Academiæ Colonienſis, & Moguntina in Germania: Salmanticensis, Toletana, Complutenſis, & plures aliæ in Hispania. Quin & plures viri celebres ex familia Dominicanorum, ut Natalis Hervæus Magiſter Generalis decimo quarto ſæculo, S. Vincentius Ferrerius Serm. 1. de Nativitate, Dominicus Soto, Ambroſius Catharinus, & plures alii eandem ſententiam amplexi ſunt: ſicque evaſit communis.

Dices: mors eſt pœna peccati originalis, dicente Apoſtolo Rom. 5. *per unum hominem peccatum in hunc mundum intravit*, & *per peccatum mors*: atqui Beata Virgo mortem ſubiit: ergo Beata Virgo incurrit pœnam peccati: atqui omnis pœna neceſſariò ſupponit peccatum: ergo Beata Virgo contraxit peccatum originale.

Distinguo majorem: mors eſt pœna peccati originalis, vel actu, vel quoad debitum contracti, Concedo: actu & de facto contracti, Nego majorem.

Porro Beata Virgo ex dictis contraxit debitum peccati originalis.

Instabis: ſublata cauſa tollitur effectus: atqui peccatum originale eſt cauſa mortis: ergo ſublato peccato originali tollitur moriendi neceſſitas, ut quæ ſit peccati originalis effectus.

Distinguo minorem: cauſa mortis eſt peccatum originale; vel in actu, vel in debito, Concedo: in actu, Nego minorem. Quanquam illud axioma non eſt univerſaliter verum; ſunt enim effectus, qui cùm non indigeant continuo cauſæ influxu, permanent etiam ſublata cauſa, domus enim ſtat deſuncto artifice; qui percuffus & mutilatus eſt à latrone, ipſo morte mulctato, manet mutilus.



mutilus. Unde absurdum non est, quòd & parvulus deletò per Baptismum peccato originali, sit in naturalibus vulneratus, & B. Virgo licet in Conceptione immaculata, sit morti obnoxia propter debitum peccati, quod in Adamo contraxerat.

Nec est cur Catholicus hic timeat Hæreticorum dentem; cùm Zwinglius Lib. de Bapt. & Calvinus in Antidoto Concilii Tridentini & Lib. 4. Instit. cap. 16. 24. & 25. doceant, filios fidelium esse Sanctos ante Baptismum, nec eis imputari peccatum originale; nam Beata Virgo orta est ex fidelibus & sanctissimis parentibus, ac proinde in Adversariorum principiis non contraxit in sua Conceptione labem peccati originalis. Verùm quàm falso nitantur principio, demonstramus Tractatu de Baptismo, ubi de ejus necessitate.

## §. VII.

### *De Pœnis Peccati originalis.*

Q. 1. *Quenam sunt pœnæ peccati originalis?*

R. Aliæ spectant corpus, aliæ animam, aliæ mortalem hanc vitam, aliæ futuram.

Q. 2. *Quæ sunt pœnæ corporis in hac vita?*

R. Mors & aliæ miseriæ, ut morbi, &c. Est de fide, sic enim definiit Concilium Tridentinum Sess. 5. his verbis: *Si quis non confitetur primum hominem . . . . . incurrisse . . . . . per offensam prævaricationis mortem . . . . . quam antea illi comminatus fuerat Deus . . . . . anathema sit.* Præi-  
verat Concilium Arausicanum II. Can. 2.

Proba-

Probatur 1. ex Scriptura Sap. 2. *Deus creavit hominem inexterminabilem, & ad imaginem similitudinis suæ fecit illum, invidia autem Diaboli mors intravit in orbem terrarum.* Rom. 5. *Per unum hominem peccatum intravit in mundum, & per peccatum mors.* De aliis miseriis habetur Eccli. 40. *Jugum grave super filios Adam à die exitus de ventre matris eorum usque in diem sepulturæ.* Per jugum autem intelliguntur omnes ærumnæ, ut morbi, aeris intemperies, sterilitas terræ, de quibus Gen. 3. *Maledicta terra in opere tuo, in laboribus comedes . . . spinas & tribulos germinabit tibi.*

Probatur 2. ex S. Aug. Lib. de Peccat. merit. c. 2. *Si non peccasset Adam, inquit, non erat expoliandus corpore, sed supervestiendus immortalitate & incorruptione.* Et Lib. 4. contra Julianum c. ult. *Quid igitur restat, nisi ut causa istorum malorum sit aut iniquitas, vel impotentia Dei, aut pœna primi veterisque peccati? sed quia nec injustus, nec impotens est Deus, restat quod non vis, sed cogaris confiteri, quod grave jugum super filios Adam à die exitus de ventre matris eorum usque in diem sepulturæ in matrem omnium, non fuisset, nisi delicti originalis meritum præcessisset.*

Dices: habetur Gen. 2. Deum posuisse hominem in Paradiso, ut operaretur: ergo homo terram coluisset, etiamsi peccatum non præcessisset.

Distinguo consequens: Coluisset honesta animi voluptate, & in oblectationem, Concedo: coluisset cum labore, & ex necessitate vitæ sustentandæ, Nego consequentiam.

Q. 3. *Quæ sunt animæ pœnæ in hac vita?*

R. Cum Glossa, quæ Venerabili Bedæ tribuitur: homo spoliatus est gratuitis, & vulneratus in naturalibus, juxta parabolam, in qua Christus  
Luc.

LUC. 10. exhibet hominem, qui descendens à Jerusalem in Jericho incidit in latrones, qui spoliaverunt illum, & plagis impositis abierunt semivivo relicto.

Constat apud omnes Catholicos, sequiturque ex dictis, hominem per peccatum originale spoliatum fuisse supernaturalibus & gratuitis donis, quæ complectebatur justitia originalis, scilicet gratia sanctificante, & omnibus virtutibus infusis, scientia, sapientia, fide, prudentia, charitate, quibus perficiebatur ejus intellectus & voluntas, obedientia partis inferioris ad superiorem, & membrorum corporis ad nutum voluntatis. Sed nonnulli negant contra communem Theologorum doctrinam, hominem fuisse vulneratum in naturalibus, contenduntque eum nasci in eo statu, in quo nasceretur, si conditus esset in puris naturalibus. Contra quos.

Probatour nostræ responsionis secunda pars, 1. ex S. Augustino Lib. de Nat. & Grat. cap. 19. *Videte, quæso, inquit, quomodo nesciens, (Pelagius) nitatur evertere medicinalium eloquiorum voces saluberrimas, ego dixi: Domine, miserere mei, sana animam meam, quia peccavi tibi. Quid sanatur, si nihil est vulneratum, nihil sauciatur, nihil debilitatum, atque vitiatur? Et Lib. 22. de Civit. Dei cap. 22. Omnium mortalium progeniem fuisse damnatam, hæc ipsa vita, si vita dicenda est, tot & tantis malis plena testatur. Quid enim aliud indicat horrenda quædam profunditas ignorantiae, ex qua omnis error existit, qui omnes filios Adam tenebroso quodam sinu suscipit, ut homo ab illo liberari sine labore, dolore, timore non possit? Quid amor ipse tot rerum vanarum, atque noxiarum, & ex hoc mordaces curæ, perturbationes, mæores?*

D. Habert Theolog. Tom. III.

S

Quis

*Quis ignorat cum quanta ignorantia veritatis , quæ etiam infantibus manifesta est, & cum quanta abundantia vanæ cupiditatis , quæ incipit in pueris apparere , homo veniat in hanc vitam , ita ut si dimittatur vivere ut velit, & facere quidquid velit , in hæc facinora & flagitia , quæ commemoravi , vel cuncta , vel multa perveniat ? Quid est , quodd cum labore meminimus , sine labore obliviscimur ? cum labore discimus , sine labore nescimus : cum labore strenui , sine labore inertes sumus. Nonne hinc apparet in quid velut pondere suo proclivis & prona sit vitiosa natura , & quanta ope , ut hinc liberetur , indigeat ?*

Probatur 2. ex S. Thoma 1. 2. quæst. 85. art. 3. supra laudato , in quo probat quatuor vulnera per peccatum naturæ humanæ fuisse inflictæ , nempe ignorantiam in intellectu , malitiam in voluntate , infirmitatem in appetitu irascibili , & concupiscentiam in concupiscibili.

Dices : peccatum originale est privatio & defectus , atqui privatio non potest producere effectum positivum , quale est vulnus. Ergo

Distinguo minorem : privatio non potest producere effectum positivum positivè influendo , Concedo : negativè , & quatenus est subtractio boni necessarii , quam sequitur naturæ corruptio , quemadmodum subtractio alimentorum solvit laudabilem habitudinem corporis , & inducit mortem , Nego minorem ; ita S. Augustinus Lib. de Nat. & Grat. cap. 2. *Nec existimemus , inquit , peccato naturam humanam non posse vitari , sed divinis credentes Scripturis , peccato eam esse vitiatam , quomodo fieri id potuerit , inquiramus. Quoniam peccatum jam didicimus non esse substantiam , nonne attenditur , ut alia omittam , etiam non manducare , non esse substantiam.*



*stantiam? à substantia quippe receditur, quoniam cibus substantia est. Sed abstinere à cibo non est substantia, & tamen substantia corporis, si omnino abstinetur à cibo, ita languescit, ita valetudinis inæqualitate corrumpitur . . . . . ut si aliquo modo perduret in vita, vix possit ad eum cibum revocari, unde abstinendo vitiata est. Sic non est substantia peccatum, sed substantia est Deus, summaque substantia, & solus verus rationalis creaturæ cibus, à quo per inobedientiam recedendo, & per infirmitatem non valendo capere, quo debuit & gaudere, audis quemadmodum dicam, percussus est sicut fœnum, & aruit cor meum, quoniam oblitus sum comedere panem meum.*

Instabis: atqui illud vitium naturæ est ipsamet spoliatio iustitiæ originalis, & donorum supernaturalium: Ergo nulla solutio.

Probatur antecedens, 1. quia sicut tenebræ nihil aliud sunt, quàm privatio lucis; ita nec ignorantia aut mentis cæcitas aliud concipitur, quàm subtractio sapientiæ & intelligentiæ. 2. Quia fingi non potest animam rationalem vulnerari sive in sua substantia, sive in suis potentiis naturalibus: nisi quatenus intelligeretur deperdere aliquid pertinens ad suam integritatem, quemadmodum vulneratur tibia, si os frangatur: vel recipere qualitatem pravam positivè eam ad malum inclinantem, qualis potest esse habitus erroris, & vitii, vel denique amittere aliquam perfectionem extrinsecus ei superadditam: atqui anima rationalis 1. modo vulnerari nequit: substantia enim est spiritalis, simplex, nec composita ex partibus integrantibus, nec potentiæ ipsi congenitæ suscipiunt majus aut minus. Unde auctor de divinis nominibus c. 4. scribit naturalia in Dæmonibus manere integra. Neque etiam 2.

quis enim esset auctor illius qualitatis pravæ, nisi Deus, qui intentator malorum est? Epist. Jacobi cap. 1. Restat ergo, ut dicamus animam vulneratam esse 3. modo, quatenus nudata est gratuitis donis.

Confirmatur. Homo sine peccato conditus in puris naturalibus, hoc ipso, quo careret omnibus donis gratuitis, pateretur tenebras ignorantiae & inordinatos motus concupiscentiae, gereretque corpus mortale, & doloribus obnoxium, nec propterea dicendus esset vulneratus in naturalibus donis, cum haberet quidquid pertinet ad naturæ humanæ constitutionem.

Nego subsumptum, & ad singula quæ proferuntur in ejus confirmationem respondeo.

Ad primum, distinguo propositionem. Ignorantia & mentis cæcitas nihil aliud sunt quam subtractio luminis, sapientiæ, & intelligentiæ, statui hominis consentaneæ, & necessariæ in ordine ad ultimum finem, ad quem institutus est, Concedo: minimè consentaneæ, nec pertinentis ad ejus statum, Nego propositionem. Non est enim ignorantia & cæcitas, sed mera nescientia, non cognoscere ea, quæ ad statum nostrum non pertinent. Porro homo sine peccato in puris naturalibus conditus, non haberet quidem notitiam rerum supernaturalium, ut qui ad ea non esset ordinatus; sed eam intelligentiam haberet, unde seipsum posset excolere, in virtute proficere, & ultimum finem adipisci; repugnat enim sapientiæ divinæ, negare creaturæ innocenti media, sine quibus finem, ad quem illam ordinavit, consequi non posset. Deus igitur sicut Angelos instruxit speciebus, sine quibus nequidem objecta natu-

naturalia cognoscerent ; ita provideret homini in statu naturæ puræ constituto , nec concupiscentia effrænis & impotens obnubilaret mentem, & sensum perverteret, ut contingit in statu naturæ corruptæ, *in quo quidam tantæ sunt fatuitatis*, inquit S. Augustinus Epist. 166. aliàs 28. *ut non multum à pecoribus differant.*

Ad secundum, respondeo cum S. Thoma 1. 2. q. 85. art. 1. duplex esse bonum naturæ : primum, sunt principia naturalia, ex quibus natura ipsa constituitur, & proprietates à principiis fluentes, nempe naturales animæ potentiæ. Secundum, est inclinatio ad virtutem, quæ dici potest bonum naturæ rationalis : quia naturaliter inclinatur natura humana ad vivendum secundum rationem, ac proinde secundum virtutem ; agere enim ex ratione idem planè est ac agere ex virtute. Porro bonum prioris generis nec tollitur, nec minuitur per peccatum ; unde & manet integrum in Dæmonibus. Bonum verò posterioris generis, nempe inclinatio naturalis ad virtutem, minuitur per peccatum, quatenus Deus in pœnam finit causas secundas sævire in filios iræ, solvere debitam irascibilis & concupiscibilis temperiem, ex quo contingit nonnullos nasci cum indole adeò prava, ut ad bonum vix flecti queant.

Q. 4. *Bonum naturæ potestne totaliter auferri per peccatum ?*

R. Non potest ; quia ex S. Thoma qu. 85. art. 2. inclinatio ad virtutem convenit homini, quatenus est rationalis. Per peccatum autem non potest fieri quòd non sit rationalis, alioquin non esset amplius homo, nec proinde capax peccati.

Q. 5. *Quænam est pœna peccati originalis in altera vita ?*

R. De fide est, parvulos sine Baptismo decedentes privari vita æterna, quæ consistit in intuitiva Dei visione; ita enim definiit Concilium Tridentinum Sess. 5. Can. 4. his verbis: *Si quis parvulos . . . . . dicit . . . . . nihil ex Adam trahere originalis peccati, quod regenerationis lavacro necesse sit expiari ad vitam æternam consequendam . . . . anathema sit.* Præiverat Concilium Florentinum Sess. ult. statuens, *illorum animas, qui cum actuali peccato, vel solo originali decedunt, mox in infernum descendere, pœnis tamen disparibus puniendas.*

Probatur 1. ex Scriptura. Joan. 3. ait Christus: *nisi quis renatus fuerit ex aqua & Spiritu Sancto, non potest introire in regnum Dei.* Quod autem regnum Dei non sit quid distinctum à vita æterna, quemadmodum fingeant Pelagiani, patet ex contextu ejusdem capitis, ubi Christus vocat æternam vitam quod prius dixerat regnum Dei, *ut omnis, inquit, qui credit in illum, non pereat, sed habeat vitam æternam.* Rom. 5. *per unius delictum in omnes homines in condemnationem.* Quem locum expendens sanctus Augustinus Lib. 2. de Peccat. meritis capit. 16. sic scribit: *Potest rectè dici parvulos sine Baptismo de corpore exeuntes in damnatione omnium mitissima futuros; multum autem fallit & fallitur, qui eos in damnatione prædicat non futuros, dicente Apostolo, iudicium ex uno delicto in condemnationem.*

Probatur 2. ex variis Conciliis, putà Diospolitano, Carthaginensi, Milevitano, quorum meminit sanctus Augustinus Lib. 2. de Origine Animæ capite 12. *Novellos, inquit, hæreticos Pelagianos justissimè Conciliorum Catholicorum, & Sedis Apostolicæ*



*licæ damnavit auctoritas , eò quòd ausi fuerint non baptizatis parvulis dare quietis & salutis locum , etiam præter regnum cælorum.*

Q. 6. Quid Pelagiani intelligebant per vitam æternam?

R. 1. Pelagius mentem suam non explicuit, ex S. Augustino Lib. de Peccato originali cap. 21. ubi hæc Hæretici verba refert , *sine Baptismo parvuli morientes , quòd non eant scio , quòd eant nescio*, id est interprete S. Doctore , *non ire in regnum cælorum , scio ; quòd verò eant , ideò se nescire dicebat aut dicit , quia dicere non audebat in mortem illos ire perpetuam.*

R. 2. Verisimilius est Pelagianos non intellexisse felicitatem supernaturalem (ut contendunt nonnulli) quæ consistit in clara Dei visione ; sed quandam duntaxat naturalem. Probatur 1. quia Pelagiani agnoscebant parvulos non adoptari in filios Dei, nisi per Baptismum : ergo nec fructuosam visionem Dei intuitivam , quæ est paterna hæreditas , solis filiis promissa , *illo regenerationis lavacro adoptari ex filiis hominum in Dei filios non negatis , imò etiam prædicatis* , inquit S. Augustinus Lib. 1. contra duas Pelagianorum Epistolas , cap. 6. Deinde quia S. Augustinus Lib. de Hæresibus Hæresi 88. docet Pelagianos parvulis non baptizatis promississe vitam secundum quid æternam : ergo non eis promittebant visionem Dei intuitivam , quæ verè & simpliciter est vita æterna , *promittunt eis , inquit , extra regnum quidem Dei , sed tamen æternam , & quandam beatam vitam suam.*

Q. 7. Parvuli non baptizati fruuntur aliqua beatitudine naturali?

Affirmarunt Catharinus & Pighius , quibus se adjunxit Cardinalis Sfondratus , contententes il-

los parvulos post judicium generale habitaturos super faciem terræ, tanquam in Paradiso terrestri, plenos sapientia & virtutibus moralibus, identidemque fruituros consortio Angelorum; sed communiter rejicitur hæc sententia, utpote quæ accedat ad hæresim Pelagianorum. Quare

R. Fictitia est beatitudo illa naturalis.

Probatur ex S. Augustino Lib. 1. de Origine Animæ cap. 9. ubi sic habet: *Non baptizatis parvulis nemo promittat inter damnationem, regnumque cælorum quietis, vel felicitatis cujuslibet, atque ubilibet medium locum, hoc enim est hæresis Pelagiana.* Deinde communis est sententia Catholicorum, quam exposuit Concilium Florentinum supra laudatum, parvulos, ante Baptismum decedentes, mox in infernum deduci. Addit S. August. ex constanti traditione Ecclesiæ Lib. 6. contra Jul. cap. 8. eosdem manere sub potestate Diaboli, *hoc ergo, inquit, generi humano inflictum vulnus à Diabolo, quidquid per illud nascitur, cogit esse sub Diabolo.* Et Lib. 3. de Nupt. & Concup. c. 18. *Baptizandi parvuli non ob aliud exsufflantur, nisi ut ab eis princeps mundi mittatur foras, à quo necesse est vasa iræ possideantur, cum in Adam nascuntur, si in Christo non renascantur.*

Nec dicant patroni oppositæ sententiæ, post universale judicium parvulos super terram transferendos, quasi de statu miseræ, ad statum cujusdam felicitatis naturalis. Nam præterquam quod hæc doctrina nulla auctoritate fulcitur, pugnat contra communem Catholicorum sensum; nempe eandem fore sententiam in judicio universali, quæ præcesserit in exitu, seu in judicio particulari; *post diem judicii, inquit S. Anselmus de Conceptu Virginali capite 22. nullus erit*

erit Angelus, aut homo, nisi aut in regno Dei, aut in inferno.

Adde quòd post universale judicium omnia elementa suum situm naturalem repetitura sint, sicque aqua, quæ initio mundi terram ambiebat, revertetur ad pristinum locum, à quo recesserat, jubente Deo, ut terra esset commoda habitatio hominum & animalium.

Dices: S. Augustinus Lib. 3. de liber. arbitr. c. 23. sic scribit: *Quis novit, quid ipsis parvulis in secreto judiciorum suorum bonæ compensationis reservet Deus?* Ergo S. Augustinus agnovit possibilem esse medium locum inter regnum cælorum & damnationem.

Distinguo consequens, in hypothesi Manichæorum, contra quos eo loci disputat, Concedo: in hypothesi Catholicorum, Nego consequentiam. Igitur Manichæi, ut jam monuimus, statuebant duo rerum principia, alterum bonum, alterum malum: ex pœnis autem, quas patiuntur parvuli, & ex præmatura eorum morte inferbant existentiam mali principii. S. verò Augustinus hac ratione eorum argumentationem diluit, nempe Deum optimum maximum propter ejusmodi pœnas temporales & transitorias remunerare posse parvulos in altera vita, ac proinde providentiam ejus in hac parte esse laudandam, nedum vituperandam. Sed nullatenus attingit quæstionem de peccato originali, quia nondum nata erat illa controversia. Ita seipsum explicat Epist. 166. olim 28. ad sanctum Hieronymum. *Nam & de Baptismo parvulorum, inquit, in eodem libro non quidem sufficienter, sed quantum illi operi satis esse videbatur, utcumque respondi . . . non tamen de*

*damnatione eorum parvulorum, qui sine illo (Baptismo) ex hac vita migrant, tunc aliquid dicendum putavi: quia non quod nunc agitur, agebatur. Cùmque Semipelagiani eundem ipsum Librum contra sanctum Augustinum postea urgerent, sanctus Doctor Lib. de Dono Persever. capite 12 sic respondet: Frustra itaque mihi de illius Libri mei vetustate præscribitur . . . . . si enim quando Libros de libero arbitrio Laicus cœpi, Presbyter explicavi, adhuc de damnatione infantium non renascentium liberatione dubitarem, nemo (ut opinor) esset tam injustus, atque invidus, qui me proficere prohiberet, atque in hac dubitatione remanendum mihi esse judicaret.*

Q. 8. *Parvuli afficiuntur aliquâ tristitia, & animi dolore ex privatione visionis beatificæ?*

Sanctus Thomas in 2. dist. 83. quæst. 2. art. 2. sic denegat beatitudinem parvulis, qui sine Baptismo decesserunt, ut velit eos esse immunes ab omni tristitia. *Nihil omnino dolebant, inquit, de carentia visionis beatificæ. Sed plures ex ejus discipulis à Magistro suo in hac parte recedunt utpote qui adhuc junior hæc scripserit, revocaturusque fuisset suam sententiam in Summa, sicut plures alias de facto revocavit, nisi præmatura mors eum prævenisset; adhærentque S. Augustino, cum quo*

R. *Parvuli tristantur ob amissam beatitudinem. Ita sanctus Augustinus Lib. 6. contra Jul. cap. 4. ubi sic scribit: Si hoc eis, (parvulis) non erit malum, non ergo amabunt regnum Dei . . . . . si autem amabunt, & tantum amabunt, quantum innocentibus amare debent, regnum ejus, à quo ad ejus imaginem creantur, nihilne mali de hac separatione patientur? Et Serm. 294. cap. 6. Nam & qui exulant, vivunt: si sani*



*sani sunt, in doloribus corporis non sunt, non torquentur, non carceris tenebris affliguntur: hæc illis sola pæna est, non esse in patria. Si amatur patria, magna pæna. Si autem non amatur patria, pejor est cordis pæna. Parvum malum est in hominis corde, qui societatem non quærit Sanctorum? qui non desiderat regnum cælorum? si non desiderat, pæna est de perversitate: si autem desiderat, pæna est de fraudata charitate.*

Absurdum verò est, quod nonnulli ex hujus sententiæ Patronis gratis docent, Deum denegare suum concursus, ne parvuli ex hac damnatione trisentur; si enim permittit parvulos ob solum peccatum originale cruciatus corporis in hac vita sustinere, à fortiori credendum est eos in altera vita dolere ob amissam beatitudinem.

Multò minùs verisimile est parvulos sine Baptismo defunctos ignorare se propter peccatum excludi ab æterna felicitate; nam ratio naturalis dicat, eum qui punitur, conscium esse debere peccati, propter quod pœnam meretur, alioquin videretur ipsi injusta.

Hinc parvuli statim à morte subeunt Dei judicium, interim reservati ad universale, in quo supremus Judex sententiam publicè proferet in omnes peccatores, pusillos & magnos, quemadmodum docet sanctus Augustinus laudata Epist. 166. capite 8. & Serm. 294. aliàs 14. de verbis Apostoli.

Q. I. *Quare privatio visionis Dei intuitivæ simpliciter vocatur à Theologis pæna damni?*

R. Quia est privatio summi boni; sicut enim Deus dicitur simpliciter ipsum bonum, non verò hoc, aut illud bonum, sed quidquid concipi potest nomine boni: sic privatio Dei non est quod-

dam

dam peculiare damnum, quemadmodum pœna sensus, sed est ipsum damnum, virtualiter complectens quidquid significatur nomine damni. Tale quippe est damnum cum proportionem, quale est bonum, quo privamur. Majus est v. g. damnum, graviorque pœna privari oculis, quam digito; quia oculi sunt quid digito præstantius: atqui Deus est omne bonum, seu bonum ipsum: ergo privatio Dei est virtualiter omne malum, & damnum ipsum.

Q. 2. *Parvuli in altera vita afficiuntur ne pœna sensus?*

R. Duplex est Catholicorum sententia; altera affirmans, altera negans.

Affirmant 1. S. Aug. pluribus in locis: præsertim verò laudato Serm. 294. c. 3. & 4. ubi sic habet: *Nullus relictus est medius locus, ubi ponere queas infantes: alii erunt ad dexteram, alii ad sinistram, non novi aliud: ecce exposui tibi quid sit regnum, & quid sit ignis æternus, ut quando confiteris parvulum non futurum in regno, fatearis futurum in igne æterno.* 2. Episcopi in Sardinia relegati, eandem sententiam amplexi sunt, ut constat ex Lib. de Incarnatione & Gratia apud S. Fulgentium cap. 14. & 30. Quin & ipse S. Fulgentius illud ipsum proponit veluti fidei dogma Lib. de Fide ad Petrum c. 27. *Firmissimè tenè, inquit, & nullatenus dubites, non solum homines jam ratione utentes, verum etiam parvulos, qui sive in uteris matrum vivere incipiunt, & ibi moriuntur, sive jam de matribus nati sine Sacramento S. Baptismatis . . . de hoc sæculo transeunt ignis æterni sempiterno supplicio puniendos.* 3. S. Gregor. Lib. 9. Moral. c. 12. *Perpetua, inquit, tormenta percipiunt, qui nihil ex propria voluntate peccaverunt.*

Sanctus

Sanctus tamen Augustinus Lib. 5. contra Julianum cap. 11. lenit suam sententiam, fateturque se esse ancipitem circa pœnas ejusmodi parvulorum; sic enim scribit: *Ego autem non dico parvulos sine Christi baptismo morientes, tanta pœna esse plectendos, ut eis non nasci potius expediret, cum hoc Dominus non de quibuslibet peccatoribus, sed de scelestissimis & impiissimis dixerit; si enim, quod de Sodomitis ait: & utique non de solis intelligi voluit, alius alio tolerabilis in die judicii punietur; quis dubitaverit parvulos non baptizatos . . . in damnatione omnium levissima futuros? quæ, qualis, & quanta erit, quamvis definire non possim, non tamen audeo dicere, quod eis ut nulli essent quàm ut ibi essent, potius expediret. Atqui, inquam ego, id dicendum videretur, si ignis per totam æternitatem in eos sæviret, quemadmodum hic sævit in corpora eorum, qui flaminis pereunt.*

Negant verò parvulos non baptizatos igne torqueri, 1. S. Gregorius Nazianzenus Orat. 4. in S. Baptisma, in qua sic loquitur: *Existimo futurum, ut . . . nec cœlesti gloria, nec suppliciis à justo Judice afficiantur, utpote qui licet Baptismo consignati non fuerint, improbitate tamen careant, atque banc jacturam passi potius fuerint, quàm fecerint.* 2. Sanctus Gregorius Nyssenus Orat. 1. de infantibus: *immatura mors infantium, inquit, neque in doloribus ac mœstitia esse eum, qui sic vivere desiit, intelligendum esse nobis suggerit.* 3. Sanctus Thomas qu. 5. de malo art. 2. in peccato originali, inquit, *non est conversio (ad creaturam) sed sola aversio (à Deo) vel aliquid aversioni respondens, scilicet destitutio animæ à justitia originali; & ideo peccato originali non debetur pœna sensus, sed solum pœna damni, scilicet carentia visionis divinæ.* Eandem sententiam ample-

xi sunt S. Bonaventura, Scotus in 2. & in Scholis evasit valdè communis.

Cæterum monendi sunt Clerici, hîc præsertim cavendum, ne Scholæ opiniones in Catechesibus proponant tanquam fidei dogmata: experientia quippe constat fideles ægrè admodum audire parvulos sine Baptismo decedentes, mitti in ignem æternum cruciandos, & propter hujusmodi sermones scandala interdum oriri in Ecclesia.

Poterunt tamen, data occasione, prudenter uti priori opinione contra matres, quæ ex negligentia, vel alio quovis modo fœtus in utero suffocant aut præmaturè effundunt: posteriore verò, utpote benigniore lenient dolorem earum, quæ acerbius lugent filios suos sine gratia Christi decessisse.

## CAPUT VIII.

### De Causa efficiente Peccati.

Q. 1. *Quænam est causa efficiens peccati?*

R. Propriè & directè sola voluntas est causa efficiens peccati.

Probatur 1. ex Scriptura Matth. 15. & Marci 7. *de corde enim exeunt malæ cogitationes . . . furta &c. Hæc sunt, quæ coinquinant hominem: ubi Christus asserit hominem non coinquinari, nisi actus exeat ex corde, hoc est, ex voluntate.*

Probatur 2. ex S. Augustino Lib. 2. de Civit. eap. 6. ubi sic scribit: *Mala voluntas efficiens est operis mali: malæ autem voluntatis efficiens est nihil.*

Et



Et cap. 7. *Nemo quærat causam malæ voluntatis ; non enim est efficiens (nempe voluntas mala) sed deficiens, quia nec illa effectio est , sed defectio. Deficere namque ab eo, quod summè est, ad id quod minus est, hoc est habere voluntatem malam.*

Probatur 3. ratione. Illud solum potest esse causa directa & efficiens peccati, quod potest physicè movere voluntatem ad peccatum: atqui nulla res potest physicè & directè movere voluntatem ad peccatum. Vel enim voluntas moveretur à Deo, vel ab objecto, vel à iudicio rationis, vel à Diabolo, vel ab hominibus, vel denique à concupiscentia, seu appetitu sensitivo: atqui à nullo ex his moveri sic potest voluntas: ergo.

Non à Deo; quia, ex dictis, ubi de reprobatione, Deus non potest esse auctor peccati.

Non ab objecto, nec à iudicio rationis, 1. quia voluntas, ex dictis, est facultas libera, quæ positis omnibus ad agendum requisitis, potest se determinare ad agendum, vel ad non agendum; atqui unum ex requisitis ad actum voluntatis, est objecti perceptio; voluntas enim non potest ferri in incognitum: ergo nec ratio proponens objectum, nec objectum propositum physicè voluntatem determinant. 2. Quia ex S. Thoma, illud est discrimen inter appetitum sensitivum, & voluntatem rationalem, quòd appetitus sensitivus, cum sola regatur imaginatione (quæ, utpote facultas corporea, bonum aut malum singulare duntaxat apprehendit) necessariò determinetur ab objecto sic proposito: ovis v. g. necessariò fugit lupum, & appetit ramum viridem, quia nihil aliud videt timendum aut appetendum. At voluntas rationalis non fertur in objectum, nisi prælucente

lucente intellectu : intellectus autem, cùm sit facultas spiritualis, cognoscit communem & universalem boni rationem, objectumque voluntati repræsentat secundùm diversas rationes bonitatis, v. g. vel ut honestum simul & arduum, ac minus utile ad rem familiarem, sive conservandam, sive augendam, vel ut turpe & simul delectabile, vel utile. Unde semper liberum est voluntati eligere, quod sibi magis placuerit, juxta illud Eccli. 15. *Deus ab initio constituit hominem, & reliquit illum in manu consilii sui . . . ante hominem vita & mors, bonum & malum : quod placuerit ei dabitur illi.*

Non etiam à dæmone, nec ab hominibus voluntas physicè moveri potest. Quia dæmon & homines voluntatem eatenus trahunt ad malum, quatenus suadendo illud proponunt : atqui ex mox dictis, voluntas hominis viatoris quocunque proposito bono, aut malo, libera est, & sui determinativa : ergo nec à Diabolo, nec ab homine physicè movetur.

Advertes tamen efficacius dæmonem suadere malum, quàm homines. Hi quippe, cùm non agant directè, nisi in sensus exteriores, sæpe voluntatem movere nequeunt, appetitu sensitivo in aliud objectum propendente, & sensum interiorem præoccupante, quo fit, ut mens non attendat ad ea, quæ dicunt, vel faciunt, sive minentur, sive blandiantur, dæmon verò sensus interiores, & appetitum sensitivum directè afficit, Deo ita permittente, phantasiæ species, quæ sunt cogitationum semina, commovet, sicque objecta velut præsentissima in imaginatione recurrunt ; spiritus quoque animales, & alios humores exagitando, appetitum sensitivum ad libidinem, iram,

iram, & alios inordinatos motus accendit. Sed voluntati necessitatem non infert; quia inordinati concupiscentiæ motus, ex mox dicendis, voluntatem physicè non determinant. Unde S. Thomas in 2. dist. 21. q. 1. art. 2. ad 1. sic scribit: *Quamvis potestas dæmonis sit simpliciter major, quàm potestas hominis, tamen quantum ad aliquid non est major, scilicet quantum ad actus liberi arbitrii, qui cogi non possunt: quia horum actuum ipse homo dominus est, & non dæmon. Et ideo potest tentationi ejus resistere.* Et sanctus Augustinus, sive quivis auctor Hom. 12. inter 50. nunc verò Serm. 253. in appendice: *non Diabolus cogendo, inquit, sed suadendo nocet; nec extorquet à nobis consensum, sed petit. Si nos Diabolum non adjuvemus, vincimus. Dat quidem ille consilium, sed Deo auxiliante, nostrum est eligere vel repudiare quod suggerit.*

Non denique à concupiscentia. Quamvis enim judicium rationis, & usum libertatis valde impediat, absolutè tamen non tollit: quia concupiscentiæ nomine vel intelligitur ipse fomes peccati, seu inordinatio radicalis ex peccato originali, etiam in renatis permanens, quæ dicitur à S. Thoma Lect. 2. in cap. 7. ad Rom. generale malum, communiter se habens ad omnia peccata, sive spiritualia, sive carnalia: vel pressius sumitur pro motibus inordinatis appetitus sensitivi, quo sensu vocatur ab eodem Angelico Doctore sensualitas: atqui concupiscentia neutro modo physicè movet voluntatem. Non priori; quia, ut sic, est veluti merus habitus sine actu & causalitate, ut in parvulis & dormientibus. Non posteriori, & quatenus in actu; vel enim motus ejus ita præveniunt rationem, ut voluntas illos

præcavere non potuerit, & tunc non sunt peccata, nisi materialiter: vel subsequuntur rationis advertentiam & iudicium, & tunc voluntas potest eis resistere, juxta illud Gen. 4. vers. 7. *Sub te erit appetitus ejus, & dominaberis illius.* Et Jac. 1. *Unusquisque verò tentatur à concupiscentia sua abstractus & illectus: deinde concupiscentia, cum conceperit, parit peccatum; peccatum verò cum consummatum fuerit, generat mortem.* Quibus verbis Apostolus docet, motus concupiscentiæ esse tentationes duntaxat, donec ipsa conceperit: concipit autem accedente voluntatis consensu, ut interpretatur sanctus Augustinus Lib. 6. contra Julianum cap. 5. ubi sic habet: *Profectò in his verbis partus à pariente discernitur. Pariens enim est concupiscentia, partus peccatum. Sed concupiscentia non parit, nisi conceperit, nisi illexerit, hoc est ad malum perpetrandum obtinuerit voluntatis assensum. Quòd ergo adversus eam dimicatur, hoc agitur; ne concipiat pariatque peccatum.* Et Lib. 1. de Civit. c. 25. *Si illa, inquit, concupiscentialis inobedientia, quæ adhuc in membris moribundis habitat, præter nostræ voluntatis Legem, quasi Lege sua movetur, quantò magis absque culpa est in corpore non consentientis, si absque culpa est in corpore dormientis?* Unde meritò Concilium Tridentinum Sess. 5. Can 5. anathemate percussit Lutheranos & Calvinistas, asserentes concupiscentiam esse peccatum propriè dictum, inordinatosque illius motus, quamvis plenè involuntarios hominem constituere reum damnationis æternæ.

Ergo sola voluntas est subjectum peccati formaliter sumpti; namque peccatum, utpote actus vitalis, recipitur in ea facultate, à qua produci-  
tur; ideo enim actus vitales dicuntur immanentes; quia manent in potentia vitali, ut cognitio  
in



in intellectu, & volitio in voluntate: atqui ex dictis sola voluntas est causa efficiens peccati: ergo sola voluntas est ejus objectum.

Dixi: *formaliter sumpti*, quia si peccatum materialiter sumatur, sedem habet in aliis potentiis, & maximè in intellectu, & appetitu sensitivo. Unde Theologi vulgò agnoscunt peccata in ratione & sensualitate.

Dices 1. Deus ut primus motor, concurrat ad omnes actiones, etiam malas. Ergo Deus est causa peccati.

Distinguo anteced. concurrat ad omnes actiones malas materialiter sumptas, hoc est, quatenus sunt entia, Concedo: formaliter sumptas, & quatenus sunt quædam deordinationes, Nego anteced. *Omnia facit Deus*, inquit S. Anselmus Lib. de Concord. Gratiæ, & Lib. arb. cap. 1. *in bonis quidem facit quod sunt, & quod bona sunt; in malis verò facit quod sunt, sed non quod mala sunt.*

Instabis: sunt aliqui actus essentialiter mali, ut mendacium, odium Dei, blasphemia, &c. Ergo.

Distinguo anteced. sunt essentialiter mali, si moraliter spectentur, Concedo: si metaphysicè, Nego antecedens. Sunt enim entia quædam; omne autem ens est verum & bonum, ut docetur in metaphysicis. Porro Deus est causa illorum actuum, quatenus entia sunt, non quatenus diffformes: nam ex S. Thoma qu. 3. de malo, art. 2. ad 1. *diffformitas consequitur ex hoc, quod liberum arbitrium recedit ab ordine voluntatis divinæ.* Et in 2. dist. 37. qu. 2. art. 5. *Et si*, inquit, *in aliquo effectu plura inseparabiliter conjuncta sint, non oportet ut quidquid est causa ejus quantum ad unum, sit causa ejus*

*quantum ad alterum : sicut natura est causa oculi , quantum ad substantiam ejus , & non quantum ad defectum cæcitatis , qui ex naturæ defectu incidit.*

Dices 2. actus à Lege prohibitus est peccatum propriè dictum; quid est enim peccatum, nisi dictum vel factum, vel concupitum contra Legem? atqui omnes concupiscentiæ motus prohibentur hac Lege? *non concupisces* : ergo sunt peccata propriè dicta.

Minor probatur 1. ex Apostolo Rom. 7. *Concupiscentiam nesciebam, nisi Lex diceret : Non concupisces.* Procul dubio autem sciebat Apostolus concupiscentiam voluntariam esse peccatum. Ergo in mente ejus Lex prohibet concupiscentiam involuntariam. 2. 1. Joan. 2. Concupiscentia non est à Deo : atqui omnia sunt à Deo præter peccatum : ergo revera concupiscentia est peccatum. 3. Ex S. Augustino Lib. de Spiritu & Littera cap. ult. Pertinet ad præsentem hanc vitam illud præceptum Eccli. 18. *Post concupiscentias tuas non eas* : ad immortalitatem verò vitæ illud Deuter. 5. & Rom. 7. *Non concupisces*, quo excluduntur omnes motus concupiscentiæ etiam involuntarii.

Nego minorem; non enim dantur præcepta de iis, quæ non sunt in nostra potestate, quales sunt illi modus prorsus involuntarii, confirmaturque hæc responsio ex Buliis Pii V. & Gregorii XIII. in quibus damnata est hæc Baji propositio : *Prava desideria, quibus ratio non consentit, & quæ homo invitatus patitur, sunt prohibita præcepto, Non concupisces.* Cum igitur S. Augustinus peccatum definiit concupitum contra Legem, intelligendus est de concupito voluntario, etiamsi foras non erumpat,

pat, quod nec Apostolus, nec quivis alius agnosceret esse peccatum, nisi opponeretur Legi dicenti, *non concupisces*. Et sic patet responsio ad primam confirmationem.

Ad secundam confirmationem respondeo, distinguendo minorem; omnia sunt à Deo præter peccatum, vel præter id quod ad peccatum inclinat, Concedo: præter id quod est peccatum formaliter, Nego min. Nam habitus erroris & vitii non sunt à Deo, nisi materialiter, & ratione concursus generalis; quia cum Deus neminem tentet ad malum; non potest infundere habitum, qui per se inclinet ad peccatum. Concupiscentia itaque materialiter sumpta est à Deo; inordinatio verò ejus est ex peccato originali, sicut habitus vitii est ex præcedente peccato actuali.

Ad tertiam confirmationem respondeo, in præcepto duo esse attendenda: scilicet finem & media. Finis autem propriè non præcipitur, sed intenditur: obligatio verò & vis præcepti cadunt in media. Imperator, v. gr. præcipit militibus, ut hostem debellant; Pater Filio, ut doctus fiat. Illi satisfaciunt præcepto, si legitimè & strenuè pugnent; iste si diligenter studeat; etiamsi nec illi victoriam, nec iste scientiam assequatur. Sic nobis viatoribus dicitur: *Diliges Dominum Deum tuum ex toto corde tuo, & ex tota mente tua, & non concupisces*, quamvis hæc planè non sint implenda nisi in patria. Sed ista nobis proponuntur ut finis; præcipitur verò, ut ad illam perfectionem totis viribus enitamur, caveamusque, ne ex quantulacunque negligentia cogitatio aliena, aut inordinati concupiscentiæ motus nostram attentionem detorqueant. Cum autem in hac parte ne-

mo sat invigilet, & oscitante ratione multa huic præcepto, *non concupisces*, contraria subrepant, nobis quotidiana opus est pœnitentia.

Dices 3. S. Thomas hic art. 3. ad 3. respondet, motus sensualitatis rationem prævenientes esse peccata venialia: Ergo.

Distinguo anteced. Rationem prævenientes, id est, plenum & perfectum rationis iudicium, Concedo: Prævenientes omnem omnino rationis advertentiam, Nego anteced. Ait enim ibidem motus illos non esse perfectè, sed imperfectè duntaxat actus humanos: nullus autem est actus humanus etiam imperfectus sine aliqua rationis advertentia.

Instabis: Idem Angelicus Doctor 3. p. qu. 41. art. 1. ad 3. sic scribit: *Tentatio, quæ est ab hoste, potest esse sine peccato; quia fit per solam suggestionem. Tentatio autem, quæ est à carne, non potest esse sine peccato; quia huiusmodi tentatio fit per delectationem, & concupiscentiam: & sicut Augustinus dicit, nonnullum peccatum est, quando caro concupiscit adversus spiritum. Et ideo Christus tentari voluit ab hoste, sed non à carne. Eadem docet sanctus Bonaventura in 2. dist. 21. Ergo.*

Distinguo anteced. Non potest esse sine peccato; hoc est, sine aliqua inordinatione, & peccato materiali, Concedo: Sine peccato formali, Subdistinguo: Non potest esse sine peccato, generatim loquendo; quia moraliter impossibile est, ut ratio semper satis vigilet, Concedo: Non potest esse sine peccato formali, ubi ratio viriliter repugnat, Nego anteced. S. itaque Thomas distinguit inter tentationes, quæ sunt à mundo, & à dæmone, & eas, quæ suscitantur à carne, docetque



cetque priores nullam inordinationem in anima ponere, ac proinde Christum illas pati potuisse. Sed tentatio carnis est quædam rebellio partis inferioris contra superiorem, quod vitium in Christum cadere non poterat.

Quòd autem non sit formaliter peccatum, ubi ratio repugnat, constans est doctrina S. Thomæ; ait enim 1. 2. qu. 80. art. 3. ad 3. *Concupiscentia carnis contra spiritum, quando ratio ei actualiter resistit, non est peccatum, sed materia exercendæ virtutis.* Et 2. 2. quæst. 154. art. 5. *Primus motus sensualitatis non habet quod sit peccatum nisi in quantum iudicio rationis reprimi potest.* Generatim tamen loquendo, motus illi inordinati non sunt sine aliquo peccato, quia moraliter impossibile est ut ratio, vel satis invigilet, ne insurgant, vel totas vires suas exerat ad illos comprimendos. Et ita intelligendus est sanctus Bonaventura.

## C A P U T IX.

Satisfit nonnullis difficultatibus circa cogitationes morosas.

Q. 1. *Quid est cogitatio morosa?*

R. Sic describitur à sancto Augustino Lib. 12. de Trinit. cap. 12. *Cum sola cogitatione mens oblectatur illicitis (puta venereis, ultione inimici,) non quidem decernens esse facienda, tenens tamen & volvens quæ statim ut attigerunt animum, respui debuerunt.* Ergo in cogitatione morosa duo intelliguntur, nempe cognitio, & delectatio rei illicitæ.

Q. 2. *Unde cogitatio dicta est morosa?*

T 4

Respon-

Respondet S. Thomas hîc qu. 74. art. 3. ad 3. sic dici à mora, non temporis, cùm peccatum etiam mortale uno momento consummari possit; sed rationis quæ circa eam immoratur. Dicitur enim ratio in mora, quomodo debitor, qui non solvit debitum statim, cùm non potest & debet.

Q. 3. *Omnis cogitatio de re illicita estne culpabilis?*

R. Non est, nisi sit otiosa, aut ex curiositate procedat, qui cognitio pertinet ad perfectionem intellectus, *omnis scientia bona est*, inquit Aristoteles, Lib. de Anima. Deus cognoscit omnia obscæna & turpissima absque præjudicio infinitæ suæ puritatis & sanctitatis. Et ratio est, quia, ex dictis, hoc est discrimen intellectum inter & voluntatem, quodd intellectus assimilet sibi objecta, & eatenus expurgat, si immunda sint; voluntas verò eis assimiletur, & agglutinetur; unde si objectum sit turpe, ipsam quoque fœdari necesse sit.

Q. 4. *Omnis delectatio cogitandi de re illicita estne mala & culpabilis?*

R. Distinguendum est: Si delectatio terminetur ad cognitionem, non ad rem ipsam, quomodo gaudet Discipulus aut Confessarius, qui ex lectione notitiam acquirit eorum, quæ sexto Decalogi præcepto prohibentur, licita est & honesta, nisi quis in his inutiliter, & ex curiositate mentem occupet, vel sine necessitate exponat se periculo patiendi motus inordinatos. Item, si delectatio non sit de ipso opere malo, sed de modo subtili, quo v. gr. furtum patratum est, non est peccatum mortale; sed ad summum est vana & inutilis, ac proinde nonnisi venialiter mala. Sed si delectatio ad rem ipsam cogitatione perceptam  
termi-

terminetur, peccatum mortale est in hypothefi, quòd res illa fit lethaliter mala.

Probatur 1. Tum auctoritate Cleri Gallicani, qui anno 1700. doctrinam cujusdam recentioris nostræ responsioni contrariam, declaravit falsam, temerariam, scandalosam, & in praxi perniciosam; tum S. Augustini laudato cap. 12. Lib. 12. de Trinit. ubi sic scribit: *Totus homo damnabitur, nisi hac, quæ sine voluntate operandi, sed tamen cum voluntate animum talibus oblectandi, solius cogitationis sentiuntur esse peccata, per mediatoris gratiam remittantur*; tum ratione sancti Thomæ 1. 2. quæst. 64. art. 8. quia nemo delectatur re illicita, nisi illam amet: atqui amare rem lethaliter malam, est peccatum lethale: ergo & ea liberè delectari. Quomodo autem dignosci possit, quando delectatio illa sit libera, exposuimus in praxi Sacramenti Pœnitentiæ gallicè edita.

Q. 5. *Cogitatio morosa sortiturne diversam peccati speciem secundum objecti diversitatem?*

R. Negarunt nonnulli recentiores, sed sine fundamento. Ideo enim cogitatio illa est mala, quia est de objecto illicito, v. gr. de fornicatione. Ergo si objectum sit pejus, puta adulterium, aut incestus, cogitatio quoque censenda est pejor, ac proinde in Sacramentali Confessione explicanda.

Dices: Sanctus Thomas hîc quæst. 74. art. 4. docet peccatum in sensualitate non posse esse mortale: Ergo.

Distinguo anteced. Non posse esse mortale sine sufficiente advertentia rationis, Concedo: Cum sufficiente advertentia rationis, Nego antec.

Namque S. Doctor disertè probat artic. 8. delectationem sensualitatis esse lethalem, quando pro objecto habet actum moraliter malum. Vult itaque duntaxat, art. 4. peccatum illud potius esse tribuendum rationi, quàm sensualitati, ut videre est in familiari exemplo populi tumultuantis præfente Magistratu. Si enim resistat Magistratus, sed non ea, qua par est fortitudine, seditio imputatur populo: sed si Magistratus eam approbet, suoque iudicio & auctoritate confirmet, jam ipse censetur auctor seditionis. Sic in proposito casu aliquando rebellat appetitus, ratione negligenter resistente, & tunc motus ille inordinatus tribuitur appetitui sensitivo, qui cum sit politicè tantum subditus, nonnunquam rebellat contra superiorem, proptereaque reus dicitur peccati, sed venialis duntaxat; quia non subvertit ordinem ad ultimum finem, cum, ut supponimus, ratio superior motum illum inordinatum non approbet. Sed si accedat plenus rationis consensus, delectatio turpis, etiamsi sit ab appetitu sensitivo, est peccatum mortale, ita tamen, ut in mente sancti Thomæ ascribenda sit rationi; quia ipsius est rectè iudicare de ultimo fine, quem turpiter censet in bono commutabili esse reponendum.

*Q. 6. Quid est ratio superior, quidve inferior?*

*R.* Ratio, licet sit una potentia, quæ alio nomine vocatur mens, seu intellectus, dividitur tamen in inferiorem, & superiorem, quemadmodum appetitus sensitivus in concupiscibilem, & irascibilem. Inferior autem ratio est illa, quæ considerat motiva humana, quæ inferiora sunt respectu divinorum, v. gr. quando quis expendit in aliquo objecto utilitatem temporalem, aut incom-



commoda, gloriam aut infamiam, delectationem aut molestiam, deliberatio illa pertinet ad rationem inferiorem. Si autem attendat quæ sunt superioris ordinis, putà, quòd objectum sit conforme, vel contrarium Legi divinæ, speculatio est rationis superioris; ratio enim superior dicitur quæ considerat motiva divina.

Q. 7. *Potestne esse peccatum mortale in ratione inferiori?*

R. 1. Constat rationem, siue superiorem, siue inferiorem, non esse capacem peccati independenter à voluntate; quia omne peccatum est voluntarium, proptereaue diximus ignorantiam, aut errorem invincibilem excusare à peccato.

R. 2. Si nulla sit prorsus advertentia aut negligentia in ratione superiori, cùm inferior expendit commodà temporalia, quæ v. gr. ex morte alterius obventura sunt, putà amplam hæreditatem, & immunitatem à quibusdam molestiis, unde appetitus sensitivus delectatur, nullum est peccatum. In hypothese autem quòd ratio superior in allato exemplo negligenter se gerat, & saltem imperfectè percipiat huiusmodi motiva temporalia, & delectationem inde consequentem repugnare Legi æternæ, peccatum est veniale. Sed si ratio superior, vel approbet iudicium inferioris, vel sufficienter advertat, aut advertere possit esse contrarium charitati & Legi divinæ; delectatio illa, cùm capiatur ex re lethaliter mala, peccatum est lethale, ut patet ex dictis de cogitatione morosa.

Dixi, *aut advertere possit*; neque enim necesse est, inquit S. Thomas, ut actu advertat & cogitet de Lege æterna, aliàs qui peccant ex habitu,  
vel

vel ex ignorantia vincibili essent excusandi; habitus enim vitiosus in perditissimis hominibus, & ignorantia vincibilis sæpè tollunt attentionem ad Legem divinam.

Ergo excusandi non sunt, qui in familiaribus colloquiis laudant vitæ superfluitates, ultionem de inimicis, & de iis cogitando animum oblectant, eo prætextu, quòd à Lege ista prohibente abstrahant: *Hæc*, inquiunt, *dicta sunt secundum hominem*. Imò contra naturam hominis est, ac proinde peccatum, amare quæ per se mala sunt.

Q. 8. *Peccatne, qui negativè se habet ad inordinatos concupiscentiæ motus, hoc est, nec consentit, nec dissentit, quamvis illos advertat?*

R. 1. Est peccatum mortale, quando imminet probabile periculum consensus in delectationem rei mortaliter malæ. Hoc uno ore fatentur omnes Theologi, inquit Azor. part. 1. Lib. 4. c. 6. quæst. 5. nisi enim quis tunc expressè resistat, consentire videtur.

R. 2. Nullum est peccatum non amovere justam & æquam causam, qualis esse potest auditio confessionum, equitatio, ex qua delectatio venerea sequitur in appetitu sensitivo, modo absit periculum consensus; si enim adesset, ab iis omninò esset abstinendum.

Neque etiam peccaret, qui propter magnam in honesto opere animi contentionem & attentionem non resisteret, citra tamen periculum consensus; quia motus illi nec directè, nec indirectè sunt voluntarii, sed omninò præter voluntatem suo operi unicè intentam.

Dixi, *causam justam & æquam*. Peccatum enim saltem veniale, per curiosam lectionem, vel inu-  
tilem

utilem confabulationem, daret occasionem non necessariam hujusmodi motibus, quamvis voluntas positivè resistat.

Quæstio autem esse potest utrùm peccatum illud sit mortale.

Negant Sylvius, Bonacina, & alii, dummodo non intendatur delectatio, sed ei repugnetur, nec subsit grave periculum consentiendi, quale est in aspectu objecti valde obscœni, quem Theologi communiter judicant esse mortale, etiamsi ex sola curiositate proficiscatur; quia hujusmodi aspectus sic provocat ad libidinem, & delectationem veneream, ut voluntatem in evidens consentiendi periculum conjiciat.

R. 3. Quando delectatio venerea, aut alia rei mortaliter malæ sufficienter advertitur, probabilius est esse peccatum mortale ad eam se negativè habere, etiam citra periculum consensus positivi. Ita sanctus Thomas hîc art. 7. ad secundum: *Ex hoc ipso*, inquit, *quòd ratio superior non dirigit actus humanos secundum Legem divinam, impediens actum peccati, dicitur ipsa consentire, sive cogitet de Lege æterna, sive non. Cum enim cogitat de Lege Dei actu, eam contemnit: cum verò non cogitat, eam negligit per modum cujusdam omissionis. Et clariùs artic. 6. Deficit (ratio) in directione passionum inferiorum dupliciter. Uno modo quando imperat illicitas passiones: alio modo quando non reprimit illicitum passionis motum. Ex quibus conficitur hoc argumentum. Tum peccatum est, & quidem grave, cum ratio voluntariè deficit in re gravi: at qui non reprimit delectationes venereas, quas sufficienter advertit esse contrarias Legi divinæ, sed ad eas negativè se habet, deficit in re gravi, deestque suo officio; officium enim*

enim est superioris coercere seditiosos subditorum motus, quando id præstare potest, censeturque iis consentire, si præmonitus dissimulet sine rationabili causa: Ergo.

Q. 9. *Peccantne qui delectantur cogitatione actionis olim ipsis licitæ, nunc verò illicitæ: viduus, v. gr. aut vidua delectabiliter cogitat de opere conjugali præterito; sponsus aut sponsa de eodem opere futuro?*

R. Viduus & sponsus peccant mortaliter, quando opus conjugale apprehendunt tanquam præsens, & ea cogitatione actuali oblectantur: quia delectatio illa est de objecto lethaliter malo: opus enim conjugii in eo statu, in quo sunt, ipsis prohibetur sub peccato mortali. Possent quidem excusari, saltem à peccato mortali, si absque sensualitatis motu apprehenderent actum conjugalem ut præteritum vel futurum, approbantes quòd illum exercuerint, aut essent exercituri; quia non approbant illud opus, nisi quatenus fuit, vel erit ipsis licitum: sed cùm ejusmodi mentis apprehensio vix possit esse sine delectatione venerea, nec est accersenda, nec sponte oblata retinenda, sed statim abjicienda.

Ex hac responsione colligitur, quid sentiendum sit de eo, qui cuperet delectari re aliqua, nisi esset mala; si enim sic cogitando delectetur actu re mortaliter mala, reus est peccati mortalis; si verò non delectetur, immunis est à peccato saltem mortali; quia actu non vult delectari re illicita, cùm autem vanæ sint & inutiles hujusmodi cogitationes, non sine peccato veniali admittuntur.

*Quid si optaret ille rem non esse malam, puta fornicationem, aut occisionem inimici?*

Distin-



Distinguendum est. Vel enim res illa est ex se indifferens, ut esus carnum in Quadragesima, qui non est malus nisi propter Legem prohibentem, vel est per se mala, ut fornicatio. Quæ sunt mala, quia prohibita, ex justa & rationabili causa sine peccato expeti possunt, v. gr. esus carnum, sanitati necessarius; quia voluntas non fertur in objectum illicitum, & Legem illud prohibentem reveretur, cum propter illam absteineat à carnibus alioquin sanitati necessariis. Sed mala posterioris generis non possunt desiderari, nisi ut mala; non enim mala sunt, quia prohibita, sed potius ideò prohibentur, quia mala sunt, & vitiosum est velle talia permitti. Peccant ergo mortaliter, qui vellent fornicationem, furtum, ultionem de inimicis non prohiberi.

Propter eandem rationem reus est peccati mortalis, qui sic affectus est, ut dicat, si non esset infernus, fornicarer; si militiæ non renuntiasset, aut ad statum Clericalem non transissem, te occiderem. Nam etiamsi non esset infernus, nec qui ista dicit, ordini Clericali esset adscriptus, nihilominus fornicatio, & injusta occisio essent lethaliter malæ, nec proinde sine gravi peccato expeti possent.

Q. 1. *Licetne delectari opere, quod cum ex se sit peccatum mortale, commissum est sine culpa propter ignorantiam invincibilem, amentiam, aut aliquid simile?*

R. 1. Delectari licet, quod illud opus fuerit sine culpa. Responsio est evidens, quia ejusmodi delectatio est de re bona.

R. 2.

R. 2. Licitum est etiam delectari effectu, qui feliciter inde secutus est, v. gr. sopitæ sunt lites, & pax conciliata ex homicidio casuali.

R. 3. Delectari ipso actu v. gr. homicidii inculpabilis est peccatum mortale. Probatur 1. ex censura Innocentii XI. qui hanc damnavit propositionem : *Licitum est Filio gaudere de parricidio parentis à se in ebrietate patrato, propter ingentes divitias inde ex hæreditate consecutas.* 2. Quia objectum hujus delectationis est lethaliter malum, etiamsi non imputetur ei qui ignoravit. Ergo & ipsa delectatio. 3. Quia non licet desiderare opus per se malum, propter bonum finem : Ergo neque de eo gaudere propter finem similiter bonum.



Tracta-



# Tractatus DE REGULA MO- RUM.

Q. I. **R**EQUIRITURNE aliqua regula ad mores rectè informandos ?

R. Certum est requiri ; quia facultas , quæ deficere potest ; ut manus Pictoris respectu picturæ , indiget aliqua regula , v. gr. arte pictoria , per quam certò & infallibiliter dirigantur in suis operationibus : atqui voluntas humana , ex qua procedunt mores humani , deflectere potest ad malum , sicut ad bonum : ergo si homo certa indiget regula , putà arte , ut sit bonus artifex , rectèque perficiat opera , quæ temporalem duntaxat vitam spectant ; à fortiori ut

*D. Habert Theolog. Tom. III.* U      eva-

evadat vir bonus, actionesque suas certò dirigat ad ultimum finem, & æternam beatitudinem.

Q. 2. *Quenam est regula actuum humanorum?*

R. Duplex statuitur, interior scilicet & exterior, interior est conscientia, exterior verò Lex.

Q. 3. *Quare conscientia non est unica actuum humanorum regula?*

R. Quia cùm possit errare, & à vero deficere, Lege debet dirigi.

Ergo temerè agunt, qui ex proprio cerebro sibi & aliis conscientiam formant, ac sine Legis notitia decernunt quid hìc & nunc sit agendum.

Ergo actus humanus non est moraliter bonus, nisi regatur conscientia simul & Lege; sed est simpliciter malus, si alterutrum desit, hoc est, si procedat vel contra conscientiam, licèt conformiter ad Legem, vel juxta dictamen conscientiae, sed contra Legis præscriptum. Ita S. Thomas quodlib. 8. quæst. 6. art. 3. ubi sic habet: *Duobus modis aliquis ad peccatum obligatur: uno modo faciendo contra Legem, ut cùm aliquis fornicatur: alio modo faciendo contra conscientiam, etsi non sit contra Legem, ut si conscientia dictat alicui quodd levare festucam de terra sit peccatum mortale. Illud autem quod agitur contra Legem, semper est malum, nec excusatur per hoc quod est secundum conscientiam. Et similiter quod est contra conscientiam, est malum, quamvis non sit contra Legem.*

Præiverat sanctus Bernardus Lib. de Præcept. & disp. cap. 14. his verbis: *Ut interior oculus verè simplex sit, duo illi arbitror esse necessaria, charitatem in intentione, & in electione veritatem . . . . . sive itaque malum putes bonum, quod fortè agis; sive bonum malum quod operaris, utrumque peccatum est.*

Q. 4.



Q. 4. *Quare actus humanus Legi conformis, sed conscientiae repugnans, est malus?*

R. Quia hominis natura, utpotè rationalis, exigit ut omnes ejus actiones rationabiliter fiant, hoc est ratione regantur, *rationabile obsequium vestrum*, inquit Apostolus, Rom. 12. alioquin magna foret inordinatio, si voluntas contra rationem insurgeret, &, contempto ejus imperio, inferiores potentias applicaret ad opus. Cum autem ignorantia in omnibus hominibus sit pœna peccati, & ratio facilè decipi possit passionibus, pravis aliorum exemplis, & dæmonum suggestionibus, ipsa indiget certa & infallibili regula, Legge nimirum, quam consulere necesse est, priusquam ratio judicium de agilibus ferat.

Nec dicas, homines facilè falli in Dei voluntate de rebus dubiis percipienda, & in præcipienda fallere posse; nam Lex æterna, quæ fallere nequit, prohibet ne inferior de superiore malè suspicetur, cum aperta ratio, vel indubitata auctoritas non demonstrat ipsum contra Deum præcipere. Ita sanctus Bernardus citato loco: *Cum de Scripturis babeas*, inquit, *quia labia Sacerdotis custodiunt scientiam, & Legem ex ore ejus requirunt; quia Angelus Domini exercituum est: ipsum quem pro Deo habemus . . . . . tanquam Deum in his quæ apertè non sunt contra Deum, audire debemus.*

Ex his patet hunc tractatum in duas partes esse distribuendum. Prima pars erit de Conscientia. Secunda de Legibus.



\*\*\*\*\*  
\*\*\*\*\*

# PRIMA PARS.

## De Conscientia.

### CAPUT PRIMUM.

#### De Definitione Conscientiæ.

Q. 1. *Quid est Conscientia?*

R. Est iudicium actuale practicum, dictans, quid in particulari sit faciendum, aut omittendum.

Dicitur 1. *Judicium*, quo significatur conscientiam pertinere ad intellectum, cujus est judicare.

Dices: Conscientia, vel est bona, vel mala: bonum autem & malum pertinent ad voluntatem, sicut verum & falsum ad intellectum: ergo conscientia est actus voluntatis, ut præferebat ejus nomen; conscientia enim secundum vim nominis est cordis scientia.

Distinguo anteced. Conscientia est bona, vel mala directè, quia ipsius est dirigere actus humanos, Conc. Est bona, vel mala formaliter, & subjectivè, Nego antec.

Dicitur 2. *Actuale*, quia conscientia neque est potentia, neque habitus sicut prudentia, sed actus.

Dicitur 3. *Dictans*, quia conscientia est dirigere actus humanos.

Dicitur 4. *Quid in particulari sit faciendum, aut omittendum*, ut distinguatur, tum à synderesi, tum à pru-

à prudentia universali. Synderesis enim est habitus intellectus nobis naturaliter inditus, qui versatur circa prima principia practica, v. g. quod tibi fieri non vis, alteri ne feceris. Prudentia verò universalis est habitus, sive acquisitus, sive infusus, qui ex primis principiis practicis deducit conclusiones universales, v. gr. non debemus alteri facere, quod nobis fieri nollemus; atqui nollemus rem nostram subripi: ergo non debemus rem proximi subripere. Conscientia autem subsumit, atqui hæc pecunia usuraria, est res aliena: ergo ab ea debeo manus meas continere.

Ergo conscientia est ultimus prudentiæ particularis actus, & veluti ejus conclusio: *Conscientia*, inquit sanctus Antoninus, *est concludens scientia*.

Ergo conscientia, ut sit recta, præsupponit præmissas veras & notas; namque vera & certa non potest esse conclusio, nisi eliciatur ex propositionibus veris & notis.

Dices, Rom. 14. Conscientia vocatur Fides, *omne quod non est ex fide, peccatum est*. Unde vulgò dicimus aliquem bona vel mala fide agere, quando agit secundum, aut contra conscientiam: ergo conscientia non est ultimus actus prudentiæ particularis.

Distinguo antec. Conscientia est Fides præsuppositivè, Concedo: Formaliter, Nego antec. Conscientia itaque præsupponit multa, quæ pertinent ad fidem, sive divinam, sive humanam, puta Ecclesiæ traditionem & definitionem, judicium sapientum, testimonium hominis fide digni: ex quibus prudentia conficit hunc syllogismum practicè & evidenter verum. Tutum est in praxi amplecti quod tradit Ecclesia, docent ejus Pastores, judicant licitum sapientiores, testantur homines

fide digni, communiterque observant viri Religiosiores. Hæc propositio est certa & evidens: atqui Ecclesia & ejus Pastores docent, v. gr. Contractum consignativum esse licitum: viri docti consentiunt, Titium in hoc facto irregularitatem non contraxisse: duo testes affirmant, hunc hominem reum esse homicidii voluntarii. Evidentia hujus propositionis ipsis sensibus percipitur. Unde conscientia evidenter concludit: ergo licitum est inire hunc contractum consignativum. Titius non tenetur se gerere tanquam irregularem. Judex hunc hominem secundum Legem morte plectere debet. Porro hæ conclusiones non sunt Fidei actus, licet fidem aliquando divinam, aliquando humanam præsupponant.

## CAPUT II.

### De Divisione Conscientiæ.

Q. I. *Quotuplex est Conscientia?*

R. Generatim & adæquatè dividitur in bonam & malam, nec ulla agnoscenda est indifferens; quia ex dictis conscientia est actus prudentiæ; atqui actiones indifferentes, etiam in hypothesis quod dentur, non sunt objectum prudentiæ, quæ tota est in ordinandis actionibus ad ultimum finem, ad quem consequendum actio indifferens non potest esse medium.

Gravis autem hic nascitur difficultas, ac præ cæteris accuratius examinanda, scilicet, quæ conscientia dicenda sit bona: nusquam enim in moralibus periculosius erratur, quam in definienda bona conscientia, testante Clero Gallicano anno



1700. his grāvissimis verbis: *Hoc initium malorum esse, atque omnium corruptelarum caput, & doctrinæ consecutio, & series temporum ostendit.* Atque ut in re tam lubrica securè procedamus, operæ pretium est referre sigillatim omnes conscientiæ divisiones, & varias ejus species; tumque licebit de unaquaque judicium ferre. Itaque

Conscientia specialius dividitur 1. in rectam seu veram, & falsam, seu erroneam: & hæc vel invincibiliter est erronea, vel vincibiliter. 2. In certam, & incertam, seu in tutam, & minimè tutam.

Incerta subdividitur in dubiam, perplexam, probabilem, & scrupulosam.

Q. 2 *Quid est Conscientia dubia?*

R. Est intellectus practici hæsitatio circa rem agibilem. Hæsitat autem intellectus, & in neutram partem contradictionis inclinatur, vel quia nulla occurrit assentiendi ratio, vel quia pro utraque parte adsunt rationes æqualis ponderis, quæ mentem suspensam, & quasi in æquilibrio contineant. Pater v. gr. asserit Filium complevisse vigesimum primum ætatis annum, ac proinde teneri Lege jejunii; mater contra pernegat, & ex hac contradictione exurgit dubia Filii conscientia.

Q. 3. *Quotuplex est Conscientia dubia?*

R. Duplicem vulgò distinguunt Theologi, scil. dubiam speculative duntaxat, practicè verò certam; & dubiam tum speculative, tum practicè.

Conscientia est speculative dubia, quando dubium est de re objective spectata, ut si tonsor dubitet, an liceat barbas radere diebus festivis. Practicè autem est dubia, quando dubium cadit in ipsum exercitium actus, ut si idem tonsor du-

bitet num peccet barbas radendo diebus Dominicis. Porro nonnunquam contingit, inquit illi Theologi, eundem esse speculative dubium, & practice certum, ut videre est in allato exemplo tonsoris, qui dubitat, num opus ejus sit servile, & ab Ecclesia prohibitum festis diebus, & practice certus est se non peccare illud opus exercendo, quando nempe res ejus familiaris magnum detrimentum pateretur, si solus ex omnibus tonsoribus in reverentiam diei sacri ab illo opere abstineret.

Quamvis hæc conscientie dubie divisio aliquo sensu sit vera, simpliciter tamen & absolute falsa est, & in praxi periculosa: & nisi recte intelligatur, tendit ad subvertendam omnem moralem disciplinam. Quare rejicienda videtur.

Primò non est simpliciter & absolute vera; cum enim conscientia ex dictis sit practica conclusio, non potest esse certa, nisi deducatur ex præmissis certis; ex incerto quippe principio non potest certa sequi conclusio. Tonsor in allato exemplo, qui dubitat an radere, sit opus servile die festo prohibitum, non potest certò concludere sibi licere eodem die radere, nisi ipsi præsto sit hæc ratio speculative certa, quæ eum ad radendum determinet, nempe Legem Ecclesiasticam non obligare cum magno familie dispendio. Itaque ut conscientia sit practice certa, stante aliquo dubio speculativo, necesse est, ut concurrat certa aliqua ratio ex circumstantiis desumpta, ex qua eliciatur conclusio, seu conscientia practice certa: patet tum ex allato tonsoris exemplo, tum ex duobus sequentibus. Mulier, ex una parte speculative est dubia de veritate ma-  
trimonii

trimonii bona fide initi : ex alia verò parte certa est speculative, neminem in dubio privandum esse jure suo , & ex illo principio certissimo practice judicat stante illo dubio reddendum esse debitum marito exigenti , nec de veritate matrimonii dubitanti. Item aliquis est speculative dubius, an sit detentor rei alienæ, & aliunde certus in tali dubio potiozem esse partem possidentis, nec ullum propter hujusmodi dubium esse spoliandum re sua : nixus autem hoc principio speculative certo , format sibi conscientiam practice certam se non teneri ad restitutionem. Ergo conscientia non potest esse practice certa, nisi cum dubio speculativo adsit ratio etiam speculative certa.

Secundò in praxi periculosum est simpliciter & absolute statuere conscientiam posse esse practice certam simul & speculative dubiam ; quia facile quis in quolibet dubio ad nutum voluntatis conscientiam sibi formaret , omnes dubitandi rationes obligaret , certumque se in operatione crederet eo ipso, quò vellet esse certus.

Q. 4. *Quid est Conscientia perplexa?*

R. Est intellectus practici judicium dictans subesse peccatum , quamcunque agens amplectatur partem , v. g. si ve mentiatur ad impediendum homicidium injustum , si ve non mentiatur in hypothesis quòd ex veritatis confessione injustum homicidium consequatur.

Q. 5. *Potestne aliquis esse in vera peccandi necessitate?*

R. Minimè, quia in iis angustiis, in quas nemo nisi ex errore delabitur , prudentia dictat minus malum esse eligendum , ac proinde in allata

hypothesi mendacium officiosum non foret peccatum, nisi materialiter.

Q. 6. *Quid est conscientia, seu opinio probabilis?*

R. Est mentis assensus cum formidine oppositi: *Opinio*, inquit S. Bernardus Lib. 5. de Confid. cap. 3. *certi nihil habens, verum per similia quærit potius, quam apprehendit.*

Q. 7. *Quotuplex est conscientia, seu opinio probabilis?*

R. Duplex: Alia fulcitur ratione: alia auctoritate. Prior probabilitas dicitur intrinseca: posterior verò extrinseca.

Q. 8. *Quotuplici modo spectari potest opinio probabilis?*

R. Duplici, scilicet absolutè, & sine respectu ad aliam oppositam, & comparatè cum alia opposita. Aliquis v. gr. probabiliter affirmat hoc poculum esse veneno infectum, hunc contractum esse usurarium; alter verò utrumque probabiliter negat, mens in ejusmodi opinionum contradictione illas prius inter se comparat, quàm judicium ferat.

Q. 9. *Quid observandum in concursu opinionum oppositarum?*

R. Imprimis observandum est utrùm opinio opposita sit vel æquè probabilis, vel minùs probabilis, vel probabilior; neque enim quisquam poculum hauriret, altero affirmante esse veneno infectum, altero negante, nisi prius expendisset uter ex illis verum diceret.

Q. 10. *Quid si opinio opposita sit æquè probabilis?*

R. Conscientia efficitur, aut saltem effici debet dubia; quia mens propter æqualia rationis, vel auctoritatis pondera non magis in unam inclinatur



clinat partem, quàm in aliam. Judex v. g. qui audito primo teste accusatum onerante probabiliter judicabat illum esse reum, in dubium venit, cum audit secundum testem priori contradicentem.

Q. II. *Quid si opinio opposita sit minus probabilis?*

R. Conscientia in illo concursu non solum de ejus veritate erit dubia, sed si non impediatur pravo voluntatis affectu, pronuntiabit probabilius esse falsam: id enim suadent graviora momenta, quibus opposita probabilior nititur, ut videre est in his exemplis: si duo testes, quorum alter est fide dignior, testimonium contradictorium ferant, Judex eo ipso, quo unius testimonium judicat credibilius, necessario putat testimonium alterius verisimilius esse falsum. Item privatus, qui consuluit duos Theologos dissentientes circa æquitatem alicujus contractus, si unius consilium propter majorem Theologi peritiam probabilius videtur verum, alterius consilium consequenter probabilius existimat falsum.

Dixi: *Modò conscientia non impediatur pravo voluntatis affectu*; Quia hujusmodi affectus judicium præcipitat, nec finit mentem attendere, nisi leviter, & superficie tenus ad ea, quæ dubium ingerere, & voluntatis impetum cohibere deberent; quod quàm timendum sit, ubi agitur de formanda conscientia, docet Clerus Gallicanus sæpius citato loco: *Neque quisquam, inquit, in dubio salutis ad actum profiliat, nisi ipso dubio non ad nutum voluntatis, aut ex cupiditatis instinctu, sed ex recta ratione deposito, dicente Scriptura, rationabile obsequium vestrum. Omnia prebete, quod bonum est tenete.*

Q. 12.

Moralis adest certitudo, quando spectatis circumstantiis ratio dicat non esse timendum, ne res aliter se habeat, quàm menti obijcitur, etsi naturaliter & absque miraculo possit se habere aliter: imò aliquando sic contigerit. Responsio patebit sequentibus exemplis. Cum morali salutis certitudine quis ambulat per plateas tranquillo aere: cum fratre, quem benevolum expertus est, solus egreditur in campum; licèt è tectis tegulæ in caput ejus decidere naturaliter possint, aut frater in ipsum insurgere, quemadmodum Cain in Abelem. Nam imprudens & ridiculus videretur, si timor incurrendæ mortis in hujusmodi circumstantiis illum domi conclusum detineret. Cum eadem certitudine Judex credit duobus testibus consentientibus, plebs Parochi catechesibus, nec nisi imprudenter fidem denegarent, eo prætextu, quòd duo testes & privatus Parochus fallere possint, nec desint exempla eorum, qui sic fuerunt decepti; hæc enim rariora & remotiora sunt, quàm ut prudenter timenda sint. Sic vir probatæ castitatis & pietatis, anxius tamen num consenserit delectationi venereæ, aut vanis cogitationibus, quas inter orandum passus est, moraliter certus esse debet se non consensisse saltem eo consensu, qui ad peccatum mortale pertingat, hoc est, plenè libero; quia moraliter fieri nequit, ut voluntas tam firma & tam constans in proposito vitandi omne peccatum præsertim lethale, mutetur, quin conscientia dilucidè advertat. Secus judicandum de iis, quorum voluntas verti solet ad omnem tentationis flatum. Horum quippe anxietas & dubium fundamento non caret, & plerumque præsumitur illos consensisse, nisi contrarium probent. His

His præmissis de conscientia divisione, & de variis ejus speciebus, superest, ut expendamus, quæ sit conscientia bona, quæve nos coram tribunali supremi Judicis defendere valeat.

## CAPUT III.

### De bona, malave Conscientia.

Cum ex dictis nullus conscientia suæ testimonio possit esse securus, nisi probaverit hanc suam conscientiam esse bonam, dicente Apostolo 1. Cor. 4. *Nihil enim mihi conscius sum: sed non in hoc justificatus sum*, nobis accuratius investigandum incumbit, quæ tandem conscientia bona dicenda sit, an erronea, an dubia, an certa, aut probabilis. Quare

Q. 1. *Conscientia erronea estne bona?*

R. Minimè; quia, ut ait sanctus Bernardus supra laudatus, pag. 280. *Ut interior oculus verè simplex sit*, id est, ut conscientia sit sana & laudabilis, duo illi arbitror esse necessaria, *charitatem in intentione, & in electione veritatem*. Sive itaque malum putes bonum, quod forte agis; sive bonum malum, quod operaris: utrumque peccatum est.

Q. 2. *Conscientia erronea nunquamne excusat à peccato?*

R. Excusat, si sit invincibiliter erronea, secus si vincibiliter. Ita S. Thomas quodlib. 8. qu. 6. art. 15. *Error conscientia, inquit, quandoque habet vim absolvendi, sive excusandi; quando scilicet procedit ex ignorantia ejus, quod quis scire non potest, vel scire non tenetur. Et in tali casu, quamvis factum de se sit mortale, tamen intendens peccare venialiter, peccaret venialiter.*

nialiter. Quandoque verò error conscientiae non habet vim absolvendi vel excusandi, quando scilicet ipse error peccatum est, ut cum procedit ex ignorantia ejus, quod quis scire tenetur & potest, sicut si crederet fornicationem simplicem esse peccatum veniale, & tunc quamvis crederet peccare venialiter, non tamen peccaret venialiter, sed mortaliter.

Ergo neque ex intentione laudabilis finis, neque ex erroneae conscientiae dictamine excusantur defectus eorum, qui officium, sive politicum, sive Ecclesiasticum suscipiunt, quamvis non quaesitum, si vires eorum superet, vel propter sufficientem scientiam; vel propter ingenii tenuitatem, vel propter meliorem indolem qualibet suggestionem versatilem; quia illorum ignorantia & deceptio voluntaria est saltem in causa, ac proinde vincibilis.

At, inquires, nullus nisi superbus crediderit se idoneum esse, qui aliis utiliter praesse valeat. Ergo omnes à regendis aliis abstinere debent, cum moraliter fieri nequeat, quin in regimine error aliquando subrepat, aut fallacia decipiat.

Nego consequentiam. Neque enim ista pensanda sunt ex proprio sensu, sed ex viri sapientis consilio, qui nos probè noverit, non ex fama tantum, aut veluti ex exteriori superficie, sed ex plana interioris hominis manifestatione. Nam ex sancto Bernardo Serm. 18. in Cantic. non minus cavendum est vocanti Deo resistere, quam honorem ab ipso non concessum, licet fortè ab homine oblatum, assumere: *Rem profectò, inquit, proximi retines tibi, si plenus virtutibus cum sis, donis scientiae, & eloquentiae adornatus, metu fortè, aut segnitie, aut minus discreta humilitate, verbum bonum, quod*  
posset



posset prodesse multis, inutili, imò & damnabili ligas silentio, certe maledictus quod frumenta abscondis in populis. Rursum quod tuum est spargis, & perdis, si prius quam infundaris tu totus, semiplenus festines effundere . . . . . si institerint rogitantes aliqui ex his, qui fortè existimant de me supra id, quod vident in me, aut audiunt aliquid ex me, respondebitur eis, ne fortè non sufficiat nobis & vobis, ite potius ad vendentes & emite vobis.

Q. 3. Quid sentiendum de conscientia dubia?

R. Mala est, nec ea innitendum, sed suspendendus consensus, quamdiu duraverit dubium.

Probatur 1. ex Scriptura, Eccli. 3. v. 27. *Qui amat periculum, in illo peribit*, hoc est, qui se à peccandi periculo non removet, in illo peribit, quamvis se securum putet.

Probatur 2. ex Traditione. S. Augustinus Lib. 1. de Bapt. c. 3. sic scribit: *Graviter peccaret in rebus ad salutem animæ pertinentibus, vel eo solo, quod certis incerta proponeret.* S. Bernardus Serm. de Voluntate nostra subjicienda divinæ, ait: *In his rebus, in quibus nihil certi possumus invenire, nihil certum voluntas nostra definiat, pendeat inter utrumque.* Innocentius III. Lib. 5. de Mysterio Missæ, cap. 24. *Ego, inquit, semper in dubiis, quod tutius est, judico præferendum; & cap. Juvenis, de sponsalibus: in his, quæ dubia sunt, quod certius existimamus, tenere debemus.* Generale Conc. Viennense cap. *Exiit*, de verb. signif. sic statuit, *in his, quæ salutem animæ respiciunt ad vitandos graves remorsus conscientie, pars securior est tenenda.* Addit Clerus Gallican. an. 1700. *neque id consilii, sed præcepti loco habeamus.* S. Thomas quodlib. 8. art. 13. eadem docet his verbis: *Quod si ille, qui plures possidet Præbendas, in quandam dubitationem inducitur ex contrarietate opinionum & manente*

nente tali dubitatione, plures Præbendas babeat, periculo se committit, & sic procul dubio peccat. Sanctus Antoninus etiam 3. part. tit. 3. cap. 10. §. 10. Beatus Thomas & alii, inquit, dicunt quòd ille, qui agit id, de quo est dubium, utrum sit mortale, vel non, peccat mortaliter, quia periculo se exponit mortalis. Cùm ergo in aliqua materia morali sunt variae & contrariae opiniones, ille qui adhæret latiori viæ, videtur se exponere periculo mortis; quia est in dubio, cùm possit illa opinio esse falsa, & contraria vera.

Probatur 3. ratione; quia agere temerè & contra prudentiæ regulas peccatum est: atqui agens in dubio, temerè & contra prudentiæ regulas operatur: Ergo.

Minor probatur. Quia prudentia est virtus intellectus; atqui ex S. Thoma 1. 2. qu. 57. art. 2. ad tertium: illi soli habitus virtutes intellectuales dicuntur, quibus semper dicitur verum, & nunquam falsum: opinio verò & suspicio possunt esse veri & falsi, & ideo non sunt intellectuales virtutes, ut dicitur in 6. Ethic. Et art. 4. Sic se habet prudentia ad actus humanos, sicut se habet ars ad exteriores factiones: atqui ars certò & infallibiliter operationes artificiales dirigit: ergo & prudentia actiones morales.

Confirmatur ex communi omnium hominum sensu: ille in proximum peccat, qui sciens & volens exponit se periculo illum lædendi, aut damnum inferendi, quia hæc agendi ratio vertitur in ejus contemptum & contumeliam. Ergo à fortiori reus est apud Deum, qui liberè ea facit, dubius an illi displiceant, necne.

Ergo conscientia bona, non est, nec actus ex illa procedens laudabilis, nisi sit certa. Evidenter sequitur ex præcedenti responsione. Non

enim datur medium inter incertum & certum: at-  
qui conscientia incerta & dubia est mala: ergo  
bona necessariò debet esse certa.

Dices 1. probabile est quid medium certum  
inter & incertum. Ergo.

Nego anteced. Oppositum constat ex dictis  
de conscientia & opinione probabili, pag. 286.  
& sequentibus, ampliusque patebit ex capite se-  
quenti.

Dices 2. Pastor in dubio prudenter Sacramen-  
ta ministrat infirmo in extremis posito, & Medi-  
cus carens remedio certo in iisdem circumstantiis  
rectè adhibet dubium: ergo prudentia non ex-  
cludit dubium.

Nego conseq. Quia etsi Pastor & Medicus  
dubitent de effectu, ille Sacramenti, ille remedii,  
nihilominus certi sunt dubia media, ubi alia non  
suppetunt, tum esse adhibenda, cum iis neglectis,  
salus desperata videatur, & iis adhibitis, spes ali-  
qua salutis affulgeat.

Dices 3. in moralibus impossibile est habere  
certitudinem, dicente Scriptura Sap. 9. *cogitatio-  
nes . . . . . mortalium timidae, & incertae provi-  
dentiae nostrae.* Job ipse à Deo laudatus fatetur se  
dubitasse de omnibus operibus suis; *verebar*, in-  
quit cap. 9. *omnia opera mea*, in quem locum sic  
scribit sanctus Gregorius, *bonarum mentium est agno-  
scere culpam, ubi culpa non est*: Ergo.

Distinguo antecedens. Certitudinem meta-  
physicam aut physicam, Concedo: ac proinde  
scrupulosi frustra eam quærunt: certitudinem  
moralem, qualem supra explicuimus pag. 289.  
Nego antecedens. Hac morali certitudine non  
caruit beatus Job, scivit quippe eleemosynam &  
alia

alia pietatis opera esse objectivè bona. Sed verebatur, ne ea qua par est intentione illa non perficeret. *Dicendum*, inquit S. Thomas supra qu. 6. art. 4. quodd agnoscere culpam, ubi culpa non est, potest esse dupliciter. Uno modo ut intelligatur quàm ad substantiam actus, & sic non ad bonam mentem pertinet, sed ad errantem, ut se actum aliquem commisisse agnoscat, quem non commisit. Alio modo quantum ad conditionem actus, & sic verum est, quod S. Gregorius dicit, quia *justus in actu*, qui de se bonus est, formidat ne aliquis defectus ex parte fuerit. Et idèd justus, qui est verè humilis, non reputat se deteriore, quantum ad perpetratiorem actus, qui sit peior ex genere, sed quia timet ne in iis, quæ benè agere videtur, per superbiam graviùs delinquat.

Quod adducitur ex Sapiente, spectat duntaxat consiliorum & actionum nostrarum successus, de quibus plerumque certi esse non possumus. Rex v. g. incertus est de victoria, licèt bellum evidenter justum, & necessarium suscipiat; mercator timet, ne malè succedat negociatio, quam certò novit non esse iniquam. Unde concludit Sapiens, mortales non propria providentia, sed divino auxilio niti debere.

Ergo ad bonam conscientiam non requiritur certitudo metaphysica aut physica, sed moralis sufficit. Hoc agnovit Aristoteles Lib. 2. Metaph. ubi sic habet: *Certitudinem metaphysicam non oportet in cunctis quærere, sed in his, quæ non habent materiam.* Et sanctus Thomas 2. 2. qu. 70. art. 2. *In actibus humanis*, inquit, non potest haberi certitudo demonstrativa, eo quodd sunt circa contingentia & variabilia. Et ideo sufficit probabilis certitudo, quæ ut in pluribus veritatem attingat, etsi in paucioribus à veritate deficiat. Et



Opusc. de Fallaciis cap. 2. *Probabilia dicuntur, quæ videntur omnibus, vel præcipuis, vel pluribus, vel maxime notis.* Sanctus quoque Antoninus 2. part. tit. 3. cap. 10. §. 3. eadem mente sic scribit: *Non confurgit moralis certitudo ex evidentia demonstrationis, sed ex probabilibus conjecturis grossis & figuralibus, magis ad unam partem, quam ad aliam se habentibus.* Sed de conscientia probabili separatim dicendum propter speciales difficultates, quas invexit recentiorum doctrina, apud quos tanquam effatum obtinuit, qui probabiliter agit tutò & prudenter agit.

## CAPUT IV.

### De Conscientia probabili.

Q. I. *Conscientia, quæ nititur opinione probabili estne bona & tuta?*

Hic in memoriam revocanda, quæ diximus pag. 318 & seq. nempe opinionem probabilem aliquando excludere erroris formidinem, aliquando verò eam admittere vel propter rationes oppositas, quas sufficienter non solvit, vel propter auctoritatem contradicentis minimè contemnendam. Hæc patent exemplis pag. 313. allatis. Quibus præmissis facilè solvitur proposita quæstio.

R. Itaque primò, conscientia, quæ fulcitur opinione priori modo probabili, bona est & tuta; quia conscientia moraliter certa ex dictis est bona & tuta: atqui conscientia, quæ fulcitur opinione hoc modo probabili, est moraliter certa. Ergo.

Confirmatur, tum ex Alexandro VIII. qui anno 1690. hanc damnavit propositionem, *non licet*

*cet sequi opinionem, vel inter probabiles probabilissimam; tum ex Clero Gallicano sic scribente anno 1700. Absit verò ut probemus eorum errorem, qui negant licere sequi opinionem, vel inter probabiles probabilissimam: sed ad rectum usum probabiliun opinionum has regulas à jure præscriptas agnoscimus. Primum ut in dubiis de salutis negotio, ubi æqualia utrinque animo sese offerunt rationum momenta, sequamur id quod tutius: sive quod est eo in casu unicè tutum; neque id consilii, sed præcepti loco habeamus, dicente Scriptura, qui amat periculum, in illo peribit.*

R. Secundò, conscientia, quæ nititur opinione posteriori modo probabili, nec est bona, nec tuta.

Probatur 1. Quia conscientia dubia est mala, ut præcedenti capite dictum est, atqui conscientia, quæ nititur opinione hoc posteriori modo probabili est dubia, imò tum verisimilius est falsa, cum momenta opinionis oppositæ præponderant. Ergo.

Probatur 2. quia nova doctrina in iis, quæ ad fidem & mores pertinent, rejicienda est ut spuria, & à moribus Christianis aliena: atqui doctrina, qua astringitur pro regula morum opinio hoc posteriori modo probabilis, est nova, & in Ecclesia ante elapsum sæculum inaudita.

Major probatur. Quia illud interest inter Conclusiones Philosophicas & Theologicas, quòd Philosophicæ eruantur ex ipsis naturæ visceribus quæ successu temporis novis effectibus & experimentis magis ac magis sese explicant, quo fit, ut juniores veteribus evadant doctiores. Contra verò cum Conclusiones Theologicæ deducuntur ex iis, quæ Christus per seipsum & per Apostolos Ecclesiæ tradidit, recentiores Theologi omnem

suam doctrinam à majoribus hauriant necesse est. *Ex ipso ordine*, inquit Tertullianus Lib. de Præscript. c. 31. *manifestatur id esse dominicum & verum, quod sit prius traditum, id autem extraneum, quod posterius immixtum.* Ergo novitas doctrinæ in Theologia falsitatis notam præ se fert manifestam.

Minor probatur testimonio Cleri Gallicani his verbis expresso anno 1700. *Quod in praxi eam nobis liceat sequi sententiam, quam nec ipsi, ut probabiliorem eligendam judicemus, hoc novum, hoc inauditum, hoc certis ac notis auctoribus postremo demum sæculo proditum.*

Sed frustra testibus agimus contra Adversarios, cum eorum habeamus confessionem, *tota Theologia moralis nova est*, inquit illi, eoque feliciorem Ecclesiam jactitant, quod sua novitate viam, quam Christus arctam fecerat, laxiorem reddiderint, innumerosque Ecclesiæ filios ad cœlestem patriam securè perducant, qui alioquin viæ asperitate deterriti ne pedem in ea figere ausi periissent. Unde audacter in hæc verba concludunt: *Doctrina morum magis à junioribus petenda est*: quam propositionem Academia Parisiensis anno 1665. & Clerus Gallicanus anno 1700. damnarunt ut falsam, scandalosam, sanctis Patribus & antiquis Doctoribus contumeliosam, & in praxi perniciosam.

Enimverò hæc opinandi libido nihil intactum & integrum in lege etiam naturali reliquit, ut discurrenti per singula Decalogi præcepta patebit. Namque juxta probabilitatis leges homo in toto vitæ decursu non tenetur actum dilectionis Dei, & proximi elicere. Condonatio injuriarum non est præcepti, sed consilii, sicut virginitas.

Licitum

Licitum est aliquando mentiri, vel etiam pejerrare: desiderare mortem patris ob temporale emolumentum: occidere aggressorem non solum in periculo vitæ, sed etiam honoris, & rei familiaris, etiam unius aurei: multa obscœna facere aut pati, quæ pudor exprimere vetat: furari in gravi necessitate: lucrum ex mutuo exigere, cum numerata pecunia pretiosior sit, quàm numeranda. Pœnitenti habenti consuetudinem peccandi, etsi emendationis spes nulla appareat, nec est deneganda, nec differenda absolutio, dummodò ore proferat se dolere, & proponere emendationem. Quare meritò Clerus Gallicanus in sua Epistola encyclica anno 1655. sic scribit: *Une profonde ignorance seroit beaucoup plus souhaitable, qu'une telle science, qui apprend à tenir toutes choses problematiquement, & à chercher des moyens, non pas pour exterminer les mauvaises habitudes des hommes, mais pour les justifier, & pour leur donner l'invention de les satisfaire en conscience: car au lieu que Jesus Christ nous donne ses preceptes, & nous laisse ses exemples, afin que ceux qui croient en lui, lui obeissent, le dessein de ses auteurs paroit estre d'accommoder les preceptes & les regles de Jesus Christ aux interêts, aux plaisirs, & aux passions des hommes.*

Ergo in omnibus actibus nostris hæc nobis præscripta sit regula, quam Clerus Gallicanus anno millesimo septingentesimo demonstrat tanquam solam, veram & tutam, *ut in rebus Theologicis ad fidei & morum dogmata spectantibus Theologos quidem etiam modernos audiamus, si tamen consonas sanctis Patribus tradant sententias. Deinde, ut si ab eis recedant, harum opinionum inibiatur cursus, nedum earum aliqua ratio habeatur, aut ulla eis tribuatur auctoritas.*



*Denique ut nemini liceat eligere eam sententiam, quam non veritati magis consentaneam duxerit.*

Dices 1. ex concessis, quivis cum morali certitudine fidem adhibet testimonio sui probati Pastoris, vel alterius viri probi: atqui plusquam viginti Theologi asserunt, tutò fidem adhiberi libro vel unius Doctoris moderni, dum non constat opinionem ejus rejectam esse à Sede Apostolica, imò ad ducentos numerantur Theologi, qui docent tutum esse in conscientia, qui agit ex opinione minùs probabili. Ergo.

Respondeo 1. Pastorem aut quemvis Theologum peccare, cum uti certum consulit, quod novit tanquam falsum à pluribus impugnari.

Respondeo 2. nec subditum debere assentiri Parocho, nec pœnitentem Confessario ubi rescire possunt & debent se dubia audire. *In his, quæ pertinent ad fidem & bonos mores, nullus excusatur, si sequatur erroneam opinionem alicujus Magistri, inquit sanctus Thomas quodlibet. 3. art. 10. & sanctus Antoninus 1. part. tit. 20. dubium probabile est, cum scilicet rationes sunt ad utramque partem quasi æquales: & peccatum grave est se exponere tali dubio, ubi est morale.* Unde in forma

Distinguo anteced. Quivis cum morali certitudine assentitur suo Pastori & Confessario, cum prudenter judicat illos vera dicere, nullo contradicente, Concedo; sic prudenter quis sumeret poculum, quod vir probus salutare assereret, quamvis revera esset lethiferum: Si noverit alios etiam fide dignos contradicere. Nego anteced. Patetque allato poculi exemplo, à quo quilibet abstinebit, si audiat alium asserentem, quòd sit veneno infectum.

Ad

Ad Confirmationem respondeo , turbam patronorum opinionis probabilis non esse magni faciendam ; tum quia alii alios instar ovium , sine iudicio sequuntur : tum quia ex Navarro Enchir. c. 27. opinio communis non est numero opinantium æstimanda , sed pondere auctoritatis , quæ sanè nulla est in iis , qui aliter docent quàm Ecclesiæ Pastores , à quibus populi legem requirere debent , dicente Domino , *qui vos audit , me audit* , Luc. 10. & iterum , *oves . . . non noverunt vocem alienorum* , Joan. 10. Quis autem magis alienus , quàm qui ab Apostolica Traditione recedit ?

Instabis : atqui Ecclesiæ Pastores absolute non proscripserunt opinionem probabilem , sed eam duntaxat , quam vel Ecclesia corrigit , vel quæ proximum exponit periculo damni sive spiritualis , sive temporalis , ut contingit in Sacramentis administrandis , & judiciis ferendis , in quibus nec Sacerdos nec Iudex sequi debent opinionem probabilem , relicta tutiore .

Respondeo 1. nec nos rejicimus omnem opinionem probabilem , quin probavimus quemlibet ex ea prudenter & tuto operari , si sit moraliter certa. 2. Piæ aures offenduntur , cùm audiunt periculum Legem Dei transgrediendi non esse timendum sequendo opinionem probabilem , si inde nullum proximo nocumentum sive spirituale sive temporale accidere possit , quasi verò minus cavenda sit Dei offensa , quàm proximi. 3. Innocentius XI. & Clerus Gallicanus duas sequentes propositiones damnarunt. Prima sic jacet , *sententia probabili tantum utendum non est in collatione Baptismi , Ordinis Sacerdotalis , aut Episcopalis*. Hanc doctrinam vocat Clerus Gallicanus pessimum pro-

babilitatis fructum. Secunda his verbis concipitur : *generatim dum probabilitate quantumvis tenui, modò à probabilitatis finibus non exeatur, confisi aliquid agimus, semper prudenter agimus.* Hic pro regula morum commendatur opinio verè , & juxta strictos probabilitatis apices probabilis , reprobatur tamen ab Innocentio XI. uti scandalosa & perniciofa, à Clero Gallicano insuper ut falsa, temeraria, statuens novam morum regulam, novumque prudentiæ genus, sine ullo Scripturarum & Traditionis fundamento , denique cum magno animarum periculo. Ergo simpliciter & absolutè falsum est bonam esse conscientiam , quæ nititur opinione verè probabili probabilitate sive intrinseca sive extrinseca, nisi opinio illa sit moraliter certa.

Falsum quoque est opinionem censendam probabilem , quamdiu ab Ecclesia non corrigitur, aut non constat rejectam à Sede Apostolica, quemadmodum declararunt Alexander VII. Clerus Gallicanus, & Academia Parisiensis.

Urgebis : impossibilis est in praxi moralis illa certitudo : Theologi enim morales vix consentiunt, ubi expressam non habent Ecclesiæ definitionem, quæ sanè in singulis actionibus haberi nequit propter novas, quæ quotidie occurrunt, circumstantias. Ergo in tanta opinionum varietate, hæc regula morum statuatur necesse est, nimirum, opinio probabilis est practicè certa. Item, in problematicis licitum est eligere quamlibet opinionem, modò sit verè probabilis, nitaturque gravis Theologi auctoritate.

Probatur antecedens. Ut habeatur opinio moraliter certa , opposita debet apparere falsa, vel saltem minimè probabilis , ut supra diximus :  
atqui

atqui in contrarietate opinionum, quæ in morali-  
 bus ferè semper occurrit, nec veritas à falsitate,  
 nec probabilitas ab improbabilitate ab ullo se-  
 cerni potest. Non à mulierculis, & ab idiotis,  
 qui consilio & auctoritate Doctorum duntaxat ni-  
 tuntur. Quomodo enim ipsis pateret auctori-  
 tem unius alteri esse præferendam? An quia ille  
 doctior habetur? sed doctiores nonnunquam sen-  
 tentias laxiores & minùs probabiles sequuntur.

Non ab eruditis, quippe qui id unum ex suo  
 examine consequi possunt, nempe quamlibet ex  
 oppositis opinionibus verisimilem videri habere  
 suos patronos, nec certò apparere utra sit deter-  
 minatè vera aut falsa.

Ergo ubi non præluet Ecclesiæ definitio,  
 nulla potest esse certitudo in practicis; ac pro-  
 inde quamdiu non constat opinionem ab Ecclesia  
 esse rejectam, ut improbabilem, prudenter tene-  
 ri potest.

Confirmatur ex communi hominum praxi.  
 Qui diriguntur opinionibus minimè certis, quales  
 sunt istæ, licet tutoribus lucrum exigere ex mu-  
 tuata pupillorum pecunia. Clerici licitè possi-  
 dent plura Beneficia, quamvis unum ex illis suffi-  
 ciat ad honestam eorum sustentationem. Istæ  
 enim propositiones oppositis negantibus sunt pro-  
 cul dubio minùs probabiles, & nihilominus abs-  
 que conscientiae scrupulo ab omnibus ferè habentur  
 pro tuta regula.

Nego anteced. Omnes enim sive eruditi,  
 sive idiotæ, si pura mente & simplici corde ve-  
 rum practicum quærant, certò invenient. *Doctrina*  
*prudentium facilis*, nempe inventu, ait Sapiens  
 Prov. 24. vers. 6. Eruditi quidem; quia etsi ex  
 oppo-



oppositis sententiis determinare non possint, quæ sit speculativè vera: evidenter tamen concludent alteram esse in praxi certam & eligendam, ut videre est in hoc exemplo. Sit opinio probabiliter affirmans hunc contractum esse licitum, attritionem sine initio dilectionis, in Sacramento sufficere: sit quoque opposita utrumque probabiliter negans. Quis non videat affirmantes illas opiniones, quantumcunque supponantur probabiles, esse in praxi periculosas, & ideo dimittendas; negantes verò in praxi certissimas ac tutissimas, ac proinde tenendas? hanc tutam regulam Clerus Gallicanus præscribit Confessariis in hæc verba: *Pœnitentes admonere non cessent, ut in pœnitendo inchoatæ saltem dilectionis Dei ineant viam, quæ sola secura sit, graviter peccaturi in hoc salutis discrimine, vel eo solo quòd certis incerta præponant.*

Mulieres quoque, & omnes idiotæ, qui plerumque sola auctoritate ducuntur, erunt moraliter certi, si in opinionum varietate sapientum iudicio adhæreant, quos sciunt sine personarum acceptione viam Domini docere.

Nec dicas hujusmodi Sapientes latere in tanta opinantium turba. Quomodo enim non detegerentur ab iis, qui vera sectantur; cùm ipsi amatores sæculi illos vel eo solo palam demonstrant, quòd tam sollicitè illorum examen & iudicium fugiant. Quòd igitur mulieres & idiotæ fallaciis opinantium aliquando decipiantur,tribuendum est pravis eorum affectionibus. *Juxta iniquitatem interrogantis, sic iniquitas Prophetæ erit, ait Dominus Ezech. 14. v. 10.*

Respondeo ad exempla in confirmationem adducta.

Ad

Ad primum. Nullatenus probabile est, sed prorsus falsum secundum Legem tum Divinam, tum Ecclesiasticam, tum Civilem, licere tutoribus lucrum captare ex mutuata pupillorum pecunia, ut multis probamus Tract. de Justitia & Jure.

Ad secundum: latum est discrimen inter has propositiones, licitum est retinere plura Beneficia, vel ob Ecclesiæ utilitatem, vel ad honestam Beneficiarii sustentationem. Licitum est plura Beneficia retinere, quamvis nec evidens Ecclesiæ utilitas, nec vera Beneficiarii necessitas id exigant; namque prior propositio vera est & certa, ex Concilio Lateranensi IV. cap. *Quia*, tit. de Præbendis & Dignitatibus, & ex Tridentini Sess. 24. cap. 17 de Reform. Posterior verò est absolute falsa, & prorsus improbabilis ex Concilii Tridentini cit. cap. 17. ubi Patres sic loquuntur: *Cum Ecclesiasticus Ordo pervertatur, quando unus plurimum officia occupat Clericorum, sanctè sacris Canonibus cautum fuit neminem oportere in duabus Ecclesiis conscribi. Verum quoniam multi improbæ cupiditatis affectu seipsos, non Deum, decipientes, ea quæ benè constituta sunt, variis artibus eludere, & plura simul Beneficia obtinere non erubescunt: Sancta Synodus debitam regendis Ecclesiis disciplinam restituere cupiens in posterum unum tantum Beneficium Ecclesiasticum singulis conferatur, &c.*

Nec dicas: Concilium Tridentinum in iis, quæ pertinent ad disciplinam, non esse receptum in Galliis. Nam pluralitas illa, ex Concilio Tridentino, est merus abusus, & ab Ecclesia sæpe damnatus: ergo independentè à nova Concilii Tridentini lege simpliciter est illicita & prohibita, quod ultro concedunt & docent iidem ipsi, qui  
plura

plura Beneficia possident. Quòd si ab iis quæras, qua ergo conscientia illa retineant? respondebunt illa sibi esse necessaria ad honestam status sustentationem, & Ecclesiæ cui præsumt, utilitatem. Ergo malè obtruditur eorum exemplum in patrociniū opinionis minùs probabilis. Negandum tamen non est nonnullos Clericos ex ignorantia, vel ex cæca cupiditate abuti hoc exemplo, sibi que videri probabile saltem probabilitate extrinseca pluralitatem Beneficiorum, etiam sine justa causa, esse licitam. Sed iisdem Judicibus condemnantur, quorum auctoritate se tueri contendunt.

Dices 2. est regula juris, in dubiis melior est conditio possidentis, & benignior sententia est eligenda: Ex qua regula certò concludunt Theologi eum, qui adhibita omni diligentia, adhuc patitur dubium num retineat rem alienam, aut matrimonium, quod bona fide contraxit, sit legitimum, non teneri restituere, aut abstinere ab usu matrimonii: atqui privatus quisque est in possessione suæ libertatis; ergo quamdiu certò elucidari non potest quis sit sensus legis, ut contingit in oppositione probabilium opinionum, nemo tenetur legem servare, sed liberum est cuique amplecti quam maluerit opinionem, peccabitque Confessarius, si pœnitentem absolvere nolit secundum faventissimam opinionem. Ita Probabilistæ.

Respondeo 1. distinguendo majorem: Est regula juris in iis, quæ spectant justitiam, contractus & judicia, Concedo: præsumi enim debet eum qui bona fide possidet, & contractum iniit, justo titulo possidere, & secundum leges contraxisse;

traxisse ; alioquin stare non posset humana societas ob innumera scandala , quæ orirentur , si propter nascentia dubia proximus esset spoliandus , aut puniendus , dissolvenda matrimonia , & alii contractus. Est regula juris universaliter servanda in qualibet materia, Nego majorem ; obstant enim supra laudatæ regulæ , *in iis , quæ dubia sunt , quod certum existimamus , tenere debemus* , cap. *Juvenis* , de *Sponsalibus*. *In iis , quæ animæ salutem respiciunt , pars securior est tenenda* , Clementina cap. *Exiit* , de verborum significatione.

Respondeo 2. negando min. Imò stat possessio primò pro Lege naturali & divina : Deo quippe semper obligata fuit nostra libertas , juxta illud Regii Prophetæ Deum sic alloquentis Psal. 115. *O Domine , quia ego servus tuus . . . & filius ancillæ tuæ* , id est , vernaculus ex ancilla tua tibi natus. Ergo in dubio Juris naturalis & divini , nefas est contra Deum litigare , & libertatem humanam asserere. 2. Stat quoque possessio pro Lege humana ; nascimur enim cives , & subditi Reipublicæ. Solisque reclamantibus Anabaptistis , usum nostræ libertatis prævenit Ecclesiæ auctoritas , adversus quam securum non est se tueri novellis Probabilistarum opinionibus.

Fatendum tamen est in hypothesi , quòd Lex humana sit obscura , nec secundum communem Theologorum sententiam constet de mente Legislatoris , liberum & tutum esse in conscientia amplecti alterutram ex oppositis opinionem : quia per usum præscribitur contra Legem humanam , præsumiturque Legislator silentio suo consentire in oppositas Legis suæ interpretationes. Ecclesia v. g. ad jejunandum obligat omnes , qui sunt



sunt fatis robustæ ætatis, & ad restituendum compellit singulos usurarii hæredes; sed non figit tempus, quo incipiat illa ætas fatis robusta, nec explicat utrùm singuli hæredes in solidum teneantur. Unde Theologi sic in oppositas abeunt sententias, ut nullam ex iis judicent falsam aut improbabilem, consentiantque in praxi quamlibet eligi posse, nimirum juvenes ante vigesimum primum ætatis annum non teneri lege jejunii, nec usurarii hæredes in solidum ad restitutionem teneri.

Ergo, inquires, immeritò proscripta est supra allata propositio, *non sunt erroneæ opiniones, quas Ecclesia non corrigit.*

Nego consequ. Namque 1. in dubio circa Legem naturalem aut divinam semper certa incertis sunt præferenda; quia adversus illas non currit præscriptio. 2. Novellæ opiniones, quæ pugnant vel contra legem humanam clarè expressam, vel contra communem Theologorum sententiam meritò habentur scandalosæ & erroneæ, etiamsi Ecclesia eas nondum correxerit. Ecclesia quippe non solet colligere zizania, quæ inimicus homo identidem seminat in agro Domini, nisi cùm prævalere incipiunt; periculumque est ne bonum semen suffocent. Hæ sequentes opiniones, & aliæ benè multæ à modernis evulgatæ contra communem Catholicorum sensum, *præceptum observandi festa & jejunia non obligat sub mortali. Satisfit præcepto audiendi Sacri per reverentiam exteriorem, animo licèt voluntariè in aliena defixo. Omnes qui in Republica corporaliter laborant, excusantur ab obligatione jejunii.*

Hæ,

Hæ, inquam, propositiones erant scandalosæ & in praxi periculosæ ante censuras Sedis Apostolicæ, & Episcoporum.

## CAPUT V.

## De tuta &amp; tutiore opinione.

Q. 1. *Quid est opinio tuta?*

R. Est opinio moraliter certa. Patet ex dictis.

Q. 2. *Estne obligatio eligendi opinionem tutiorem?*

R. Minimè: quia secundum prudentiæ leges non est timendum aut fugiendum, quando nullum est periculum: atqui nullum periculum incurrit, qui sequitur opinionem tutam. Ergo.

Q. 3. *Estne consilium sequi opinionem tutiorem?*

R. Quando opinio tutior spectatis circumstantiis hominem magis expeditum reddit ad virtutem, salubre est consilium eam amplectendi: *Eligere viam tutiorem*, inquit S. Antoninus, *consilii est, non præcepti*; aliàs oporteret multos ingredi Religionem, in qua tutius vivitur, quàm in hoc sæculo. Sed si opinio tutior scrupulis faveat, majoribusque difficultatibus implicet, propterea est dimittenda. Quare, licet tutius videatur scrupuloso horas repetere, alterum Sacrum audire, prohibendus tamen est suis scrupulis indulgere; quia *timor sine sapientia Dei esse non debet*, ait S. Bernardus.

Dices: ex laudatis Canonibus, semitam tutiorem debemus eligere, pars securior est tenenda. Ergo.

Distinguo antecedens; eligenda est pars tutior & securior, tutior, inquam, juxta communem

nem loquendi morem, quo dicimus tutius, quod removet periculum, v. g. tutius esse abstinere à cibo, quem timemus ne sit lethifer, tutius viam non ingredi, quæ dicitur à latronibus obsideri, ubi vox, *tutius*, sumitur pro tuto, Concedo: pars tutior secundum Grammaticæ leges, & pro ut Comparativum opponitur Positivo, hoc est, tutius tuto, Nego antecedens: nam ex ipsa lectione laudatorum Canonum liquet, tutius opponi dubio, & partem securiorem parti, quæ graves stimulos conscientiae pareret.

\*\*\*\*\*  
\*\*\*\*\*

## SECUNDA PARS

### De Legibus.

#### CAPUT PRIMUM.

De Legis nomine, & varia ejus acceptione.

Q. I. *Unde Lex sic vocatur?*

R. Juxta S. Thomam 1. 2. q. 90. art. 1. dicitur à *ligando*; quia proprius ejus effectus est ligare, seu obligare subditos. Secundum verò auctorem lib. q. Novi Testamenti q. 15. dicitur ab eligendo. *Lex*, inquit, à *lectione*, id est, *electione dicta est*, ut de multis quid eligas, scias. In mente autem S. Isidori Lib. 2. Etym. cap. 10. *Lex dicta est à legendo*; quia lex debet esse scripta, & ideo legenda.

Q. 2.

Q. 2. *Quare lex nonnunquam jus appellatur , v. g. Jus naturale , Jus civile , &c.*

R. Quia est quædam jussio actionum justarum ; jus enim derivatur secundum quosdam à verbo , *jubeo* , & secundum alios à nomine *justitia*.

Q. 3. *Quotuplici modo lex accipitur ?*

R. Duplici. 1. latissimè & improprie. 2. strictè & proprie.

Q. 4. *Quid est lex improprie sumpta ?*

R. Est regula & mensura , secundum quam res quælibet inducitur ad operandum , vel ab operando retrahitur. Ita ferè S. Thomas cit. art. 1.

Secundum hanc legis acceptionem , omnia sive rationalia , sive irrationalia & inanimata ; artes quoque etiam illicitæ suas habent leges , quibusdam enim regulis diriguntur. Hoc sensu dicuntur Leges Grammaticæ , militiæ , mundi. Scriptum quoque legitur Prov. 8. *Legem ponebat aquis , ne transirent fines suos*. Et Rom. 7. *Fomes peccati , & inordinatus appetitus vocantur lex peccati , lex membrorum*. Quamquam S. Augustinus Lib. 1. ad Simplicianum qu. 1. & S. Thomas 1. 2. q. 90. art. 1. velint , illam inordinationem dici legem denominatione extrinseca & metaphorica , quomodo Scriptura dicitur manus , quia est à manu : & sermo lingua , quia à lingua procedit. Sic fomes peccati , & concupiscentia vocantur lex , quia sunt effectus Divinæ Legis , secundum quam homo propter peccatum originale justissime privatur rectitudine , in qua conditus fuerat : *quam sarcinam* , inquit S. August. *prementem & urgentem ideo legem appellat ; quia jure supplicii divino judicio attributa & imposita est*.

Q. 5. *Quid est lex strictè & proprie sumpta ?*

Y 2

R. Est



R. Est regula morum, secundum quam aliquis inducitur ad bonum, & retrahitur à malo. Ergo lex propriè dicta non competit creaturis irrationabilibus & inanimatis, quia non sunt capaces obedientiæ: nec ad præceptum iniquum transferri potest; quia hujusmodi præceptum non est regula morum, sed deviatio à regula. Unde S. August. Lib. 1. de lib. arbitr. cap. 5. sic habet: *mihi lex esse non videtur, quæ iusta non fuerit.*

## CAPUT II.

### De Definitione Legis.

Q. 1. *Quomodo Lex definitur?*

R. Definitor, rationis ordinatio stabilis, ad bonum publicum, promulgata ab eo, qui curam habet communitatis cum intentione obligandi subditos.

Dicitur 1. *rationis ordinatio*; quia lex est actus prudentiæ, quo Legislator membra Reipublicæ inter se componit, & aptis mediis dirigit ad suum ultimum finem. *Lex*, inquit Cicero Lib. 2. de Legibus, *est recta ratio in iubendo & vetando.* Et 1. Ethic. cap. 9. dicitur *sermo ab aliqua prudentia & mente profectus.*

Ergo lex est actus intellectus, cum sit iudicium practicum dictans subditis hæc esse vel facienda, vel fugienda.

Dices: Lex est præceptum & jussio: atqui præceptum & jussio pertinent ad voluntatem: Ergo lex est actus voluntatis.

Distinguo minorem ad mentem S. Thomæ cit. art. 1. ad tertium. Præceptum & jussio pertinent

ment ad voluntatem præsuppositivè , Concedo : formaliter, Nego minorem. Namque lex est actus prudentiæ; prudentia autem est virtus intellectus; necessariò tamen præsupponit in voluntate intentionem finis; quia prudentiæ est, ordinare media ad finem consequendum, v. g. ad bonum commune procurandum; sed media non quærentur, nisi finis, nempe bonum commune efficaciter intendatur, ac proinde intellectus à voluntate moveri debet ad ferendam legem; & ideo voluntas Principis dicitur à Jurisperitis habere legis vigorem. Porro ex duplici illo actu, scilicet intellectus & voluntatis, qui ad legem faciendam concurrunt, Lex in Scripturis vocatur lux, lucerna, Dei voluntas, Prov. 6. vers. 23. *Lex lux.* Psalm. 118. *Lucerna pedibus meis verbum tuum & lumen semitis meis.* Psalm. 102. *Notas fecit vias suas Moysi, & filiis Israel voluntates suas,* id est, Leges. 2. Mach. 1. *Det vobis cor omnibus, ut colatis eum & faciatis ejus voluntatem.*

Dicitur 2. *Stabilis & perpetua*, hoc est, non ad tempus, sed in perpetuum duratura, nisi abrogetur: quo differt lex à mandato vel præcepto, quod non est ita firmum & stabile; & ratio est, quia præceptum non solet dirigi; nisi ad privatas personas, aut familiam, quæ successu temporis extinguitur: Lex verò imponitur toti communitati, quæ nunquam interit.

Ergo lex ligat non solum præsentem, sed & eorum successores, non verò præceptum, aut mandatum.

Ergo defuncto Episcopo, statuta ejus obligant, quamdiu non revocantur à successore. Secus sentiendum de ejus mandatis, quæ non sunt lata per modum legis aut statuti.

Dicitur 3. *ad bonum publicum*; quia potestas legislativa est à Deo, Rom 13. v. 1. & Principibus five Ecclesiasticis, five Politicis concessa, non in eorum privatam utilitatem, sicut potestas dominativa domini in servum & rem domesticam; sed in totius Reipublicæ ædificationem, 2. Cor. cap. 10. v. 8. turpe enim est totum ad partem referri, cum pars naturaliter ordinetur ad totum. Unde Aristoteles Lib. 4. Ethic. cap. 1. scribit, leges ad Rempublicam accommodandas, non Rempublicam ad leges. Additque l. 8. c. 10. in hoc differre tyrannum à Rege, quòd ille propriam, hic communem utilitatem quærat.

Ergo vera lex non est, nec ligat subditos, quæ Juri naturali five divino contraria est.

Dices 1. cum Machiavello, & aliis Pseudo-Politicis: finis in practicis habet rationem principii, ad quod reduci debent omnes leges: atqui publica tranquillitas, & temporalis felicitas est finis regiminis politici: ergo ad eam reduci debent omnes leges civiles. Porro Religionis præcepta, & honestatis regulæ non modò ad pacem conciliandam, aut conservandam reduci non possunt, quin aliquando ei adversantur: ergo Princeps Politicus hujusmodi præceptis non astringitur.

Distinguo minorem: Temporalis felicitas est finis proximus Reipublicæ, Concedo: finis ultimus, Nego minorem. *Felices Imperatores eos dicimus*, ait S. Augustinus Lib. 5. de Civ. Dei cap. 24. *si justè imperant . . . si suam potestatem ad Dei cultum maxime dilatandum, majestatis ejus famulam faciunt.*

Ad subsumptum respondeo. Solus impius & Atheus dixerit veræ Religionis præcepta, & honestatis regulas publicæ tranquillitati obesse, idem enim

enim est ac si dicatur, non est Deus, qui curet res humanas; aut, Sapientiæ æternæ præferenda est sæculi prudentia, & vitium virtuti; quam impietatem exhorruerunt ipsi Gentiles, qui docent Legislatoris scopum esse, facere bonos cives, 2. Ethic. capit. 1. & Lib. 1. Digest. de Justitia & Jure: *Justitiam colimus, licitum ab illicito discernentes, bonos non solum metu posnarum, sed etiam exhortatione præmiorum efficere cupientes.*

Instabis: si potestas civilis habet cultum Dei, & beatitudinem æternam pro fine, non distinguetur à potestate Ecclesiastica: falsum consequens; Deus enim voluit utramque distingui: ergo & anteced.

Nego sequelam majoris. Quia utraque potestas diversis mediis ad unum & eundem finem tendit: civilis quippe Deo servit in administratione rerum terrenarum; Ecclesiastica verò in dispensatione rerum spiritualium, *arma militiæ nostræ*, inquit Apostolus 2. Cor. 10. *non carnalia sunt, sed potentia Deo.*

Ergo materia Legum Canonicarum sunt res spirituales, Civilium verò res temporales, quemadmodum S. Athanasius monet Imperatorem Constantinum in sua Apologia, his verbis: *Tibi Deus imperium commisit, nobis quæ sunt Ecclesiæ concredidit; neque enim fas est in terris nos imperium tenere, neque tu thymiamatum & sacrorum potestatem habes.*

Sæculi tamen Principes, uti Ecclesiæ defensores & protectores, curare possunt & debent, ut Ecclesiasticæ Leges observentur. Unde Leo Magnus ad Leonem Imperatorem sic scribit Ep. 73. *Debes incunctanter advertere, regiam potestatem tibi non solum ad mundi regimen, sed maximè ad Ecclesiæ præsi-*



*dium esse collatam , ut ausus nefarios comprimendo , & quæ bene sunt statuta defendas & veram pacem , his quæ sunt turbata , restituas.*

Dices 2. Si de essentia legis sit , ut feratur in bonum publicum, sequitur, non esse obtemperandum legibus , quamdiu de recta Legislatoris intentione non constiterit.

Nego sequelam : tum quia præsumi debet recta Legislatoris intentio , si opus ab eo præceptum sit justum , & Reipublicæ utile : tum quia rectitudo in mente Legislatoris non pertinet ad essentiam legis , sed sola bonitas operis injuncti ; nam ex S. Aug. Lib. 1. de libero arbitr. cap. 5. *Si ille cum aliqua libidine hoc statuit , non ex eo fit , ut ei legi cum libidine obtemperare necesse sit ; quia bona lex à non bono ferri potest.*

Instabis : atqui leges tributorum non sunt in bonum publicum , sed in privatum Principis commodum : ergo non sunt veræ leges.

Nego subsumptum ; quia Princeps hîc non spectatur ut privata persona , sed ut caput Reipublicæ , quam administrare non potest sine magnis expensis. Quare Reipublicæ interest , ut ærarium Principis sit locuples , quantum necesse est ad publica onera sustinenda.

Dices 3. hæc definitionis particula subditorum inobedientiam fovet , & ad seditionem inducit ; familiare quippe est subditis , conqueri se gravari legibus superfluis & iniquis : Ergo hæc particula ex definitione legis est delenda tanquam publicæ tranquillitatis perturbativa.

Nego antecedens ; namque 1. non ex vulgi opinione , sed ex sapientum judicio æquitas legum pensanda est. 2. In dubio , sitne lex justa

an injusta, utilis an superflua, præsumptio esse debet pro Legislatore; quia, ut jam dictum est, in dubiis melior est conditio possidentis: atqui superior est in possessione regendi subditos: ergo in hoc dubio non est ei deneganda obedientia. *Imperfecti cordis*, inquit sanctus Bernardus Lib. 1. de Præcept & Disp. cap. 10. *& infirmæ prorsus voluntatis indicium est, malè suspicari de omni præcepto, cujus causa latuerit: nec unquam libenter obedire, nisi cum audire contigerit, quod fortè libuerit, aut quod non aliter licere, seu expedire monstraverit, vel aperta ratio, vel indubitata auctoritas. Delicata satis, imò nimis molesta est hujusmodi obedientia.* Et hæc responsio maximè locum habet in Politicis, ubi consilia & motiva, propter quæ leges feruntur, occulta esse debent, juxta illud Tob. 12. *Sacramentum Regis abscondere bonum est.* 3. Quamvis leges nonnunquam habeant aliquid iniqui respectu unius aut alterius privati, justæ nihilominus censendæ sunt, cum toti communitati expediunt. Si enim Medicus laudatur, dum secundum suæ artis regulas membrum aliquin sanum cauterio inurit, ut totius corporis salutem consulat: quidni & Legislator, qui lege sua nonnullos gravat ex necessitate procurandi boni publici? quamquam in hujusmodi circumstantiis sublevari soleant dispensationis beneficio, ut infra explicabitur.

Idem à fortiori dicendum, quando lex per se communitati necessaria, aut admodum utilis, quibusdam inutilis & superflua existit, pertinet enim ad bonum commune, ut pars toti se conformet.

Dices: cessante fine Legis, ipsa quoque Lex cessare dicitur: ergo privatus non tenetur parere Legi, quando est ipsi inutilis.

Distinguo anteced. Cessante universaliter, & respectu totius communitatis, Concedo: cessante duntaxat respectu quorundam, Nego antecedens. Responsio elucidatur sequentibus exemplis.

Apostoli Act. 15. præceperunt, ut Gentiles recens ad fidem conversi, abstinerent à suffocato & sanguine, eo scilicet fine, ut Judæi, qui ab esu sanguinis prorsus abhorrebant, facilius cum Gentilibus in unum corpus coalescerent. Cum autem finis ille à pluribus sæculis evanuerit, lex quoque Apostolica desit, utpote jam toti Ecclesiæ inutilis. Contra verò licet statutum, quo cavetur, ne Clerici in tabernis comedant extra casum peregrinationis, idque ad evitauda gravia scandala, quæ inde oriri solent, non videatur ullius utilitatis respectu Clerici, qui à tabernario amico, fortè etiam consanguineo, invitatus apud ipsum pranderet secluso scandalo, & servatis temperantiæ honestatisque legibus: respectu tamen illius vim legis habet; quia finis illius statuti in tota Diœcesi subsistit, rectusque ordo postulat, ut pars toti cohæreat, privatusque ille Clericus à communi disciplina non recedat.

Dicitur 4. *promulgata*, id est, enunciata & intimata; regula enim morum innotescere debet, quod fit per promulgationem.

Utrùm autem promulgatio sit de essentia legis, dissentiunt Theologi; alii affirmant; quia ex c. *In istis* dist. 4. *Leges instituuntur, cum promulantur*. Alii negant, contenduntque, promulgationem esse conditionem, sine qua non; quia applicatio regulæ non constituit regulam, sed supponit constitutam; atqui per promulgationem lex tanquam regula applicatur, & intimatur subditis: ergo  
intima-

intimatio illa, seu promulgatio non pertinet ad essentiam legis.

Verum etiamsi ante promulgationem innotescat subditis quid Princeps decreverit, illud tamen decretum non habet rationem legis & regulæ observandæ. Post promulgationem verò tale decretum vim habet obligandi subditos, etiam eos, ad quos ejus notitia nondum pervenit; nam ex cap. *Ad hæc*, de Prælatorum postulatione, necessarium non est promulgationem fieri singulis personis: ergo promulgatio Legem perficit, ac proinde est de ejus essentia.

*Quomodo Lex promulgata habet vim obligandi illos, qui eam ignorant?*

R. Quatenus cogit subditos diligentiam adhibere ad illius notitiam assequendam, reosque constituit, qui illam transgrediuntur ex ignorantia vincibili; quod de Lege nondum promulgata dici nequit.

Dicitur 5. *Ab eo, qui curam habet communitatis.* Quibus verbis duo designantur in Legislatore necessaria. Primum, ut sit superior; quia omnis lex est præceptum, quamvis non omne præceptum habeat rationem legis, ut jam observavimus: atqui solus superior præcipere potest: ergo. Secundum, ut jurisdictionem exterioriorem habeat, hoc est, ut præsit communitati perfectæ, jussive habeat illam regendi.

*Quid est communitas sive perfecta, sive imperfecta?*

R. Perfecta est ea, quæ sibi sufficit ad assequendum finem, ad quem instituta est: imperfecta verò, quæ sibi non sufficit. Hinc regnum, & civitas sui juris, sunt communitas perfecta; quia sibi sufficiunt ad conciliandam & conservandam  
pacem,



pacem, quæ est finis illarum; Magistratus constituunt, qui Cives in ordine contineant, inquietos coerceant, & pestiferos puniant.

Ecclesia quoque, & Diœcesis sunt communitas perfecta; subditis enim suppeditant media ad beatitudinem supernaturalem, quæ est finis spiritualis ordinis; Ministros ordinant, idoneos Pastores præficiunt, controversias nascentes dirimunt, inobedientes & contumaces spirituali gladio excindunt. Familiæ verò, Collegia, & Parochiæ sunt communitates imperfectæ; quia nec firma pace gaudere, nec salutis æternæ consulere valent, nisi aliunde adjuventur. Paterfamilias à molestis & importunis vicinis non liberabitur, nec in furem domesticum aut in filium degerem animadvertet pro gravitate culpæ, sine Magistratus politici auxilio. Parochus quoque non potest consecrare sibi Coadjutores aut Successores; caret foro externo, in quo pestilentes comprimantur & puniantur; sed ad Episcopi auctoritatem & iudicium recurrat necesse est. Idem dicendum de Moderatore Collegii. Ergo nec paterfamilias, nec Parochus, nec Collegii Superior leges condere possunt.

Dicitur 6. *cum intentione obligandi subditos*, ut distinguatur lex à consilio, quod dari potest æqualibus ac Superioribus, nec per se ullam inducit obligationem. Lex verò, cum præceptum contineat, non imponitur nisi inferioribus & subditis.

Q. 2. *Omnis lex obligatne in conscientia, & sub peccato?*

R. De Lege naturali & divina positiva nullum potest esse dubium; ait enim Apostolus Rom. 2. Gentiles

Gentiles, qui Legem naturalem, & Judæos, qui scriptam transgrediuntur, perituros. Et ratio est, quia utriusque Legis transgressio est vera Dei offensa, cum pugnet contra divinam ejus voluntatem; nam, ut argumentatur Tertullianus Lib. i. contra Marcionem c. 26. *Deus necessariò offenditur factò, quod non vult fieri; cum offensa sit comes frustratæ voluntatis, si offenditur, debet irasci: si irascitur debet ulcisci: nam & ultio fructus est iræ, & ira debitum offensæ, & offensa ut dixi, comes frustratæ voluntatis.*

Controversia est duntaxat Catholicos inter & Heterodoxos, num Lex humana obliget in conscientia & sub peccato? Hi quippe absolutè negant; illi verò affirmant, cum quibus sit nostra responsio.

R. Lex humana obligat in conscientia & sub peccato quandoque etiam mortali.

Probatur 1. ex Scriptura Matthæi 18. *Si Ecclesiam non audierit, sit tibi sicut Ethnicus & Publicanus.* Luc. 10. *Qui vos audit, me audit.* Rom. 13. *Qui resistit potestati, Dei ordinationi resistit. Qui autem resistunt, ipsi sibi dominationem acquirunt. Ideo necessitate subditi estote, non solum propter iram; sed etiam propter conscientiam.* 2. Petri 2. *Subditi estote omni humanæ creaturæ propter Deum . . . . . quia sic est voluntas Dei.*

Probatur 2. ex censuris Summorum Pontificum Alexandri VII. Innocentii XI. & Cleri Gallicani, qui sequentes propositiones damnarunt: *Præceptum servandi Festa non obligat sub mortali. Frangens jejunium Ecclesiæ, ad quod tenetur, non peccat mortaliter. Populus non peccat, etiamsi absque ulla causa non recipiat legem à Principe promulgatam. Subditi possunt justa tributa non solvere.*

Proba-

Probatur 3. ratione duplici. Prima in communitatibus imperfectis, præceptum Superioris obligat sub peccato, Ephes. 5. *Mulieres viris suis subditæ sint sicut Domino.* Et cap. 6. *Filii, obedite parentibus vestris in Domino, hoc enim justum est. Servi obedite dominis carnalibus . . . . sicut Christo, non ad oculum servientes . . . . sed ut servi Christi, facientes voluntatem Dei ex animo . . . . scientes quoniam unusquisque, quodcumque fecerit bonum, hoc recipiet à Domino.* Ergo à fortiori in communitatibus perfectis (in quibus major est potestas) lex obligat sub peccato. Secunda, peccat qui transgreditur Legem naturalem & divinam: atqui transgreditur Legem naturalem & divinam, qui transgreditur humanam; ait enim Dominus, *qui vos audit, me audit.* Unde S. Bernardus Lib. de Præcept. & Disp. c. 8. & 9. ait: *Discretio est in mandatis, consequenter & in culpis, ut majorum gravior, leviorque minorum censeatur transgressio mandatorum, sed mandantium non ita; sive enim Deus, sive homo Vicarius Dei mandatum quodcumque tradiderit, pari profectò obsequendum est cura, pari reverentia deferendum; ubi tamen Deo contraria non præcipit homo.*

Dices 1. Ex hac doctrina duo sequuntur absurda. Primum, inferiorem posse obligare in foro superioris; conscientia quippe est forum Dei proprium, utpotè qui solus scrutetur renes & corda. Secundum, homines posse ligare ad pœnam, putà æternam, quam nec infligere nec solvere possunt, cum tamen ejusdem sit ligare & solvere.

Distinguo sequelam, inferiorem, ut superioris ministrum & auctoritate ejus munitum, Conc. Inferiorem independentem à voluntate & auctoritate Superioris, Nego sequel. Enimverò sicut in poli-

politicis Princeps vult eos morte plecti, qui in re gravi imperium ministri sui contempserunt, quamvis ipse minister tantam pœnam nec inferre, nec solvere possit: sic Deus æternæ damnationi obnoxios reddit, qui jussis vel parentum, vel Pastorum, vel Principum non obtemperant.

Ergo falsa est recentiorum quorundam doctrina, & à Clero Gallicano damnata anno 1700. legem humanam non præcipere actus interiores, v. gr. attentionem in precibus, hac ratione ducti, quòd potestas humana de internis judicare non possit; nam Lege naturali & divina tenentur filii obedire parentibus, servi dominis, plebs Pastori & Principi: atqui nulla est obedientia, nisi sit voluntaria, ut docet S. Bernardus Serm. 41. de diversis, ubi sic habet: *Quamlibet grave sit (suam relinquere voluntatem) non potest tamen primum obedientiæ ascendere gradum, qui voluntatem præcipientis suam non fecerit. Undè voluntariè, inquit, sacrificabo tibi. Sola ergo voluntas est, quæ totius operis ornat effectum, sine qua etiam nec bene aliquid agitur, etiamsi bonum esse videatur. Ex voluntate igitur suscipienda sunt imperia Prælatorum, & ipsum cor à suis voluntariis reflexionibus abducendum, donec propria voluntas mactata mandatum dirigat imperantis.*

Dices 2. Sequeretur omnia præcepta humana esse Juris naturalis & divini. Falsum consequens, ergo & antecedens.

Distinguo majorem: Esse Juris naturalis, & divini remotè, Concedo: Lex enim naturalis, & divina dictant obediendum esse justis Superiorum mandatis: esse Juris naturalis & divini proximè, Nego majorem: Non enim est Juris naturalis, aut divini, quòd hæc mulier matrimonium contrahat cum



cum tali viro ; quòd famulus locet operas suas huic diviti , quòd privatus vendat agrum suum ; quòd Ecclesia venationem Clericis prohibear : hæc quippe omnia sunt Juris merè humani. Sed præsuppositis hujusmodi contractibus , aut legibus , Jus naturale & divinum cogit servare leges , contractus , & præceptum Superioris adimplere.

Ergo , inquires , vera erit Gersoni doctrina l. de Vita spiritali lect. 4. nempe leges humanas non obligare in conscientia , nisi quatenus sunt determinationes Juris naturalis & divini.

Distinguo sequel. Quatenus sunt determinationes , vel propriè , vel impropiè , Concedo : Quatenus sunt determinationes propriè & strictè loquendo , Nego sequel.

Lex humana propriè est determinatio Legis Divinæ , quando Lex Divina præfixit aliquod opus in particulari , putà Sacramentalem Confessionem , Eucharistiæ perceptionem , ita tamen , ut Ecclesiæ determinandum relinquat modum & tempus , quibus illud opus perfici debeat , v. g. quoties , & quando Confessio Sacramentalis sit facienda , aut Eucharistia percipienda.

Tum verò lex humana impropiè dicitur determinatio Legis naturalis & divinæ , cum ea opera injungit , quæ Lex naturalis aut divina non præscribit , qualia sunt jejunium quadragesimale , abstinencia à carnibus qualibet feria sexta , recitatio Horarum Canonicarum , & alia hujusmodi , quæ accedente & mediante Legislatoris voluntate determinant naturale ac divinum illud præceptum , *obedite præpositis vestris* , Hebr. 13.

Porro sententia Gersoni priori sensu intellecta , falsa est , & omninò rejicienda , ut patet tum ex  
laudatis

laudatis Scripturæ textibus, tum ex constanti Ecclesiæ Traditione, quæ multa sub gravibus pœnis sanxit, de quibus nullum extat divinum præceptum. Posteriori verò sensu verissima est quia ad Superioris jussionem, si Deo contraria non sit divinum præceptum semper accedit.

Q. 3. *Unde colligi potest Legem sive divinam, sive humanam obligare sub mortali peccato?*

R. Ex materiæ gravitate. Namque vis & efficacia Legis pendet ex voluntate Legislatoris, qui alia plus, alia minus expetit: atqui certum est quòd voluntas recta, qualis agnoscitur in Deo, & supponitur in homine Legislatore, magis expetat servare ea, quæ sunt graviora, ac proinde magis offendi, & severius ulcisci, si ea negligi contingit; quia ex Tertulliano supra laudato, offensa est comes frustratæ voluntatis. Ergo transgressio Legis tum divinæ, tum humanæ in materia gravi, est culpa lethalis; in materia verò levi venialis duntaxat, modo tamen absit contemptus; nam ex S. Bernardo, Lib. de Præcep. & Disp. cap. 8. *Ubique culpabilis neglectus, & contemptus damnabilis.*

Dices 1. Si peccatum ex contemptu sit mortale & damnabile, sequitur, nullum esse peccatum leve; quia omne peccatum procedit ex aliqua negligentia & incuria: atqui omnis negligentia est contemptus; si enim subditus reveretur, ut par est, Superioris mandatum, promptè & alacriter obtemperaret: Ergo.

Nego sequelam: Cujus confirmationis distinguo minorem; omnis negligentia est contemptus materialis & interpretativus, Conc. est contemptus formalis, Nego min. Differunt autem

*D. Habert Theolog. Tom. III.*

**Z**

negle-

neglectus & contemptus, ex sancto Bernardo citato cap. 8. *Quodd neglectus languor inertiae est, contemptus vero superbiae tumor*: hoc est, subditus nonnunquam negligit mandatum, vel quia leve est, vel si grave, quia difficilius, & repugnans naturae corruptae; ideoque in minimis non acquiescit, linguam, v. gr. solvit in vaniloquium aut mendacium officiosum: in gravioribus vero segnius se gerit; & in alterutro casu non commodam Superiori reverentiam exhibere videtur. Qui reverentiae defectus dicitur contemptus materialis & interpretativus. Cum autem ex odio & displicentia personae praecipientis non vult acquiescere, & elata mente contra ejus auctoritatem rebellat, tum est contemptus formalis, & semper damnabilis, ut disertè docet ibid. S. Bernardus his verbis: *Porro hujusmodi elatio in minimis mandatis culpam facit non minimam, & convertit in crimen gravis rebellionis naevum satis levem simplicis transgressionis. Non est enim idipsum nolle obedire, & non obedire. Hoc quippe interdum erroris est, nonnunquam & infirmitatis: illud vero aut odiosae pertinaciae, aut contumaciae non ferendae; quia licet illud posterius Legislatorem deprimit, & ejus auctoritatem minuit, quod gravissimum est, & damnabile.*

Dices 2. Prævaricatio Adæ, sicut & Israëlitæ ligna colligentis die Sabbati, Num. 15. fuit lethalis quamvis in re levissima. Ergo levitas materiae in Lege divina non excusat à mortali. Idem videre est in Legibus humanis; nam Sacerdos, si ex proposito modicissimam aquam vino non admisceat, dum sacra peragit, reus fit peccati mortalis secundum communem sententiam: suspensionem quoque incurrit, si contra Diœce-

seos

seos statutum in taberna epuletur, etiam servatis temperantiæ & honestatis Legibus. Denique Miles, qui inconsulto Præfecto è castris egreditur, eo ipso morte plectendus judicatur. Ergo ex levitate, aut gravitate materiæ non colligitur, an peccatum sit mortale, aut veniale.

Distinguo consequens, ex levitate materiæ secundum se spectatæ, Concedo; ex levitate materiæ spectatæ per ordinem ad finem & circumstantias, Nego consequentiam. Itaque materia, in qua Lex versatur, ponderanda est ex fine & circumstantiis, ex quibus sæpè evadit gravissima, ut patet in allatis exemplis. Lex quippe abstinendi à ligno scientiæ boni & mali, habuit pro fine testificationem humanæ subjectionis ad Deum; & mixtio aquæ cum vino in sacris Mysteriis præcipitur ad significandam unionem Fidei cum Christo, simulque denotandam integram Sacrificii hostiam ex capite & membris, quæ duo sunt quid gravissimum. Prævaricatio quoque tum Israëlita, tum Sacerdotis, tum Militis in propositis exemplis, magna post se traheret incommoda, & necessariam disciplinam subverteret, nisi severè corripereetur. Sed quia privati ista perpendere non valent, nec satis Legislatoris mentem assequuntur, Legislator pœnas decernit transgressoribus, quarum gravitas certè demonstrat materiæ & peccati gravitatem.

Quæ cum sint certa & indubitata; omninò cavenda est, quam non semel experti sumus in Parochis benemultis, & aliis Clericis perniciofa securitas, qua sine Dei timore, sine gehennæ metu, promulgata Prælati mandata, & statuta nihili pendunt, vel ad summum reputant veluti monita



& confilia, quæ negligentibus obesse nequeunt, observantibus verò plerumque in opprobrium vertuntur, quasi sua sedula obedientia Prælati favorem fratrum suorum dispendio ambitiosè quærant. Quo fit, ut Prælati labores pro stabilienda, vel restituenda Diœceseos disciplina, prorsus fiant irriti, subordinatio à Christo instituta inter Prælatos majores & minores planè solvatur, & inobedientes quotidianis prævaricationibus contemptum addentes usque ad mortem miserabiliter pereant. Nempè, ut sæpiùs inculcat sanctus Bernardus laudato opere: *Toties Deo resistere convincuntur, quoties ejus, qui pro Deo ipsis præest hominis mandatum prætergrediuntur, contestante Apostolo, qui hæc spernit: non hominem spernit sed Deum. I. Thes. 4. & iterum, qui potestati resistunt, ipsi sibi damnationem acquirunt, Rom. 13.*

Contra hanc fundatissimam doctrinam opponere solent araneorum telas, nempe statuta illa non fuisse ab omnibus acceptata, acceptationem verò secundum plures Theologos non minùs pertinere ad rationem Legis, quàm promulgationem, quod nobis jam incumbit examinandum.

## CAPUT III.

### De Legis acceptatione.

Q. *Acceptatio Legis estne necessaria, ut vim habeat obligandi?*

Primò, certum est Legem naturalem non pendere ab acceptatione. Quia Lex naturalis, ut infra dicetur, nec prohibet, nisi ea quæ per se mala sunt, ut mendacium; nec jubet nisi necessaria,

ria, quæ sine peccato omitti nequeunt, ut amor & cultus Dei, pietas erga parentes; ac proinde peccat quisquis Legi naturali reluctatur.

Secundò, certum est, Legem divinam positivam vim habere independentem à populi consensu; quia nulla creatura jus habet contradicendi & resistendi Deo, qui habet imperium absolutum & illimitatum.

Tertiò, certum est, ad Legem humanam satis esse, si acceptetur à primatibus, & saniori parte communitatis, nec requiri, ut à singulis recipiatur, alioquin nullæ essent Leges humanæ, cum in communitate perfecta nunquam desint flagitiosi & contumaces, qui, quantum in ipsis est, omnem disciplinam abjiciunt.

Quartò, denique certum est, in regimine Monarchico, quod habet admixtum Aristocraticum, ut in Imperio Romano, in quo Principes, quamvis Imperatori subordinati, proprio tamen nomine & jurisdictione ordinaria dominantur in sua ditione, Leges juribus & moribus hujusmodi populorum contrarias non obligare, nisi ab ipsis acceptentur: quia supremus Monarcha, nimirum Imperator non habet omnimodam auctoritatem, sed ad eos casus limitatam, in quibus agitur de totius Imperii unitate servanda, & pace vindicanda.

Controversia itaque solum esse potest, num ad Legem humanam requiratur consensus sanioris patris communitatis, vel immediatè subditæ, ut Diœceseos Episcopo, vel sub regimine purè Monarchico constitutæ.

R. Verior videtur eorum Theologorum sententia, qui asserunt, Legem humanam habere vim obligandi independentem ab acceptatione.

Probatur; Quia ex dictis Lex est præceptum: atqui nisi Lex obligaret subditos ad sui acceptationem, jam non esset præceptum, sed consilium: Ergo. Deinde si Leges humanæ vim & efficaciam acciperent à subditorum consensu, potestas Legislativa minùs esset penes superiorem, quàm penes subditos. Iste enim subministraret duntaxat materiam Legis eo ferè modo, quo Consiliarii Regii suggerunt quæ expedire videntur ad regimen politicum; subditi verò sua approbatione votis superioris annuentes tribuerent vim & efficaciam obligandi, in qua consistit Legis forma & essentia. Denique quia Alexander VII. & Clerus Gallicanus anno 1700. sequentem propositionem quorundam Modernorum damnarunt uti scandalosam, seditiosam, & Apostolicæ doctrinæ contrariam, *populus non peccat, etiamsi absque ulla causa non recipiat Legem à Principe promulgatam.*

Dices 1. Cap. *In istis*, dist. 4. habetur: *Leges instituuntur, cum promulantur & firmantur, cum mores utentium approbantur.* Ergo ad Legem requiritur consensus communitalis.

Distinguo anteced. Firmantur, id est, firmiter permanent, nec abeunt in dissuetudinem, sicut contingit ubi subditi contradicunt, Concedo: Firmantur, id est, non habent vim obligandi, nisi recipiantur, Nego anteced. Nam in prima canonis parte expressè dicitur Leges promulgatione institui: Lex autem non est instituta, nisi habeat vim obligandi, ut patet in ejus definitione.

Ergo

Ergo peccant qui sine justa causa Legi promulgatæ primi contradicunt, resistunt enim potestati obedientiam exigenti.

Dixi, qui primi contradicunt. Primò, quia licet cum debita reverentia Principi exponere, si quæ prævideantur ex Lege incommoda secutura, & interim executionem differre. Secundò, quia cum Superior Legi à se latæ non insistit propter subditorum resistantiam, præsumitur acquiescere, ut effectui careat; cum enim Lex feratur in bonum publicum, optimi Principis est obligationem relaxare, cum videt Legem à se latam pacem turbare, & vergere in boni publici detrimentum.

Dices 2. Qui præest communitati, auctoritatem suam habet à populo: ergo non potest illum obligare, nisi consentiat.

Respondeo 1. negando absolutè antecedens. Namque 1. Prælati Ecclesiæ à Deo sunt instituti, Ephes. 4. vers. 11. *Ipse (Christus) dedit quosdam quidem Apostolos . . . . alios autem Pastores & Doctores*, quibus dixit Matth. 18. vers. 18. *quæcunque alligaveritis super terram, erunt ligata & in cælo*. Secundò Principibus quoque politicis dicitur, Sap. 6. vers. 4. *Data est à Domino potestas vobis, & virtus ab Altissimo*. Enimverò electio Principis politici est quædam determinatio juris naturalis; quia, ut advertit S. Thomas 1. part. quæst. 97. art. 4. *Homo naturaliter est animal sociabile: sociabilis autem vita multorum esse non posset nisi aliquis præsideret, qui ad bonum commune intenderet: multi enim per se intendunt ad multa, unus verò ad unum*. Ergo populi ex Dei ordinatione præficiunt sibi Principes & Duces, juxta illud Rom. 13. *Non est . . . . . potestas nisi à Deo*. Sed transeat antecedens.



Respondéo 2. Negando consequentiam; Quia etsi quis ex libera electione addicat se famulatum alterius; ex illo tamen contractu tenetur præceptis ejus obtemperare: ergo & communitas, quæ elegit sibi Principem.

## CAPUT IV.

### De Subjecto Legis.

Q. 1. *Quinam Legibus astringuntur?*

R. Omnes & soli adulti, si subditi sint, astringuntur Legibus quæ eos spectant. Quia illi Legibus astringi possunt, qui præcepti, & obedientiæ sunt capaces: atqui omnes, & soli adulti sunt præcepti, & obedientiæ capaces; Ergo

Dixi 1. *Si subditi sint*; Quia ex definitione Legis constat, Superiorem non posse præcipere nisi subditis.

Dixi 2. *Quæ eos spectant*; Quia Leges non semper diriguntur ad singula communitatis membra; aliæ enim spectant Clericos, aliæ Laicos: aliæ Nobiles, aliæ Milites, &c.

Dices: Parvuli tenentur Lege Baptismi: ergo non soli adulti Legibus astringuntur.

Distinguo anteced. Tenentur quatenus Baptismus spectatur ut medium, sine quo nec remissionem peccati originalis, nec beatitudinem consequi possunt, Concedo: Quatenus Baptismus est Lege præceptus, Nego antecedens: Duplex itaque est Baptismi, sicut & ciborum corporalium necessitas, scilicet medii & præcepti. Necessitas medii æquè ligat parvulos ac adultos; quia parvuli

vuli æquè ac adulti nec vitam æternam sine Baptismo obtinere, nec vitam corporalem sine ciborum usu conservare possunt. Necessitas verò præcepti adultos duntaxat astringit, eosque solos constituit reos, si vel Baptismum negligant, vel omnem cibum respuant.

Ergo non peccant parentes, qui diebus jejunii carnes ministrant parvulis, qui nondum rationis sunt compotes.

Ergo omnes adulti, etiam infideles non baptizati, tenentur Lege Baptismi, & aliis Evangelicis præceptis; quia subditi sunt Deo, qui omnibus divinam illam Legem imposuit

Ergo iidem infideles non ligantur Ecclesiæ Legibus, quia Ecclesiæ non subjacent: *Quid enim mihi de iis, qui foris sunt, judicare;* inquit Apostolus, 1. Cor. 5. v. 12.

Ergo Leges civiles obligant Clericos (salvo tamen illorum privilegio) quia subsunt Principi politico, ut partes communitatis, cui præest: *Omnis anima potestatibus sublimioribus subdita sit,* Rom. 13. in quem locum Theodoretus sic scribit, & Sacerdos, & antistes, & monasticam vitam professus, iis debent parere, quibus demandati sunt principatus.

Dices 1. Lex vetus, quamvis esset à Deo, Gentiles tamen non astringebat: ergo neque Lex nova, seu Evangelica infideles non baptizatos.

Nego consequent. Quia Lex vetus solis Judæis fuit imposita, Deut. 4. *Quæ est alia gens tam inclyta, quæ habeat cæremonias ac justa judicia?* At Lex nova pro omnibus lata est; Ecclesiæ enim Christianæ dicitur, Is. 60. vers. 12. *Gens & regnum quod non servierit tibi, peribit.*

Dices 2. Omnes infideles, etiam non baptizati, tenentur Ecclesiæ Christianæ subjici, ut patet ex laudato mox Isaïæ textu: ergo æquè peccant, sive Legem divinam, sive Ecclesiasticam non observent.

Nego consequent. Quia Lex divina ad omnes gentes dirigitur, Ecclesiastica verò ad solos Christianos; neque enim Ecclesia intendit obligare infideles non baptizatos, dum aliquam Legem, v. gr. jejunii instituit.

Dices 3. Per Evangelium fideles, maximè justi, solvuntur ab omni Lege: *Nolite iterum jugo servitutis contineri; vos enim in libertatem vocati estis, fratres*, ait Apostolus, Galat. 5. ergo Christiani, præsertim justi, non astringuntur Legibus. Ita Lutherus, qui, ut refert Bellarminus, Libro 4. de Justificat. cap. 2. sic concionans exhortabatur auditores: *Caveamus à peccatis, sed multò magis à Legibus & bonis operibus, & tantum attendamus ad Dei promissionem & fidem.*

Distinguo anteced. Solvuntur à Lege veteri, à Lege carnis & peccati, Concedo: A Lege naturali, divina, & humana, in quibus præcipiuntur opera justitiæ, Nego antecedens: Ait enim Apostolus, Rom. 6. *Liberati à peccato servi estis justitiæ.*

Instabis 1. ad Tim. dicitur: *Lex justo non est posita*: ergo saltem justi non astringuntur Legibus, utpotè qui ducantur spiritu, & ad illos pertineat quod scribit Apostolus, Gal. 5. *Quid si spiritu ducimini, non estis sub Lege.*

Distinguo anteced. Lex metu cogens & pre-mens, Concedo: Lex quæ demonstrat honesta, & ad ea amore dirigit, Nego anteced. Duo itaque in

in Lege spectanda sunt. Primum, est ordinatio rationis in bonum publicum. Secundum, est vis cogendi renitentes pœnarum metu. Primum sine altero non constituit Legem, ut jam monuimus, sed merum consilium, quod justis sufficit; cum enim toto corde, quæ recta sunt, appetant, justitiamque esuriant ac sitiant, frustra Legislatores minis eos urget, sine quibus tamen impii & scelerati ad obtemperandum non adigerentur; ac proinde meritò dicitur, Legem adæquatè sumptam solis impiis esse impositam; quemadmodum dicimus, patibula & furcas non erigi pro mansuetis & pacificis civibus, sed pro homicidis & seditiosis. Sensus enim non est, quòd cives mansueti & pacifici non teneantur Legibus, quæ prohibent homicidia & seditiones; nec pœnam mortis Lege latam incurrant, si vim facientes ingentis suæ indoli sanguinem fundant innocentem, aut seditionem commoveant; sed hæc loquendi ratio innuit duntaxat, cives sic affectos homicidia & seditiones fugere independentes à Lege. Ita sancti Patres & antiquiores Theologi explicuerunt laudatos Apostoli textus, ut S. Ambrosius Lib. 3. Offic. cap. 5. *Lex, inquit, non justo est posita, sed injusto; quia justus Legem habet mentis suæ, æquitatis ac justitiæ suæ normam: ideoque non timore pœnæ revocatur à culpa, sed honestatis regula.* Et S. Anselmus in 1. ad Cor. sic scribit, *justo non est Lex posita, id est, imposita, ut supra illum sit; in illa enim est potius, quàm sub illa, quia non sua vita vivit, cui coercendæ Lex imponitur: injustus verò sub illa est, quia sua vita vivit, cui coercendæ Lex imponitur.* Denique S. Thomas in eundem locum, *si omnes essent justii, nulla necessitas esset dandi Leges, quia omnes essent sibi Lex.*



Q. 2. *Peregrini tenenturne propriis suæ patriæ Legibus?*

R. Non tenentur, nisi absint in fraudem, primò, si peregrini diversentur extra Legislatoris territorium, v. g. extra Diœcesim; quia Legislatoris jurisdictio extra proprium territorium non extenditur. Secundò, si Leges sint merè locales; quale esse posset Festum Patroni sub præcepto, & Lex abstinendi à carnibus; quia intentio Legislatoris limitata est ad illum locum. Unde Parochianus in alia Parochia ejusdem Diœceseos bona fide existens, non tenetur observare Festum & abstinentiam, si ibidem non sint in præcepto.

Ergo, inquires, Sacerdos, cui in sua Diœcesi absolutè & illimitatè sub pœna suspensionis interdicitur sacri Ordinis usus, in alia Diœcesi sacerdotalia munia obire poterit. Item Parochus è Diœcesi absens, & civis è regno, non tenentur parere sive Episcopo, sive Regi eos revocantibus.

Nego sequelam. Quia in primo exemplo Sacerdos jam erat præcepto ligatus, antequam egrederetur. In secundo verò exemplo Parochus & civis residere tenentur, ille in Parochia sua, iste in regno, peccaruntque eò ipso, quò contra Superioris voluntatem recedere præsumpserunt, ideoque cogi possunt ad redeundum. Adde hujusmodi peccare, vel contra jus naturale & divinum, quo Pastores suo gregi invigilare tenentur, vel contra jus gentium, juxta quod singuli obedientiam & reverentiam ubique debent Principi, quem origine sortiti sunt. Porrò jus naturale & jus gentium ubique obligant.

Dixi: *Nisi in fraudem absint.* Quia Lex est generalis ubique recepta & obligans, *fraus nemini patro-*

*patrocinari debet ; alioquin ordo servari non posset, si cuique liceret fugere ad eludendas Leges, quibus disciplina continetur. Ergo peccant qui eo fine aliò transmigrant, ut servilibus operibus vacent, & carnibus vescantur ibidem licitis, sed in sua Parochia prohibitis.*

Q. 3. *Advenæ subjiciuntur Legibus territorii, per quod transeunt ?*

R. Subjiciuntur ; Quia cùm eximantur à patriis Legibus, par est, ut ligentur Legibus locorum, per quæ transeunt.

Confirmatur ex capit. *In illa, distinct. 12. quod sumptum est ex Epistola 54. aliàs 118. Sancti Augustini, ubi sic scribit S. Doctor, nec disciplina ulla est in his melior gravi prudentique Christiana, quam ut eo modo agat, quo viderit Ecclesiam, ad quamcunque fortè devenerit. Refertque, hoc fuisse responsum à sancto Ambrosio datum matri suæ, ad quam fortè Ecclesiam veneris, ejus morem serva, si cuiquam non vis esse scandalum, nec quemquam tibi. Et capit. quæ contra, distinctione 8. quod excerptum est ex Lib. 3. Confess. cap. 8. ejusdem sancti Augustini, sic scribitur, quæ contra mores hominum sunt flagitia, pro morum diversitate vitanda sunt, ut pactum inter se civitatis aut gentis consuetudine, vel Legge firmatam, nulla civis aut peregrini libidine violetur. Turpis enim omnis pars est suo universo non congruens.*

Dices : Grave est, & nimis onerosum iter facientibus, si propter Festum locale sistere debeant ad audiendam Missam : Ergo.

Nego antecedens : Nam duplex potest esse præceptum locale, aliud negativum, quo prohibentur aliqui actus, v. g. esus carnum, opus servile, quod præceptum in transitu & absque mora servari potest

test & debet : aliud positivum , quo præcipitur actus, putà auditio Missæ: & ad illud præceptum implendum non tenetur peregrinus cessare ab itinere, nec ad Ecclesiam currere, si in loco quiescat ad cibum sumendum duntaxat, vel ad dormiendum summo manè profecturus. Nostra itaque responsio intelligenda est de peregrino, qui per aliquod tempus v. gr. matutinis horis moratur in oppido, in quo est dies festus; hic enim tenetur sacrum audire, etiamsi statim à prandio sit discessurus.

Q. 4. *Quid si incola propter urgentia negotia die festivo è Parochia summo mane discedit, Missam auditurus in itinere; ubi festum non est, satisfacitne præcepto?*

R. Dissentiunt Theologi. Alii negant, quia per actum non præceptum, non satisfit præcepto: atqui auditio Missæ non est præcepta in loco ubi auditur: ergo. Alii contra probabilius affirmant; quia peregrinus ille reverà ponit actum sibi imperatum: nec dici potest Legislatorem non minùs loco quàm diei præceptum affixisse, alioquin, sicut qui sacrum prætermisit die festo, audire non tenetur altero die feriali, ita, qui in propria Parochia die festo non potuerit interesse Missæ sacrificio, liber esset ab audienda Missa, quæ in altera ejusdem oppidi Parochia superest celebranda; quia festum ad illam oppidi partem non extenditur, quod videtur absurdum. Nec refert quòd locus ille Legislatoris jurisdictioni non subjacet; quia Parochianus ad illum accedit jam ligatus præcepto audiendæ Missæ.

Q. 5. *Legislator subjeciturne suis Legibus?*

Certum est, Legislatorem peccare etiam mortaliter: si in re gravi palam & publicè Legem suam

suam transgrediatur ; quia hujusmodi prævaricatio non est sine gravi communitatis offensione & scandalo , vergit in Legis & boni publici contemptum , ordinem perturbat , & audaciores efficit subditos ad non parendum ; exempla enim superioris plus movent, quàm dicta.

Tota difficultas in eo versatur , an peccet Legislator , qui Legem à se latam privatim & sine scandalo transgreditur ?

R. Communior est Theologorum sententia, illum peccare.

Probatur 1. auctoritate. Capit. *Iustum* , distinct. 9. dicitur , *Iustum est* , *Principem Legibus obtemperare suis* ; tunc enim jura sua ab omnibus custodienda existimat, quando & ipse illis reverentiam præbet. Et Capit. *Cum omnes* , tit. de Constit. sic respondet Innocentius III. Episcopò Trecensi , cum igitur quod quisque juris in alterum statuit , ipse debeat uti eo , & sapientis (Catonis) dicat auctoritas , *patere Legem , quam tu tuleris , mandamus , &c.* Sanctus quoque Ambrosius , Lib. 2. Epistolarum Epistola 13. sic alloquitur Valentinianum Imperatorem , *quodcunque præscripsisti aliis , præscripsisti etiam tibi.* *Leges enim Imperator fert , quas primus ipse custodiat.*

Probatur 2. ratione duplici. Prima, quia ex S. Augustino supra laudato turpis est pars suo universo non congruens : secunda, quia Lex fertur in bonum publicum : atqui Legislator non minus , imò multò magis quàm subditi bonum publicum curare tenetur : Ergo.

Dices 1. Legislator non habet in seipsum jurisdictionem , cum non sit seipso inferior : ergo non subjicitur suæ Legi.

Distin-



Distinguo conseq. Non subjiçitur quoad vim coactivam, Concedo: Unde non incurrit pœnas transgressoribus impositas, putà suspensionem, excommunicationem, &c. non subjiçitur quoad vim directivam, subdistinguo: non subjiçitur directè, quasi sibi ipsi imperet, Conc. Præceptum enim est superioris ad inferiorem: non subjiçitur indirectè; quatenus debet conformem se exhibere aliis communitatis partibus, & bonum publicum promovere, Nego consequent. Hoc quippe æquitas & jus naturale exigunt.

Dices 2. Legislator quemlibet ex subditis à Lege eximere potest: ergo & seipsum.

Respondeo 1. Distinguendo anteced. Eximere potest iusta de causa, & quatenus ad bonum publicum confert, Conc. Sine causa, & contra bonum publicum, Nego antec. Porro in prævum exemplum verteretur, si superior non servaret, quod ab aliis servandum præcipit.

Respondeo 2. Negando consequentiam; Quia subditus obligatur Legi ex voluntate Legislatoris; Legislator verò ex æquitate naturali, quæ non subiacet ejus arbitrio.

## CAPUT V.

### De Legis observatione.

Q. 1. *Quotuplici modo Lex observari potest?*

R. Duplici, scilicet, quoad substantiam, & quoad modum.

Lex servatur quoad substantiam, quando ponitur opus à Lege præscriptum, v. gr. quando auditur Sacrum, Eucharistia in Paschate recipitur.

Tum

Tum verò servatur quoad modum, cum perficitur opus eo modo, & cum iis, quæ decent, circumstantiis.

Tria autem à subdito expetenda videntur, ut Legem debito modo observet. 1. Ut advertat ad Legem, opereturque animo eam implendi. 2. Ut volens & minimè invitus obtemperet. 3. Ut recta sit ejus intentio, & honestum finem sibi constituat. Porro circa substantiam operis, & ejus modum, nonnulla expendenda. Itaque

Q. 2. *Circa substantiam operis, utrum per unum & eundem actum pluribus præceptis satisfieri possit?*

R. Non potest, nisi aliunde colligatur, superiorem contrarium intendere; quia superior videtur frustra imponere novam obligationem, si à subditis aliud non exigeret, quam quod jam debent vi præcedentis mandati.

Ergo, qui ex duplici justitiæ titulo, putà ex contractu mutui, & ex damno illato centum debet, creditori non facit satis, si centum duntaxat solvat; sed tenetur ducenta refundere, alioquin æqualitatem non reponeret.

Ergo Sacerdos, qui duo stipendia accepit, aut duas Capellanas possidet, quibus annexa est obligatio celebrandi, non satisfacit per unum sacrificium.

Ergo si Confessarius in satisfactionem jejunium imponat, pœnitens Confessarii præcepto non satisfaciet jejunio, quod vel ipse vovit, vel Ecclesia præcipit.

Dixi in responsione, *nisi aliunde colligatur superiorem contrarium intendere*. Namque Ecclesia concedit, ut Capellanus, qui pro unaquaque Capel-

lania Horas Canonicas recitare tenetur, una recitatione satisfaciat.

Q. 3. *Unde colligitur superiorem concedere, ut duplici præcepto per unum & idem opus fiat satis?*

R. Colligitur vel ex ejus verbis expressis; aliquando enim Confessarius v. g. pœnitenti declarat, se in satisfactionem imponere jejunia, quæ occurrunt ab Ecclesia præscripta, ea scilicet mente, ut pœnitens sensum doloris ob peccata præterita conservet, & pro iis Deo satisfacere curet: vel ex communi hominum usu & interpretatione, ut si Confessarius pœnitenti injungat audire sacrum singulis diebus per mensem, idem pœnitens non tenetur bis audire sacrum qualibet die Dominica occurrente; quia ex benigna interpretatione Confessarius præsumitur concedere, ut eodem actu duplici obligationi satisfaciat.

Q. 4. *Potestne quis eodem tempore satisfacere duplici præcepto per actus distinctos?*

R. Potest, si unus actus alterum non impediat. Hinc qui ex voto meditationi vacare tenetur, & votum & præceptum audiendi sacrum die festo simul implet; quia meditatio non impedit attentionem & devotionem, quæ debetur Missæ sacrificio.

Sed difficultas est, num recitatio Horarum Canonicarum, ad quam Beneficiarius tenetur, obsit attentioni ad Missæ sacrificium?

Graves Theologi, ut Sylvester, Angelus à Clavasio, & alii affirmant. Communior tamen sententia, quæ est Navarri, Soti, &c. & quam plerique in praxi sequuntur, negat impedire; quia ad sacrificium Missæ, & ad recitationem horarum sufficit attentio generalis ad Deum, aliamque

vix

vix habere possunt idiotæ, qui nihilominus præcepto Ecclesiæ satisfaciunt, quamvis distinctè non cognoscant, quæ sit ratio sacrificii, & quâ mente celebrari debeat. Verùm, etsi hujusmodi generalis attentio absolutè sufficiat ad implendum utrumque præceptum, fatendum tamen est, perfectiorem expetendam esse ab iis, qui intersunt Missæ sacrificio, ad quod Fideles conveniunt, ut passionem Christi recolant, & unâ cum ipso sese Deo offerant perfectam hostiam.

Q. 5. *Circa modum implendi præcepti satisfacitne, qui de præcepto non cogitans, facit tamen quod præscriptum est? Aliquis, v. gr. audit sacrum, nesciens, aut non advertens esse diem festum. Item Clericus ignorans, nec advertens quosdam fructus Beneficii sui non fecisse suos, ideoque teneri restituere pauperibus vel Ecclesiæ, largas interim facit elemosynas.*

R. Vel opus est debitum ex justitia, vel non? Si non est debitum ex justitia, satisfacit, juxta communem Theologorum sententiam, nec in alio exemplo tenetur quis aliud sacrum audire, postquam resciverit esse diem festum, quia reverà exercuit actum Religionis, quam Ecclesia diebus festis imperat. Si autem opus sit ex justitia debitum, communis est Theologorum sententia non satisfacere; quia in rei veritate non restituit, sed liberaliter donat, nec potest donationem jam factam revocare, ut restitutionis locum suppleat. Crederem tamen Clericum, qui in exemplo adductus est, excipiendum esse, si pauperibus multa largitus est ea mente, quòd Beneficarii ex justitia teneantur dare superflua pauperibus; is enim verè restituit omne, quod debet in



hypothesi, quodd plus erogandum non esset ratione fructuum malè perceptorum.

Q. 6. *Impletne præceptum, qui illius implendi non habet voluntatem? Aliquis v. g. sacrum audit die festo, vel Eucharistiam recipit tempore Paschali, ut privatae suae devotioni indulgeat, proponens aliud audire sacrum, vel iterum ad sacram mensam accedere, ut Ecclesiae præcepto satisfaciat; sed talia impedimenta superveniunt, propter quæ non impletet quod proposuerat, si jam præcepto fecisset satis.*

Resp. Theologorum major pars, præceptum in iis circumstantiis impleri propter rationem in priori præcedentis responsionis parte allatam. Sed illi longius progrediuntur, qui affirmant, eum etiam præcepto satisfacere, qui voluntatem gerit absolutè contrariam, positivèque statuit se nolle ex præcepto facere, quod exterius perficit, nam ex regula juris in 6. *Censetur agere contra legem, qui verba legis complexus contra voluntatem legis nititur.*

Dixi: *Voluntatem absolutè contrariam*; Qui enim involuntarius est secundum quid, & simpliciter voluntarius, ægrè v. gr. præcepto jejunii obtemperat, legi satisfacit, quamvis non sine aliquo defectu.

Q. 7. *Estne necessaria recta intentio ad legem humanam implendam? nam de naturali & divina nullum potest esse dubium.*

Negant multi ex modernis Theologis moralibus, apud quos receptum est illud effatum, *modus præcepti non cadit sub præceptum.* Ex quo concludunt satisfieri præcepto annuæ Confessionis & Communionis per sacrilegam Confessionem & Communionem; quam doctrinam damnarunt

Summi

Summi Pontifices Alexander VII. & Innocentius XI. Deinde Clerus Gallicanus anno 1700. cum quibus

R. Recta intentio cadit sub præceptum humanum.

Probatur 1. ex Scriptura, Eph. 6. *Servi obedite dominis carnalibus cum timore & tremore, in simplicitate cordis vestri, sicut Christo: non ad oculum serviientes, quasi hominibus placentes; sed ut servi Christi, facientes voluntatem Dei ex animo, cum bona voluntate serviientes, sicut Domino, & non hominibus.*

Probatur 2. ratione: Quia vera lex non præcipit nisi actus bonos, atqui actus non potest esse bonus sine recta intentione. Ergo Minor est certa.

Major probatur ex S. Thoma q. 62. art. 1. Ubi expressè docet, hunc esse proprium Legis effectum, efficere homines bonos, juxta illud Philosophi, 1. Ethic. cap. 14 *Voluntas cujuslibet Legislatoris hæc est, ut faciat homines bonos.* Et hanc rationem affert Angelicus Doctor, quia omnis lex est ordinatio in bonum commune: *Impossibile autem est, inquit, quòd bonum commune civitatis bene se habeat, nisi cives sint virtuosus, hoc est, bene subdantur ei, à quo gubernantur, sicut virtus irascibilis, & concupiscibilis in hoc consistit, quòd sint bene obedientes rationi, & per hunc modum virtus cujuslibet subjecti est, ut bene subjiciatur principanti.*

Dices, ex sancto Thoma quæst. 91. art. 4. *De his potest homo legem facere, de quibus potest judicare: atqui judicium hominis esse non potest de interioribus motibus qui latent, sed solum de exterioribus actibus qui apparent.* Porro modus præcepti pertinet ad actus interiores: ergo modus præcepti non cadit sub præceptum humanum.

Confirmatur ex Jure tum Civili, tum Canonico : ex civili quidem ; nam *Lege cogitationis*, digest. de pœnis, habetur, *cogitationis pœnam nemo patitur* : ex Canonico verò cap. *Tua nos*, de simonia, *nobis datum est tantum de manifestis judicare*. Et cap. *Erubescant* : distinctione 32. *de manifestis loquimur ; secretorum autem & cognitor Deus & Judex est*.

Distinguo maj. De his duntaxat potest homo legem facere secundum vim omnem coactivam, de quibus potest judicare, Concedo : secundum vim directivam & coactivam ex parte, Nego maj. Enimverò Jure Canonico, cap. *si quis* 8. distinct. 30. excommunicatur, qui ex interna superstitione Jejunium Ecclesiasticum non servaverit, Clementina 1. de Statu Monach. Monachus Benedictinus sine licentia se conferens ad curiam animo accusandi Prælatum, excommunicationem incurrit. Et Clementina 2. §. *Verum* de Hæreticis eadem pœna feriuntur Inquisitores, qui ex odio, & ex intentione turpis lucri contra justitiam & conscientiam omittunt procedere. Denique in Concilio Constantiensi Sess. 45. Martinus V. suspectos de hæresi jubet interrogari ab Inquisitoribus, an Joannem Hufs, & Hieronymum à Praga reputaverint Sanctos, an credant, quòd ab Ecclesia sint injustè condemnati. Atqui in his exemplis lex humana directè cadit in modum operis ; illum enim præcisè prohibet, punitque excommunicationis censura, in quo elucet aliqua vis coactiva, sed imperfecta & insufficiens, quia cum prohibiti illi affectus in corde lateant, Legislator nec juridicè declarare potest, quis ex harum legum transgressoribus incurrerit excommunicationis pœnam, nec proinde à societate Fide-  
lium

lium remove. Unde concludit Angelicus Doctor præter Legem humanam divinam esse necessariam, cujus forum occulti peccatores declinare nequeunt.

Ex hac solutione facilè explicantur Leges in contrarium allatæ, nempe Ecclesia non judicat de internis per sententiam declinatoriam, & judicio plenè coactivo. Addo, nec in eos animadvertit, nisi conjuncti sint actibus externis.

Instabis : sola Lex naturalis & divina, quæ semper concurrat cum humana, modum operis præscribit. Ergo peccatum in modo operandi Legem Divinam duntaxat impetit, non humanam.

Nego antec. Namque in laudatis Clementinis ipsa Lex humana, non divina, modos operis excommunicatione ferit.

Confirmatur responsio, ideo Lex humana non caderet in actus interiores, vel quia Deus hanc auctoritatem hominibus concedere non potest : vel quia, cum possit, concedere tamen noluit : Atqui neutrum dici potest. Non primum, ipsi enim Adversarii ultro fatentur Deum potuisse dare Ecclesiæ potestatem directam in actus internos. Non secundum, quia Christi verba, *quæcunque ligaveritis super terram, erunt ligata in cælis*, nullam exceptionem admittunt, nec licet Adversariis illa ad actus externos restringere contra communem Ecclesiæ sensum & usum, quæ hætenus imperavit actus internos, ut patet ex laudatis Canonibus.

At, inquires, potestas Apostolis à Christo concessa limitatur ex fine Regiminis Ecclesiastici : atqui finis ille est bonum commune & publicum, ad quod actus interiores nihil conferunt ; modò



enim singula Ecclesiæ membra benè se habent ad invicem, Ecclesia summa pace fruitur, ergo.

Concessa majore, Distinguo minorem: finis Regiminis Ecclesiastici proximus est bonum commune publicum, Concedo: ultimus, nego minorem. Omne enim Regimen sive Ecclesiasticum, sive Politicum, sive Oeconomicum ordinatur ad Deum, qui omnia propter se operatus est, & infima per media, domesticos per patremfamilias, Fideles per Prælatum, Cives per Principem, tanquam per suos Ministros ad se adducit: actus autem à Legislatore imperati ad Deum non tendunt, nisi boni sint. Deinde tranquillitas publica stare nequit, nisi superior bene imperet, & subditi bene obtemperent, ut supra docebat sanctus Thomas. Denique Religio, ex sancto Augustino, tota est ad animam excolendam, commune ejus bonum est Dei cultus, quem si omnes pro virili exhibeant exoptata pace & felicitate gaudet. Porro *Spiritus est Deus, & eos, qui adorant eum, in Spiritu & veritate oportet adorare*, Joan. 4. Ergo ad Regimen præsertim Ecclesiasticum, maximè conferunt actus interni.

Q. 8. *Satisfacitne, qui sine recta intentione obtemperat, v. g. qui jejunit ex vana gloria, aut ex avaritia?*

R. 1. Si præceptum sit negativum, hoc est, prohibens actum, putà homicidium, usum ciborum diebus jejunii; certum est ei satisfacere; nec esse reum homicidii, aut violati Jejunii Ecclesiastici, nisi fortè ex affectu. Difficultas solum est de præceptis affirmativis, quæ imperant actum. Quare

R. 2. Non satisfacit præcepto affirmativo, qui ponit opus sine ea animi rectitudine, quæ vel est essen-

essentialis actui externo, ut attentio orationi vocali, contritio saltem imperfecta Sacramento Pœnitentiæ, vel per Legislatorem præscribitur, ut perceptio Eucharistiæ in Paschate; Ecclesia enim præcipit communionem moralem simul & spiritalem. Ergo qui sine pia attentione adfuit sacro, preces recitavit, vel sine sufficienti attritione confessus est, vel sacrilegè Eucharistiam percipit, non satisfecit præcepto; quia non facit quod revera præcipitur; non orat, non percipit Sacramentum Pœnitentiæ; nec spiritualiter Corpus Christi manducat. Idem dicendum videtur de eo, qui ex voto, vel ex Confessarii præcepto jejuna; neque enim satisfacit, qui ex præcedenti crapula per totam diem à cibis abstinere absque ullo pietatis sensu; quia vovens sibi, & Confessarius pœnitenti imponunt obligationem actus honesti.

R. 3. Quando honestas expressè non præcipitur, nec est conditio essentialis actui externo, sine ea adimpletur præceptum humanum. Filius v. g. honorat patrem, eique obtemperat, quamvis utrumque præstet ex vanitatis motivo, atque ideo peccet contra legem naturalem.

## CAPUT VI.

### De Legis Divisione.

Q. 1. *Quotuplex est Lex?*

R. Generatim dividitur in æternam, naturalem, & positivam.

Q. 2. *Quid est Lex æterna?*

R. Est summa ratio, secundùm quam Deus cuncta

cuncta regit & gubernat, diciturque à sancto Bernardo Lex Dei.

Q. 3. *Lex æterna estne quid idem cum ideis divinis, aut cum providentia?*

R. Realiter est quid idem; quia omnia in Deo unum sunt: sed virtualiter & secundum nostrum concipiendi modum est diversa; namque idea spectat rerum creationem, Lex verò æterna earundem gubernationem, estque regula creaturarum dirigendarum, quam regulam sequitur providentia in actuali rerum gubernatione.

Explicatur responsio. Idea formaliter est exemplar, seu repræsentatio rei faciendæ in mente agentis dianœtici, ad cujus similitudinem conficit opus præconceptum. Architectus v. g. speciem domus, quam ædificare intendit, prius in mente sibi efformat. Diximus autem, ubi de Attributis; ideas divinas esse ipsammet essentiam divinam prout imitabilem & participabilem. Lex vero æterna formaliter concipitur in Deo, ut actus intellectus & voluntatis, præscribens quibus mediis, quoque ordine res creatæ ad suos fines dirigantur. Tum denique providentia regulam illam in tempore exequitur, & subministrat media per Legem æternam præscripta, quibus unaquæque res congruenter ad finem suum perducatur; ac proinde ideæ divinæ, Lex æterna, & providentia inter se virtualiter distinguuntur.

Ergo quamvis creaturæ in tempore gubernentur, ratio tamen illas gubernandi est æterna.

Ergo cum nemini liceat ignorare existentiam Dei & providentiam, notum quoque omnibus esse debet, Legem æternam existere; sevidens quippe est, Deum utpote sapientissimum & optimum,

ea regere, quæ ipse condidit. Nam, ut argumentatur S. Ambrosius Lib. I. de Offic. c. 13. *Quis operator negligat operis sui curam? quis . . . destituat, quod ipse condendum putavit? cum aliquid non fecisse nulla iniustitia sit, non curare quod fecerit, summa inclementia.*

Ergo omnes creaturæ subjacent Legi æternæ, juxta illud Sap. 6. *magnum & pusillum ipse fecit, & ipsi cura est de omnibus.* Æterna tamen illa ratio in Deo non habet rationem Legis propriè dictæ, nisi respectu creaturarum rationalium; quia irrationales capaces non sunt præcepti & obedientiæ, ut supra monuimus.

Dixi expressè, *omnes creaturæ subjacent Legi æternæ*, quia nec natura, nec voluntas divina illi subjiuntur, sed realiter sunt ipsa Lex. Si enim justus, quamvis non sit sine Lege, Legi tamen non subjacet eo sensu, quo supra explicuimus, sed rectitudo voluntatis ejus ipsi Lex est; quanto magis id sentiendum est de Deo, cujus intellectus est ipsa veritas, & voluntas ipsa rectitudo? Deus itaque non est sine Lege, & tamen nulli subjacet Legi, sed ipse sibi Lex est.

Ergo Lex æterna una est, immutabilis, & indefectibilis, quia realiter est Deus ipse unus & immutabilis.

Ergo à Lege æterna omnes Leges derivantur; quia in Regimine Monarchico omnes Ministri ad mentem & voluntatem Principis attendere debent, à quibus si devient, iniqua illorum statuta censentur. Hinc sanctus Augustinus Lib. de vera Relig. cap. 32. sic scribit: *Conditor legum temporalium, si vir bonus est & sapiens, illam ipsam consulit æternam, de qua nulli animæ judicare tutum est; ut secundum*



*cundum ejus incommutabiles regulas, quid sit pro tempore jubendum, vitandumque discernat. Et quæst 57. in Exod. Lex Dei, inquit, sempiterna est, quam consulunt omnes piæ mentes; ut quod in ea invenerint, vel faciant, vel jubeant, vel vetent, secundum quod illa incommutabili veritate perceperint.*

Dices: contrariæ leges ab eodem fonte dimanare nequeunt: atqui plures è legibus humanis sibi sunt contrariæ; in quibusdam enim regionibus præcipiuntur, quæ in aliis prohibentur: ergo non omnes leges ab æterna derivantur.

Nego majorem; namque ex S. Augustino Lib. de vera Relig. capit. 17. sicut ars medica nonnunquam præscribit varia & contraria remedia pro varietate & contrarietate morborum: ita Lex æterna exigit, ut variæ & contrariæ leges condantur juxta diversas temporis circumstantias, & contrarios nationum mores. Verba S. Doctoris sunt: *Ut ars medicinæ, cum eadem maneat, neque ullo pacto ipsa mutetur, mutat tamen præcepta languentibus, quia mutabilis est nostra valetudo; ita Divina Providentia, cum sit omnino immutabilis, mutabili tamen creaturæ variè subvenit, & pro diversitate morborum alia aliis jubet aut vetat, ut à vitio, unde mors incipit, & ab ipsa morte ad naturam suam & essentiam, ex qua deficiunt, id est, ad nihilum tendunt, reducat & firmet.*

Q. 4. *Quid est Lex naturalis?*

Est Legis æternæ radius, creaturæ rationali à Deo impressus, dictans & præscribens quid agere aut fugere debeat.

Dicitur 1. *Legis æternæ radius*, seu fulgor & irradiatio, quo significatur legem naturalem non distinguui à Lege æterna, nisi secundum modum habendi.

bendi. In Deo quippe Lex æterna, juxta S. Thomam q. 91. art. 2. est tanquam regulans & mensurans, in homine verò tanquam in regulato & mensurato; in Deo realiter est ipsamet natura divina, indefectibilis veritas & rectitudo: in homine verò distinguitur ab ejus natura defectibili, inestque per participationem.

Dicitur 2. *creaturæ rationali*; quia, ut advertit S. Thomas cit. art. etsi creaturæ irrationales participant aliquammodo Legem æternam, quatenus ex ejus impressione inclinantur in proprios actus & fines; in iis tamen Lex æterna non habet rationem legis; quia non participant illam intellectualiter & rationaliter.

Dicitur 3. *à Deo impressus*, quia ex S. Augustino Lib. 14. de Trinitate c. 15. *in cor hominis non migrando, sed tanquam imprimendo transfertur, sicut imago ex annulo in ceram transit, & annulum non relinquit.* His autem definitionis particulis duo declarantur. Primum, legem naturalem esse divinam, cum sit à Deo. Secundum, differre à lege positiva, quæ mentibus nostris impressa non est, sed prorsus extrinseca, ut leges suscipiendi Baptismi, à carnibus abstinendi die Veneris, quarum nullum vestigium in natura humana reperitur.

Dicitur 3. *dictans & præscribens, quid creatura rationalis agere, aut fugere debeat.* Quibus verbis duo denotantur, quæ ad rationem legis pertinent, nempe promulgatio, & vis obligandi; intimat enim hoc ipso quo dictat, & præscribendo obligat.

Q. 5. *Lex naturalis estne idem ac synderesis, aut conscientia?*

R. Misi-

R. Minimè; quia synderesis est habitus propriè dictus, quo intellectus dirigitur circa principia practica, quale est illud: bonum est prosequendum, & malum fugiendum: atqui habitus propriè dictus, non est Lex, cùm non sit præceptivus, sed est mera facilitas & inclinatio ad benè agendum, si bonus sit; & malè agendum, si malus: atqui Lex naturalis est præceptiva & obligans. ergo non est habitus propriè dictus. Non est etiam conscientia, quia conscientia potest esse erronea & mala, quod de Lege naturali dici nequit.

Q. 6. Quid igitur est præcisè ille radius Legis Divinæ?

Respondet S. Thomas cit. artic. 2. qu. 91. esse ipsummet divinum lumen mentibus nostris impressum, juxta illud Psalm. 4. *Signatum est super nos lumen vultus tui, Domine.* Quod sanctus Doctor sic interpretatur: *quasi lumen rationis naturalis, quo discernimus quid sit bonum, & quid malum, quod pertinet ad naturalem legem, nihil aliud sit quàm impressio divini luminis in nobis. Unde patet, quòd lex naturalis nihil aliud est, quàm participatio legis æternæ in rationali creatura, quemadmodum illuminatio oculorum est ipsamet lux Solis in oculos sese diffundens. Sed audiendus est sanctus Augustinus in laudata Psalm. verba: Hoc lumen, inquit, est totum hominis & verum bonum. Signatum autem dicit in nobis, tanquam denarius signatur Regis imagine, homo enim factus est ad imaginem & similitudinem Dei. Et ad hoc credo pertinere illud, quòd Dominus, viso Cæsaris nummo, ait, reddite Cæsari, quod Cæsaris est, & Deo, quod Dei est. Tanquam si diceret: quemadmodum Cæsar à vobis exigit impressionem imaginis suæ,*

*sua, sic & Deus. Ut quemadmodum illi redditur nummus, sic Deo anima lumine vultus ejus illustrata, atque signata. Non ergo foris quærenda est lætitia, sed intus, ubi signatum est lumen vultus Dei. Sed homines temporalia sectantes, nihil aliud noverunt dicere nisi quis ostendit nobis bona? cum vera & certa bona intra semetipsos videre non possint. Et Lib. 14. de Trinitate cap. 15. docet, illud nomen esse ipsam veritatem mentes humanas desuper illuminantem: Etiam impii, inquit, multa rectè reprehendunt, rectèque laudant in hominum moribus. Quibus ea tandem regulis judicant? nisi in quibus vident, quemadmodum quisque vivere debeat, etiamsi nec ipsi eodem modo vivant. Ubi eas vident? neque enim in sua natura, cum procul dubio mente ista videantur, eorumque mentes constet esse mutabiles, has verò regulas immutabiles videat quisquis in eis & hoc videre potuerit; nec in habitu suæ mentis, cum illæ regulæ sint justitiæ, mentes verò eorum constet esse injustas. Ubinam sunt istæ regulæ scriptæ . . . . . nisi in libro lucis illius, quæ veritas dicitur, unde omnis lex justa describitur?*

Q. 7. *Potestne deleri lex naturalis?*

R. Obumbrari quidem potest in conclusionibus, præsertim remotioribus, ut dictum est ubi de ignorantia, Tractatu de Actibus humanis: deleri omninò non potest, alioquin homo desineret esse rationalis & imago Dei. Ita Tertullianus Lib. de Anima cap. 41. ubi sic scribit: *Potest obumbrari, quia non est Deus; extingui non potest quia à Deo est. Itaque sicut lumen aliquo obstaculo impeditum manet, sed non comparet, si tanta densitas obstaculi fuerit: ita & bonum in anima à malo oppressum pro qualitate ejus, aut in totum vacat occulta salute, aut quæ datur radiat, inventa libertate.*

Ergo.



Ergo cum natura rationalis una sit ubique & in omnibus, lex quoque naturalis, si secundum se spectetur, ubique & in omnibus est una, quamvis in applicatione propter varias circumstantias sit diversa; ut docet S. Thomas qu. 94. art. 4. Lex enim naturalis, quæ docet depositum esse reddendum, prohibet tum reddi furioso arma deposita, cum inde prævidetur damnum illaturus proximo.

Q. 8. *Quid est lex positiva?*

R. Est ea, quæ legi naturali superaddita est ex libera Legislatoris voluntate.

Q. 9. *Quomodo dividitur lex positiva?*

R. Dividitur in divinam, quæ habet Deum Auctorem; & humanam, quæ ab homine sancita est.

Q. 10. *Quotuplex est Lex Divina?*

R. Duplex, nempe vetus seu scripta, quam vocamus vetus Testamentum; & nova, seu gratiæ, quæ dicitur novum Testamentum.

Q. 11. *Quotuplex est Lex humana?*

R. Duplex, alia est communis omnibus ferè nationibus, diciturque Jus Gentium; alia, in qua non omnes conveniunt, & hæc, si à Potestate Ecclesiastica procedat, dicitur Lex Canonica, seu Ecclesiastica, si à Potestate politica, dicitur Lex Civilis.

Q. 12. *Quid est Jus Gentium?*

R. Definitur ab Imperatore Justiniano, quod usu exigente & humanis necessitatibus, gentes humanæ sibi constituerunt. Constituerunt, ait, ut distinguatur Jus Gentium à Jure naturali, quod hominibus innatum est, nec ab ipsis constitutum: Ad Jus Gentium pertinent dominiorum distinctiones, agrorum divisiones, pacifica Lega-  
torum

torum receptio, etiamſi ab hoſtibus mittantur.

Dices: S. Thomas qu. 95. art. 4. docet, ad Jus Gentium pertinere ea, quæ derivantur ex Lege Naturæ, ſicut concluſiones ex principiis, ergo Jus Gentium pertinet ad Legem naturalem.

Distinguo antec. Quæ derivantur ſecundum quid neceſſario, abſolutè verò liberè, Concedo: quæ derivantur abſolutè, & ſimpliciter neceſſario, Nego antecedens. Porro ut concluſio cenſeatur Juris naturalis, debet neceſſario elici ex principiis naturalibus, adeo ut peccet contra Legem naturalem, qui in praxi concluſionem non ſequitur. Sic filius protervus, & uſurarius in Legem naturalem peccant, quia quòd honorandi ſint parentes, quòdque lucrum ex mutuo non ſit captandum, ſunt concluſiones neceſſario deductæ ex principiis Legis naturalis, nec homines conſtituerunt ſibi has leges, ſed à Deo ſibi inditas acceperunt.

At verò, quòd dividendi ſint agri, inducendæ ſervitutes, manumiffiones, & alia hujusmodi, quæ ad Jus Gentium pertinent, quamvis omnibus videantur media longè commodiora ad ſocietatem humanam conciliandam, non ſunt tamen abſolutè neceſſaria: ac proinde eorum inſtitutio ex arbitrio hominum pendet, & ad legem humanam revocanda eſt.

## CAPUT VII.

De Differentia Legis naturalis & poſitivæ.

Q. I. *Quotuplex eſt diſcrimen inter legem naturalem & poſitivam, ſive divinam, ſive humanam?*

D. Habert Theolog. Tom. III.

B b

R.

R. Triplex. 1. Lex naturalis simul cum natura indita est, nihilque præscribit, quod quisque in corde suo (si attendere velit) cernere non valeat, v. g. Deum colendum, parentes honorandos, nemini nocendum; Lex verò positiva extrinsecus supervenit, & ordinat, quæ alioquin ratio naturalis non dictaret observanda, v. g. Baptismum suscipiendum, abstinendum à carnibus sexta qualibet feria. 2. Præcepta legis naturalis necessaria sunt, nec pendent à libera Dei, aut cujusvis Legislatoris voluntate: præcepta verò legis positivæ sunt merè arbitraria. Deus v. g. nec prohibere potest justitiam, religionem, pietatem erga parentes, nec imperare mendacium, fornicationem, odium proximi, hæc quippe repugnant, tum infinitæ ejus bonitati & sapientiæ, tum naturæ rationali, quæ est ad ejus imaginem condita; sed liberum illi fuit prius præcipere circumcisionem: esum Agni Paschalis, quæ sunt legis positivæ, & postea in Lege nova prohibere. Hinc 3. quæ prohibentur lege naturali, sunt per se mala, & ideo prohibita, ut mendacium, injustitia: quæ verò vetantur lege positiva, per se sunt licita, plerumque etiam indifferentia, nec mala evadunt, nisi quia prohibita, ut apud Judæos esus carnis suillæ, & suffocatæ, & apud Christianos opera servilia, carnisque usus certis quibusdam diebus.

Ergo ex crassa ignorantia Clerici obmurmurent contra Dioceseos suæ statuta, quibus prohibentur venatio, ludus aleæ & chartarum, popinarum frequentatio, & alia similia, eo prætextu, quòd hæc per se mala non sint; nulli enim Clericorum ignorare licet allatum discrimen inter  
legem

legem naturalem & positivam, Prælatisque à Deo concessam potestatem statuendi & sancienti, quæ ad bonum publicum promovendum expedire iudicaverint.

Ergo lex naturalis est immutabilis, nullam abrogationem, derogationem, dispensationem admittit, nec adversus illam usu contrario præscribi potest; quia nunquam licet facere, quæ per se mala sunt, quæve repugnant naturæ seu divinæ, seu rationali. Lex verò positiva his modis mutari potest; quia præcepta ejus sunt arbitraria, pendentque à libera Legislatoris voluntate. Sed de mutatione legis positivæ postea.

Dices 1. Deus sæpius dispensavit in lege naturali; namque permisit 1. fratres in matrimonium ducere sorores in prima generis humani generatione. 2. Judæos auferre Ægyptiorum vasa, & usuras ab alienis accipere. 3. Plures simul habere uxores, & matrimonia dissolvere dato libello repudii. 4. Abrahamum immolare filium suum. 5. Prophetam Oseam filios fornicationum suscipere ex meretrice. 6. Potestatem concessit Ecclesiæ dispensandi in votis & juramentis, quæ omnia sunt juris naturalis. Ergo lex naturalis Dei dispensatione mutari potest. Unde S. Bernardus Lib. 1. de Præcepto & Dispensat. c. 3. sic scribit: *Quod inviolabile nominavi, illud intelligo, quod non ab homine traditum, sed divinitus promulgatum, nisi à Deo, qui tradidit, mutari omnino non patitur, ut exempli causa: Non occides, non mæchaberis, non furtum facies, & reliqua illius tabulæ legiscita: quæ etsi nullam prorsus humanam dispensationem admittunt, nec cuiquam hominum ex his aliquo modo solvere aut licuit, aut licebit: Domi-*



*nus tamen horum, quod voluit, & quando voluit, solvit.*

Distinguo anteced. Dispensavit dispensatione improprie dicta, Concedo: proprie dicta, Nego antecedens.

Dispensatio impropria est, quando mutatur objectum & materia legis per circumstantias concurrentes. Res patefiet duobus exemplis. Promissarius, cum sponsori remittit, & condonat rem promissam, improprie dispensat à fide servanda, quod est juris naturalis; quia mutat objectum & materiam legis naturalis, quatenus per condonationem efficit, ut res promissa non sit amplius debita. Item, Pastor ex lege naturali tenetur proprio gregi invigilare: sed si urgens Ecclesiæ necessitas aliò eum vocet, jam residentia desinit esse objectum & materia legis naturalis.

Dispensatio proprie dicta, est relaxatio obligationis per legem inductæ facta alicui ex causa, quæ tamen sola non sufficeret obligationi tollendæ. Exemplum affero: Titius vult ex causa nubere cum consanguinea; sed Lex Ecclesiastica resistit, & stante illa causa, incestuosas declararet Titii nuptias, nisi Summus Pontifex illum à vinculo legis absolveret. En verè & proprie dicta dispensatio, quam diximus legem naturalem nunquam admittere.

Porro Deus in exemplis allatis hoc posteriori modo non dispensavit, sed priori duntaxat, quatenus nempe in circumstantiis notatis actus in objectione recensiti desierunt esse objectum & materia legis naturalis.

Enimverò, cum Deus sic instituerit genus humanum, ut non nisi carnali generatione propagaretur,

garetur, ratio naturalis dictavit, nedum prohibuerit, ut fratres in prima generatione fororibus copularentur; quanquam non desint Theologi, Cajetanus, qui absolute negant, matrimonium inter fratrem & sororem jure naturali esse prohibitum.

Deinde polygamia & matrimonii dissolutio per libellum repudii, vel fuerunt à Deo duntaxat toleratæ, ut contendunt nonnulli Theologi, vel revera concessæ, quod de polygamia verisimilius est, cum plures Viri sancti, ut Abraham & David, in ea usque ad mortem permanserint. Si primum, corrui objectio. Si secundum, Deus, qui est naturæ Auctor, & humanæ societatis supremus Moderator, potuit quod non possunt homines, nempe justis de causis uni & eidem viro tribuere jus in corpora plurium fœminarum; & libello repudii revocare quod prius concesserat, nec in extraordinaria illa dispositione violavit jura societatis humanæ, quemadmodum cum operatur miracula, vim naturæ non infert, sed agit supra naturalem rerum ordinem, ut docent Theologi.

Denique Deus, cujus dominio subjacent omnium hominum fortunæ, corpora, & vita, dedit Abrahamo potestatem mactandi filii unigeniti; dedit Judæis bona Ægyptiorum, & aliarum gentium, à quibus usuras exigebant; nisi tamen hoc posterius potius toleravit, quam concesserit: dedit & Osæ dominium in corpus meretricis; ac etiam nunc ministerio Prælatorum condonat promissa, quibus Fideles per vota & jura-menta sese illi obstrinxerunt. His autem Dei condonationibus præsuppositis, jure Abraham ad

Dei præceptum accinxit se ad mactandum unigenitum; Judæi abstulerunt vasa Ægyptiorum & usuras ab alienigenis acceperunt: Prælati Ecclesiæ Fideles à votis & juramentis, si causa sublit, absolvunt; & Osee Propheta cum meretrice conjunctus est. Osee, inquit S. Thomas q. 100. art. 8. *accedens ad uxorem fornicariam, vel mulierem adulteram, non est mæchatus, vel fornicatus, quia accessit ad eam, quæ sua erat secundum mandatum divinum, qui est auctor institutionis matrimonii.* Alio modo S. Augustinus Lib. contra Secundianum cap. 21. factum Osee excusat, scribens Prophetam mulierem illam fornicariam in uxorem duxisse: *quid inimicum Fidei Christianæ, inquit, si meretrix, relicta fornicatione, in castum conjugium commutetur?* Hanc explicationem Theologi communiter amplectuntur. Nec refert quòd filii ex illo connubio progeniti, vocentur filii fornicationis; sic enim appellantur, quia nati sunt ex matre, quæ prius fuerat fornicaria.

Dices 2. Præceptum observandi Sabbati ad Legem naturalem pertinet; cum in prima Decalogi tabula tertium locum obtineat: atqui præceptum illud, adveniente Lege Evangelica, mutatum est: ergo Lex naturalis non est immutabilis.

Distinguo majorem: Ad Legem naturalem pertinet sub aliquo respectu, Concedo: sub omni respectu, Nego maj. In præcepto itaque observandi Sabbati, duo spectanda sunt, nempe res ipsa, quæ præcipitur; & tempus, quo executioni est demandanda. Præcipitur 1. ut homo aliquandiu vacet rebus divinis, & propriæ saluti prospiciat: deinde determinatur tempus, quo id præstare

præstare debeat, scilicet septima die cujusque hebdomadis. Primum est naturale: ratio quippe naturalis dicitur, propriæ salutis consulendum, & media necessaria ad illam assequendam eligenda. Media autem illa sunt meditatio rerum cœlestium, & oratio, quibus mens amore Dēi & patriæ cœlestis inardescit. Quodd autem his spiritualibus exercitiis vacandum sit per diem integram, eamque septimam, & non per interpolatas hebdomadæ horas, præceptum est cæremoniale pertinens ad legem positivam. Porro præceptum observandi Sabbati, promulgata Lege nova, quoad prius stat immobile, mutatumque est duntaxat quoad illud posterius, & ut loquitur S. Thomas qu. 100. art. 3. ad 2. quantum ad taxationem temporis.

Ergo Pastores verbi ministerium nunquam prætermittere debent diebus Dominicis & Festis, ut rudiores & idiotæ in ventre memoriæ, quemadmodum scribit S. Gregorius, reconditum habeant quod identidem ad considerationem suaviter revocent, alioqui vacuos traducturi sacros illos dies.

Ergo, qui in Republica terrenis occupationibus, hisce diebus toti detinentur, ut Coqui, Lanniones, &c. si spiritale damnum, quod inde incurrunt, aliis hebdomadæ diebus resarcire negligant, Legem naturalem transgredientes, propriæ salutis periculum subeunt. Qua de re graviter eos monere debent Confessarii; opus enim salutis perficitur, non corporis, sed animi viribus, quæ sicut uberiori Dei cognitione atque amore excitantur, ita ejusdem oblivione sensim evanescunt.



Q. 2. *Omnia Legis naturalis præcepta admittuntne indirectam & impropiam dispensationem mox explicatam?*

R. Minimè, ut patet vel ex solo mendacio, quod nulla ratione potest fieri licitum.

Q. 3. *Quenam igitur præcepta Legis naturalis omnem dispensationem respuunt, quæve impropiam admittunt?*

R. Respuunt, quæ versantur circa materiam ita intrinsecè malam, ut ne divinitus quidem immutari possit, ut idololatria, falsæ Religionis professio, odium Dei, mendacium, blasphemia, perjurium. Contra verò admittunt, quorum materia est sub dominio & dispositione sive Dei, sive hominis, & ideo mutari potest; vel à Deo solo, vel etiam ab homine.

Ergo solus Deus indirectè dispensare potest circa homicidium, quia solus directum habet dominium in vitam innocentis.

Ergo Princeps impropiè dispensat circa restituendi præceptum, quatenus per legem præscriptionis efficit, ut quod alienum est, fiat proprium ejus, qui bona fide & tempore competenti possedit, ut suo loco dicitur. Imò privatus sic dispensat, dum debitori aut promissori remittit debitum, aut fidem sibi datam. Ergo regula à S. Bernardo supra tradita, nempe Deum indirectè dispensare posse in præceptis secundæ tabulæ, non verò in præceptis primæ aliquam patitur exceptionem; namque circa mendacium, quod pertinet ad secundam tabulam, Deus sic dispensare nequit: in voto autem & juramento promissorio, quæ sunt præcepta primæ tabulæ, hoc modo per Præpositos Ecclesiæ dispensat.

Dices:

Dices : Princeps ergo exigente bono publico, indirectè dispensare potest circa usuras : quia cùm habeat dominium altum in bona subditorum, potest transferre in usurarium pecuniæ usurariæ dominium , quemadmodum per præscriptionem transfert dominium rei alienæ in possessorem bonæ fidei.

Nego sequelam ; obstat enim Lex Divina, quam nulla potestas humana solvere potest : *mutuum date, nihil inde sperantes*, Luc. 6. quapropter Concilium Viennense excommunicatione ferit Principes, qui sua auctoritate foveant usuras.

## CAPUT VIII.

### De Interpretatione Legis.

Q. I. *Quotuplex est Legis interpretatio?*

R. Duplex, alia minùs propria, alia propriè dicta.

Minùs propria est explicatio legis, ubi sensus ejus manifestus non est, vel propter verborum obscuritatem & ambiguitatem, vel propter circumstantias, quæ dubium generare possent, num ad illas lex extendatur, v. g. an contractus sic initus, sit injustus, an mendacium ad vitandam mortem necessarium, sit Lege prohibitum.

Interpretatio propriè dicta, est Legis correctio in his casibus, in quibus deficere judicatur. Et hæc interpretatio dicitur fieri per epichiam, seu æquitatem ; sic v. g. Lex, quæ prohibet, ne Moniales extra septa Monasterii exeant, per epichiam corrigitur in hypothesi, quòd Monasterii ædes incendio conflagent.

Q. 2. *Lex admittitne interpretationem?*

R. 1. Omnis Lex, five naturalis, five positiva, admittit interpretationem improprie dictam; quia sæpius explicatione indiget, ut constat tum ex Christi exemplo, qui Matth. 5. Legem naturalem explicuit: tum ex constanti Ecclesiæ Traditione, quæ ex potestate sibi divinitus concessa, Matth. 18. *quæcunque solveritis super terram, &c.* hætenus controversias circa sensum Legis naturalis & positivæ natas diremit: v. g. non licere pejorare ad vitandam mortem, occidere ad conservandam famam, &c. tum ex judiciis forensibus, quibus Leges civiles explicantur.

R. 2. Interpretatio proprie dicta, quæ fit per epichiam, non cadit in Legem naturalem; quia interpretatio proprie dicta, est correctio Legis: atqui Lex naturalis, cum ex dictis sit ipsa veritas, ipsa recta ratio corrigi non potest; alioquin veritas posset esse falsitas, & recta ratio error, quod est contradictorium: Ergo.

R. 3. Lex positiva patitur interpretationem proprie dictam: quia Lex, quæ ita universaliter fertur, ut si applicetur singularibus quibusdam casibus, noxia evadat, per epichiam exponi debet: atqui talis est Lex positiva, ut patet ex sequentibus exemplis, Lib. 1. Machab. cap. 2. Mathathias, & alii Judæi improbarunt consilium fratrum suorum, qui Religione ducti, maluerunt interfici ab impugnantibus hostibus diebus Sabbatorum, quibus prohibentur opera servilia, quam loca, in quibus delitescabant, obturare, & armis repugnare. Christus quoque Luc. cap. 14. epichia usus est contra Phariseos, qui curare infirmos diebus Sabbatorum illicitum arbitrabantur.

Denique

Denique Moniales in allata hypothesi conflagrationis interpretari debent humanum præceptum servandæ clausuræ deficere in illis circumstantiis.

Dices 1. contra secundam responsionis nostræ partem: Glossa in illud Eccli. 17. *addidit eis disciplinam & legem vitæ*, ait, legem litteræ quantum ad correctionem Legis naturalis scribi voluit.

Respondent S. Thomas q. 94. art. 5. ad primum, Legem scriptam dici datam ad correctionem Legis naturalis, *vel quia per Legem scriptam suppletum est quod Legi naturæ deerat; vel quia Lex naturæ in aliquorum cordibus, quantum ad aliqua, corrupta erat, & talis corruptio correctione indigebat.*

Instabis: non minus deficit Lex naturalis in singularibus casibus, quàm Lex positiva: Ergo æquè corrigi debet per epichiam.

Antecedens ostenditur exemplis. Lex naturalis reddendi depositi, servandi secreti, & juramenti implendi, deficit in iis circumstantiis, nempe si dominus enssem depositum repetat ad confligendum duello, vel occidendum innocentem: si fides secreti vergat in publicum damnum; si juramentum sit de re illicita.

Nego ant. Quia Lex naturalis comprehendit omnes & singulas circumstantias, in quibus præcipit aut prohibet; est quippe recta ratio, quæ sanè non jubet, quin potius prohibet reddi enssem in perniciem alterius, servari secretum in grave damnum tertii; & stare promisso injustè agendi, etiamsi juramento confirmatum sit. Contra verò Lex positiva, sive divina, sive humana universaliter fertur, v.g. omnes Eucharistiam percipiant in Paschate, peccata sua integrè confiteantur quolibet anno, Sacro intersint singulis diebus festis,



festis, nec figillatim explicare debent omnes circumstantias, in quibus Legislatores obligare non intendit; sed explicandum relinquit rectæ rationi, & æquitati naturali.

Dices 2. nullus potest esse defectus in Lege Divina: Ergo Lex Divina corrigi nequit.

Distinguo anteced. Nullus potest esse defectus positivus, & quem Legislatores vitare debeat, Concedo; nullus defectus negativus, quem Legislatores permittere potest & debet, Nego anteced. Verum quidem est, quod Lex Divina positiva careat illa perfectione, quæ competit Legi naturali, ut se extendat ad omnes & singulas circumstantias, quæ occurrere possunt. Sed ex dictis illa perfectio non convenit Legi positivæ; qualis enim esset Lex his verbis concepta: Omnes peccata sua integrè confiteantur, nisi ratio ipsis aliter suadeat?

Q. 3. *Cujus est interpretari Legem?*

R. Vel evidens est, Legem non extendi ad has circumstantias, vel est dubium.

Si primum, cujusvis est Legem interpretari ex S. Thoma q. 91. art. 1. quia cum manifesta sit Legislatoris intentio, frustra de ea inquireretur. Ratio autem evidenter demonstrat, Legem in iis casibus non esse servandam, in quibus vel est Reipublicæ noxia, vel pugnat cum Lege superiori, ita ut sine peccato servari nequeat, ut enssem depositum reddere furioso, Sacrum audire die sacro, cum charitas prohibet ne ægrotus derelinquatur. Utrum autem Lex obliget cum gravi incommodo, expendemus capite sequenti.

Si

Si secundum, nempe si dubium sit, num Lex comprehendat has circumstantias, triplex potest esse interpretatio.

Alia dicitur usualis, quæ petitur ex communi usu; consuetudo enim est optima Legum interpretres, ut habetur in regulis juris, & cap. *Cum dilectus*, tit. de Consuetudine.

Altera dicitur authentica, id est, cum auctoritate prolata; quia fit per ipsum Legislatorem vel ejus Successorem, vel Superiorem, vel denique per Ministros ab ipso constitutos; habetque vim Legis. Sic Ecclesia auctoritate Dei Legem Evangelicam interpretatur, & Principes politici Legem civilem.

Tertia dicitur doctrinalis; quia habetur per Doctorum responsa, qui doctrinaliter definiunt, quid sit juris in his aut illis circumstantiis. Quamvis autem hæc interpretatio non habeat vim Legis, temerè tamen, & contra dictamen rationis rejiceretur, si Theologi & Jurisperiti in eam communiter consentiant. Quòd si dissentiant, standum est his, quæ supra tradidimus de conscientia probabili.

Q. 4. *Quid observandum Confessariis, & Parochis, cum Fideles dubia proponunt, & Legis interpretationem ab ipsis requirunt?*

R. 1. Ante omnia habeant præ oculis illud Eccli. 5. vers. 13. *Si est tibi intellectus, responde proximo: sin autem, sit manus tua super os tuum, ne capiaris in verbo indisciplinato*; hoc est, noverint quid ferat jus, quidve probati Auctores sentiant circa materiam, de qua quæritur, alioquin ipsimet consilium quærant à sapientioribus, priusquam respondeant. Nimis quippe grave est, & prorsus intole-

intolerabile, quòd plurimi Sacerdotes Legum ignari, sola duce conscientia ad omnem quæstionem in quacunque materia, ex proprio cerebro intrepidè respondeant, *non puto, ita sentio, sic mihi videtur.* Duces planè cæci, qui cum sequentibus se in foveam cadunt, Matth. 15. v. 14.

Enimverò constat ex dictis, conscientiam non esse solam morum regulam, eumque peccare, qui propria conscientia ductus, contra Legem agit, aut consulit; quia conscientia ad omnem favoris humani, & timoris mundani flatum verti solet, nisi Lege firmetur, & dirigatur.

Quamquam conscientia in iis, quæ sunt juris merè positivi, sine doctrina prorsus cæcutit. Parochus ergo, sive Confessarius nunquam respondeat juxta id, quod sibi videtur, nisi sciat quid ferat jus, quidve periti sentiant circa propositum dubium.

R. 2. Si non pateat quid statuerit Lex, nodum difficultatis secundum regulas doctrinalis interpretationis cautè dissolvant, respondeantque ad mentem Legislatoris, non ad suam. Hoc quippè interest authenticam inter & doctrinalem interpretationem, quòd in illa Legislator aliquando Legi suæ derogare possit, prout magis congruere videbitur: privatus verò Interpres voluntatem Legislatoris per omnia sequi teneatur, ut docet S. Augustinus Lib. de vera Religione cap. 11. ubi sic scribit: *In temporalibus legibus, quamvis homines judicent de his, cum eas instituunt; tamen quando sunt institutæ & firmatæ, non licebit de ipsis judicare, sed secundum ipsas.* De Legibus autem judicant, qui præ Legislatore sapere præsumentes, agunt & consulunt, prout magis expedire ipsis videtur, spreta lege, &

& Legislatoris voluntate. Sed detur illis, quòd utilius foret aliter statuere; alios ritus v. gr. in facris Mysteriis peragendis præscribere, & alia ordinare, propter quæ, si in consilium Legislatoris vocati fuissent, fortè non ita sanxisset: attamen Lege jam lata & firmata, quamvis minùs utiliter, ut ipsis videtur, non licet de ea judicare: alioquin Lex ipsa, de qua injustè judicant, ipsos uti transgressores justè judicabit damnabitque.

Addit S. Thomas, quæst. 97. art. 2. nequidem licere Legislatoris mutare Legem à se latam, quoties aliquid melius occurrit. Et in responsione ad primum, docet in hoc differre artem à Lege, quòd ea, quæ sunt artis, habent efficaciam ex sola ratione; & ideò, ubicumque melioratio occurrit, est mutandum quod priùs tenebatur, sed Leges habent maximam virtutem ex consuetudine, ut Philosophus dicit in 2. polit. & ideo non sunt de facili mutandæ; Ergo in doctrinali interpretatione non proprio sensui, sed Legi adhærere oportet.

R. 3. Noverint insuper, quòd ad assequendam Legislatoris mentem, non tam attendenda sit ejus ratio, quàm verba; quia ubi de Lege positiva agitur, ratio non est Lex, nec Legem facit, nisi ad eam accesserit Legislatoris voluntas, seu præceptum. Unde Legis Interpres non argumentabitur ex paritate rationis, nisi fortè in relativis; namque eadem ratio, quo v. g. Parisiis pedissequi vetantur procedere ense accincti, militare videtur etiam contra Scholares, ad quos tamen Lex non extenditur. Quid ita, cum videatur par ratio? quia Legis verba eos non comprehendunt.

Dixi,



Dixi, *nisi in relativis* ; quia Lege finali cod. de indicta viduitate sic sancitur, *dispositum in uno correlativo*, censetur esse dispositum in alio, v. gr. si ob sponsi absentiam sine licentia sponsæ dissolvuntur sponsalia, possunt & dissolvi ob absentiam sponsæ, sine sponsi licentia.

Verba autem Legis juxta eorum proprietatem accipienda sunt, nisi sic accepta vel sensum absurdum reddant, vel Legem inutilem efficiant. Si sint æquivoca, ex antecedentibus & consequentibus spectanda est verbi significatio, Legis intentio & ratio, & servanda regula 68. de Regulis juris, *quoties idem sermo duas sententias exprimit, ea potissimum accipietur, quæ rei gerendæ aptior est.*

Si secundum communem Interpretum sententiam dubium sit, an verba Legis humanæ hunc casum comprehendant, licet perinde agere, ac si casus ille Lege non comprehenderetur; quia sicut in dubio num detineam rem alienam, non teneor me spoliare post adhibitam diligentiam, sic nec Legi obedire, si revera dubium sit secundum Legis Interpretes, num Legislatores me obligare voluerit. Si verba Legis sint universalis, non sunt limitanda, nisi pugnent contra aliam Legem, aut aliter constet de mente Legislatoris, aliàs pateret via innumeris interpretationibus, quæ Legem enervarent, & ferè inutilem redderent. Exemplum affero. Si Lex municipalis irritas reddit quasunque donationes conjugum factas causa mortis, non licet excipere casum, in quo uxor, viro insignem exhibuisset operam.

Dixi, *Nisi verba universaliter sumpta pugnent contra aliam Legem?* Quia Legislatores non censetur alteri derogare voluisse, nisi expresse. Hinc maritus

ritus in allato exemplo potest retinere quod sibi ab uxore donatum est causa mortis, si illud ex iustitia erat debitum. Similiter Episcopus, qui absque limitatione delegavit Sacerdotem ad excipiendas confessiones, non præsумitur derogasse vel legi, qua sibi reservat quosdam casus, vel Canoni: *Omnis utriusque sexus*, quem vult observari in sua Diœcesi, nisi utrumque in suo Mando expresserit.

Juvant etiam ad Legis interpretationem illa juris axiomata: *Consuetudo est legitima Legis interpret.* *Beneficium Principis est interpretandum largissime* . . . . *odia restringi, favores convenit ampliari.* Verum scitè iis uti oportet; Namque 1. consuetudo est sæpè verus abusus, & mera Legis prævaricatio, ut dicetur infrà. 2. Quod pugnat contra Leges & bonum commune, etsi faveat votis & cupiditati alicujus privati, favor dicendus non est, sed odium. Unde nec dispensatio est amplianda (sed strictè explicanda; quia per eam plaga infertur Legibus) nec privilegium, quando onerosum est communitati. In jure itaque beneficium favor est, quod ita uni prodest, ut alteri non noceat: odium verò, si, dum unum levat, alios gravet.

R. 4. Non innitantur prudentiæ suæ, nec pares se esse præsумant solvendis omnibus dubiis, quæ in Parochia, & tribunali pœnitentiæ occurrere possunt; sed consilium Prælati, ubi necesse est, requirant, juxta Ecclesiast. 6. *In multitudine Presbyterorum sta, & sapientiæ illorum ex animo conjungere*; namque ex S. Thoma 2. 2. qu. 49. art. 3. ad 3. *nullus in his, quæ subsunt prudentiæ, sibi quantum ad omnia sufficit.* Atque inde probat, doci-

litem à Philosophis rectè constituti partem prudentiæ. Namque prudentia, inquit, consistit circa particularia operabilia, in quibus cum sint quasi infinitæ diversitates, non possunt ab uno homine sufficienter omnia considerari. Unde in his, quæ ad prudentiam pertinent, maximè indiget homo ab alio erudiri . . . . hoc autem pertinet ad docilitatem, ut aliquis sit bene disciplinæ susceptivus; & idèò convenienter docilitas ponitur pars prudentiæ . . . . dum scilicet homo sollicitè, frequenter, & reverenter applicat animum suum documentis majorum, non negligens ea propter ignaviam, nec contemnens propter superbiam.

Confirmatur exemplo celeberrimorum Doctorum, qui, licèt in interpretandis Legibus versatissimi, hærent nonnunquam in casibus difficilioribus, & ad Libros, consiliumve aliorum sapientum recurrere opus habent. Ipsemet S. Augustinus præcipuum Ecclesiæ lumen, fatetur Lib. 21. de Civit. cap. 27. se aliquando dijudicare non posse inter peccata, quæ pœnam æternam, & ea, quæ temporalem duntaxat merentur, additque periculosissimum esse in his præcipitem ferre sententiam. Denique totum ferè Corpus Juris Canonici nihil est aliud, quàm collectio responsionum ad consulta, quibus Episcopi, & alii viri insignes ex variis orbis partibus, Sedem Apostolicam pulsare consueverant.

Nec dicas, in pagis & villulis non ita difficiles casus occurrere, namque quotidiana experientia constat, ex iisdem locis quæstiones valdè intricatas proponi. Nec mirum; quia ubi ignorantia amplius viget, ibi homines frequentius in erroris laqueos se conjiciunt, ex quibus non facile sit eos expedire.

CAPUT

## CAPUT IX.

Utrum Lex obliget cum gravi nocumento,  
atque etiam cum vitæ periculo?

Hæc quæstio ad Legis interpretationem pertinet, estque solvenda ex præmissis principiis. Juxta quæ

R. 1. Præcepta Juris naturalis, quæ versantur circa materiam, quæ est vel intrinsecè malà, ut prohibens mendacium, perjurium, blasphemiam, vel solius Dei dominio subjicitur, ut Lex prohibens homicidium, polygamiam, obligant etiam cum vitæ periculo.

Probatur 1. Ecclesiast. cap. 4. *Pro justitia agnizare usque ad mortem.* Matth. 10. *Nolite timere eos, qui occidunt corpus.* Joan. 12. *Qui amat animam suam, perdet eam.*

Probatur 2. Traditione: Namque Ecclesia hætenus damnavit tanquam gravioris peccati reos, qui tormentorum vi aut metu fidem abjurarent. Clerus Gallicanus anno 1700. proscripsit doctrinam quorundam Modernorum, qua docebant, licitum esse ad vitandam mortem, jurare absque intentione jurandi; aut cum amphibologia, & cum restrictione mentali; occidere pro defensione famæ, & bonorum fortunæ, Susannam in extremis angustiis constitutam potuisse pati libidinem infandorum Seniorum passivè se habendo. Præiverant Innocentius XI. anno 1679. & Facultas Parisiensis anno 1665.

Probatur 3. ratione; Quia nisi præcepta illa obligarent cum vitæ periculo, sequeretur, vel



quod intrinsecè & essentialiter malum est , in extremis angustiis fieri bonum , aut saltem indifferens , vel honestum esse juxta Legem æternam , & rectam rationem aliquando malè agere : atqui utrumque est longè absurdissimum , & prorsus contradictorium : Ergo. Hinc non licet fœtum in utero materno præfocare , quamvis non possit aliter consuli saluti matris ; quia occidere innocentem est res per se mala.

R.2.Præcepta Legis naturalis, quæ ex contractu, & hominum dispositione exurgunt, non obligant cum mortis periculo, & ex iis aliqua nequidem cum gravi nocumento. Responsio exemplis patebit quoad utramque partem.

Quoad primam , 1. præsupposita rerum divisione exurgit naturale præceptum , *non furtum facies* ; sed homines illam divisionem facere nequiverunt in naturæ præjudicium , pro cujus conservatione Deus terram dedit filiis hominum : ergo res in extrema necessitate redeunt ad suum pristinum statum, fiuntque communes ; ac proinde non tenetur quis fame perire , cum in promptu adest panis alterius ; nec segetibus parcere , si aliter gladium persequentis se fugere non possit. 2. Ex emptione Mancipii , & ex contractu matrimonii nascitur in Mancipio naturalis obligatio obediendi domino , & in conjugē reddendi debitum conjugale : sed illa obligatio non extenditur ad eum casum , in quo ista præstari nequeunt sine vitæ discrimine , putà si dominus Mancipium evidenti mortis periculo exponit , si alter conjugum sit lepra , & alio pestifero morbo infectus ; si uxor Medicorum judicio in partu mortem non  
fit

fit evasura; quia contractus humani fieri intelliguntur, salvis naturæ juribus.

Quoad secundam etiam partem, suadetur responsio exemplo voti & restitutionis. Votum quippe, v. gr. jejunandi, Horas Canonicas recitandi, jure naturali est observandum, non obligat tamen cum sanitatis discrimine, quia ex dicendis ubi de voto, intentio voventis præsumitur exclusisse tantum incommodum; alioquin fuisset temeraria. Item, debitor in gravi necessitate constitutus, licitè differt restitutionem, quia si creditor pari necessitate non laboret, ex charitate vel misericordia tenetur hanc dilationem concedere.

R. 3. Præcepta Legis positivæ, sive divinæ, sive humanæ, ordinariè non obligant cum gravi nocumento.

Probatur 1. ex Scriptura. Christus judicio suo comprobatur, Matth. 12. vers. 4. quòd David in necessitate gravi comederit Panes propositionis, quos secundum Legem divinam edere non licebat, nisi solis Sacerdotibus; & Luc. 14. v. 5. Quòd Judæi Sabbato servilibus operibus vacarent ad extrahendum jumentum, si fortè sacro illo die in puteum incidisset.

Probatur 2. ratione; Quia cùm præcepta illa versentur circa materiam minimè necessariam, & imposita sint in bonum publicum, interpretari licet eam esse Legislatoris mentem, ut non obligent cum gravi subditorum detrimento, tum maxime, cùm bonum publicum id non postulat.

Dixi, *ordinariè*; Quia Lex positiva sive divina, sive humana, obligare potest cum mortis periculo.

1. Quando præceptum omitti non potest, vel sine gravi aliorum scandalo, vel sine contemptu Religionis, ut si hæreticus in odium præcepti Ecclesiastici, cogeret ad manducandas carnes die Veneris: in his enim casibus imitandum est exemplum Eleazari, & fratrum Machabæorum, qui elegerunt magis mori, quàm manducare carnem suillam in veteri Lege prohibitam, 2. Mach. 7.

2. Quando commune Reipublicæ bonum exigit v. gr. ut Cives cum vitæ discrimine pugnent, ut miles ex ducis præcepto stationem non dimittat propter mortis periculum; rationi quippe consentaneum est, quòd pars propter salutem totius periculo sese objiciat. Hinc laudabilis censetur Lex Carthusianorum, juxta quam à carnibus abstinent, etiam cum Medici judicio necessariæ sunt ad sanitatem restaurandam; satius enim est unius privati vitam periclitari, quàm januam in sancto illo Ordine aperire multis abusibus. Et ita sensisse fertur Patres Tridentinos, cum quæstio apud eosdem moveretur, num ille Carthusianorum rigor esset mitigandus.

Confirmatur. Si paterfamilias periculose decumbens, ne nimis familiam gravet, licite parcat magnis impensis ad comparandum pretiosissimum remedium, & morbo depellendo aptissimum, quidni & Carthusianus, ne solvatur Ordinis sui observantia, laudabiliter abstinebit à carnibus, alioqui saluti corporis necessariis? is tamen uti deberet, si nullus alius cibus præsto esset, modò tamen id fieret citra aliorum scandalum.

Dices 1. contra primam responsionem; Seipsum occidere, est quid intrinsecè malum: atqui ille seipsum occidit, qui medium rejicit, putà menda-

mendacium vel cibum, sine quo vita conservari non potest: ergo vel Lex naturalis non obligat in extremis angustiis: vel si obligat juxta responsionem, homo in iis constitutus erit perplexus, peccabitque quocumque se verterit; si enim mentiatur, peccabit juxta responsionem: si à mendacio absteineat, non minùs erit sui homicida, quàm si omnem cibum respueret.

Concessa majore, distingo minor. Si usus medii sit honestus & ad ultimum finem ordinari possit, ut usus alimentorum, Concedo: Si sit inhonestus & malus, Nego minor. Nam ex S. Thoma, quod sine peccato fieri nequit; illud simpliciter impossibile est: quæ autem sunt impossibilia, non cadunt sub præceptum, ac proinde qui mortem sine mendacio effugere nequit, non minùs caret medio ad vitam conservandam, quàm cui nullum suppetit alimentum. Probrosus namque foret Christianum id non sentire, quod Poëta Juvenalis, licèt Ethnicus, verissimè cecinit:

*Summum crede nefas animam præferre pudori,  
Et propter vitam vivendi perdere causas.*

Vivendi causas vocat honestatem & virtutis opera, quia sicut causa excolendæ arboris, sunt fructus ex ea percipiendi, aded ut omnium judicio succidi debeat arbor, quæ nullos aut malos fructus producit, sic causa finalis vitæ humanæ, sunt actus laudabiles, ac proinde nihili facienda est, quando honestè & sine peccato conservari nequit; perabsurdum enim est fini præferre media, sanitati remedia, & virtuti vitam temporalem. Hæc solo lumine naturali vidit homo ethnicus in nocte infidelitatis constitutus, ad quæ nonnulli



Christiani in meridiana Evangelii luce cæcutiunt.

Dices 2. Infans censetur pars matris, quamdiu in ejus utero continetur: atqui licet amputare membrum, quando est toti corpori noxium: Ergo.

Distinguo majorem: Est pars moraliter, & civiliter: Concedo: Physicè, Nego major. Est enim persona realiter à matre distincta, in cujus vitam nec mater, nec Respublica habent dominium directum.

Instabis: Principes animadvertunt in eos, qui aliis sunt noxii; non enim sine causa gladium portant, Rom. 13. Ergo, cum infans matrem in vitæ periculum conjiciat, licitè interficitur.

Distinguo antecedens: qui aliis sunt noxii injustè, Concedo: Inculpatè, quemadmodum infans, Nego anteced.

Urgebis: furibundi & rabie perciti licitè suffocantur, quamvis sine sua culpa aliis noceant: Ergo.

R. 1. Negari potest anteced. Recludi quippe debent hujusmodi homines, non occidi. Sed quidquid sit de antecedente,

R. 2. Negando conseq. Disparitas est quòd rabiosi, quamvis non sint formaliter injusti ob defectum libertatis, injusta tamen faciunt, & cum obvios quosque directè & sævè nimis aggrediuntur, vim vi licet repellere. At infans intra materna viscera nihil injustum contra eam molitur, nec mortis periculum, quod ipsa ejus occasione incurrit, ipsi imputari potest, etiam in hypothèsi quòd esset mentis compos. Unde nec mater, nec quivis alius plus juris habet illum

lum occidendi, quàm eques hostem insequentem fugiens proterendi obvios, qui præter intentionem sunt fugæ obstaculum.

## C A P U T X.

### De Dispensatione in Lege positiva.

Q. I. *Quid est dispensatio?*

R. Est relaxatio juris communis cum cognitione causæ facta in quibusdam casibus ab eo, qui habet jurisdictionem.

Dicitur 1. *Relaxatio juris communis*, ut distinguatur 1. ab interpretatione, quæ est mera Legis explicatio, in qua superior simpliciter & juridicè declarat Legem ad casum sibi propositum non extendi, v. gr. votum non obligare in iis circumstantiis. Vulgò tamen hæc interpretatio vocatur dispensatio, sed improprie. 2. A permissione, quæ Legem non relaxat, sed conditionem apponit, sub qua Lex non obligat, ut prohibitionem ingrediendi Monasteria Monialium sine permissione Ordinarii. 3. A privilegio, quod plerumque non est contra, sed præter Legem, ut privilegium Clericale.

Dicitur 2. *Cum cognitione causæ*; Quia Lex non est relaxanda, nisi adhibita diligenti consideratione, ut habetur capit. *Necessaria*, causa 1. quæst. 7.

Dicitur 3. *Facta in quibusdam casibus*, in quo iterum differt à Privilegio, quod conceditur in perpetuum, & per modum Legis.

Dicitur 4. *Ab eo qui habet jurisdictionem*; Quia ex S. Thoma qu. 97. art. 4. *Periculosum esset, ut hoc judicio cujuslibet committeretur, nisi forte propter evi-*

*dens & subitum periculum ; & ideo ille , qui habet regere multitudinem , habet potestatem dispensandi in Lege humana , quæ sua auctoritate nititur , ut scilicet in personis , vel in casibus , in quibus Lex deficit , licentiam tribuat , ut præceptum Legis non servetur .*

*Q. 2. Lex positiva admittitne dispensationem propriè dictam ?*

*R. Admittit , præsertim humana ; quia ut ratiocinatur S. Thomas cit. qu. 97. art. 4. Leges latæ sunt , ut proficiant , non verò ut noceant : atqui aliquando contingit Legem positivam , quæ lata est in bonum commune , noxiam esse in quibusdam circumstantiis , quas Legislatores aut fortè non prævidit ; aut si præviderit , exprimere non debuit . Nam ex dictis hoc discrimen est inter Legem naturalem & positivam , quòd Lex naturalis se extendat ad omnes & singulos casus , solaque explicatione , seu interpretatione indigeat ; Lex verò positiva spectet duntaxat , quæ communiter fieri , aut vitari debent .*

*Ergo fidelis dispensator & prudens , quem constituit Dominus super familiam suam , debet attendere , quod cuique utile sit , & severitatem Legis relaxare , ubi aliquem è subditis nimis gravari contigerit ; Legi enim insistere , cum ejus observantia infert præjudicium , crudelitatem sapit , ex Symmacho Papa Epistola ad Avitum .*

*Ergo dispensatio non est mera gratia , quam superior pro libitu concedere , vel denegare possit ; sed est necessarium levamen , quod ex officio & ex justitia distributiva impendere tenetur iis qui indigent , ut colligitur ex laudato capit. *Necessaria* , ubi summus Pontifex sic loquitur : *Necessaria rerum dispensatione constringimur , Apostolicæ Sedis**

*dis moderamine convenimur, sic canonum paternorum decreta liberare . . . ut quæ præsentium necessitas temporum restaurandis Ecclesiis, relaxanda deposcit, adhibita diligenti consideratione (quantum potest fieri) temperemus.* Sic Apostolus 2. Cor. 2. partem impositæ satisfactionis incesto remisit, ne abundantiori absorberetur tristitia. Sic S. Cyprianus pœnitentiæ tempora restrinxit propter imminentem persecutionem: ratus eum non esse idoneum ad martyrium, quem accepta Eucharistia armaret ad prælium.

Dixi in responsione, *præsertim Lex humana*; Non enim desunt Theologi, qui docent Legem divinam non admittere dispensationem propriè dictam, sed interpretationem duntaxat, hoc est, superiorem non solvere vinculum Legis divinæ, sed juridicè tantum declarare, eam non extendi ad hunc aut illum casum. Verum S. Thomas cit. art. 4. agnoscit dispensationem in utramque Legem cadere; sic enim habet in responsione ad tertium, *sicut in Lege humana publica non potest dispensare, nisi ille à quo Lex auctoritatem habet, vel is, cui ipse commiserit: ita in præceptis juris divini, quæ sunt à Deo, nullus potest dispensare nisi Deus, vel is, cui ipse specialiter committeret.*

Q. 3. *Quis potest dispensare in Lege positiva?*

R. 1. Certum est ipsummet Legislatorem posse dispensare in Lege à se lata, cum ex dictis tota ex ejus voluntate pendeat. Sed difficultas est, utrum inferior possit dispensare in Lege Superioris?

R. 2. Inferior non potest dispensare in Lege Superioris nisi id ipsi sit concessum vel jure, vel consuetudine, vel delegatione. Ita habetur Clementina, Capit. *Romani*, de Elect. *Lex Superioris*  
per



*per inferiorem tolli non potest.* Et ratio est, Inferior ipse Lege Superioris constringitur, eique parere debet sicut cæteri.

Dixi, *Nisi id sit ipsi concessum, &c.* Ex usu enim Episcopi dispensant in Canonibus & præceptis universalis Ecclesiæ, nisi dispensatio sit specialiter reservata Summo Pontifici: quin & hæc ipsis committitur, quando non patet recursus ad Sedem Apostolicam.

Q. 4. *Dispensatio sine causa estne licita?*

R. Minimè, colligiturque ex allata definitione dispensationis, in qua dicitur debere fieri cum cognitione causæ.

Probatur autem 1. ex Concilii Tridentini Sess. 25. cap. 18. de Reform. ubi sic habetur: *Quod siurgensjustaque ratio, & major quandoque utilitas postulaverint cum aliquibus dispensandum esse, id causa cognita, ac summa maturitate, atque gratis, à quibuscumque, ad quos dispensatio pertinebit, erit præstandum, aliterque facta dispensatio subreptitia censeatur.* Et Sess. 24. cap. 5. de Reform. in contrahendis matrimoniis, *vel nulla omninò detur dispensatio, vel rarò, idque ex causa, & gratis concedatur. In secundo gradu nunquam dispensetur, nisi inter magnos Principes, & ob publicam causam.*

Probatur 2. ex Patribus. Sanctus Bernardus, Lib. 3. de Considerat. cap. 4. sic alloquitur Eugenium Summum Pontificem: *Quid ergo, prohibeo dispensare? non sum tam rudis, ut ignorem positos vos dispensatores, sed in ædificationem, non in destructionem. Denique quæritur inter dispensatores, ut fidelis quis inveniat. Ubi necessitas urget, excusabilis dispensatio est; ubi utilitas provocat, dispensatio laudabilis est. Utilitas, dico, communis, non propria; nam cum nihil horum est,*  
*non*

*non planè fidelis dispensatio, sed crudelis dissipatio est. Et ad confirmandam suam sententiam profert sanctorum Patrum testimonia Lib. de Præcept. & dispens. c. 2. Numquid autem hoc dico, vel solus sentio, vel primus dico? Annon hoc ipsum & Papa Gelasius sentit? ait siquidem, ubi necessitas non est, inconvertibilia maneant sanctorum Patrum Decreta. Leo quoque Papa, ubi, inquit, necessitas non est, nullo modo sanctorum Patrum constituta violentur. Et cap. 4. de statutis Monachorum, sic habet: Neque enim Abbas supra regulam est, cui semel, & ipse spontanea se professione submitit; etsi (quod negandum non est) Dei regula charitas, regulæ S. Benedicti jure præponitur. Esto proinde ut interdum regulæ littera cedat pro tempore charitati, cum ratio necessitatis, vel charitatis exegerit: absit tamen ut hominis cujuscumque subdatur voluntati. Sanctus quoque Thomas, qu. 197. art. 4. sic scribit: Si autem absque hac ratione pro sola voluntate licentiam tribuat, non erit fidelis in dispensatione, aut erit imprudens: infidelis quidem, si non habet intentionem ad bonum commune: imprudens autem, si rationem dispensandi ignoret.*

Probatur 3. ratione triplici. Prima, Prælati ex officio tenentur invigilare legum observationi, defensores divinarum Canonum, & custodes summi, non prævaricatores, inquit Martinus I. Epist. 5. Ergo infidelis est erga Ecclesiam, si Leges ejus impunè transgredi patiatur, magis si ipse sit transgressionis auctor. Secunda, quia ex dictis Legislator peccat, si sine causa non servet Legem à se latam: ergo à fortiori, si eam concedat ab aliis negligi. Tertia tangitur à Patribus Tridentinis laudato cap. 18. Sess. 25. his verbis: *Frequentius, Legem observare, exemploque potius, quàm certo personarum rerumque delectu, petentibus indulgere, nihil aliud est,*  
quàm

*quàm unicuique ad Leges transgrediendas aditum aperire.* Enimverò subditi facilè credunt idem sibi licere, quod aliis, tum maximè, cùm nulla specialis causa, aut ratio existit, cur Lex ab uno potius quàm ab alio servari debeat, sicque infidelis dispensatio in malum exemplum trahitur, & est plurium transgressionum occasio. Itaque non minùs cautè dispensandum est, quàm membrum corporis incidendum, hoc est, quatenus necessarium, & expedit salutì totius; Nam dispensatio ad mentem S. Augustini est quædam disciplinæ plaga: *Fit quidem, inquit, aliquid tanquam in cortice arboris matris contra integritatem severitatis.*

Q. 5. *Quale est peccatum dispensare sine causa?*

R. Est ex natura sua mortale juxta communem Theologorum sententiam; quia hujusmodi dispensatio ex natura sua pugnat contra charitatem & bonum commune, multisque est peccandi occasio. Levitas tamen materiæ excusare potest à mortali, sicut in qualibet alia materia.

Q. 6. *Dispensatio sine causa estne valida?*

R. 1. Si facta sit ab ipso Legislatore vel ab ejus successore, valida est, quamvis illicita; quia ex dictis Lex positiva non habet vim obligandi, nisi ex voluntate Legislatoris: atqui Legislator non vult subditum obligari in eo casu, in quo cum illo dispensat: Ergo.

R. 2. Si dispensatio procedat ab inferiori, irrita est & prorsus nulla; quia inferior non potest dispensare in Lege superioris. Nec refert quòd inferior habeat à superiore dispensandi facultatem; namque superior non præsumitur id concessisse, quod sine peccato concedere non potest: atqui superior non minùs peccaret, si inferiori deman-

demandaret dispensare absque causa, quàm si ipsemet sine ratione dispensaret : ergo recta ratio postulat , ut interpretemur ipsum concessisse inferiori facultatem dispensandi secundùm regulas juris , & non aliàs , velleque legem suam ab omnibus observari , quantum fieri potest , absque eorum præjudicio , & boni communis dispendio.

Confirmatur. Prælati inferior non potest absque causa secum dispensare in lege Superioris, Episcopus , v. g. in lege abstinendi à carnibus diebus Veneris , jejunandi per Quadragesimam , recitandi Horas Canonicas ; quia sunt præcepta universalis Ecclesiæ , quibus parere tenetur : ergo nec cum subditis in hujusmodi præceptis validè dispensare potest , si desit dispensandi causa.

Ergo nulla est dispensatio sine causa à Summo Pontifice obtenta in voto , & juramento ; quia lex voti & juramenti est Juris Divini , cui subest Summus Pontifex.

Ergo sine causa validè non dispensaret Episcopus in impedimentis matrimonii ; quia hujusmodi impedimenta sunt Leges universalis Ecclesiæ , quæ est supra Episcopum.

Q. 7. *Licetne petere dispensationem sine causa?*

R. Minimè ; Quia per hujusmodi supplicationem Legislator inducitur ad peccandum : ergo si talis dispensatio sit grave peccatum in superiore , juxta præcedentem responsionem , erit & in supplice , nisi excuset ignorantia & bona fides , quare totam committit judicio Superioris.

Viderint ergo Parochi, qua conscientia, nedum Parochianos avertant ab hujusmodi illicitis supplicationibus, sicut tenentur ex officio; quin potius illas suadent, & pro iis intercedunt apud Superiorem.

Q. 8.



Q. 8. *Subditus potestne uti dispensatione, quam sine causa obtinuit?*

R. 1. Si dispensatio est valida, validè ea utitur; quia per dispensationem illam solutus est à lege quoad hunc effectum. Usus tamen ille est illicitus; quia quamvis ablatum sit humanæ legis vinculum, superest tamen obligatio legis naturalis, juxta quam pars non debet absque causa discrepare à suo toto, nec aliis præbere scandalum, sive malum exemplum.

R. 2. Si dispensatio est irrita & prorsus nulla, nullum parit effectum, & irritum est, quod inde consequitur: putà matrimonium.

Dices: In Curia Romana plures dispensationes obtinentur sine causa, atqui hujusmodi dispensationes effectum sortiuntur, matrimonia, v. g. validè contrahuntur: Ergo.

Distinguo major. Obtinentur obreptitiè, aut subreptitiè, Concedo: Obtinentur absque ulla apparente causa, Nego major. Namque Summus Pontifex in suis Bullis, sive Rescriptis testatur se motum fuisse ex rationalibus causis ad concedendam gratiam, remittitque ad examen Ordinarii, num preces veritate nitantur. Si quæ sit ergo hęc culpa, potius tribuenda est Mandatario, quàm Mandanti.

Instabis: Expeditionarii, seu Bancharii distinguunt inter dispensationes in Curia Romana obtentas; alias vocant dispensationes cum causa, alias sine causa: ergo reverà Summus Pontifex aliquando sine causa dispensat.

Nego consequentiam; Illæ enim dicuntur sine causa, pro quibus obtinendis solvitur Camera Apostolicæ notabilis pecuniæ summa, quæ, cum  
infer-

inserviat ad sustinenda gravia Summi Pontificis onera Reipublicæ Christianæ necessaria, censetur in eadem Curia rationabilis causa, ex qua dispensatur cum iis, qui aliam dispensandi causam non exponunt.

Q. 9. *Quid est obreptio & subreptio?*

R. Obrepere dicitur, qui in sua supplicatione narrat falsa: subrepere verò, qui tacet, quæ exponi debent juxta Legem, Cancellariæ regulas & stylum.

Q. 10. *Estne irrita dispensatio, quoties in narratione fuit obreptio, vel subreptio?*

R. 1. Generatim. Rem dilucidè explicat Innocentius III. Cap. *Super litteris*, de Rescriptis, ubi decernit eum, qui mala fide falsum narrat, aut verum reticet, carere impetratis. Si autem bona fide, & sine ipsiusmet impetrantis culpa, obreptio vel subreptio contigerit, observandum docet, num summus Pontifex, cognita causa gratiam fuisset concessurus, aut negaturus? Si primum, valet dispensatio: si secundum, caret effectu: in dubio, ad delegati examen & judicium remittit. Quia celebre est illud Capitulum, & ad enodandas plures difficultates pernecessarium, non abs re erit illud majori ex parte exscribere: Nos igitur inter eos, qui per fraudem vel malitiam, & illos, qui per simplicitatem, vel ignorantiam, litteras à nobis impetrant, hujusmodi credimus discretionem adhibendam, ut hi, qui priori modo falsitatem exprimunt, vel supprimunt veritatem; in suæ perversitatis pœnam, nullum ex illis litteris commodum consequantur . . . . inter alios autem, qui posteriori modo litteras impetrant, duximus distinguendum, quæ falsitas suggesta fuerit, vel quæ veritas sit suppressa. Nam si talis expressa sit falsitas,

D. Habert Theolog. Tom. III.

Dd

vel

*vel veritas occultata, quæ quamvis fuisset tacita, vel expressa; nos nihilominus (saltem in forma communi) litteras dedissemus; Delegatus non sequens formam in litteris ipsis appositam, secundum ordinem juris in causa procedat. Si verò per huiusmodi falsitatis expressionem, vel suppressionem etiam veritatis litteræ fuerint impetratæ, qua tacita vel expressa, nos nullas prorsus litteras dedissemus, à Delegato non est aliquatenus procedendum, nisi forsitan eatenus; ut partibus ad suam præsentiam convocatis, de precum qualitate cognoscat, ut sic in utroque casu eadem ratio, quæ delegantem moveret, moveat etiam Delegatum.*

Ergo in hypothesi, quòd in libello supplici ad obtinendam dispensationem in aliquo consanguinitatis gradu, ab Expeditionario inter graves dispensandi causas falso expositum sit, Oratore ignorante, intercessisse copulam inter partes, vel contra suppressum præcessisse incestam copulam, quæ reverà præcessit, sed Orator ignorabat crimen illud esse exprimendum; nec obreptitia, nec subreptitia est illa dispensatio, potestque à Iudice, ad quem dirigitur Rescriptum Apostolicum, executioni demandari; quia in narratione nulla mala fides ex parte supplicis, & gratia nihilominus fuisset concessa, etiamsi falsum non esset expressum, nec verum suppressum.

Ergo obreptitia & irrita est dispensatio in forma pauperum obtenta à divite; quia falsitas est cum mala fide conjuncta. Quis autem censendus sit dives aut pauper, non una est omnium sententia. Is nobis videtur pauper, qui sine gravi rei familiaris incommodo expensas facere nequit, sive sit nobilis, sive ignobilis.

R. 2. Speciatim. Subreptio, qua tacetur quod exprimendum est juxta consuetudinem Curiae Romanæ, sed libertatibus Ecclesiæ Gallicanæ contrariam, dispensationem in Gallia non reddit irritam. Dispensatio, v. g. obtenta suppresso propinquiore consanguinitatis gradu, apud nos subreptitia non habetur; licet Pius V. Constitutione sua sanxerit inæqualitatem graduum consanguinitatis & affinitatis in supplicatione ad effectum matrimonii, esse exponendam; quia hæc Constitutio pugnat contra veterem Ecclesiæ Gallicanæ usum, & contra cap. *Vir qui à stipite*, cui eadem Ecclesia adhæret, ut constat ex Senatusconsulto anni 1672.

## CAPUT XI.

Expenduntur reliquæ difficultates circa dispensationes & alias gratias.

Cum in praxi difficultates, & quidem graves, circa dispensationes, indulta & alias gratias frequenter recurrant, præcipuas duximus expendendas sequentibus quæstionibus. Itaque,

Q. 1. *Utrum dispensatio super uno impedimento suppresso altero, sit subreptitia: v. g. impetrans erat affinitate & consanguinitate conjunctus cum ea, quam ducere optabat, & mentionem fecit solius consanguinitatis?*

R. Non una est Theologorum sententia. Navarrus & alii negant esse subreptitiam, contenduntque, valere quantum ad unius impedimenti solutionem, sed communior sententia cui subscribendum est, distinguit inter impedimenta. Alia sunt prorsus disparata, ut duæ irregularitates, al-



tera ex defectu natalium, altera ex bigamia. Alia sunt impedimenta sic inter se conjuncta per ordinem ad effectum dispensationis, ut nisi singula tollerentur, dispensatio redderetur omnino inutilis, v. gr. frustrà dispensaretur in tertio gradu consanguinitatis, vel in voto castitatis ad effectum matrimonii, si impetrans esset aliunde in quarto gradu consanguinitatis; vel præter votum castitatis emisisset votum ingrediendæ Religionis. Impedimenta prioris generis non debent necessariò exponi ad effectum dispensationis; quia nullum jus id præscribit, nullave suadet ratio; dispensatio enim super irregularitate orta ex defectu natalium, suppressa bigamia, vel super voto Religionis, nulla mentione facta alterius voti castitatis, potest esse utilis impetranti; ergo honestè & rationabiliter concedi.

Singula verò posterioris generis impedimenta exponi debent, quia alioquin inutilis ac proinde inhonesta esset dispensatio, nec præsumi debet, Summum Pontificem sine ratione dispensare, ut reverà sine ratione dispensaret, vel in voto castitatis remanente voto Religionis; vel in impedimento tertii gradus consanguinitatis, adhuc stante impedimento quarti gradus. Quare meritò in Curia Romana hujusmodi dispensatio censetur subreptitia & nulla.

Q. 2. *Sed quid si impetrans quartum gradum consanguinitatis reticuit bona fide, & ex mera ignorantia, estne recurrendum ad Summum Pontificem?*

R. Ex Cap. *Super litteris* supra laudato & explicato, pag. 417. dispensatio non est subreptitia; cum verisimile sit Summum Pontificem etiam concessurum fuisse gratiam cognita veritate. Sed impetrans

petrans alia dispensatione indiget, quam Episcopus concedere potest, si juxta Ecclesiæ suæ usum in quinto gradu dispensare soleat.

Q. 3. *Utrum ad obtinendam dispensationem in Curia Romana circa impedimentum matrimonii impetrans exprimere debeat, se rem turpem habuisse cum consanguinea, quam vult habere uxorem?*

R. Si incestus præivit, ut facilius esset dispensatio, utpotè petita ob gravem causam, exprimenda sunt & crimen, & intentio ex qua patratum est; quia impia illa intentio incestos gratia efficit prorsus indignos, ex Trident. Sess. 25. cap. 5. de ref. matr. Sed seclusa ejusmodi intentione, negat Pontius, incestum exprimendum, quin hæc expressio prodesset potius, quàm obesset gratiæ obtinendæ.

Verum ex praxi Curiae & declaratione Cardinalium, subreptitia foret dispensatio; Quia cap. *Si quis*, & cap. *Transmissæ*, tit. *de eo, qui cognovit*, &c. incesti matrimonium contrahere non debent.

Q. 4. *Quid si impetrantes post dispensationem in idem crimen relabuntur?*

R. Novum non incurrunt impedimentum, propter quod ad Sedem Apostolicam recurrere necesse sit. Nam relapsus contigit, vel post, vel ante latam Ordinarii sententiam, atqui in neutro casu parit impedimentum: non in priori; quia in omnium sententia impetrantes virtute dispensationis non sunt conjuncti in gradu prohibito, nec proinde per relapsum fiunt incesti. Non in posteriori, quia vel ipse Summus Pontifex actu & de facto dispensat, committitque duntaxat Ordinario examen, num preces veritate nitantur, ut nonnulli contendunt: vel mandat Ordinario,

ut ipse dispenset, cognita veritate, quemadmodum Galli communiter sentiunt: atqui in neutra sententia relapsus parit impedimentum, propter quod impetrantes indigeant nova Summi Pontificis dispensatione. Non in priori; quia, ut jam diximus, impetrantes post obtentam dispensationem, non sunt conjuncti in gradu prohibito. Non in posteriori; tum quia in narratione apud Sedem Apostolicam necesse non est, ut crimen exponatur quoad numerum, sed sufficit quod exprimatur incestus species, quam supponimus impetrantes exposuisse: tum quia nullum jus, nullave ratio exigit, ut in Curia Episcopali, ubi concedenda est gratia, exponatur occultum crimen. Quòd si opponas laudatum cap. *Si quis*, respondetur, ipsi derogatum contraria consuetudine: nam incestus hodie non computatur inter impedimenta matrimonii.

Ex hac responsione patet, quid sit sentiendum in casu, quod impetrans, post mandatum de dispensando super affinitate orta ex copula illicita cum consanguinea ejus, quam vult uxorem ducere, relapsus sit. Si enim relapsus contingit post judicium Mandatarii, novum procul dubio incurrit impedimentum. Idem dicendum in sententia eorum, qui volunt, Mandatarium non esse Judicem, sed Executorem gratiæ à Summo Pontifice concessæ, qualis vulgò præsumitur prudens Confessarius. Sed si Mandatarius agat Judicem ordinarium, ut creditur in Gallia, dispensat etiam super affinitate orta ante suam sententiam.

Q. 5. *Estne necesse, ut pro obtinenda nova gratia, fiat mentio prioris, vel concessæ, vel denegatæ?*

R. 1. Gratia jam concessa exprimi debet, quoties

ties potest esse causa & ratio denegandi novam. Responsionis ratio patebit exemplis. Clericus obtinuit Beneficium, & postulat secundum; à sex mensibus non residet in Beneficio, & petit, ut sibi adhuc liceat abesse per alios sex menses: nisi faciat mentionem præcedentium gratiarum, subreptitiè novam quærit; utpotè quæ non debeat concedi; nisi gravior supervenerit causa; causa enim conferendi Beneficium alicui, non sufficit ut eidem duo conferantur; nec ratio, non residendi per sex menses, valet ad non residendum per annum integrum. De Beneficiis expressè habetur cap. *Ad aures*, &c. *Ad Audientiam*, de Rescriptis, ubi vult Summus Pontifex, fieri mentionem etiam pensionis Clericalis. Et C. *Si proponente*, de Rescriptis in 6. habens Beneficium exiguum, quod supprimit: subreptitiè obtinet Rescriptum ad secundum.

R. 2. Si prior gratia sit omninò disparata, nec sit causa denegandæ posterioris, ut si quis olim à vinculo irregularitatis absolutus postulet Beneficium, necesse non est ut exprimatur; quia nulla Lex, nullave ratio boni communis id exigit.

R. 3. Absolutè valet gratia, quamvis impetrans tacuerit eam sibi olim denegatam, sive ab ipsomet concedente, sive ab ejus Superiore, v. g. supplex repulsam passus est ab Episcopo, accedit fortè (improbatus tamen) ad ejus Vicarium Generalem, qui annuit ejus postulatis, licèt ita affectus, ut non recederet à sententia Episcopi, si esset illi nota; quia potestas Vicarii non est revocata, nec restricta per denegationem Episcopi: habitualis autem ejus intentio non reddit actum invalidum; aliàs improbatio ad excipiendas Confessiones, nul-



la cenferi deberet ex eo quòd non fuiffet concessa, si noti fuiffent nonnulli impetrantis defectus.

Q. 6. *Utrum cessante dispensationis causa, cesset & ipsa dispensatio?*

R. Effatum est apud Canonistas, cessante causa totali, cessat effectus, nempe dispensatio. Dicitur, *causa totalis*; quia si supersit causa partialis, propter quam nihilominus Summus Pontifex gratiam concessisset, rata est dispensatio ex cap. laudato. *Super litteris.*

Q. 7. *Quid si causa adfuit, dum litteræ in Curia expediebantur, & desit priusquam ab Ordinario, vel à Confessario executioni mandarentur?*

R. Extinguitur gratia, nec debet dispensatio executioni mandari; quia Litteræ Pontificiæ sub hac conditione ad Mandatarium diriguntur, nempe si preces veritate nitantur. Ergo si post expeditionem lis, propter quam dispensatio super gradu consanguinitatis concessa est, ante iudicium Ordinarii extinguatur; vel dos competens obveniat puellæ ex hæreditaria successione, Mandatarium non potest exequi Mandatum Apostolicum.

Q. 8. *Quid si post iudicium Mandatarii causa dispensationis desinit?*

R. Oppositæ sunt Theologorum sententiæ, quæ nobis videntur sic conciliandæ; nempe si dispensatio sit in Lege humana, permanet firma, nisi ex communi omnium sensu intelligatur alia mens Superioris: si in Lege Divina, dispensatio evadit nulla, nisi impetrantes bona fide amplexi sint statum, putà matrimonium, à quo recedere non liceat sine scandalo, aut graviore incommodo. Et ratio est, quòd Summus Pontifex vera existente dispensandi causa, vinculum Legis humanæ in perpetuum

petuum tollere possit, præsumaturque ita voluisse, ne impetrantes continuis conscientiae scrupulis, & animi anxietatibus exponantur, num scilicet dispensationis causa perseveret: Legem verò naturalem non solvat, sed interpretetur duntaxat illam non obligare in quibusdam circumstantiis, quibus sublati interpretatio locum non habet. Ergo facultas transeundi ad strictiorem rejici debet ab Ordinario, tamquam obreptitia, quando impetrans elegit benevolum receptorem, in cujus Monasterio nulla est disciplinæ regularis observantia, nullus paupertatis & obedientiæ actus. Quod & Confessarii advertent, quando hujusmodi fraudulentum ad eos accedunt, peccata deposituri.

Dixi: *Nisi ex communi omnium sensu intelligatur fuisse alia mens superioris.* Quis enim non intelligat in dispensatione ad usum carnum per Quadragesimam, tacitam esse conditionem, si impetrantis infirmitas per totum illud tempus duraverit?

Dices: ex nostra responsione sequi absurda. 1. Eum, cum quo dispensatum fuit super irregularitate ad suscipiendos Ordines, manere irregularem, si Ordines non suscipiat. 2. Voto castitatis iterum astringi, qui causa matrimonii dispensationem in voto obtinuit, si hoc matrimonium inire noluit.

Nego sequel. Namque actualis susceptio Ordinum, vel matrimonii celebratio ordinariè non sunt dispensationis causæ, nisi remotæ. Unde Mandatarius non tenetur inquirere, an impetrans de facto Ordines suscepturus sit, aut matrimonium contracturus; sed satis est, si ipsi appareat, quòd aliæ dispensationis causæ veritate nitantur; propter quas ponatur in statu, in quo possit vel

Ordines suscipere, vel matrimonium contrahere, si ipsi expediat.

Dixi, *ordinariè*; Nam *extraordinariè* matrimonium potest esse causa proxima & necessaria dispensationis circa Votum castitatis, ut si concessa esset cupienti ducere puellam, quæ licet jam provectæ ætatis, hætenus nubere non potuit propter dotis defectum. In quo casu nulla esset dispensatio, si impetrans mutato consilio nollet eam ducere.

Q. 9. *Utrum liceat uti gratia, antequam litteris sit exarata?*

R. Licet; modò constet esse concessam: tum quia Scriptura requiritur duntaxat in testimonium gratiæ concessæ: tum quia nulla Lex universaliter irritat gratias, quæ Scripturis non fuerint traditæ.

Dixi: *Universaliter*; Nam Extravag. cap. *Injunctæ*, titul. de Electionibus, & Julii II. & Bulla, *Romani*, censetur intrusus, qui Beneficii à Sede Apostolica collati iniit possessionem ante litterarum expeditionem. Concilium quidem Tridentinum præcipit facultatem tum ingrediendi septimonialium, Sess. 25. cap. 5. tum non residendi Sess. 23. cap. 1. de Reformat. scriptis esse tradendam, sed non declarat alias fore irritam. Unde excommunicationem citat. cap. 1. latam non incurreret, qui cum consensu, sed sine litteris Episcopi, aut Superioris eadem septa ingrederetur. Sic multi Episcopi Statutis suis cavent, ne approbatio ad excipiendas Confessiones detur sine scripto; sed eam sic datam non irritant.

Dices: ex regula 25. Cancellariæ, gratia censetur informis ante litterarum expeditionem.

R. 1.

R. 1. Regulam illam spectare duntaxat gratias à Summo Pontifice concessas, nec extendendam ad alias. 2. Valere tantum pro foro externo.

Q. 10. *An gratia expiret morte concedentis?*

R. 1. Certum est, quòd si res non sit integra, hoc est, si Mandatarius ante mortem mandantis, mandatum exequi cœperit, v. g. citaverit, vel vocaverit partes ad veritatem cognoscendam, Confessarius pœnitentis confessionem exceperit ex parte, gratia non extinguitur. Ita Urbanus III. Cap. *Gratum*, de officio & potestate Judicis delegati, ubi sic habet: *Respondemus quòd cum in casu priori, citatione facta, negotium sit quasi cœptum, maxime si delegatus non sit certus de morte delegantis, potest ac debet in causa procedi.*

R. 2. In materia justitiæ, & ad litem terminandam, gratia sive facta sit, sive facienda, desinit morte concedentis, re adhuc integra ex cap. *Licet*, de officio delegati: quia mandatum re integra, morte mandatoris expiravit, ut ibi dicitur.

R. 3. In alia materia quam justitiæ gratia jam facta, non expirat morte concedentis, etiamsi res sit adhuc integra, ex cap. *Si cui nulla*, de Præbendis in 6. & c. *Si super gratiam*, de officio delegati in 6. Et ratio est, quia donatio non extinguitur morte donantis: atqui gratia jam facta est quædam donatio: ergo privilegium alicui concessum eligendi Confessarium, non perit morte concedentis, quamvis nondum electus sit Confessarius; quia gratia est jam facta. Propter eandem rationem mortuo Episcopo, valent litteræ dimissoriæ, quas ante mortem concesserat ad Ordines suscipiendos.

R. 4.



R. 4. Gratia facienda extinguitur morte concedentis; si res sit adhuc integra. Ita expresse habetur cit. cap. *Si cui nulla*.

Q. II. *Quomodo dijudicari potest, an gratia sit facta, vel facienda, maximè cum nondum sortita est unum effectum?*

R. Hæc à Theologis communiter statuitur regula. Si gratia sit in favorem ejus, ad quem dirigitur, quamvis ulterius cedat in aliorum commodum, ut facultas excipiendi Confessiones indefinitè, est gratia facta; quia in hac concessione Superior vult favere accipienti. Ergo Confessarius, cui Episcopus dederat facultatem absolven- di à casibus sibi reservatis, non hunc aut illum determinatè, sed quoslibet è subditis, validè & licitè utitur ea facultate post mortem Episcopi; quia est gratia jam facta. Contra verò, si Superior spectet duntaxat commodum alicujus tertii, mandatque prudenti Confessario, ut à casibus reservatis, censuris & irregularitatibus absolvat determinatam personam, est gratia facienda illi personæ, ac proinde desinit morte concedentis.

Colligitur autem hæc regula ex laudato cap. *Si cui nulla*, ubi sic loquitur Summus Pontifex: *Si cui nulla personarum facta expressione, sit gratiose concessa facultas, ut auctoritate Apostolica possit aliquibus personis idoneis in certa Ecclesia providere, vel Beneficia conferre . . . : hujusmodi concessa, (quam, cum specialem gratiam continent, decet esse mansuram) non expirat, etiam re integra; per obitum concedentis. Secus si super provisione certæ personæ facienda, sit data potestas eidem non ob suam, sed ejus, cui provideri mandatur, gratiam vel favorem: illa quidem expirat omnino, si concedens re integra moriatur.*

Sed

Sed contra hanc regulam objicitur 1. praxis contraria ; namque in Gallia mortuo Summo Pontifice, executioni demandantur Rescripta, quæ vivens concesserat, quamvis contineant gratiam faciendam ; Ordinarii Beneficium conferunt impetranti, dispensant super gradu consanguinitatis, & affinitatis, irrita declarant Religionis vota gravi metu emissa, Confessarius absolvit impetranterem à censuris & irregularitatibus. 2. Hujusmodi Rescripta non expirarent cum Summo Pontifice sine magno boni publici præjudicio, & evidenti animarum periculo.

Omissis variis rationibus, quas Theologi excogitarunt ad conciliandam praxim cum allata regula,

Respondeo, duplicis generis esse Rescripta, alia emanant à Dataria, alia à Pœnitentiaria, & hæc valent duntaxat pro foro interno, unde prudenti Confessario committi solent, ut dictum est capite præcedenti. Illud autem est discrimen inter officium Pœnitentiariæ & Datariae, quod prius sit perpetuum ; posterius verò expiret cum Summo Pontifice. Ex quo sequitur, Rescripta Pœnitentiariæ, etsi contineant gratiam faciendam, non extinguì morte Pontificis ; quia vivit & perseverat Officium, ex quo emanant.

Difficultas ergo solum superest circa Rescripta Datariae, cujus officium extinguitur morte Pontificis.

R. Sanchez Lib. 8. de Matrim. Disp. 20. num. 42. eam solvit, & quidem ad mentem Ecclesiæ Gallicanæ, contendens hujusmodi Rescripta Ordinario demandata, non esse attributiva, sed excitativa tantum, hoc est, non tribuere potestatem

tem Ordinario; sed excitare solum ordinariam ejus potestatem ad conferendam gratiam. Porro regula laudata non cadit in Rescripta excitativa, sed in attributiva duntaxat; quia per Rescripta excitativa, nova potestas non datur Ordinario: sed excitatur ea, quæ ipsi competit, & ex qua confert gratiam.

Rebuffus de Mandatis Apost. in Concord. Sanbovius Tomo secundo cas. 113. & alii benemulti censent gratiam ipso Rescripto esse factam; quia impetrans acquirit jus, ut Rescriptum executioni demandetur, si preces veritate nitantur: nec Officialis sine injustitia ministerium suum illi denegaret; ac proinde post obtentum Rescriptum res non est integra, cum *quæsitum sit jus ad rem*, inquit Rebuffus, *vel saltem jus impetrandi officium Judicis, vel executoris, tunc non expirat morte concedentis.*

## CAPUT XII.

### De Consuetudine.

Q. 1. *Consuetudo estne morum regula?*

R. Negari non potest, quin aliqua consuetudo sit morum regula; namque ex Legum civili 57. Digest. de Legibus; tum Ecclesiastica, c. *cum dilectus*, tit. de Consuetudine, consuetudo est optima Legum interpret. Et c. finali eodem titulo dicitur, quod longævæ consuetudinis non sit civilis auctoritas, & quod juri positivo deroget, si sit rationabilis & legitime præscripta. S. quoque Augustinus Epist. 36. alias 86. de consuetudine sic scribit: *Mos populi Dei, & instituta Majorum pro lege sunt tenenda; & sicut prævaricatores*

*ricatores Legum Divinarum ita & contemptores consuetudinum Ecclesiasticarum coercendi sunt.*

Ergo aliqua consuetudo agnoscenda est morum regula. Ut autem definiatur, quæ tandem sit illa consuetudo, prius exponendæ sunt præcipuæ consuetudinum species. Itaque

Q. 2. *Quomodo dividitur consuetudo?*

R. Generatim dividitur in eam, quæ est facti, & eam, quæ est juris.

Prior dici potest consuetudo popularis: posterior verò legalis.

Q. 3. *Quid est consuetudo facti?*

R. Est usus & frequentia actuum externorum exercitorum à majori, sed non à saniori parte communitatis perfectæ.

Dicitur 1. *usus & frequentia*; quia unus actus bis aut ter repetitus non efficit consuetudinem.

Dicitur 2. *actuum externorum*; quia ex actibus internis sæpius repetitis exurgit quidam habitus, qui nonnunquam dicitur consuetudo benè vel malè agendi, de qua hîc non est sermo. Agimus enim de consuetudine communitatis, quæ non exurgit nisi ex actibus externis.

Dicitur 3. *exercitorum à majori parte*: frequentes enim paucorum actus dici nequeunt consuetudo communitatis.

Dicitur 4. *non à saniori parte*: ut distinguatur consuetudo facti à consuetudine juris, quæ debet esse à saniori parte communitatis.

Dicitur 5. *Communitatis perfectæ*, ut excludatur consuetudo privatæ familiæ, sive sodalitiî, quæ si pugnet contra jus commune, secluso speciali privilegio, est mera corruptela.

Q. 4. *Quid est consuetudo juris, seu legalis?*

R. Defi-



R. Definitur à S. Isidoro , & refertur dist. 1. cap. *Consuetudo* , jus quoddam moribus institutum, quod pro Lege suscipitur , ubi deficit Lex.

Dicitur 1. *jus* , quia si legitimæ conditiones adsint, vim legis habet. Per hanc autem vocem consuetudo convenit cum Lege scripta ; utraque enim est jus, differtque à consuetudine facti, quæ jus non constituit.

Dicitur 2. *moribus institutum* , ut distinguatur à Lege scripta ; hæc enim à Legislatore petitur ; illa verò ab usu, quem populus invexit.

Dicitur 3. *ubi lex ipsa deficit* : quia cùm Lex positiva nec se extendat ad omnes & singulos actus, nec semper sat clarè loquatur, consuetudo utpote ejus supplementum ordinat, quæ Lex positiva non attingit , & explicat, quæ dubia relinquit. His præmissis,

Q. 5. *Utrum consuetudo facti supra descripta, sit regula morum?*

R. Minimè, sed plerumque est morum corruptela.

Probatur 1. ex Scriptura. Christus Matth. 7. v. 13. asserit, eum recta tendere ad perditionem qui multitudinem secutus, viam latam & spatiosam ingreditur. Unde S. Aug. Lib. 1. Confessionum cap. 16. consuetudinem illam vocat flumen tartareum, in quo navigantes rapido cursu ad tartara devolvuntur ; & Cardinalis Bellarminus Ep. ad Nepotem recens Episcopum monet actum de ejus salute, si se aliorum moribus conformet contra Apostoli præceptum, Rom. 12. *nolite conformari huic sæculo*.

Probatur 2. ex sanctis Patribus relatis dist. 8. cit. cap. *Si solus* , ex S. Cypriano, *neque hominis consuetu-*

*consuetudinem sequi oportet, sed Dei veritatem. Cap. Frustra, ex sancto Augustino, Frustra quidam, qui ratione vincuntur, consuetudinem nobis obijciunt; quasi consuetudo major sit veritate. Et cap. Qui contempta, ex eodem in Evangelio Dominus ait: Ego sum veritas; non dixit: Ego sum consuetudo. Itaque cedat consuetudo veritati.*

Probatur 3. ratione. Cùm actuum humanorum bonitas consistat in conformitate ad rectam rationem, necesse est, ut eorum regula sit recta quædam ordinatio rationis in bonum: atqui consuetudo facti plerumque non est rationis, sed ignorantiae & cupiditatis ordinatio; virtus enim sapientiae & prudentiae, cujus est ordinare, non est quærenda apud promiscuum vulgus, nec in multitudine; quia existit in paucis. Hoc advertit Tertullianus scribens contra consuetudinem cap. 1. Lib. de velandis Virginibus, ubi sic habet: *Ostendatur hoc exigere veritatem, cui nemo præscribere potest, non spatium temporum, non patrocinia personarum, non privilegia nationum. Ex his enim ferè consuetudo initium ab aliqua ignorantia vel simplicitate sortita in usum per successionem corroboratur, & ita adversus veritatem vindicatur. Sed Dominus noster Christus veritatem se, non consuetudinem cognominavit. Enimverò venit ipse veritas contra consuetudinem pugnaturus, & etiam nunc contra eam pugnat in fortissimis suis membris. Nihil quippe inimicius veritati, ait S. August. Lib. 5. Musicae, nihil ad decipiendum potentius, nihil ad corrumpendos mores efficacius, ut habetur cap. Mala consuetudo: cit. dist. 8. Mala consuetudo, nisi citius radicitus evellatur, in privilegiorum jus ab improbis assumitur: & incipiunt pravaricationes, & variae præsumptiones celerrimè non compressæ*

D. Habert Theolog. Tom. III. E e pro

*pro legibus venerari, & privilegiorum more perpetuo celebrari.*

Ergo sola consuetudo juris est morum regula, utpote quæ sola habeat testimonium à lege, & à sapientibus.

Q. 6. *Quotuplex est consuetudo juris?*

R. Triplex; alia dicitur præter legem; quia nec Lege præscribitur, nec Legi adversatur, ut consuetudo jejunandi in pervigilio Pentecostes, quæ in quibusdam locis viget; alia quæ est contra Legem (scilicet humanam) ut consuetudo vescendi carnibus in quibusdam Diœcesibus singulis Sabbatis, à festo Nativitatis Domini, usque ad Festum Purificationis inclusivè: alia secundum Legem; quia est Legi conformis, ut consuetudo satisfaciendi præcepto Confessionis annuæ in Festo Paschatis.

Harum consuetudinum prima novam Legem constituit. Secunda veterem Legem abrogat. Tertia Legem authenticè interpretatur; quælibet autem habet vim obligandi, modò concurrant conditiones requisitæ.

Q. 7. *Quot conditiones requiruntur, ut consuetudo habeat vim legis, & obliget in conscientia?*

R. Quinque.

Prima, debet consuetudo esse rationalis, & utilis bono publico; omnis enim Lex essentialiter est ordinatio in bonum publicum. Ergo consuetudo prorsus inutilis, & ad bonum publicum nihil conferens, non habet rationem Legis; potest tamen abrogare Legem veterem, si aliæ conditiones adsint. Et in eo casu dicenda est potius derogatio vel abrogatio Legis veteris, quàm Lex. Usus v. g. comedendi carnes diebus Sabbati

Sabbati post Nativitatem Domini, non est Lex obligans, sed quædam juris communis derogatio.

Secunda, est tempus sufficiens ad inducendam consuetudinem. Sed quæritur quale debeat esse illud tempus?

R. 1. Si consensus Legislatoris accedat, eo ipso consuetudo vim legis obtinet, & legem contrariam abrogat. Responsio per se patet.

R. 2. Si Legislator consuetudini nec consentit, nec contradicit, quia fortè illam ignorat, vel ad illam non attendit; consuetudo nec rationem legis fortitur, nec antecedentem legem abrogat, nisi sit præscripta præscriptione longi temporis, ex jure, tum civili, Codice, *quæ sit longa consuetudo, lege secunda*; tum Ecclesiastica, *cap. finali de consuetudine*. Præscriptio autem longi temporis est ad minimum decem annorum, ut diximus ubi de præscriptione Tract. de Justitia & Jure.

Porrò sicut litis contestatio impedit præscriptionem dominiorum: ita Legislatoris, vel Ministrorum ejus contradictio interrumpit præscriptionem consuetudinis, reosque constituit, qui consuetudine nondum præscripta contra legem operantur; ita ut in eos cadat Vincentii Lirinensis sententia *condemnantur magistri, absolvuntur discipuli*; hoc est peccarunt priores, qui contradicente Legislatore, vel nondum elapso tempore ad præscriptionem requisito, Legem non observarunt; & non peccant posteriores, qui consuetudine legitimè præscripta, Legem contrariam non custodiunt; quia Lex per præscriptionem evasit irrita.

Dixi, *ad minimum*; nam ex dictis ubi de præscriptione, non præscribitur contra Ecclesiam, nec



proinde contra ejus leges, nisi spatium 40. annorum.

Dices 1. *Communitas*, quæ non est sui juris, sed sub Principe constituta, non habet potestatem legislativam, ergo consuetudo ejus nunquam vim legis obtinebit sine consensu Principis.

Nego consequentiam. Nam ex dictis *Jus tum Civile*, tum *Ecclesiasticum* definiit, consuetudinem legitimè præscriptam esse observandam, inobedientesque puniendos, tanquam *Legum Divinarum prævaricatores*; ac proinde communitas, quamvis non sit sui juris, habet à *Jure communi*, ut consuetudines ejus præscriptæ habeantur pro *Lege*.

Ergo sicut peregrini tenentur observare *Leges locorum*, ad quæ demigrant; ita & consuetudines ibidem legitimè præscriptas.

Dices 2. Nullus præscribit cum mala fide: atqui consuetudo contra *Legem*, est cum mala fide; incipit enim ab inobedientia contra *Superiorem*, quæ sanè peccatum est, ergo consuetudo contra *Legem* nunquam præscribere potest.

Distinguo maj. Nullus præscribit cum mala fide ad acquirendum dominium rei alienæ, Concedo: ad abrogandam *Legem humanam*, cujus observationem *Legislator* à longo tempore non curat, Nego maj. Ratio autem disparitatis est, quòd *Jus commune* semper resistat possessori malæ fidei, definiatque, eum rem alienam nunquam facere suam, si possessio ejus cum mala fide cœperit: faveat verò consuetudini, cui *Legislator* longo tempore non contradixit.

Tertia conditio necessaria, ut consuetudo *Lex* evadat, sunt actus externi, voluntarii & liberi. Quare si per vim & errorem inducatur populus  
ad

ad agendum , consuetudo non habet vim Legis ; quia vera consuetudo essentialiter pendet à consensu populi , tanquam à causa ; sicut Lex scripta à voluntate Superioris.

Quarta. Actus, ex quibus oritur consuetudo, debent exerceri cum animo inducendæ obligationis ; quia sicut Lex nulla est sine intentione obligandi , ita consuetudo vim Legis non fortitur, si desit in populo , à cuius voluntate pendet intentio se obligandi. Hinc licet Fideles consuetudine immemoriali cineres die prima Quadragesimæ accipiant , nulla tamen Lege ad eos accipiendos astringuntur ; quia sine animo se obligandi illam cæremoniam observant.

Colligitur autem, inductam esse consuetudinem cum animo se obligandi, si viri timorati malè sentiant de iis, qui illam non servant, si populus inde scandalizetur, si transgressores puniantur. In dubio, num consuetudo cæperit cum animo se obligandi, judicandum est non cœpisse.

Quinta. Oportet consuetudo sit majoris & sanioris partis communitalis : quia mos unius aut alterius privati non facit nisi consuetudinem privatam : agitur autem hic de consuetudine communitalis perfectæ, quæ vim legis habere possit. Non est tamen necesse, ut in consuetudinem consentiant singula communitalis membra ; quia sicut Lex dicitur à communitate acceptata , quando major & sanior pars illam acceptavit : ita consuetudo censetur universalis, si à majori & saniori parte inducatur ; quamvis nonnulli resistent.

Dixi, à *saniori parte* ; si enim à sapientibus & viris timoratis rejiciatur , non est nisi consuetudo

facti inter regulas morum minimè numeranda, licèt pars numerosior ei adhæreat.

Q. 8. *Consuetudo potestne præscribere contra quamlibet legem?*

R. Non potest, nisi contra Legem humanam; quia nulla alia Lex pendet à voluntate hominum, ut pro eorum nutu, & contrariis moribus mutari possit. Non Lex naturalis: quia est ipsamet veritas & recta ratio, contra quam agere est per se malum. Non Lex Evangelica, quæ ex Dei institutione illibata permanebit usque ad consummationem sæculi, juxta illud Apostoli Gal. 1. *Licèt nos, aut Angelus de cælo evangelizet vobis præterquam quod evangelizavimus vobis; anathema sit.*

Ergo consuetudo, quæ in aliquibus Provinciis obtinuit, lucrum percipiendi ex mutuata pecunia etiam pupillorum, mera corruptela est; quia adversatur Legi naturali & divinæ, contra quam non præscribitur, c. *Cùm tanto*, de consuetudine: *nemo sanæ mentis* (inquit Summus Pontifex) *intelligit naturali juri, cujus transgressio periculum salutis inducit, quacunque consuetudine, quæ dicenda est verius in hac parte corruptela, posset aliquatenus derogari.*

Ergo posteriora Ecclesiæ sæcula non præscripserunt contra priora, nisi in iis, quæ sunt meræ disciplinæ, ut Canones Pœnitentiales, ritus absolvendi ante vel post peractam pœnitentiam, & aliæ ejusmodi Leges Ecclesiasticæ. Nam Præcepta Evangelica, v. g. de contemptu voluptatum, & rerum temporalium, de carnis mortificatione, & de pœnitentiæ fructibus, qui respondeant gravitati & multitudini peccatorum, nulla consuetudine quantumvis longæva & universali abrogantur; quia Deus ea in æternum mandavit, & in novissi-

mo die ex iisdem judicabuntur homines, quia ut scribit Apostolus 2. Tim. 3. tunc communiter erunt *seiphs amantes, cupidi, elati, voluptatum amatores magis quàm Dei, habentes speciem pietatis*, (nempe ex quadam observatione exterioris cultus) *virtutem autem ejus abnegantes*, id est, rem ipsam & naturam pietatis.

Q. 9. *Utrum consuetudo legitime præscripta, abrogari possit contraria lege?*

R. Vel consuetudo, quamvis non sit rei per se maiæ, nec Evangelio prohibitæ, noxia tamen evadit, & viam aperit pluribus corruptelis; vel est admodum utilis, & idonea ad promovendum bonum publicum: vel est superflua aut minùs utilis.

Si primum, consuetudo lege contraria abrogari potest & debet, sed circumspèctione, & accurata consideratione opus est, ne Superior, dum colligit zizania, eradicet & triticum, mutationeque consuetudinis pacem perturbet.

Si secundum, Lex consuetudinis admodum utilis abrogatoria non esset vera Lex, utpote bono publico contraria, ac proinde nec ferri, nec acceptari debet.

Si tertium, tolerandam esse consuetudinem, scribit sanctus Augustinus Epist. 54. aliàs 118. quia *ipsa mutatio consuetudinis, etiam quæ adjuvat utilitate, novitate perturbat*. Propterea ibidem censet quasdam cæremonias Religioni Christianæ minùs consentaneas ferendas potius, quàm cum populorum offensione tollendas; Medicus enim dici non debet, sed homicida, qui lethale vulnus infligit; ut lege corporis vitium amputet. Talem meritò dixeris Parochum, qui dominandi studio potius, quàm boni publici zelo, receptos Parochiæ usus subvertit majoris boni prætextu; quid enim Pa-



rochianorum odia inde in ipsum concepta, oblo-  
cutiones, detractiones, & alia scandala, nisi exi-  
tialis parochiæ morbus? Ergo si nequidem Lex  
mutari debet quoties aliquid melius occurrit, ut  
supra docebat sanctus Thomas, multò minùs con-  
suetudo, quæ noxia non est, cùm Lege sit fir-  
mior, longèque difficiliùs evellatur.

## CAPUT XIII.

### De Lege humana.

Jam diximus, quid & quotuplex sit Lex humana;  
quam obligationem inducat; quæ sit ejus cau-  
sa efficiens; ad quos actus & ad quas personas se  
extendat; quam interpretationem, & dispensatio-  
nem admittat. Superfunt duntaxat nonnulli du-  
bia sequentibus quæstionibus solvenda. Itaque

Q. 1. *Utrum præter Legem naturalem & divinam,  
necessaria sit humana?*

R. Est necessaria; quia si societas humana in-  
diget artibus, ut provideantur corporis necessa-  
ria, putà victus, vestitus, habitatio; à fortiori  
indiget disciplina Legum ad excolendam ani-  
mam; quia judicium rationis in iis, quæ spe-  
ctant mores, multò magis impeditur cupiditati-  
bus & delectationibus, quàm in iis, quæ perti-  
nent ad arte facta. Unde 1. polit. c. 2. dicitur:  
*sicut homo, si sit perfectus virtute, est optimum anima-  
lium; sic si sit separatus à lege & justitia, est pessimum  
omnium.*

Dices 1. Lex Evangelica sufficit ad regendos  
hominum mores: ergo temerè Lex humana su-  
peradditur.

Nego

Nego anteced. Tum quia in societate humana inveniuntur protervi, & ad vitia proclives, qui ut scribit sanctus Thomas quæst. 96. art. 1. *verbis de facili moveri non possunt*, (nempe ad Legem divinam & naturalem observandam.) *Necessarium ergo fuit, quod per vim & metum cogerentur à malo . . . . ut aliis quietam vitam redderent, & ipsi tandem per hujusmodi assuetudinem ad hoc perducerentur, quod voluntariè facerent, quæ pænæ metu implebant, & sic fierent virtuosæ.* Tum quia in humana societate plura ordinanda occurrunt, putà circa cultum divinum, & contractus, quæ Lex Divina prætermittit, nec ex Lege naturali necessariò deducuntur.

Dices 2. In dubiis homines confugiunt ad sapientem, sicut ad justitiam animatam, ut dicitur 5. Ethic. cap. 4. ergo Lex humana necessaria non est.

Nego consequentiam. Namque, ut observat S. Thomas q. 95. art. 1. ad 2. justitia animata præterquam quod invenitur in paucis, passionibus facilè flectitur; ac proinde necesse fuit legibus determinare quid faciendum, quidve fugiendum, & paucissima hominum arbitrio committere, ut singularia, quæ lege comprehendi nequeunt. Unde melius est omnia ordinari lege, quàm dimitti Judicum arbitrio, ut habetur 1. Rhetoric. cap. 1.

Q. 2. *Utrum lex humana prohibere debeat omnia vitia?*

R. Negat S. Thomas q. 96. art. 2. & ratio est, quia quælibet Lex essentialiter est ordinatio ad bonum commune: atqui Lex humana omnia vitia prohibens est bono communi noxia, Ergo.

Minor probatur. Lex observatu difficilior, & moraliter impossibilis est bono communi noxia;

posita enim hac lege multiplicantur transgression-  
 nes, & ita Cives evadunt peiores, cum tamen le-  
 gis officium sit efficere bonos : atqui Lex huma-  
 na omnia vitia cohibens est difficilior, & obser-  
 vatu moraliter impossibilis : nam ut ratiocinatur  
 sanctus Thomas, in communitate plures reperiun-  
 tur infirmi, quam sani ; hoc est, plures ad vitia  
 proclives, quam ad virtutem propensi : quæ au-  
 tem possibilia sunt sanis, infirmis sunt impossi-  
 bilia. Porro Lex humana spectat majorem par-  
 tem ; imponitur enim communitati, ac proinde  
 nonnisi graviora prohibere debet, à quibus, inquit  
 Angelicus Doctor, *possibile est majorem partem multi-  
 tudinis abstinere, & præcipuè quæ sunt in nocumentum  
 aliorum, sine quorum prohibitione societas humana conser-  
 vari non posset. Alioquin imperfecti in deteriora pro-  
 rumperent, sicut dicitur Prov. 3. qui nimis emungit, eli-  
 cit sanguinem ; & Matth. 9. Quod si vinum novum (id  
 est, præcepta perfectæ vitæ) mittatur in utres veteres ;  
 (id est, in homines imperfectos) utres rumpuntur, & vi-  
 num effunditur, id est, præcepta contemnuntur, & homi-  
 nes ex contemptu ad pejora prorumpunt.* Nempe ex  
 consuetudine transgrediendi difficiliora præce-  
 pta, etiam ad faciliora, quamvis graviora, profi-  
 liunt.

Tanta incommoda sollicitè præcavent Reli-  
 giosorum Ordinum Fundatores, qui licet non  
 colligant nisi anhelantes ad perfectionem, ni-  
 hilominus paucis præceptis regulam suam con-  
 cludunt, ne legum multitudo laqueus sit pedi-  
 bus alumnorum ; reliqua verò ad perfectionem  
 Monasticam pertinentia per modum directionis  
 exequuntur, expressèque declarant se non obli-  
 gare quenquam sub peccato etiam veniali, sed  
 dunta-

duntaxat sub pœna regulari & œconomica. Si autem hæc cautio adhibenda est in Monasteriis, quantò magis in Politicis?

Q. 3. *Utrùm dentur Leges merè pœnales, quæ subditos ad pœnam obligent; & nullatenus ad peccatum?*

R. 1. Possunt dari; quia ex dictis lex vim habet ex voluntate Legislatoris: ergo si Legislator nolit obligare subditos nisi ad pœnam, subditi inobedientes non incurrerent nisi reatum pœnæ.

Dices 1. ex S. Augustino Lib. 1. Retract. cap. 9. omnis pœna, si iusta est, peccati pœna est & supplicium nominatur: ergo lex non potest obligare ad pœnam: quin antecederet obliget ad culpam.

Distinguo ant. Omnis pœna propriè dicta, Concedo: impropriè dicta, Nego antec. Satis enim est ad pœnam iustam, quòd sine causa non infligatur, juxta juris regulam 23. in 6. quæ sic habet: *sine culpa, nisi subsit causa, non est aliquis puniendus*; causa autem est puniendi subditum quòd non abstinuerit ab actu prohibito, vel non præstiterit actu præceptum. Responsio elucidatur exemplo voti, quod dicitur à S. Thoma lex privata; quia privatus eam sibi imponit. Si enim quis voverit dare nummum pauperibus, si unquam luserit, contra votum non peccabit ludendo, modò nummum in eleemosynam eroget.

Dices 2. Lex illa purè pœnalis, non est lex propriè dicta. Ergo.

Nego conseq. Satis enim est ad nostrum institutum, quòd Superior possit obligare ad pœnam, & nullatenus ad culpam; siue lex ejus sit propriè, aut impropriè dicta.

Potest



Potest etiam negari antec. Nam ad rationem legis sufficit quòd habeat vim obligandi in conscientia: atqui lex purè pœnalis obligat in conscientia ad pœnam; qui enim hujusmodi legem transgressus fuerit, tenetur in conscientia pœnam subire; & ita lex pœnalis remotè saltem obligat ad culpam.

R. 2. Omnis lex pœnalis priùs intelligitur obligare ad culpam, quàm ad pœnam, nisi quibusdam signis constet aliam esse Legislatoris mentem.

De lege quæ imponit pœnam spiritalem, putà suspensionem, excommunicationem, nulla est difficultas; cùm spirituales illæ pœnæ culpam necessariò supponant.

Probatur de lege obligante ad pœnam temporalem; quia cùm ipsum opus lege præceptum aut prohibitum magis conferat ad bonum publicum, quàm ipsa pœna inobedientibus imposita, Legislator censetur illud magis intendere, ac proinde subditi, qui vel ab opere prohibito non abstinere, vel opus præceptum non exequuntur, magis lædunt ejus voluntatem, quàm si pœnam transgressoribus impositam non evolverent. Ergo peccati reos se constituunt; quid enim est peccatum, nisi dictum, vel factum contra Legem?

Dixi, *nisi quibusdam signis constet aliam esse Legislatoris mentem*; quia obligatio legis oritur ex intentione & voluntate Legislatoris.

Constare autem potest intentionem Legislatoris non esse obligare ad culpam, i. ex ipsa legis forma, nempè si disjunctivè feratur, v. g. nullus frumentum efferat, vel solvat centum libellas; lege enim sic concepta, optio subditis datur aut frumentum non efferendi, vel centum libellas solven-

solvendi, si magis placuerit frumentum efferre.  
 2. Ex communi sapientum interpretatione  
 3. Ex verbis Legislatoris, quibus declarat se nolle obligare ad culpam: quod satis communiter observant in suis constitutionibus Superiores regulares.

Omittendum tamen non est, quod tradit S. Thomas 2. 2. qu. 286. art. 9. ad 1. nempe subditos Regulares in his posse venialiter, vel etiam mortaliter peccare, *ex negligentia vel libidine seu contemptu*, non quidem vi hujusmodi Constitutionum, quæ ut supponitur, ad culpam non obligant, sed vi Legis naturalis; contra quam graviter peccaret, qui ex Constitutionum neglectu seu contemptu, valde turbaret ordinem Monasterii. Enimverò si persona extranea omnium judicio graviter peccaret, quæ suis consiliis & inordinata agendi ratione regularem Monasterii disciplinam everteret, quantò magis ipsa Monialis?

In dubio autem num Lex sit purè pœnalis, quidam Theologi censent, habendam pro merè pœnali, nisi pertineat ad bonos mores, & ad prohibenda vitia; quia, inquiunt, odia sunt restringenda. Verùm quòd Lex aliqua non obliget ad culpam, est quædam exceptio à generali regula, juxta quam omne factum vel dictum contra Legem, est peccatum: exceptio autem non est amplianda, sed restringenda; adeo ut nisi de mente Legislatoris aliter constet, judicandum sit in favorem Legis, nempe quòd sub peccato obliget.

Dices: Leges tributorum ex natura sua sunt merè pœnales: tum quia non spectant bonos mores: tum quia tributa sunt onera, & veluti mul-

etæ pecuniariæ, quas Princeps directè & primariò intendit. Ergo.

Nego antecedens; Pertinet enim ad bonos mores, & ad bonum publicum, ut jus suum cuique reddatur; atqui tributa sunt iusta stipendia Principi pro Republica laboranti debita, juxta illud Rom. 13. *Ideo enim & tributa præstatis; ministri enim Dei sunt, in hoc ipsum servientes.*

Ergo tributa non sunt meræ pænæ, sed debita ex iustitia solvenda, etiamsi non petantur, nisi consuetudo præscripta Principis mentem aliter interpretetur. Ergo qui defraudant vectigalia & gabellas, tenentur ad restitutionem; quia contra iustitiam peccant, ut innuunt hæc Apostoli verba, Rom. 13. *Reddite ergo omnibus debita; cui tributum, tributum: cui vectigal, vectigal.*

Dixi, *nisi consuetudo præscripta Principis mentem aliter interpretetur.* Nam apud nos fert usus, ut tributa tum solvantur, cum petuntur: nec ullus in Legem peccare se credit, si tallias v. gr. non deferat ad exactores. Unde colligere licet tributorum Leges à subditis duntaxat exigere, ut non resistent, nec fraudibus, minis, & aliis malis artibus solutionem eludant, sed bona fide parati sint petentibus satisfacere. Ita Sylvius in 1. 2. q. 484. ubi sic habet; *probabiliter opinio fert illa vectigalia, quæ ad portas civitatis solvi debent juxta quorundam locorum consuetudinem, non necessario solvenda, si non petantur, modò nihil fraude agatur, abscondendo merces, divertendo à viis publicis.*

Instabis: restitutio vel fieret Principi, vel exactoribus: atqui non est facienda Principi; namque certo pretio vendidit exactoribus quidquid in hac parte juris habebat; non etiam exactoribus,

bus, qui propter fraudes subditorum, nulla sollicitudine vitandas, viliori pretio jus Principis emerunt: ergo.

Nego minorem. Cum enim objectio supponat Principem pati injuriam ab illis defraudatoribus, & propter eorum fraudes viliori pretio vendere, Principi restituere tenentur.

Q. 4. *Utrum pœna Lege præscripta, sit exolvenda statim post transgressionem?*

R. Si pœna statuatur ferenda, transgressor non tenetur eam exolvere, donec Judex condemnaverit eum ad pœnam subeundam; quia Lex de facto pœnam non imponit, sed imponendam minatur. Contra verò, si pœna sit Lege lata, transgressor eam quandoque statim incurrit, quandoque verò non nisi post sententiam declaratoriam.

Q. 5. *Unde dignoscitur, an pœna sit ferenda, aut lata?*

R. Pœna est ferenda, quando Lex concipitur his & similibus verbis, *sub pœna excommunicationis, privationis Beneficii. Excommunicabitur, excommunicetur. Non gaudeat Beneficio, &c.* Pœna autem censetur lata, quando Legislatores his utitur formulis, *ipso facto, ipso jure. Ex tunc. Illico, excommunicamus. Excommunicatus est.*

Q. 6. *Quandonam pœna ipso jure lata subeunda est ante sententiam judicis, quando verò non nisi post sententiam?*

R. Huic quæstioni admodum intricatæ, & in Scholis multum agitatæ satisfieri non potest, nisi distinguendo variarum pœnarum genera, & expendendo verba Legis.

Primò itaque sunt pœnæ passivæ, quæ nullam transgressoris actionem postulant, ut censuræ Ecclesia-



clesiasticæ, irregularitas, privatio vocis tum passivæ, tum activæ. Constat autem ex communi Ecclesiæ usu hujusmodi pœnas latæ sententiæ incurri absque sententia declaratoria; cum plerumque sint occultæ, & Judicis examen effugiant; certumque sit apud omnes occultos illos prævaricatores debere abstinere ab actibus per censuras Lege latas prohibitis. Excipienda tamen est irregularitas, quæ oritur ex infamia: nullus enim censetur jure infamis: nisi post sententiam criminis declaratoriam.

Secundò, pœnæ, quæ executioni mandari non possunt sine transgressoris actione, triplicis sunt generis.

Nonnullæ irritant actum prohibitum, puta matrimonium clandestinum, & reum inhabilem reddunt, putà Simoniacum ad Beneficium acquirendum, Beneficiarium ad fructus suos faciendos, si Horas Canonicas non persolvat, &c. Hæ autem pœnæ effectum suum fortiuntur ante sententiam declaratoriam. Conjuncti clandestinè debent statim separari; quia non sunt conjuges. Simoniacus quoque illico tenetur dimittere Beneficium simoniacè acquisitum, & fructus inde perceptos restituere. Sic & Beneficiarius, qui Horas Canonicas non recitavit; quia jure naturali non licet rem alienam retinere: atqui in alatis exemplis & Simoniacus & Beneficiarius retinent rem alienam, cum Lex justa inhabiles eos reddat ad acquirendum.

Hinc meritò hæc propositio damnata est ab Alexandro VII. & à Clero Gallicano: *Restitutio à Pio V. imposita Beneficiatis non recitantibus, non debetur in conscientia ante sententiam declaratoriam Judicis, eo quod sit pœna.* Aliæ

Aliæ sunt pœnæ Legibus latæ; tanquam conditiones necessariæ ad acquirendum. Nec istæ requirunt declarationem; quia conditione non impleta, gratia non est facta, juxta illud vulgare effatum, *conditio suspendit consensum*. Hinc qui sua culpa, & sine rationabili causa ad Sacerdotium intra annum non promovetur, Beneficio Parochiali ipso facto est privatus, nulla prætermissa monitione, ex cap. *Licet*, tit. de Elect. in 6.

Denique sunt pœnæ latæ sententiæ, quæ privant jure jam acquisito, putà Beneficio legitime possessio; sed executioni mandari non possunt sine prævaricatoris actione. Actio autem illa vel est facilis, ut pœnitentiæ, quas præscribunt Constitutiones Monasteriorum: vel sunt admodum difficiles, ut exilium, confiscatio omnium bonorum, privatio Beneficii, &c. Priores nullam Superioris declarationem requirunt; posteriores verò reus in conscientia subire non tenetur ante sententiam Judicis: tum quia Lex alioquin esset in detrimentum boni publici; pauci enim hujusmodi pœnas exequerentur, adeoque Lex esset multitudini in scandalum: tum quia communis usus Leges hujusmodi pœnales sic interpretatur.

Ergo Pastor ipso jure privatus Beneficio, ante sententiam judicis munia Pastoralia validè exercet, & fructus Beneficii justè percipit; quia habet titulum saltem coloratum.

Tertiò, quando Lex pœnam ipso facto decernit, nulla monitione, aut declaratione præmissa, pœna statim subeunda est, nec expectanda Judicis sententia; quia Legislatores id potest quod Judex: ergo si reus pœnam subire tenetur post de-

clarationem Judicis, quidni & post Legislatoris declarationem?

Nec dicas cum nonnullis: hæc verba, *nulla declaratione præmissa*, addi à Legislatore majoris explicationis gratia, ut subditi plenius intelligant, pœnam esse latæ sententiæ; nam ex jure satis clarè elicitur, verba illa habere sensum à nobis intentum; & planè diversum à sensu verborum quæ in Lege præcedunt.

Non negârim tamen, quod aliquando expertus sum, Judicem, qui minùs vim illorum verborum percipit, ita pronuntiare majoris claritatis causa, nec aliud intendere per hæc verba, *absque declaratione*, quàm per ista, *ipso facto*. Sed factum unius aut alterius non debet trahi in exemplum, nec recedendum à communi regula, nisi aliter constet de mente Superioris.

Quartò, reus post sententiam Judicis nec tenetur, nec licitè potest exequi pœnam mutilationis aut mortis, v. gr. venenum haurire, præcipientem se dare, suspendio se præfocare; quia hæc crudelitatem sapiunt, & repugnant Legi naturali; sed satis est, quòd executori non resistat. Imò Suarez Lib. 5. cap. 10. num. 10. probabiliorẽ existimat sententiam Covarruviæ, & aliorum asserentium eum, cujus omnia bona fisco addicta sunt, non teneri exequi sententiam difficilem, sed facere satis, si patiatur bona sua à Ministro auferri, nec ea subtrahat, nec occultet.

Q. 7. *Utrum ignorantia pœnæ reum à pœna excuset?*

R. Ignorantia etiam invincibilis solius pœnæ non excusat per se à pœna, quæ non sit censura.

Proba-

Probatur ; quia illud est discrimen inter culpam & pœnam, quòd culpa necessariò sit voluntaria, ac proinde cum aliqua cognitione & advertentia : pœna verò veniat ab extrinseco , & contra voluntatem pugnet. Ergo qui invincibiliter ignorat Legem, non peccat, si eam non observet, quia ejus omissio non est voluntaria ; nec pœnam meretur, cum pœna culpam præsupponat. Contra verò qui Legem novit , eamque transgreditur, nesciens tamen pœnam in transgressores latam, pœnam meretur, & si sit Lege lata, illam de facto incurrit.

Dixi 1. ignorantiam per se non excusare à pœna, quia per accidens excusare posset, saltem in foro conscientiæ, nimirum si ex eo quòd ignoraret pœnam, bona fide crederet, Legem non obligare sub mortali ; nam ex gravitate pœnæ colligitur, Legem obligare sub gravi peccato.

Dixi 1. *nisi pœna sit censura* ; quia censura communiter non incurritur, nisi præcesserit aliqua monitio vel ab homine, vel à jure, seu Lege comminante, aut etiam decernente, v. gr. Excommunicationem : atqui non est monitus, qui nullatenus cognovit illam pœnam fuisse Lege latam : ergo illam non incurrit saltem in foro conscientiæ ; nam in foro exteriori non audiretur, qui diceret, se ignorasse hujusmodi pœnam in Lege contineri.

Q. 8. *Lex pœnalis obligatne Superiorem ad pœnam imponendam ?*

Huc revocanda sunt, quæ supra diximus de dispensatione ; nam dispensatio pœnæ per Legem latæ, est quædam Legis dispensatio : Ergo sicut inferior non potest dispensare in Lege Superio-



ris, nisi necessitas, aut epichia id postulent; ita nec relaxare pœnam à Superiore impositam. Ergo sicut Legislator peccat sine causa dispensans, sic & pœnam relaxans.

Ad relaxandam autem pœnam, plures honestæ causæ movere possunt supremum Principem, quæ in inferiori Judice locum non habent, puta benignitatis, & liberalitatis ostensio, primus in urbem ingressus: prolis nativitas, gratificatio obsequiorum delinquentis, vel ejus consanguineorum, &c.

Observandum tamen est in hujusmodi gratiis concedendis; quod ex S. Ambrosio refertur cap. Denique, 14. qu. 5. ubi sic habetur: *Si non potest subveniri alteri, nisi alter lædatur, commodius est neutrum juvari, quàm gravari alterum. Ideoque in causis pecuniariis intervenire non est Sacerdotis, in quibus non potest fieri, quin frequenter lædatur alter, qui vincitur, quoniam intercessoris beneficio se victum arbitratur. Sacerdotis est igitur nulli nocere, prodesse velle omnibus, posse autem solius Dei est.*

## CAPUT XIV.

### De Lege Divina veteri.

Q. I. *Quotuplici modo Lex vetus accipitur?*

R. Duplici. I. Pressius pro Lege, quam ipse Moyses promulgavit, ut Luc. 24. v. 44. Ubi Christus Legem distinguit à Libris Prophetarum, & à Psalmis; sic enim Apostolos alloquitur: *necesse est impleri omnia, quæ scripta sunt in Lege Moysi, & Prophetis, & Psalmis de me*: ubi Lex concluditur quinque Libris à Moyse scriptis, qui Pentateuchus

teuchus solent appellari. 2. Lex latius sumitur pro tota Scriptura veteris Testamenti. Et hoc posteriori modo Legem veterem hîc accipimus.

Q. 2. *Quotuplici nomine vocatur Lex vetus?*

R. Quâdruplici. Dicitur 1. simpliciter & absolutè Lex, ut in Epistola ad Romanos passim & capit. 10. Joan. *Lex per Moysen data est, gratia & veritas per Jesum Christum facta est.* 2. Lex Mosaica; quia per Moysen fuit promulgata. 3. Lex vetus, ut distinguatur à nova, seu Evangelica. 4. Vetus Testamentum, seu pactum & fœdus, quia per eam Deus cum Judæis pepigit, ipsos fore sibi peculiarem populum, & terram promissam in hæreditatem possessuros, si Legem observarent.

Q. 3. *Lex vetus fuitne bona & divina?*

Utrumque negârunt Marcionitæ, deinde Manichæi & Priscillianistæ, docentes duos esse prima rerum principia, alterum malum, quod fuit auctor Legis veteris, & ideo malæ: alterum bonum, à quo Lex Evangelica prodiit. Contra priores imprimis scripsit Tertullianus, & contra posteriores S. Augustinus, cum quibus

R. De fide est, Legem veterem fuisse bonam, & à Deo conditam.

Prima pars responsionis probatur 1. ex Scriptura Rom. 7. vers. 12. *Itaque Lex quidem sancta, & mandatum sanctum, & justum, & bonum.* Et 1. Timoth. 1. vers. 8. *Scimus autem quia bona est Lex, si quis ea legitime utatur.* Luc. 2. Christus Legem circumcisionis, & Beata Virgo Legem purificationis servârunt. Matth. 26. Christus cœnam legalem instituit pridie quàm pateretur. Probatur 2. ratione; quia illa Lex est bona, quæ non

præcipit nisi bonum, nec prohibet nisi malum, idque in honestum & debitum finem: atqui Lex vetus nonnisi bonum præcipit, ut patet vel ex illo præcepto, Deut. 6. in quo cætera continentur: *Diliges Dominum Deum tuum ex toto corde tuo, &c.* & omne malum prohibet, dum ait, *non concupisces*; idque in honestum & debitum finem: remotum quidem vitam æternam; proximum verò Christum juxta illud Roman. 10. *Finis enim Legis Christus ad justitiam omni credenti*, Galat. 3. *Lex pædagogus noster fuit in Christo, ut ex fide justificemur. At ubi venit fides, jam non sumus sub pædago*, 1. Cor. 10. *Omnia in figura contingebant illis.* Unde non mirum, si Ecclesia Christiana in suis Conventibus miracula & Historias veteris Testamenti grata memoria quàm sæpissimè recolat; hæc enim omnia ad stabilendam Religionem Christianam conferebant, & in gratiam corporis mystici, cujus Christus caput est, Deus operabatur. Ubi bella legit Judæus, mysteria intelligit Christianus.

Unde S. Augustinus Lib. 6. contra Faustum, cap. 2. sic scribit: *Cum dicit (Apostolus) scripta sunt propter nos, procul dubio demonstrat, quanta nobis cura legenda & intelligenda, & in quanta auctoritate habenda sint, quia propter nos ubique scripta sunt.*

Secunda pars, nempe quòd Lex vetus fuerit à Deo, probatur: tum ex Scriptura Luc. 1. *Sicut locutus est (Deus Israël) per os Sanctorum, qui à sæculo sunt Prophetarum ejus.* Hebr. 1. *Multifariam, multisque modis olim Deus loquens in Prophetis*, tum ex Traditione; nam in Symbolo Constantinopolitano de Spiritu Sancto habetur, *qui locutus est per Prophetas.* Et in Concilio Toletano 1. contra Pri-

Priscillianistas, si quis dixerit esse alterum auctorem priscæ Legis, alterum Evangeliorum, anathema sit.

Dices contra primam nostræ responsionis partem: Deus Ezech. 20. de Lege veteri sic loquitur: *dedi eis præcepta non bona* & Hebr. 8. ait Apostolus, *vetus Testamentum culpa non vacasse*. Ergo.

Distinguo ant. Non bona, id est, imperfecta, Concedo: mala; Nego ant. Nam in eodem loco habetur, *dedi eis præcepta mea . . . quæ faciens homo vivet in eis*. Et ita hunc locum interpretatur S. Gregorius Lib. 28. Mor. cap. 7. ubi sic scribit: *hos pannos infantiae, quos inchoantibus dedit, ipse per Prophetam Dominus reprehendit, dicens; Ego dedi eis præcepta non bona; mala enim quasi mala esse desinunt comparatione pejorum, & bona quasi bona non sunt comparatione meliorum, melioribus novi Testamenti præceptis subsequentibus, præcepta bona, quæ rudibus data sunt, non bona esse memorantur*. Et hanc imperfectionem Apostolus loco laudato vocat culpam, scilicet improprie dictam, ut patet ex ejus contextu.

Instabis 1. Dei perfecta sunt opera, Deut. 32. atqui ex concessis Lex vetus est imperfecta, nec culpa seu defectu vacavit: ergo non est à Deo.

Distinguo maj. Dei perfecta sunt opera, quoad modum operandi, hoc est, summa sapientia diriguntur ad finem, quem sibi Deus præstituit, Concedo: perfecta ex objecto circa quod versantur, Nego majorem: Deus enim non semper facit optima: alioqui mundum perfectiorem creare debuerat. Porro Lex vetus, quamvis non fuerit perfecta ex objecto, nec Judæos ad illam sublimiorem vitam perducere potuerit, ad quam Lex Evangelica Christianos evehit; perfe-



Et tamen fuit, quatenus congruebat populo rudiori: quemadmodum Pædagogus, qui rudibus & quodammodo infantilibus præceptis puerum imbuunt, sapienter illum erudit: quia tradit ea, quæ congruunt illi ætati, & disponunt ad majora percipiendâ, quando adoleverit.

Instabis 2. 1. Cor. 3. Lex dicitur ministratio mortis.

Distinguo, occasionaliter & per accidens, Concedo: per se, Nego. Hanc solutionem ipsemet Apostolus nobis suggerit Rom. 7. ubi sic scribit, *occasione accepta peccatum per mandatum operatum est in me omnem concupiscentiam*; ardentius enim ea appetimus, quæ nobis prohibentur; juxta illud Poetæ, *nitimur in vetitum*.

Urgebis; atqui Lex vetus per se fovebat cupiditatem, cum ejus promissa essent temporalia: ergo.

Nego subsumptum, cujus confirmationem distingo, temporalia promittebat tanquam media apta ad pueros & carnales adducendos ad præceptorum observationem, Concedo: tanquam præmia & ultimum finem, Nego. Nam Psal. 143. improbantur, qui beatum dicunt populum, cui hæc sunt, & beatus dicitur populus, cujus Dominus Deus ejus. *Non itaque*, inquit Sanctus Augustinus Libro quarto contra Faustum, *spes nostra in temporalium rerum promissione defixa est, quandoquidem nec ipsos illius temporis sanctos & spiritales viros, Patriarchas & Prophetas, his terrenis rebus fuisse deditos credimus*.

Instabis 3. Illa Lex non est bona, quæ salvare nequit, & est moraliter impossibilis: atqui Lex vetus salvare non poterat, taleque jugum erat,

erat, quod neque Patres nostri, inquit Apostolorum Princeps, neque nos portare potuimus, Act. 15. Ergo.

R. 1. Retorquendo argumentum. Ipsa Lex naturalis homines per se salvare nequit, & est jugum quod nullus sine gratia portare possit: ergo Lex naturalis non est bona: quo nihil est absurdus.

R. Itaque 2. in forma, Lex vetus salvare nequit, & est jugum intolerabile sine gratia, Concedo: Cum gratia, Nego minor. Nam plures in veteri Lege salvati sunt, & iusti ante Deum extiterunt, incedentes in omnibus mandatis, & justificationibus Domini, ut de Zacharia & Elisabeth dicitur Luc 1. iisque mandata Dei non extitère gravia, sed dulciora super mel & favum, ut de seipso testatur règius Psalter Psal. 17. Sed ista ascribenda erant Fidei in Christum venturum, & gratiæ novi Testamenti, quæ ex S. Augustino in veteri Testamento occultabatur, sicut frumentum in palea. Unde Lib. 3. ad Bonifacium cap. 3. scribit, iustos, qui sub veteri Lege vixerunt; licet non nomine, reverà tamen fuisse Christianos: *Veteris quidem Testamenti, inquit, dispensatores & gestatores, sed novi demonstrantur hæredes. Nondum nomine, sed re ipsa fuerunt Christiani.*

Porro S. Petrus loquitur de Lege veteri secundum se spectata, quæ, ut sic innumera præceptorum multitudine obruebat, eos præsertim, qui promulgato jam Evangelio, Legem necessariam esse contendebant; nam ex Apostolo Galat. 5. à Gratia Christi exciderant: *Evacuati estis à Christo, inquit, qui in Lege justificamini à gratia excidistis.*

Dices contra secundam responsionis partem: Lex vetus, Galat. 3. est ordinata per Angelos in

manu mediatoris, id est Moyſis, qui de ſeipſo ſic ait, Deut. 5. *Ego ſequeſter & medius fui inter Dominum, & vos*, Hebr. 2. de Lege ſic loquitur Apoſtolus, *qui per Angelos dictus eſt ſermo*, Joan. 1. *Lex per Moyſen data eſt*, Et Joan. 7. *nonne Moyſes dedit vobis Legem?* Ergo Lex vetus non eſt à Deo.

Distinguo anteced. Per Angelos tanquam Dei miniſtros, & ejus nomine agentes & loquentes: per Moyſen verò tanquam Legis promulgatorem, Concedo: Per Angelos & Moyſen tanquam Legis Authores, Nego antec. Quin nonnulli è veteribus credidère, ipſummet Verbum divinum in corpore ad tempus aſſumpto Moyſi apparuiſſe in monte Sina, & cum eo fuiſſe locutum. Sed conſtat Legem miniſterio Angelorum fuiſſe ordinatam, tum ex laudatis in objectione textibus, tum ex cap. 7. Actuum v. 30. 31. 32. & 38. ubi S. Stephanus ſic loquitur: *Apparuit illi (Moyſi) in deſerto monte Sina Angelus in igne flammæ rubi . . . facta eſt ad eum vox Domini dicens . . . Ego ſum Deus patrum tuorum. Hic eſt, qui fuit in Eccleſia in ſolitudine cum Angelo qui loquebatur ei in monte Sina.* Quòd autem Moyſes Legis promulgatorem ubique egerit patet, ex 24. cap. Exodi ubi ſic habetur: *Moyſes . . . narravit plebi omnia verba Domini atque judicia: reſponditque populus una voce: omnia verba Domini, quæ locutus eſt, faciemus.* Adde quòd ipſemet Moyſes ſemper præmittat, *hæc dicit Dominus.* Locutusque eſt Dominus ad Moyſen.

Q. 4. Quotuplicis generis præcepta numerantur in veteri Lege?

R. Triplicis, nempe moralia, cæremonialia, & judicialia; ſic enim loquitur Moyſes Deuter. cap. 6. verſ. 1. *Hæc ſunt præcepta, cæremoniæ,*

&

Et *judicia*, quæ mandavit Dominus Deus vester.

Præcepta moralia pertinent ad morum disciplinam, digito Dei descripta sunt in duabus tabulis, Exodi 20. solentque dici Decalogus, eo quod sint numero decem. In prima tabula scripta erant præcepta, quæ Deum respiciunt; & in secunda quæ proximum. Cæremonialia cultum Dei spectant, ut sacrificiorum & purificationum Leges. Judicialia sunt Leges civiles & politicæ, juxta quas Judæorum societas regebatur.

Ergo, inquires, in veteri Lege nulla erant præcepta Fidei, spei, charitatis, & pœnitentiæ, nullave consilia.

Nego conseq. Tum quia hæc & alia Legis naturalis præcepta implicite continentur in Decalogo. In primo quidem præcepto, Fides, spes, charitas, & pœnitentia; cum sine iis Deus, veraciter coli non possit. Tum quia harum virtutum actus passim in Lege præcipiuntur. Unde S. Augustinus Libro de Gratia & libero arbitrio c. 18. sic scribit: *Hæc omnia præcepta dilectionis, id est, charitatis, per Legem dantur Et veterem Et novam. Lex autem sine gratia est littera occidens, in gratia verò Spiritus vivificans.* Quod autem in Lege veteri aliqua fuerint consilia, patet ex variis sacrificiis & votis, quæ in Lege non præcipiebantur, ut advertit sanctus Chrysostomus in illud Psalm. 118. *Voluntaria oris mei beneplacita fac, Domine.*

Q. 5. *Quare Deus Legem naturalem in tabulis scribi voluit, cum ex dictis in cordibus hominum ita sit indita, ut omnino deleri non possit?*

Respondet S. Augustinus in enarrat. in Ps. 57. *Scriptum est in tabulis, quod in corde non legebant; non enim scriptum non habebant; sed legere volebant: opposi-*  
tum



*tum est oculis eorum quod in conscientia legere cogerentur, & quasi forinsecus admota voce Dei, ad interiora sua homo compulsus est. Adde quod concupiscentia, passiones inordinatæ, & habitus vitiosi, etsi Legem naturalem omnino delere non possint, illam valde obscurant, rationemque ita perturbant, ut facile homo malum tanquam bonum apprehendat. Unde Apostolus Rom. 7. ait: *Peccatum non cognovi, nisi per Legem: nam concupiscentiam nesciebam, nisi Lex diceret, non concupisces.**

Q. 6. *Lex vetus obligabatne omnes homines?*

R. Solos Judæos obligabat quoad præcepta cæremonialia & judicialia; quia iis solis data fuit, Deuter. 4. *Quæ est aliagens tam inchoata, quæ habeat cæremonias & iusta judicia?* Rom. 3. *Quid ergo amplius Judæo est? multum per omnem modum. Primum quidem quia credita sunt illis eloquia Dei; Gentilibus tamen licebat amplecti Legem, quamvis sine ea absolute potuissent salvari: Si quis peregrinorum (ait Deus Exodi 12.) in vestram voluerit transire coloniam, & facere Phase Domini, circumcidetur prius omne masculinum ejus, & tunc rite celebrabit, eritque sicut indigena terræ.*

Dixi: *Quoad præcepta cæremonialia & judicialia; Nam Gentiles præcepta moralia quæ pertinent ad Legem naturalem, servare tenebantur, non tamen vi Legis scriptæ; nec proinde subiciebantur pœnis temporalibus Lege latis contra prævaricatores, putà idololatrias, blasphemos, adulteros.*

Q. 7. *Lex vetus fuitne mutabilis?*

R. 1. Mutari potuit à Deo quoad præcepta cæremonialia, & judicialia; quia erat Lex positiva, & minimè necessaria, quemadmodum Lex naturalis; sed prorsus dependens à libera Dei voluntate: ergo sicut Deus potuit quoque eam revocare.

R. 2.

R. 2. Actu & de facto mutata est, & abrogata in adventu Christi. Est de fide contra Ebionem, Cerinthum, & Nazaræos, ex sancto Epiphanio Hæresi 28.

Probatur: Tum quia Lex data est ad tempus, & *donec veniret semen, cui promiserat*, ait Apostolus Gal. 3. vers. 19. Tum quia finis Legis est Christus, Rom. 10. vers. 4. Atqui obtento fine cessat usus mediorum, quæ sunt ad finem: tum quia Lex erat umbra futurorum, Hebr. 10. vers. 4. figurabat Christum venturum, *omnia in figura contingebant illis*, 1. Cor. 10. v. 11. Atqui fulgente luce, evanescit umbra, & præsentē veritate, figura illam futuram prænuntians, evadit falsa: Ergo.

Dices: Habetur Baruch 4. *Hic liber mandatorum Dei, & Lex, quæ est in æternum*: Ergo.

Nego conseq. Nam in Scripturis illud solet dici æternum, quod longissimo tempore durat, ut patet tum ex cap. 17. Gen. vers. 8. ubi Abrahæ promittitur Chanaan in possessionem sempiternam, hoc est, quamdiu durabit Judæorum Respublica; tum ex cap. Deut. 15. v. 17. ubi dicitur de servo, qui maluit servire, quàm manumitti septimo anno, sic statuitur: *Serviet illi in æternum*, id est, toto vitæ suæ tempore.

Instabis: Christus Matth. 5. testatur se non venisse legem solvere, sed adimplere: Ergo.

Distinguo anteced. Non solvere quoad præcepta moralia, quæ sunt legis naturalis & necessaria, Conc. Quoad cæremonialia, & judicialia, Subdisting. Venit adimplere, quatenus gratiam, quam significabant, exhibuit, Conc. Quatenus eorum vim obligandi confirmavit, Nego anteced. Hoc enim sensu illa abrogavit.

Q. 8. *Lex estne mutata & abrogata statim ab adventu Domini, aut ab ejus Baptismo?*

R. Non fuit mutata, nisi in Christi morte; quia Christus verbo & exemplo docuit, Legem esse servandam: verbo quidem, Matth. 23. v. 2. *Super Cathedram Moysi sederunt Scribæ & Pharisei. Omnia ergo quaecumque dixerint vobis, servate, & facite:* exemplo quoque; quia ipse Legem servavit, circumcissus est, oblatuſ est in Templo, Pascha comedit, & omnia Judæorum Festa celebravit.

Dices: Luc. 16. v. 16. sic legitur: *Lex & Prophetæ usque ad Joannem:* Ergo.

Distinguo anteced. Lex & Prophetæ, quatenus prænuntiabant Christum venturum, Conc. Quatenus alia facienda, alia vitanda præcipiebant, Nego antec. Itaque voces illæ Prophetarum, *veniens, veniet, qui avertat iniquitatem à Jacob,* cessarunt prædicante Joanne: *Ecce Agnus Dei, ecce, qui tollit peccata mundi.*

Instabis: Atqui prædicante Joanne, Legis præcepta non obligarunt; nam ex dictis, præcepta veteris Legis ad Christum ducebant tanquam media ad finem, erantque figuræ futuri ejus adventus: ergo statim atque Christus se præsentem exhibuit, præcepta veteris Legis evaserunt inutilia, imò & signa falsa ac superstitiosa.

Nego subsumptum, & ejus confirmationis antecedens distingo, Legis præcepta ad Christum deducebant, tanquam ad finem, ipsumque futurum prænuntiabant, tanquam redemptorem Jacob, novi fæderis, & legis gratiæ auctorem, Conc. Deducebant ad Christum, ipsumque futurum prænuntiabant præcisè & simpliciter, Nego antec. Porro Christus ante mortem nec redemit Jacob,

Jacob, nec novum Testamentum condidit, nec novam gratiæ legem sanxit, ac proinde lex toto illo tempore, quod Christi mortem præcessit, futura verè prænuntiabat.

Instabis iterum: Baptismus ante mortem Christi fuit institutus: ergo circumcisio exinde evasit inutilis & consequenter lex ipsa; cum legitime observari non posset, nisi à circumcisis. Ita ferè Scotus.

Distinguo anteced. Baptismus fuit institutus, & non præceptus, Concedo: Fuit præceptus, Nego anteced. Unde neganda est consequentia, nam quamvis circumcisio non esset tunc necessaria ad delendum peccatum originale (si tamen illud unquam deleverit, quod suo loco examinabitur) non fuit propterea inutilis, cum proprius ejus effectus esset consignare populum Dei, & idoneum illum reddere ad cæremonialia legis præcepta observanda.

Q. 9. *Quando itaque lex fuit abrogata?*

Priusquam huic quæstioni fiat satis, quatuor circumstantiæ temporis diligenter sunt distinguendæ. Prima, in qua lex nova fuit constituta, & vetus abrogata. Secunda, cum hujusmodi mutatio fuit promulgata. Tertia, quando lex vetus evasit prorsus inutilis & obligare desiit; ita, tamen, ut ejus observatio non fuerit per se illicita & noxia. Quarta, cum lex evasit mortifera, & usus ejus omnino illicitus ac superstitiosus. His prænotatis,

R. 1. Lex abrogata est in morte Christi. 2. Mutatio ejus promulgata est die Pentecostes, & exinde obligare desiit, utpote jam inutilis. 3. Observatio legis aliquandiu post Pentecosten fuit per



per se licita. 4. Evasit tandem mortifera & superstitiosa, quando Templum fuit destructum sub Vespasiano & Tito, quadraginta annis post mortem Christi.

Prima pars responsionis, nempe quòd lex vetus in morte Christi abrogata fuerit & mortua, probatur; quia quidquid in lege fuerat promissum & præfiguratum, in morte Christi completum est. Hinc Christus Spiritum mox emissurus ait, Joan. 19. *Consummatum est.* Ex quibus verbis sic concludit S. Thomas quæst. 103. art. 3. ad 2. *Et ideo tunc totaliter debuerunt cessare legalia, quasi jam veritate eorum consummata.* Atque in hujusce rei signum velum Templi scissum esse communiter docent SS. Patres, ut S. Ambrosius Lib. 10. in Luc. cap. 23. ubi sic habet: *Velum scinditur, quo mysteriorum Synagogæ profanatio declaretur.* Sanctus Augustinus, vel quivis Auctor Serm. 114. de Tempore, nunc in Appendice 153. *Velum templi scinditur; quia Synagoga honore nudatur; observatio antiqua dissolvitur, Ecclesiæ unitas præmonstratur.* S. Leo Serm. 17. de Passione: *Adeò tunc à Lege ad Evangelium, à Synagoga ad Ecclesiam, à multis sacrificiis ad unam hostiam, quæ Deus est, evidens est facta translatio, ut emittente Domino Spiritum, velum vi subdita scinderetur.*

Enimverò tum vetus Testamentum est revocatum, cum novum conditum est: tum lex antiqua abrogata, cum Sacerdotium Aaronicum fuit translatum; nam ex Apostolo Hebr. 7. v. 12. *Translato Sacerdotio, necesse est, ut, & legis translatio fiat.* Atqui in morte Christi novum Testamentum conditum esse probat Apostolus Hebr. 9. vers. 16. & 17. his verbis: *Ubi testamentum est, mors necesse est inter-*

*intercedat testatoris ; testamentum enim in mortuis confirmatum est , & cap. 10. vers. 9. aufert primum , ut sequens statuat. Sacerdotium etiam Aaronicum sublatum est ; cum Christus novus Sacerdos secundum ordinem Melchisedech seipsum in Cruce obtulit , tanquam victimam æterno Patri , suaque oblatione , consummavit in æternum sanctificatos , ut loquitur Apostolus , Hebr. 10. v. 14. Ergo lex vetus in morte Christi abrogata est.*

Dices : Lex, quæ adhuc obligat, abrogata non est : atqui lex vetus post Passionem Christi obligavit Judæos, donec Evangelium promulgaretur ; alioquin Judæi sine lege remansissent , defuissetque parvulis remedium contra peccatum originale. Unde S. Bernardus Epist. 77. seu Tractat. ad Hugonem , sic scribit : *Sancito quippe novi mysterii decreto , sed adhuc secreto , quisnam , quæso , morientibus interim ad regnum patet accessus , dum & vetus jam deficit , quoniam à novo excluditur ; & novum tamen non subvenit , quoniam dum nescitur , non percipitur ? O infelicissima illa tempora , quæ sola à sæculis omni penitus salutis remedio vacua transierunt. Ergo.*

Nego major. Nam in civilibus lex antiqua, licet sit abrogata in consilio Principis, vim tamen habet obligandi, eosdemque parit effectus, donec abrogatio fuerit promulgata, ac proinde viguit remedium contra peccatum originale, quamdiu novum Testamentum promulgatum non est.

Secunda pars, scilicet, quod in Pentecoste Lex Evangelica promulgata sit, & exinde Lex Mosaica obligare desierit, & inutilis evaserit, probatur, quia eo ipso die, quo Judæi recolebant gratam memoriam olim traditæ Legis in monte Sina inter tonitrua & fulgura ; ut figuræ veritas responde-

ret, Spiritus Sanctus cum ingenti sonitu, & in flamma ignis descendit in monte Sion, novam Legem proprio digito scripsit, non in tabulis lapideis sicut prius, sed in cordibus Fidelium: Apostoli Evangelii præcones designati, qui à Passione Christi hæcenus latuerant, & ejus jussu siluerant, jam Spiritu Sancto repleti loquuntur variis linguis, Deo sermonem eorum confirmante stupendis signis: efficaciam simul & necessitatem Baptismi prædicant: *Pœnitentiam agite*, inquit Apostolorum Princeps Actuum 2. vers. 38. *& baptizetur unusquisque vestrum in nomine Jesu Christi, in remissionem peccatorum vestrorum, & accipietis donum Spiritus Sancti.* Porro eò ipso, quò aperitur posterius Testamentum, præcedens, & leges in eo contentæ revocari censentur.

Dices 1. Fides in Christum est novi Testamenti præceptum: atqui Fides ante Pentecosten obligavit; Judæi quippe Christi sermonibus credere tenebantur: ergo Lex nova ante Passionem obligavit.

Distinguo major. Fides est novi Testamenti, & veteris simul præceptum, Concedo: Est novi Testamenti præceptum proprium, Nego majorem: Nam Patriarchæ & Prophetæ credebant ea omnia futura, quæ Christiani credunt impleta: mutata sunt tempora, non ipsa fides, quæ eadem semper fuit.

Instabis: præceptum Baptismi fuit promulgatum Joan. 3. his verbis: *Nisi quis renatus fuerit ex aqua & Spiritu Sancto, non potest introire in regnum Dei;* & exinde Apostoli Baptismum publicè administrârunt: atqui Baptismo initiati, omnibus Legis Evangelicæ præceptis astringuntur: ergo  
Lex

Lex Evangelica ante Passionem Christi obligavit, & circumcisionem, seu quodvis remedium prius contra peccatum originale institutum evacuavit.

Nego majorem. Nam, ut ait sanctus Bernardus laudata Epistola, Christus in privato & familiari colloquio Nicodemum docuit, non quod tunc exigeret, sed quod suo tempore prædicandum erat super tecta. Sic præceptum illud: *Nisi manducaveritis carnem Filii hominis, & biberitis ejus sanguinem, non habebitis vitam in vobis*, Joan. 9. non præsens tempus, sed futurum denotabat; cum Christus nondum carnem suam in Sacramento exhiberet, sed tantum promitteret. Baptismus quidem ab initio prædicationis Christi fuit institutus, illumque Apostoli contulerunt tanquam remedium efficax, sed nondum necessarium ad eluendum peccatum originale; quia aliud remedium tunc temporis suppetebat, nimirum circumcisio, vel professio Fidei in Christum.

Dices 2. Si statim post Pentecosten inutile fuit vetus remedium contra peccatum originale, Evangelium pluribus parvulis nocuit, quam prodesse potuerit; quot enim parvuli toto orbe terrarum non baptizati, mortui sunt antequam prædicatio Apostolorum ad eorum parentes pervenire potuerit? *Itane ergo, inquit sanctus Bernardus in Opere jam laudato, verbum salutis, præceptum vitæ non prius vitam restituere valuit, quam mortem inflixerit?*

R. I. Duo certa sunt. Primum, promulgata lege irritante, statim irritos reddi actus, quos prohibet, nisi expresse terminum præfigat ad hunc effectum, quemadmodum Decretum Tridentini irritans matrimonia clandestina, concedit



triginta dies numerandos à prima die publicationis, priusquam ejusmodi matrimonia censeantur irrita, Sess. 24. cap. 1. de Reform.

Secundum, ad debitam legis promulgationem satis esse, quòd fiat communitati, nec requiri, ut ejus notitia ad singulos perveniat; alioquin semper esset dubitandi locus, num lex fuerit sufficienter promulgata; cum vix fieri possit, quin aliquis eam ignoret. Unde qui ex ignorantia Decreti Concilii Tridentini, hodie matrimonium contraheret sine præsentia Parochi, nihilominus irritum foret ejus matrimonium. Porro Lex Evangelica die Pentecostes solemniter fuit promulgata Synagogæ; hæc enim promulgatio publicè & cum sonitu facta est in primaria Judæorum civitate, quæ erat Sedes Principum Synagogæ, & in qua convenerant populi ex omni natione, quæ sub cælo est, Act. 2. Ergo inutile reddidit remedium contra peccatum originale prius institutum.

Supereft tamen gravis difficultas, utrùm remedium illud ex illa die irritum fuerit, tum apud Judæos per orbem dispersos, ad quos Evangelii promulgatio statim pervenire non potuit; tum apud Gentiles, ad quos solemnitas illa promulgatio pertinere non videbatur, cum Discipuli communiter ausi non fuerint ipsis Evangelium prædicare, donec eorum vocatio revelata est sancto Petro, Actuum 11. & 12. Quare

R.2. Sanctus Bernardus laudato Opere cap. 2. contendit, remedium contra peccatum originale in iis circumstantiis per aliquod tempus efficax fuisse: *Sanè, inquit, parvulis, & necdum ratione utentibus, quia sola nocere creditur peccati contagio, non etiam mandati prævaricatio, tamdiu credendum est antiqua*

*qua valuisse Sacramenta, quamdiu palam interdicta fuisset non constiterit. An verò ultra, penes Deum est, non meum definire.*

Hugo Victorinus sancti Doctoris sententiam amplexus est Lib. 2. de Sacramentis, nec desunt Theologi, qui illam quoad priorem partem etiam nunc docent. Et ratio eorum est, quia in propositis circumstantiis notitia Legis Evangelicæ ubique haberi non potuit, saltem humano modo; ac proinde Deus saluti illorum parvulorum sufficienter providisse non videretur.

Dixi *quoad priorem partem*; Nam quoad posteriorem, ubi sanctus Bernardus dubitat, num circumcisio, aut fidei professio etiam nunc valeat parvulis, quorum parentes nihil audierunt de Evangelio, nullum potest esse dubium, quin sit prorsus inutilis; quia remotè saltem prædicatio Evangelii ad omnes orbis partes pervenire potuit: quòd autem actu & de facto non pervenerit, per accidens est, & ex defectu causarum secundarum.

Dices 3. Lex illa inutilis censi non debet, quam Apostoli observârunt, quamque observandam præceperunt, saltem in quibusdam capitibus; nefas enim est credere, tam sanctos viros quidquam frustra & inutiliter egisse, ac præcepisse: atqui Apostoli post promulgatum Evangelium, legem observârunt ex concessis; & observandam præceperunt, ex cap. 15. Act. *Abstineatis vos*, inquit, *vers. 29. ab immolatis simulacrorum, & sanguine, & suffocato, & fornicatione*; Ergo.

Distinguo major. Inutilis censi non debet ex opere operantis, Conc. Ex opere operato, Nego majorem. Deinde concessa minore, di-

stinguo similiter consequens : Lex non fuit inutilis ex opere operantis ; hoc est, Apostoli non inutiliter observârunt , & à Fidelibus observandam præceperunt , Concedo : Id enim præstiterunt propter honestum finem , & rationes supra allatas ; ex opere operato , quasi lex per se vim haberet producendæ alicujus sanctitatis saltem legalis , Nego consequ.

Ergo inquires, post promulgatum Evangelium lex obligavit.

Distinguo : Lex Apostolica , seu Ecclesiastica, Concedo : Mosaica, Nego. Igitur non Moyse, sed Apostoli jussurunt novos Christianos abstinere. 1. Ab idolothytiis, hoc est, à cibis, qui Idolis immolati sunt, & quidem ad vitandum Judæorum scandalum, quibus talis esus idololatria videbatur. 2. A sanguine, sive liquido ac potabili, sive in carne suffocata contento, ut Judæi (qui ab hujusmodi esu utpote à tempore diluvii prohibito, maximè abhorrebant) facilius ad Gentilium conversationem, & familiarem usum pellerentur. 3. A fornicatione, quam Gentiles crimen non opinabantur, quamvis jure naturali sit prohibita. Quodd autem hæc Apostolica Constitutio quoad duo priora capita, sit lata duntaxat ad vitandum Judæorum scandalum, patet tum ex cap. 14. ad Rom. tum ex cap. 10. 1. ad Corinth. Ubi Apostolus hujusmodi cibis uti permittit, quando id fieri potest sine aliorum scandalo. Constat tamen ex Conciliis Gangrensi, Aurelianensi, & Wormatiensi, legem suffocatorum diu post Apostolos viguisse quibusdam in locis, quin etiam nunc apud Græcos observatur.

Tertia responsionis pars, nempe observationem

nem Legis veteris aliquandiu post Pentecosten fuisse per se licitam, probatur ex praxi Apostolorum, qui data occasione legalia observârunt, Act. 10. v. 14. cùm audisset S. Petrus vocem de cœlo dicentem sibi : *Occide, & manduca*, scilicet, quæ secundum Legem erant immunda, respondit, *absit, Domine, quia nunquam manducavi omne commune, & immundum* : Ergo hætenus abstinuerat à cibis per Legem prohibitis : Actuum 16. Sanctus Paulus circumcidit Timotheum, Actuum 18. vers. 18. observat cæremonias Nazaræorum ex voto : ergo non ex simulatione. Et cap. 21. vers. 23. suadente sancto Jacobo & Senioribus, purificat se cum aliis quatuor, juxta Legis præscriptum : Ergo observatio veteris Legis, quamdiu vixerunt Apostoli, fuit per se licita.

Dices 1. S. Hieronymus Epistola, quæ est 75. inter Epistolas sancti Augustini, multis probat, Legem veterem statim post promulgatum Evangelium, fuisse mortiferam, Petrum & alios Apostolos ea usos simulatoriè, hoc est, non in honorem ejusdem Legis, nec ad Dei cultum, quemadmodum si quis nunc à suffocato abstineret, non Religionis, sed solius sanitatis causa, idque colligit ex cap. 2. vers. 13. Epistolæ ad Galat. ubi sic legitur : *Et simulationi ejus (Petri) consenserunt ceteri Judæi, ita ut Barnabas duceretur ab eis in illam simulationem.* Additque sanctus Doctor, hujusmodi simulationem non fuisse verè reprehensibilem, reprehensam tamen à Paulo Gal. 2. sed in speciem, & ex composito, ut per eam Judæi legalibus nimis addicti, intelligerent ea non amplius esse servanda. Ergo Lex vetus tempore Apostolorum reverà fuit mortifera.



Nego consequi. Fateor quidem, S. Hieronymum prius fuisse in illa sententia; sed S. Augustinus Epist. 82. aliàs 19. ineluctabilibus argumentis illum refellit. 1. Quia nunquam licet mentiri etiam ad honestum finem: atqui illa dissimulatio fuisset verum mendacium, & mera deceptio. 2. Quia assumere signum falsæ Religionis, v. g. coram idolo thus incendere etiam sine animo colendi idolum, est grave crimen contra Religionem: atqui in hypothese S. Hieronymi, quod lex fuisset superstitiosa & mortifera, Apostoli legalia cum Judæis observantes, tanti criminis reos se constituissent: Ergo. 3. Quia per se malum est aliis præbere scandalum, & suo exemplo illos inducere ad peccandum: atqui si Apostoli animo simulatorio legalia, alioquin in se mortifera servassent, alios suo exemplo ad peccandum induxissent, quod nefas est de tantis viris dicere aut credere, qui in gratia erant confirmati. Simulatio ergo Petri non fuit formalis, sed materialis duntaxat, hoc est, Petrus non observavit legalia animo simulandi; quamvis ejus agendi ratio minùs cauta & prudens Gentilibus suspicionem injiceret, legalia esse ad salutem necessaria; & ideò verè fuit reprehensibilis, ac seria fuit Pauli reprehensio: quod tandem sanctus Hieronymus agnoscens, in sententiam sancti Augustini, quæ est communis Catholicorum, descendit, ut patet ex c. 8. lib. 1. quem scripsit contra Pelagianos, ubi probat exemplo sancti Petri, Sanctos in hac vita non esse à peccatis venialibus immunes: *Paulus, inquit, dicat de Petro, quod non recto pede incesse- rit in Evangelii veritate; & in tantum reprehensibilis fuerit, ut & Barnabas adductus fuerit*

*fuerit in eandem simulationem. Quis indignabitur id sibi denegari, quod Princeps Apostolorum non habuit? Hanc S. Doctoris mutationem laudat sanctus Augustinus Epist. 130. aliàs 260.*

Instabis pro sententia sancti Hieronymi. Lex post promulgatum Evangelium non minùs fuit mortifera tempore Apostolorum, quàm nostro: atqui negari non potest quin hodie sit mortifera: Ergo.

Major probatur; Quia alia non potest afferri ratio, cur observatio Legis nunc sit mortifera; etiam in hypothesi, quòd non credatur ad salutem necessaria, quàm quòd tota sit ad præfiguranda futura. Unde qui illam nunc observaret, videretur sperare cum Judæis Christum venturum, & ea impleturum, quæ in Lege promissa sunt, sicque falsum & superstitiosum cultum exhiberet: atqui hæc omnia contra observationem Legis militant, etiam respectu Apostolorum, qui cernebant impleta quæcunque Lex prænuntiabat futura: ergo Lex non minùs erat mortifera tempore Apostolorum, quàm nostro.

Nego majorem utriusque argumenti. Namque legalia dupliciter assumi possunt. 1. Ad spem erigendam, quòd Deus aliquando impleturus sit, quod in Lege futurum præfiguravit. Et hic legalium usus à promulgato Evangelio, est planè Judaicus, superstitiosus & prorsus alienus ab Apostolorum mente. 2. Ad Christianorum consolationem, & gratulationem, quòd cernant consummata, quæ antiquis figuris & prophetiis fuerant prænunciata. Et hac mente Apostoli legalia cum Evangelio conjunxere; Ecclesia quoque etiam nunc in publicis conventibus scripta

Prophetarum legit, Psalmos decantat, ubi Christus prædicitur venturus, ut appareat consonantia Legis veteris cum nova, intelligantque Christiani, hanc in illa contineri sicut veritatem in figura.

Cur ergo non licet nunc Ecclesiæ quod licuit Apostolis, circumcisionem addere Baptismo, & Sacrificia Aaronica Missæ Sacrificio? ratio repetenda est ex voluntate Dei, qui usum illum nascente Ecclesia concessit ad tempus, & jam firmata ac roborata prohibuit, saltem in iis, quæ in Lege erant graviora, qualia sunt Sacrificia, circumcisio & alia Sacramenta.

Hæc autem Dei dispositio & ordinatio certò colligitur ex Ecclesiæ Traditione; constans enim est SS. Patrum doctrina, nefas esse legalia cum Evangelio miscere: *Si quis*, inquit S. Ignatius Epist. ad Philipp. *cum Judæis celebrat Pascha, aut symbola festivitatis eorum recipit, particeps est eorum, qui Dominum occiderunt & Apostolos ejus.* Similia habent S. Hieronym. Epist. 7. & S. August. Epist. 82. alias 19.

Dixi: *Saltem in iis, quæ in Lege erant graviora*; Nam Ecclesia leviora quædam admittere posset, ut abstinentiam à sanguine & suffocato, quam diximus diu post Apostolos fuisse observatam pluribus in locis.

Dices 2. Ait Apostolus Gal. 5. vers. 2. *Si circumcidamini, Christus vobis nihil proderit.* Vers. 4. *Evacuati estis à Christo, qui in Lege justificamini, à gratia excidistis.* Vers. 9. *Modicum fermentum totam massam corrumpit*, hoc est, minima Legis observatio Evangelium Christi pervertit. Vers. 11. testatur, se multas sustinuisse persecutiones: ex eo quòd strenuè

strenuè se opposeret ejusmodi illicitæ mixtioni Legis cum Evangelio : *Si circumcisionem adhuc prædico , qui adhuc persecutionem patior ?* Et cap. 2. ejusdem Epistolæ vers. 3. & 5. restitit subdolis fratribus , qui Titum circumcidere volebant : *Sed neque , inquit , Titus qui mecum erat . . . . compulsus est circumcidi . . . . neque ad horam cessinus subjectione , ut veritas Evangelii permaneat apud vos.* Ergo observatio Legis tempore Apostolorum verè fuit illicita & mortifera.

R. 1. Apostolus secum conciliari debet ; quis enim credet , eum propterea evacuatum esse à Christo , & ab ejus gratia excidisse , quòd non semel , sed sæpissimè legalia observaverit ?

S. Hieronymus , cum ferveret controversia inter ipsum & S. Augustinum , sic Apostolum conciliandum arbitrabatur ; nempe , inquiebat ille , Apostolus legalia simulatoriè ac in speciem observavit , serio verò rejecit ac reprobavit. Sed S. Augustinus laudata Ep. 82. illum refellit argumento ad hominem : *Decepit ergo Timotheum , inquit , & fecit nihil ei prodesse Christum ? an quia hoc fallaciter factum est , ideò non obfuit ?*

R. 2. Cum eodem S. Augustino : circumcisio & alia legalia erant licita , *non ex necessitate salutis , sed ex consuetudine solemnitatis* , id est , fas non erat legalia usurpare , vel tanquam necessaria ad salutem , veluti signa Christi venturi & expectandi , sed licitè & gravibus ex causis Apostoli usurpârunt legalia , tanquam cæremonias præcisè à Deo institutas ad suum cultum. 1. Ut Judæos suis ritibus valdè addictos faciliùs adducerent ad Evangelium. 2. Ut amputarent occasionem Hæreticis docendi Legem veterem malam fuisse. 3. Ut honorificè sepeli-



sepeliretur Synagoga, nec videretur tanquam cadaver hominis damnati & inglorii projicienda. Porro Apostolus locis in objectione citatis; insurgit adversus æmulos, qui plures seducebant, docentes neminem sine circumcissione, & aliis Legis cæremoniis per Christum salvari posse, quod est falsissimum, & hæreticum.

Quarta pars responsionis, nimirum legem evasisse mortiferam à destructione Templi Jerosolymitani, probatur: tum quia Synagoga fuit tunc temporis sepulta, & omninò extincta; ex tunc enim cessarunt sacrificia Aaronica, & alia Judæorum solemnia: tum quia Evangelium jam erat prædicatum in universa creatura, quæ sub cælo est, quemadmodum loquitur Apostolus in Epistola ad Coloss. cap. I. v. 23.

Q. 10. *Peccavitne S. Petrus per illam simulationem, quam reprehendit S. Paulus?* Gal. 2.

R. Certum est, eum lethaliter non peccasse; erat enim confirmatus in gratia, sicut cæteri Apostoli, post descensum Spiritus Sancti. Peccatum ergo, si quod in illo fuit, veniale duntaxat extitit, scilicet ex inadvertentia.

Dixi, *si quod in illo fuit*; Nam Baronius, & alii nonnulli opinantur, S. Petrum nequidem venialiter peccasse, nisi materialiter; quia inadvertentia fuit in illo invincibilis, & nullatenus voluntaria. Sed sancti Hieronymus & Augustinus locis suprâ citatis illum non excusant à peccato veniali. Quidquid sit, & justa fuit S. Paulo reprehendendi causa, ut jam ostendimus, & eximium in S. Petro humilitatis exemplum, ut qui passus sit publicè in se corrigi, quod minùs rectum videbatur: *Rarius*, inquit S. Augustinus laudata Epist. 82.

¶ *Sanctius exemplum Petrus posteris præbuit, quò non dedignarentur à posterioribus corrigi, quàm Paulus, quò confidenter auderent minores majoribus pro defendenda veritate, salva charitate, resistere.*

Q. II. *Licebatne æquè Gentilibus ad Fidem conver-  
sis, ac Judæis usurpare legalia?*

R. Absolutè licebat. Ita S. Augustinus expositione in Epist. ad Gal. *Quamvis, inquit, Titus Græcus esset, & nulla eum consuetudo, aut cognatio parentum circumcidi cogeret, sicut Timotheum; facile tamen & istum circumcidi permisisset Apostolus, non enim tali circumcisione dicebat salutem auferri. Sed si in ea constitueretur spes salutis, hoc esse contra salutem ostendebat: poterat ergo, ut superfluam æquo animo tolerare. Propter subintroductos autem falsos fratres (qui circumcisionem necessariam ad salutem prædicabant) non est compulsus Titus circumcidi, id est, non ei potuit extorqueri, ut circumcideretur; quia illi vehementer observabant, & cupiebant circumcidi Titum, ut jam circumcisionem, & ipsius Pauli attestatione & consensione tanquam saluti necessariam prædicarent.*

Responsionis autem ratio est, quia ante promulgatum Evangelium, Gentilibus licuit amplecti Legem veterem: ergo & post promulgatum id eis licitum fuit, donec evaderet mortifera; nulla enim extat prohibitio ipsis specialiter facta; imò Apostoli Act. 15. eò ipso, quò ex legalibus nonnulla, tanquam necessaria Gentilibus imponunt, videntur eis liberum relinquere cætera, vel observare, vel prætermittere.

Dixi, *absolutè licebat*; Quia per accidens minùs licebat Gentilibus, quàm Judæis legalia assumere; Judæi quippè faciliè præsumebantur ea frequentare ex consuetudine, non verò ex necessitate: sed  
non

non videbatur, cur Gentiles onus tam grave subire vellent, nisi illud ad salutem necessarium existimassent; ac proinde per accidens & ratione scandalii, circumcisio, & aliæ Legis cæremoniæ minus in Gentilibus, quàm in Judæis erant tolerandæ.

## CAPUT XV.

### De Lege Evangelica.

**C**onstat ex dictis capite præcedenti. 1. Legem Evangelicam esse divinam, haberèque Christum Auctorem; nullatenus verò Joannem Baptistam, ut qui nullam legem tulerit, quæ Christianos obliget, Baptismus enim, quem instituit, non erat Sacramentum, sed dispositio ad Baptismum Christi, ut dicitur, ubi de Baptismo. 2. Legem Evangelicam die Pentecostes fuisse promulgatam, saltem Judæis, conditam verò non uno & eodem tempore, sed successivè; nam Baptismus institutus est initio prædicationis Christi, Eucharistia pridie quàm pateretur, & plura alia, ut Sacramentum Pœnitentiæ, post Resurrectionem; adeò ut Lex Evangelica non fuerit integrè condita, nisi circa Christi Ascensionem. 3. Legem Evangelicam non obligasse ante diem Pentecostes, cum priùs non fuerit promulgata; potuit tamen esse utilis; nam Baptismus & Eucharistia habuerunt vim sanctificandi statim atque instituta sunt.

Judæi quidem tenebantur credere Christo prædicanti, & per varia signa contestanti, se à Patre missum, neminem salvatum iri, nisi renasceretur ex aqua & Spiritu Sancto, vitamque æternam habiturum, nisi manducaret carnem Filii hominis, &

& biberet ejus sanguinem, &c. quia ratio naturalis dictat, credendum vera dicenti & probanti, nec ad id requiritur promulgatio, quemadmodum requiritur, ut præcepta positiva mores & cæremonias spectantia vim habeant obligandi. Unde Judæi ante passionem debuerunt credere necessitatem percipiendi aliquando Baptismum & Eucharistiam; sed nulla necessitas, nullave obligatio fuit eis imposita, nisi post Pentecosten, suscipiendi illa Sacramenta. Sic absoluto Concilio Tridentino, sed nondum promulgato, qui noverat illud fuisse œcumenicum, tenebatur credere, quæ in eo tanquam de Fide erant definita, non verò servare, quæ circa mores noverat sancita.

His facilioribus jam elucidatis & stabilitis, alia graviora occurrunt expendenda, ac 1. quidem quid sit propriè Lex Evangelica, & in quo præcipuè consistat? 2. Utrùm sit præceptiva? 3. Utrùm sit alia à Lege veteri? 4. An sit durior ac severior? 5. An sit aliquando mutanda?

### §. I.

*Quid sit Lex Evangelica, & in quo consistat?*

**A**dvertes 1. Legem Evangelicam ex S. Thoma hic qu. 106. art. 1. dupliciter spectari posse, scilicet, vel in se præcisè, vel in signo. Quemadmodum enim testamentum sumitur, vel pro ipsa dispositione & donatione Testatoris, vel pro scriptura, qua Testator utitur tanquam signo & instrumento, ut notum faciat, hanc ultimam fuisse suæ voluntatis dispositionem; ita Lex Evangelica, quæ dicitur novum Dei Testamentum, dupliciter



pliciter accipi potest. 1. Pro ipsamet Christi dispositione & ordinatione. 2. Pro doctrina, qua nobis explicuit divitias suæ donationis.

Advertes 2. ex eodem sancto Doctore loco citato, Legem Evangelicam præcipuè consistere in ipsa Christi dispositione, & charismatum largitione; doctrinam verò esse quid secundarium. Et, ut loquitur S. Doctor, quoddam dispositivum; verba illius sunt: *quoddam est potissimum in Lege novi Testamenti, & in quo tota virtus ejus consistit, est gratia Spiritus Sancti, quæ datur per Fidem Christi: & idè principaliter Lex nova est ipsa gratia Spiritus Sancti . . . habet tamen Lex nova quædam sicut dispositiva ad gratiam Spiritus Sancti & ad usum hujus gratiæ pertinentia, quæ sunt quasi secundaria in Lege nova, de quibus oportuit instrui Fideles Christi & verbis scriptis, tam circa credenda quàm circa agenda.* Ex quibus concludit Angelicus Doctor, Legem Evangelicam dicendam inditam, non verò traditam; atque in eo distingui à veteri, quòd ista simpliciter dicatur scripta, illa verò indita. Enimverò res quælibet denominanda est ab eo, quod in illa excellit, homo v. g. simpliciter dicitur rationalis, nec sine aliqua contumelia vocaretur absolutè animal; quia ratio illum suprà omnia sensitiva extollit: ergo cùm gratia sit quid præcipuum in Lege Evangelica, nec per litteram seu scripturam tradatur, sed per Spiritum Sanctum infundatur, absolutè dicendum est Legem Evangelicam esse inditam.

Nec refert, quòd Lex Evangelica magna ex parte sit scriptis exarata; namque Lex naturalis, quam constat naturæ rationali esse inditam, fuit postmodum scripta in tabulis lapideis: ut carnales, circa exteriora effusi, extrinsecùs saltem

tem audirent, quod intus in corde insculptum legere negligebant; ita consentaneum fuit, ut Lex Evangelica, quæ cum non sit innata sicut naturalis, sed naturæ rationali superaddita, per peccatum deleri potest, & excidere, non solum ex hominum cordibus; sed etiam ex eorum memoria, scripto traderetur. Ergo cum illa Scriptura sit quid secundarium in Lege Evangelica, illa Lex æquè dici debet indita, ac Lex naturalis, maxime cum sine scriptis fuerit condita, promulgata, & ferè ubique recepta. His prænotatis, ad propositam quæstionem

R. Lex Evangelica, describi potest, gratia per Spiritum Sanctum cordibus indita, qua creduntur & amantur quæ Christus verbo tradidit.

Dicitur 1. *gratia*; de ea enim sic cecinit Zacharias cap. 12. vers. 10. *Effundam super domum David, & super habitatores Jerusalem Spiritum gratiæ & precum*: quod impletum esse die Pentecostes, quo promulgata est Lex Evangelica, docent S. Hieronymus, Theodoretus, & alii. Sic etiam sanctus Joannes Legem Evangelicam indigitavit cap. 1. vers. 17. *Lex per Moysen data est, gratia & veritas per Jesum Christum facta est*: hoc est, Moyses per Legem præcepta dedit; Christus per Evangelium obedientiam contulit: Moyses cupiditatem prohibuit, quæ ipsa prohibitionis occasione amplius exarsit: Christus per Evangelium infundendo charitatem expulit cupiditatem. *Lex ergo Dei*, inquit sanctus Augustinus Lib. de Spiritu & Littera cap. 17. *est charitas . . . cum in tabulis scribuntur opera charitatis: Lex est operum, & littera occidens prævaricatorem: cum autem ipsa charitas*  
*D. Habert Theolog. Tom. III. H h dif-*

*diffunditur in corde credentium, Lex est Fidei, & spiritus vivificans dilectorem.*

Dicitur 2. *cordibus indita*; sic enim de ea habetur cap. 31. vers. 31. & 33. Jeremiæ, quem Apostolus cap. 8. ad Hebræos laudat in confirmationem nostræ definitionis: *Ecce, inquit, dies venient, dicit Dominus, & feriam domui Israël & domui Juda fœdus novum . . . dabo Legem meam in visceribus eorum, & in corde eorum scribam eam.*

Unde Apostoli hujusce Legis novæ præcones non descenderunt de monte Sion, in quo illam acceperunt, sicut Moyse de monte Sina, in quo Deus veterem Legem sanxerat; iste enim descendit ferens Legem veterem in manibus, & in tabulis descriptam: illi verò sine scriptura descendunt Legem Evangelicam in cordibus insculptam deferentes, & ex abundantia cordis linguis igneis loquentes magnalia Dei, sicut scriptum est Act. 2. *Repleti sunt omnes Spiritu sancto & cœperunt loqui.*

Dicitur 3. *per Spiritum Sanctum*, ut Lex Evangelica distinguatur etiam à Lege naturali, quæ ita est indita, ut sit innata, fluensque instar cujusdam radii à principiis naturæ rationalis; quæ cum sit per peccatum originale vitiata & debilitata, Lex ab ipsa emanans infirma quoque sit, necessum est. At Lex Evangelica 1. est naturæ rationali superaddita, & cordibus inscripta per Spiritum Sanctum, ut habetur. 2. Cor. 3. vers. 3. *Epistola estis Christi ministrata à nobis, & scripta non atramento, sed Spiritu Dei vivi: non in tabulis lapideis, sed in tabulis cordis carnalibus.* 2. obscuratam Legem naturalem illustrat, & debilitatas naturæ vires reparat, auct, ac perficit, juxtà illud. Rom. 1. vers. 16. *Non erubescō Evangelium; virtus enim Dei est in salutem*

*tem omni credenti.* Et 2. Tim. 1. vers. 7. *Non enim dedit nobis Deus spiritum timoris, sed virtutis & dilectionis, & sobrietatis.*

Dicitur 4. *qua creduntur & amantur*; quibus vocibus significatur, Legem novam, non solum ostendere quæ sint credenda, amanda, & fugienda: sed etiam dare ut illa credantur, amentur, & fugiantur. Hinc dicitur Lex amoris; Lex Fidei, quæ per dilectionem operatur; quia mentem sanctis cogitationibus illustrat, & voluntatem pie movet & accendit, proptereaque dicitur ab Apostolo, Rom. 8. vers. 2. *Lex, Spiritus vitæ in Christo Jesu*, Lex verò scripta, *ministratio mortis litteris deformata in lapidibus.* 2. Cor. 3. vers. 7.

Dicitur 5. *quæ Christus verbo tradidit*, ut ostendatur materiam, circa quam versatur Lex Evangelica, esse ea omnia, quæ Christus verbo docuit, & Apostoli postmodum magna ex parte scripto tradiderunt.

Ergo Lex nova verè justificat; namque gratia, ex dictis Tractatu de Gratia, est forma justificans, & formaliter expellens peccatum, quemadmodum lux tenebras, & calor frigus: atqui Lex Evangelica est ipsamet gratia & charitas diffusa in cordibus nostris per Spiritum Sanctum, qui datus est nobis: ergo Lex Evangelica verè justificat.

Dices 1. Illud propriè non est Lex, cui non convenit definitio Legis: atqui gratiæ non convenit definitio Legis; non enim est ordinatio rationis ad bonum commune, facta à superiore, habens vim obligandi: ergo gratia propriè non est Lex, sed metaphoricè duntaxat, quemadmodum dicitur Lex carnis, Lex peccati.



Nego minorem. Gratia quippe est ordinatio vel efficax, vel sufficiens, facta à Deo summa ratione ad finem ultimum supernaturalem, quo nihil est melius, & quisquis ab illo ordine deficit, prævaricationis reum se constituit. Ergo gratia propriè dicitur ab Apostolo Lex Spiritus; concupiscentia verò metaphoricè Lex carnis, & peccati; quia ille carnis & peccati impulsus est contra rationem, & ad malum tendit, ad quod nemo obligari potest.

Dices 2. vera Lex, cùm sit ad bonum commune, debet esse una: atqui gratia non est una: *divisiones gratiarum sunt*, inquit Apostolus 1. Cor. 11. & S. Aug. Ser. 26. aliàs 21. de Verbis Apostoli, *natura communis est, non gratia.*

Nego min. Nam ex Apostolo Ephes. 4. Una Fides, unus spiritus, qui licet non æqualiter singulis communicetur, tamen *quantum est de se*, inquit S. Thomas qu. 106. art. 2. ad secundum, *sufficiens auxilium dat ad non peccandum.* Sicut ergo Lex naturalis una est in omnibus hominibus, quamvis in quibusdam amplius vigeat: ita & Lex gratiæ & Spiritus in omnibus Christianis, si obicem non ponant. Locus autem adductus ex Epistola ad Corinthios, intelligendus est de Gratiis gratis datis, quæ non erant omnibus communes, nec rationem Legis habere poterant. Quo verò sensu dictum sit, *natura communis est non gratia*, exposuimus Tractatu de Gratia pag. 583. 1. edit.

Dixi, *nisi ponant obicem*; nam Christus loquens de Spiritu sancto Joan. 14. ait, mundum non posse eum accipere: mundum autem dixit, interprete sancto Augustino, dilectores mundi, qui secundum eundem Doctorem, non re, sed nomi-  
ne

ne duntaxat sunt Christiani; scriptum est enim Rom. cap. 8. *si quis Spiritum Christi non habet, hic non est ejus.*

Dices 3. Illud non est differentia essentialiter Legis Evangelicæ, quod est ipsi commune cum Lege naturæ, & cum Lege scripta: atqui gratia est communis Legi naturæ, scriptæ, & Evangelicæ: sancti enim Patriarchæ, ut Noe, Abraham, Isaac, & Jacob, in Lege naturæ; & Prophetæ, ut Moyfes, Samuel, David, & alii in Lege scripta fuerunt sub gratia: ergo.

Distinguo min. cum sancto Augustino Lib. 3. contra duas Epistolas Pelagianorum cap. 4. fuerunt sub gratia, quæ pertinebat ad Legem Evangelicam, cum non fuerit ipsis collata, nisi per merita Christi & fidem in ipsum venturum, Concedo: quæ erat propria Legis naturæ aut scriptæ, Nego minorem. *Eadem igitur Fides est, inquit sanctus Augustinus, & in illis, qui nondum nomine sed re ipsa fuerunt antea Christiani, & in istis, qui non solum sunt, verum etiam vocantur, & in utrisque eadem gratia per Spiritum Sanctum.*

## §. II.

*Utrum Lex Evangelica sit præceptiva?*

**N**egant Pseudo-Reformati, contenduntque, Legem Evangelicam, utpote Legem libertatis, aliud non continere præceptum, quam fidem, seu certam fiduciam in divinis promissis, adeò ut stante ejusmodi fiducia nullum peccatum quantumcunque grave imputetur, tumque solummodo Christiani lethaliter peccent, cum à certa illa fiducia excidunt. Ita Lutherus in cap. 2. Epist. ad

Galatas, in quo sic habet: *cætera omnia liberrima, neque præcepta amplius, neque prohibita. Si conscientia dictat, peccasti, responde, peccavi. Ergo Deus puniet, & damnabit: non. At Lex hoc dicit: sed nihil mihi cum Lege. Quare? quia habeo libertatem.* Luthero concordat Calvinus Lib. 3. Institut. cap. 19. Quam impietatem Concilium Tridentinum anathemate percussit Sess. 6. Can. 16. his verbis: *Si quis dixerit, nihil præceptum esse in Evangelio; præter fidem, cætera esse indifferentia, neque præcepta, neque prohibita, sed libera: aut decem præcepta nihil pertinere ad Christianos, anathema sit.* Similia habet Can. 20. & Can. 21. *Si quis dixerit, Christum Jesum à Deo hominibus datum fuisse ut Redemptorem, cui fidant, non etiam ut Legislatorem, cui obediant; anathema sit.* Quare ad propositam quæstionem

R. De Fide est, Legem Evangelicam alia præcipere, quàm fidem.

Probatur 1. ex Scriptura, Matth. 5. *Non veni Legem solvere, sed adimplere. Nec dicant Adversarii, hæc intelligenda duntaxat de promissionibus in Lege factis, quas Christus adimplevit; subdit enim: Qui ergo solverit unum de mandatis istis minimis, & docuerit sic homines, minimus vocabitur in regno cælorum: . . . dico enim vobis, quia nisi abundaverit justitia vestra plusquam Scribarum & Phariseorum, non intrabitis in regnum cælorum.* Quid verò addendum justitiæ Phariseorum, exponit toto capite & duobus sequentibus: *audistis, inquit, quia dictum est antiquis, non occides . . . ego autem dico vobis quia omnis, qui irascitur fratri suo, reus erit judicio.* Matth. 19. *Si vis ad vitam ingredi, serva mandata . . . non homicidium facies, non adulterabis, &c. Et c. 25. boni & mali judicantur ex operibus: tunc dicet Rex*  
bis,

*his, qui à dextris ejus erunt; venite benedicti Patris mei, possidete paratum vobis regnum, non quia credidistis, sed quia, esurivi . . . & dedistis mihi manducare . . . Et his, qui à sinistris erunt, discedite à me maledicti in ignem æternum . . . esurivi enim, & non dedistis mihi manducare.* Luc. 6. vers. 46. *Quid autem vocatis me Domine, Domine, & non facitis quæ dico?* Joan. 14. *Si diligitis me, mandata mea servate.* Et cap. 15. *Hoc est præceptum meum, ut diligatis invicem, sicut dilexi vos.* 1. Joan. 3. *Qui non diligit, manet in morte.* Denique sanctus Jacobus in sua Epist. ex professo confutat eos, qui docebant solam fidem sufficere.

Probatur 2. ex Traditione. Sanctus Augustinus Lib. 3. contra duas Epistolas Pelagianorum cap. 4. num. 10. sic scribit. *Quis dicat, non debere observare Christianos, ut uni Deo Religionis obsequio serviatur, ut idolum non colatur, ut nomen Domini non accipiat in vanum, ut parentes honorentur, ne adulteria, furta, falsa testimonia perpetrentur, ne uxor, ne omnino res ulla concupiscatur aliena? Quis est tam impius, qui dicat, ideo se ista Legis non custodire præcepta, quia est ipse Christianus, nec sub Lege, sed sub gratia constitutus?*

Dices 1. Apostolus Rom. 3. vers. 27. in eo opponit Legem veterem Legi Evangelicæ, quòd illa sit Lex factorum, ista verò Lex Fidei: *ubi est ergo, inquit, gloriatio tua? exclusa est. Per quam Legem? Factorum? non, sed per Legem Fidei. Arbitramur enim justificari hominem per fidem sine operibus.* Ergo Lex Evangelica non præcipit opera. Hinc dicitur Evangelium, hoc est, bonus nuntius, seu Lex fausta annuntians. Quænam autem sint illa, exponit Christus Matth. 11. v. 28. *Venite ad me om-*



*mnes, qui laboratis, & onerati estis (scilicet jugo Legis) & ego reficiam vos.*

Distinguo antecedens, Lex Fidei & gratiæ, quia dat fidem & gratiam, quibus implentur præcepta, Concedo: Fides enim Christianorum est Fides, quæ per charitatem operatur, ut dicitur Gal. 5. Lex Fidei inertis, qua otiosi confidamus, & quiescamus in promissis divinis, Nego anteced. Lex itaque vetus dicitur Lex factorum; quia gratiam non conferebat: sed extrinsecus duntaxat opera præcipiebat: Lex verò Evangelica vocatur Lex Fidei; quia hominem propriæ infirmitatis admonens, per fidem addicit Christo, à quo accipit gratiam implendi, quæ jubentur per Legem. Ita sanctus Augustinus Lib. de Spiritu & Littera cap. 13. in quo sic scribit: *Quid igitur interest? scilicet Legem inter & Evangelium, breviter dicam. Quod operum Lex minando imperat, hoc Fidei Lex credendo impetrat. Illa dicit, non concupisces, ista dicit, cum scirem quia nemo potest esse continens, nisi Deus det . . . adii Dominum, & deprecatus sum . . . ideo enim jubet Lex, ut admoneat quid faciat Fides, id est, ut cui jubetur, si nondum potest, sciat quid petat: si autem continuò potest, & obedienter facit, debet etiam scire, quo donante possit.* Et cap. 10. probat, Decalogum æquè pertinere ad Christianos, ac ad Judæos; sed eos, qui etiam nunc propriis viribus illum servare præsumunt, servire sub Lege premente, & sub littera, quæ occidit: *quid horum, quisquam dixerit Christianum non debere servare? an fortè non istam Legem, quæ in illis duabus tabulis scripta est, litteram occidentem appellat Apostolus, sed illam circumcisionis, aliorumque veterum, jamque abolitorum Sacramentorum? sed quomodo putabimus, cum in ea sit, non concupisces, per quod*  
man-

*nandatum, quamvis sanctum & justum, & bonum, fefellit me, inquit, peccatum, & per illud occidit? Quid enim aliud est, littera occidit, spiritus autem vivificat: quamvis evidentiùs eo ipso loco ad Corinthios . . . . . non aliam velit intelligi litteram, quàm ipsum Decalogum in illis duabus tabulis scriptum?*

Christus ergo bonum nobis attulit nuntium, quatenus annuntiavit, se præbere fidem & gratiam, qua credantur, & amentur quæ Lex vetus in Decalogo præcipiebat; ubi enim amor, labor non est, sed sapor & refectio, inquit sanctus Bernardus.

Confirmatur, & explicatur responsio familiari exemplo. Cogitemus quempiam laborantem morbo, qui hætenùs omnem Medicorum artem & industriam fefellit, proptereaue de salute omnino desperantem. Interim familiares ipsi renuntiant, quemdam Medicum desperatos quosque sanitati restituere. Credit æger: ad Medicum confugit: paret ejus præceptis, & convalescit. Annon verè dixerit ille, se sanatum per fidem in Medicum? Per quam autem fidem? an per fidem inertem & otiosam? Imò si Medici præcepta contempsisset, visus esset non habuisse in eum fidem. Ergo Fides obtemperans & operans, illum à morbo liberavit

Similiter humanum genus peccato primi parentis vulneratum, nec Moyse per multiplicia Legis præcepta, nec cæteri Dei Prophetæ curare potuerunt. Prædicatus est Salvator mundi, & quotquot in illum credidère, per fidem salvi facti sunt: per fidem, inquam, quæ per charitatem operatur. Quo autem sensu dicatur homo iusti-

ficari sine operibus Legis, vide in Tractatu de Gratia pag. 434. & seq.

Dices 2. Gal. 4. vers. 4. *Misit Deus Filium suum . . . . . ut eos qui sub Lege erant redimeret.* Et cap. 5. vers. 18. *Non estis sub Lege* Rom. 6. vers. 14. *Non enim estis sub Lege, sed sub gratia* 1. Tim. 1. vers. 9. *Lex iusto non est posita, sed iniustis & non subditis.* Ergo Christiani non tenentur Legibus.

Nego consequentiam; nam ex sancto Augu-  
stino Tractatu tertio in Joannem; ille duntaxat  
est sub Lege, cujus in malum propensi duritia re-  
tunditur Lege minitante, quæ tanquam grave  
pondus cervicibus illius imponitur. Qui autem  
amore ducitur, & justitiam diligit, is in Lege,  
non sub Lege Domini est, juxta illud Psalm. 1.  
*In Lege Domini voluntas ejus.* Verba sunt S. Do-  
ctoris, qui *Legem implet, non est sub Lege, sed cum Le-  
ge, qui autem sub Lege est, non sublevatur, sed premi-  
tur Lege.* Omnes itaque homines sub Lege constitutos  
reos facit Lex & ad hoc illis super caput est, ut ostendat  
peccata, non tollat.

Enimverò in Lege duo sunt spectanda. Pri-  
mum, est ordinatio in bonum. Secundum, vis  
obligandi sub peccato & pœna. Primum repu-  
gnat voluntati malæ, contemneretque, nisi secun-  
dum occurreret veluti quidam obex, qui malum  
opus coercet. Sed, inquit S. Aug. Libro de Spi-  
ritu & Littera cap. 4. *ubi sanctus non adjuvat Spiritus,  
inspirans pro concupiscentia mala concupiscentiam bonam,  
hoc est charitatem infundens in cordibus nostris, profectò  
illa Lex, quamvis bona, auget desiderium malum; sicut  
aquæ impetus vehementior fit obice opposito, cujus molem  
cum evicerit, majore cumulo præcipitatus violentius per  
prona*

*prona provolvitur : nescio quo enim modo hoc ipsum, quod concupiscitur, sit jucundius, dum vetatur. At justus, cujus voluntas est in Lege Domini, hoc est, per gratiam in bonum ordinata, etiamsi Lex vim habeat illum obligandi, non attendit tamen ad illam obligationem, nec discernit, an bonum à Spiritu Sancto inspiratum, sit ex præcepto, vel ex consilio amplectendum, sicut nec esuriens, an cibus sit ex præcepto sumendus. Quid enim concupiscit justus, nisi justitiam? Utinam, inquit, dirigantur viæ meæ ad custodiendas justificationes tuas! . . . .*

*Concupivit anima mea desiderare justificationes tuas in omni tempore. Psalm. 118. In eo quodd dicit se concupiscere, confitetur se infirmum, quemadmodum pullus, qui volare appetit nec dum potest. Quis autem dixerit, naturam ei addere pondus, dum plumas tribuit? Revera plumæ in se spectatæ pondus sunt (plus enim ponderat avis mortua cum plumis, quàm sine plumis) sed vivam levio-rem faciunt, ac sublevant. Ita carnales, utpote peccatis mortui, Lege Christi premuntur, justi verò levantur. Unde sanctus Augustinus in Psal. 59. ait: *Illa sarcina peccati pondus habet, Christi sarcina pennas habet. Nam & avi, si pennas detrabas quasi onus tollis, & quò magis onus abstulisti, eò magis in terra remanebit, quam exonerare voluisti, jacet, non volat, quia tulisti onus; redeat onus, & volat. Talis est Christi sarcina, portent illam homines, non sint pigri, non attendantur illi, qui eam ferre nolunt, ferant illam qui volunt, & invenient quàm sit levis, quàm suavis, quàm jucunda, quàm rapiens in cælum, & à terra eripiens.**

Dices 3. scriptum est 2. Cor. 3. *Ubi Spiritus Domini, ibi libertas. Ergo.*

Distin-



Distinguo antec. Libertas à timore servili, & à jugo veteris Legis, Concedo : ab omni præcepto, Nego anteced. Apostolus enim Gal. 5. graviter monet, ne libertatem, quam habemus in Christo, deus in occasionem carnis. Et Rom. 6. *Sicut, inquit, exhibuistis membra vestra servire immunditiæ, & iniquitati ad iniquitatem; ita nunc exhibete membra vestra servire justitiæ in sanctificationem.*

Q. *Quotuplicis generis sunt præcepta Legis Evangelicæ?*

R. Triplicis, alia sunt Fidei, ut præceptum credendi mysterium Trinitatis; Incarnationis, &c. alia moralia, ut ea, quæ continentur in Decalogo, quæque Christus sua auctoritate confirmavit, & explicuit Matth. 5. Alia cæremonialia, quæ spectant usum Sacrificii & Sacramentum.

Dices: Fuerunt præcepta judicialia in veteri Lege, quibus politicè administrabatur Judæorum societas: ergo similiter in Lege Evangelica ejusmodi præcepta institui debuerunt.

Nego consequentiam 1. quia cum Deus Judæorum Rempublicam prius ita instituisset, ut non haberent alium præter se Regem, ut constat ex Libro 1. Regum cap. 8. vers. 7. Moyse sigillatim præscripsit quidquid pertineret ad regimen civile & politicum. At Christus sibi temporale regnum non assumpsit; ait enim Joan. 10. *Regnum meum non est de hoc mundo.* Quamobrem Principibus temporalibus liberum reliquit, statuere ea, quæ viderentur aptiora ad publicam tranquillitatem, quæ est finis temporalis eorum regiminis, modò tamen ea non pugnarent contra Leges Fidei & morum, quas sanxit. 2. quia Lex vetus imposita

posita est soli familiæ Jacob , quæ ut unius moris erat, & sat angustis terminis conclusa, eadem spiritali disciplina facile contineri potuit. Contrà verò Lex Evangelica sese extendit ad omnes nationes, quarum consuetudines, mores & ingenia planè sunt diversa, unde eas quoque diversis institutionibus regi oportuit. Quare Christus pro sua infinita sapientiâ, non unum Pastorem, sed plures, sub uno tamen supremo, scilicet Romano Pontifice, ut unitas servaretur, fidelibus Christianis præfecit, quorum singuli Provinciam sive Diœcesim sibi commissam spiritaliter administrarent, ordinarentque ad vitam æternam, prout moribus & ingenio indigenarum congruere videretur.

## §. III.

*Utrum Lex Evangelica sit aliena à veteri?*

R. **N**on est alia secundum substantiam; sed differt in accidentalibus, tanquam perfectum ab imperfecto, puer v. gr. à viro.

Ita S. Thomas qu. 7. art. 1. & seq.

Prima pars probatur 1. ex Scriptura, Matth. 5. *Non veni Legem solvere, sed adimplere.*

Probatur 2. ex Traditione. Eusebius Lib. 1. demonstrationis Evangelicæ c. 5. *Ne Testamentum novum aliud esse putemus, quàm antiquissimam illam Mosai-  
corum temporum Religione conjunctam vilem rationem, ut & vetus pariter, & idem novum possimus dicere.* S. August. Epist. 187. aliàs 57. c. 11. num. 34. *Sacramentum por-  
rò regenerationis nostræ, inquit, manifestum esse voluit ma-  
nifestatus Mediator. Erat autem antiquis justis aliquod oc-  
cultum, cum tamen & illi eadem fide salvi fierent, quæ fuerat  
suo*

*suo tempore revelanda ; non enim audemus Fideles temporis nostri præferre amicis Dei , per quos nobis ita prophetata sunt . . . . . habentes autem , inquit Apostolus , eundem Spiritum Fidei , propter quod scriptum est : Credidi propter quod locutus sum , & nos credimus , propter quod & loquimur : Non diceret , eundem , nisi & illorum idem ipse esset Spiritus Fidei . Sicut autem illi , quando idem Sacramentum occultum erat , credebant Christi Incarnationem futuram , sic & nos credimus factam . Et à nobis autem , & ab illis futurus expectatur ad iudicium ejus adventus .*

S. Leo Serm. 4. in Nativitate Domini sic etiam loquitur : *Gratia Dei , qua semper est universitas Sanctorum justificata , aucta est Christo nascente , non cæpta , & hoc magnum pietatis Sacramentum tam potens etiam in suis significationibus fuit , ut non minùs adepti sint , qui in illud credidère promissum , quàm qui suscepère donatum .*

Probatur 3. ratione ; quia illæ Leges non sunt diversæ quantum ad essentiam & substantiam , quæ habent eundem Legislatorem , eundem finem , & eadem præcepta : atqui Lex nova & vetus habent 1. eundem Legislatorem , Hebr. 1. *Multifariam multisque modis olim Deus loquens Patribus in Prophetis , novissimè diebus istis locutus est nobis in Filio .* 2. Eundem finem : tum proximum , nempe verum Dei cultum , mentis integritatem , & cordis puritatem : tum remotum , scilicet vitam æternam . 3. Eadem præcepta , scilicet fidei & charitatis : namque Matth. 22. vers. 4. *in his duobus mandatis universa Lex pendet , & Prophetæ .*

Secunda pars probatur ex Scriptura , Gal. 3. *priùs autem , quàm veniret Fides , sub Lege custodiebamur conclusi in eam Fidem , quæ revelanda erat . Itaque Lex Pædagogus noster fuit in Christo . Et c. 4. Cùm essemus parvu-*

*parvuli, sub elementis mundi eramus servientes.* Sensus est interprete sancto Thoma qu. 107. art. 1. & aliis, Lex vetus erat veluti rudior disciplina, puerorum imbecillitati accommodata, qui cum non alliciantur virtutis honestate, neque intelligant nobiles fructus, qui ex illa percipiuntur, urgendi sunt pœnarum timore, & infantilibus quibusdam promissis; Lex quippe eadem mysteria, quæ nunc explicitè credimus, obscurè & sub figurarum velamine commendabat, & carnales Judæos, tum pœnarum temporalium metu, tum terrenæ felicitatis pollicitatione impellebat ad ea, quæ virtutis sunt. At ubi venit plenitudo temporis, & splendidior effulsit lux Evangelicæ prædicationis, *jam non sumus sub pædago*, ait Apostolus Gal. 3. dispelluntur veteres umbræ, spernuntur mundi terricula & promissa, unus animorum ardor, rapere regnum cœlorum: unus timor, à tanta spe excidere.

Dices: Illæ Leges sunt planè diversæ, quæ se invicem excludunt: atqui ita se habent Lex vetus, & Lex Evangelica, *evacuati estis à Christo, qui in Lege justificamini*, inquit Apostolus Gal. 5. *translato enim Sacerdotio, necesse est, ut & Legis translatio fiat*, Hebr. 7. Ergo Lex vetus, & Lex Evangelica sunt planè diversæ.

Distinguo majorem: Si se excludant quoad substantialia, Concedo: quoad accidentalia, Nego majorem.

Distinguo similiter min. Lex Evangelica excludit veterem quoad cæremonias, & observantias legales, Concedo: quoad præcepta Fidei & morum, Nego min. Enimverò legalia illa præfigurabant, & promittebant, quæ implenda erant



in Christo: ergo debuerunt definere eò ipso, quò promissum fuit adimpletum, quemadmodum, inquit S. Thomas q. 107. art. 2. ad 1. soluta pecunia deletur chirographum promissorium: sed sicut donum virtute continetur in promisso & arbor in semine; ita ex eodem Angelico Doctore ibid. art. 2. Lex Evangelica continetur in veteri.

Instabis: Atqui Lex Evangelica excludit veterem, quoad essentialia: Ergo nulla solutio.

Probatur subsumptum. Essentiale est Legi veteri præfigurare & promittere Christum, ac Religionis Christianæ mysteria: atqui Lex Evangelica excludit illas figuras & promissiones: Ergo.

Nego subsumptum, & ejus confirmationis distinguo maj. Est essentialiale Legi veteri præfigurare, & promittere Christum, si Lex spectetur, ut vetus & præcedens adventum Christi, Concedo: si spectetur secundum se præcisè, Nego majorem; quemadmodum enim duo in homine spectari possunt: primum, quòd homo sit: secundum, quòd sit puer aut adultus: primum ad ejus essentiam pertinet, secundum ad circumstantias temporis, quæ se invicem excludunt; ætas quippe adulta excludit ætatem puerilem, sed in utraque manet idem homo secundum essentiam & substantiam; similiter sunt duæ Legis ætates, alia præcedit adventum Christi, alia subsequitur: in priori Lex per legalia præfiguratur, & promittit Christum futurum: in posteriori verò prædicat Christum venisse. Porro ejusmodi circumstantiæ temporis futuri & præteriti sese expellunt, falsumque nunc esset, annuntiare Christum venturum, ac proinde illicitum usurpare cæremonias Legis veteris, quæ sunt promissiones rei futuræ; sed

sed ipsa Lex secundum substantiam spectata manet eadem : Fides in Christum est eadem ; idem Deus colitur eadem fide , eadem spe , eadem charitate : iisdem virtutibus , eadem præceptorum moralium observatione.

Urgebis : atqui Lex Evangelica sustulit , vel correxit moralia Legis veteris præcepta , utpote vero Dei cultui contraria : Ergo.

Probatur antec. Christus i. sustulit polygamiam , repudium uxoris , iuramentum , usuras , legem talionis , quæ permittebat appetitum vindictæ : 2. correxit quod dictum fuerat antiquis , non occides , non mœchaberis , diliges proximum tuum , & odio habebis inimicum tuum , docuitque , omnem hominem etiam infensissimum esse proximum nostrum , inordinatos iræ , concupiscentiæ , & odii motus esse coercendos , uti legitimo Dei cultui contrarios ; Ergo.

Nego subsumptum , & ad ejus confirmationem

R. 1. Christus non ipsam Legem , sed falsas Scribarum & Phariseorum interpretationes ac traditiones circa iuramentum & dilectionem proximi sustulit. Illi interpretabantur tradebantque i. tum solum assumi nomen Dei in vanum cum pejeratur : Christus contra docet, omne iuramentum esse vanum , nisi fuerit necessarium , quemadmodum probamus Tractatu de Religione , ubi de Juramento. 2. Inimicum non esse pro proximo habendum ; ac proinde à benevolentia nostra excludendum , quod est contra expressum Legis decretum , Lev. 19. v. 18. *Non quæras ultionem , nec memor eris injuriæ civium tuorum.* Et Exodi 23. v. 4. *Si occurreris bovi inimici tui , aut asino erranti , reduc ad eum.* Quid verò de usuris Lex statuerit , expen-

D. Habert Theolog. Tom. III.

li

dimus

dimus Tractatu de Justitia & Jure, ubi de u-  
fura.

R. 2. Quid sentiendum sit de Polygamia & re-  
pudio uxoris, quæ apud Judæos erant in usu, an  
scilicet Deus ea toleraverit duntaxat, an revera  
permiserit, supra solvimus ubi de dispensatione.  
Sed siue toleraverit, siue ex utili dispensatione  
indulserit, satis est ad præsentem difficultatem, si  
dicatur nonnulla tolerari in pueris, aut etiam per-  
mitti, quæ majoribus prohibentur; ex quo se-  
quitur, Legem Evangelicam differre accidentaliter à veteri, sicut perfectum ab imperfecto: Ju-  
dæis v. g. tanquam pueris præscripta est Lex ta-  
lionis, *oculum pro oculo, dentem pro dente*, quæ est  
primus justitiæ gradus, & pacis inchoatio, scili-  
cet ut injuriam acceptam vindicta non transeat;  
vix enim invenitur, qui ira turbatus ob acceptum  
pugnum, vel auditum verbum convitii, plures  
pugnos, aut graviora convitia rependere non ap-  
petat: immoderatum autem illum animi impetum  
Lex ita refrænât, ut quod superest inordinatum  
in appetitu vindictæ non approbet, sed illud Chri-  
sto, ad quem deducit, eradicandum dimittat.  
Quare

R. Christus nulla Legis veteris præcepta mo-  
ralia abrogavit, quin illa auctoritate sua confir-  
mavit, sed sustulit duntaxat, quæ Lex illa vel to-  
lerabat, vel ex prudenti dispensatione indulge-  
bat; ut polygamiam, repudium. Responsio pa-  
tet ex dictis.

Q. *Utrum Christus veteri Legi nova præcepta addi-  
derit?*

R. I. Loco Legalium, quæ abrogavit tanquam  
umbras futurorum, instituit nova præcepta cære-  
monia-

monialia ; præcepit enim novum offerri Sacrificium, & alia celebrari Sacramenta.

R. 2. Addidit nova fidei præcepta ; namque explicita fides mysterii Trinitatis, quæ est in præcepto apud Christianos, Judæis præcepta non fuit ; cum illud mysterium in Lege veteri non fuerit nisi implicitè revelatum.

R. 3. Christus nulla præcepta moralia addidit, sed ea accuratiùs, quàm Moyfes explicuit, confirmavitque. Ita S. Thomas q. 108. art. 2. ad 1. in quo sic habet : *Ea, quæ sunt fidei, sunt supra rationem humanam : unde in ea non possumus pervenire nisi per gratiam ; & ideo, abundantiori gratia superveniente, oportuit credenda explicari. Sed ad opera virtutum dirigimur per rationem naturalem, quæ est regula quædam operationis humanæ : & ideo in his non oportuit aliqua præcepta dari ultra moralia Legis præcepta, quæ sunt de dictamine rationis.*

Dixi 1. Christum accuratiùs, quàm Moyfen, explicuisse moralia præcepta. Cum enim Judæi veluti pueri spiritualia non caperent, nec cordis intentiones discutere & explorare valerent, Legem naturalem ipsis exposuit præsertim in ordine ad actus exteriores, ut qui sensibus percipiantur. At Christus, sicut per gratiam suam lumen naturale sordibus peccati obscuratam pristino splendori restituit ; ita per cœlestem suam doctrinam plenè ac dilucidè explanavit quidquid recta ratio præscribit, non solum circa opera exteriora, sed etiam circa cogitationes mentis, & affectiones cordis.

Dixi 2. Christum præcepta moralia sua auctoritate confirmasse ; egit enim Doctorem simul & Legislatorem, ut supra diximus, & patet ex ser-



mone, quem habuit in monte, in quo sic loquitur: *Qui solverit unum de mandatis istis minimis, & docuerit sic homines, minimus vocabitur in regno cælorum; dico enim vobis, quia nisi abundaverit iustitia vestra plusquam Scribarum & Phariseorum, non intrabitis in regnum cælorum.* Unde post absolutum sermonem cap. 7. subdit Evang. *erat docens eos, sicut potestatem habens.*

Ergo Lex naturalis per Christum explicata & confirmata, est verè Divina & Evangelica. Hinc 1. Joan. 2. v. 7. & 8. dicitur *mandatum vetus simul & novum, non mandatum novum scribo vobis, inquit, sed mandatum vetus, quod habuistis ab initio . . . . . Iterum mandatum novum scribo vobis, quod verum est & in ipso & in vobis; quia tenebræ transferunt, & verum lumen jam lucet.*

Ergo qui post promulgatum Evangelium in Legem naturalem peccat, is non solvit tantum jura naturæ, sed etiam Christi & gratiæ ejus, ac proinde majora meretur supplicia, juxta illud Apostoli Hebr. 10. *irritam quis faciens Legem Moysi, sine ulla miseratione duobus vel tribus testibus moritur: quanto magis putatis deteriora mereri supplicia, qui Filium Dei conculcaverit . . . . . & Spiritui gratiæ contumeliam fecerit?*

Ergo Ecclesia non minùs est Judex controversiarum, quæ spectant Jus naturale, quàm earum, quæ ad fidem pertinent, ipsiusque est definire, quid Fidei & Legi naturali repugnet, aut consentaneum sit: quia utrumque nititur verbo Dei: atqui ad Ecclesiam pertinet explicare verbum Dei, statuere, quis sit verus illius sensus, ut fusè demonstravimus in Prolegomenis.

Confirmatur ex Traditione & constanti Ecclesiæ praxi; hætenus enim controversias circa Legem

gem naturalem , putà , an simplex fornicatio sit contra Jus naturale , aut positivum duntaxat , an usura sit licita , an matrimonium dissolvatur per adulterium , an secundæ & tertiæ nuptiæ sint prohibitæ , suo judicio terminavit.

Dixi , quæ spectant Jus naturale ; quæ enim sunt Juris positivi civilis , cùm verbo Dei non nitantur ; sed sola voluntate Principis politici , ad eum , vel ad ejus Ministros recurrendum est , quando in ejusmodi oritur difficultas & controversia , ac eorum judicio prorsus standum.

Ergo hallucinantur nonnulli Moderni , qui solam rationem statuunt Judicem controversiarum , an hæc aut illa verba Christi præceptum vel consilium duntaxat contineant , adeò , ut in eorum sententia illud solum in Scripturis habeat vim præcepti , quod mens humana judicat repugnare naturæ rationali , si vel fiat , ut mendacium ; vel omittatur , ut eleemosyna in gravi necessitate proximi ; cætera verò etsi perfectiora , habenda sint , ut mera consilia. Sed non advertunt illi , quod omnes experiuntur , inordinatos concupiscentiæ motus objecta exhibere aliter quàm sunt , timorem displicendi , aut studium placendi , ita pervertere judicium , ut quæ gravissima sunt in Legge naturali & Evangelica , v. g. fugere concupiscentiam carnis , oculorum & superbiam vitæ , quibus Fideles constituuntur inimici Dei , Jac. 4. videantur mera consilia. Quamobrem in iis , sicut in cæteris , consulenda est Ecclesiæ traditio & interpretanda Scriptura secundum sanctorum Patrum sensum , an scilicet præcipiat vel consulat ; alioquin Evangelium Dei faciliè evaderet Evangelium

lium hominum, ut loquitur sanctus Hieronymus alibi laudatus.

His ita explicatis, superest ut solvamus, quæ opponuntur contra tertiam nostram responsionem, ex quæ præcedentes conclusiones elicuimus. Itaque,

Dices 1. Christus ea dedit mandata, quæ si servaverimus, diligemur à Patre, & certò consequemur vitam æternam: atqui per solam observationem Legis naturalis non meremur diligì à Patre, nec consequimur vitam æternam: Ergo Christus addidit Legi naturali nova præcepta moralia.

Minor probatur. Naturalia sunt singula præcepta Legis naturalis: atqui per præcepta naturalia non possumus assequi finem supernaturalem, nempe vitam æternam, quæ nobis promittitur; nulla enim habent cum illa proportionem. Ergo.

Distinguo min. Per solam observationem Legis naturalis, quæ sit sine fide & gratia, Concedo; quæ sit ex fide & ex gratia, Nego minorem.

Distinguo similiter confirmationis minorem, per præcepta naturalia non possumus assequi finem supernaturalem, si ad ea moveamur lumine & motivo naturali, Concedo: si ad ea movemur lumine fidei & instinctu Spiritus Sancti, Nego minorem; namque Beati in cœlo fruuntur Deo per amorem, qui pertinet ad Legem naturalem.

Dices 2. Christus in Lege Evangelica plura præcepta moralia sanxit, quæ non pertinent ad Legem naturalem: ergo præcepta moralia reverà addidit Legi naturali.

Antecedens probatur nonnullis exemplis, 1. Lex naturalis non prohibet omnem iram: dicitur enim

enim Psalmo 4. *irascimini & nolite peccare.* Neque omnem litem; alioquin Judices in Republica non deberent constitui: neque curam & sollicitudinem rei familiaris: neque iudicium ferre de iis, qui malè agunt: neque laudem intendere, quæ debetur virtuti: neque fontes punire. Sed Christus illa omnia prohibet; ait enim Matth. 5. v. 22. *qui irascitur fratri suo, reus erit iudicio; v. 40. & ei qui vult tecum iudicio contendere & tunicam tuam tollere, dimitte ei & pallium.* Matth. 6. v. 30. *Nolite ergo solliciti esse dicentes, quid manducabimus?* Matth. 7. v. 1. *Notite judicare, ut non iudicemini.* Matth. 6. v. 1. *Attendite ne iustitiam vestram faciatis coram hominibus, ut videamini ab eis, alioquin mercedem non habebitis apud Patrem vestrum, qui in cælis est.* Luc. 6. v. 37. *Nolite condemnare, & non condemnabimini.* 2. Lex naturalis non præcipit mutuo dare: benedicere maledicentibus nobis: præbere maxillam alteram percutientibus dexteram: omnes nobis præferre & novissimum locum eligere: seipsum & parentes odisse. Christus verò ista omnia præcepit, vultque ut plura faciamus, quàm Ethnici & Publicani, tamen omnibus Legis naturæ præceptis obligantur: Ergo Lex Evangelica plura præcepta moralia præscribit, quàm Lex naturalis.

Nego anteced. Et confirmationis ejus consequentiam, & dico, Christum in allatis exemplis nihil de novo præscribere, sed accuratius duntaxat exponere Legem naturalem, quam Pharisei suis traditionibus, Ethnici & Publicani pravis institutionibus & consuetudinibus corrumpebant, eamque restituere pristinae suæ integritati, ut expendenti allatos textus patebit.



Ac i. quidem irasci in fratrem repugnat Legi naturali, ira enim est appetitus vindictæ, seu voluntas lædendi eum, qui prior læsit, eique reddendi malum pro malo; malè autem velle & malè facere Lex naturalis ex æquo prohibet, *læsi vicem referre prohibemur*, inquit Tertullianus Apol. 7. *ne de facto pares simus*. Deinde quilibet sive fidelis, sive infidelis, Lege naturali tenetur diligere proximum sicut seipsum: atqui nemo, ut multum sui amans, sibi ipsi irascitur; furentis enim est ac rabidi, velle discerpere, & dilaniare proprium membrum, si quando molestum sit, & dolorem inurat: quin sensatus tenerius illud diligit, impensius fovet, iram verò totam & odium in ægritudinem convertit, ut illam expellat, dolorem extinguat, & membrum sanum expeditumque possideat.

Similiter recta ratio, secundum S. Thomam, in inimico etiam infensissimo duo distinguit, scilicet naturam & malitiam; per naturam homo est & proximus noster, membrum nostræ societatis, & quod majus est, membrum corporis Christi, in quo omnes unum sumus: per malitiam inimicus est molestus, ac noxius. Vide nunc quid Lex naturalis præscribat. An non ut irascamur malitiæ, hominis verò tanto morbo laborantis misereamur, juxta illud, *irascimini, & nolite peccare*; hoc est, malitiam compescite monitis, exhortationibus, & si necesse est, persequimini, & perimite mordacibus remediis: hominem verò diligite sicut vosmetipsos, tanquam membrum ejusdem vobiscum corporis, salutaria adhibete remedia, quibus à lethali morbo, quo laborat, liberum reddidisse vobis gratulemini.

Atque

Atque ex hac explicatione facile intelligitur, ad Legem naturalem pertinere Evangelicum illud præceptum, *si quis te percusserit in dexteram maxillam tuam, præbe illi & alteram*; ordo enim charitatis postulat, ut salutem temporalem posthabeamus æternæ proximi salutis, si in extremo damnationis periculo versetur, & jam percussi à phrenetico, præbeamus nos ad plura perpetienda, si necesse sit, ne det se præcipitem.

Dico, *si necesse sit*; quia, ut notat S. Augustinus, Lib. 1. de Serm. Domini in monte c. 36. præceptum illud, & alia similia, magis ad præparationem cordis, quàm ad ostensionem operis accipienda sunt, ita ut semper parati simus & dexteram præbere, & pallium dimittere, ubi necessitas charitatis exegerit; nam *ipse Dominus*, inquit S. Doctor, *qui utique præcepta, quæ docuit, primus implevit; percutienti se in maxillam ministro Sacerdotis non præbuit alteram . . . non tamen ideo paratus corde non fuit, non solum in alteram maxillam cædi pro salute omnium, sed etiam toto corpore crucifigi.* Hanc animi præparationem erga proximum expressius commendat Joan. 15. *Hoc est præceptum meum, inquit, ut diligatis invicem, sicut dilexi vos.* Non ait, sicut Scribæ & Pharisei hætenus interpretati sunt, nec sicut homines carnales se diligunt; quia malè se diligunt à summo bono averfi, sed, *sicut dilexi vos*, non tam novi mandati formam præscribens, quàm vetus à natura inditum, & inordinatis affectibus obscuratum restituens.

2. Matth. 7. non omnis cura rei familiaris damnatur, sed anxia & superflua sollicitudo, præfertim ea, quæ ex cupiditate & ex fiducia in propriis viribus procedit, cùm solus Deus det incre-

mentum, 1. Cor. 3. & nisi ædificaverit domum, in vanum laborent, qui ædificant eam. Psal 126. Sed Christus non vult, nos omnem curam ita in Deum projicere, ut desides & otiosi remaneamus; ait enim Apostolus 2. Thessal. 3. *Si quis non vult operari, nec manducet.*

3. Christus laudato cap. 7. Matth. non aliud præscribit, quàm Lex naturalis, scilicet neminem temerè, & ex incerta vulgi fama esse judicandum aut condemnandum, nam verbis immediatè sequentibus, ait, *nolite dare sanctum canibus*; hoc est, nolite res sacras impuris & manifestè flagitiosis hominibus communicare; quin illis irrum-pentibus strenuè ac fortiter obsistite, judicantes eos gratia indignos.

4. Matth. 5. Lex Evangelica non absolute vetat provocare Judicem, sed in iis duntaxat casibus, in quibus Lex naturalis, idipsum prohibet. 1. Quando nulla est provocandi necessitas, scilicet cum rejecta amica compositione, impotenti motu iræ & desiderio vexandi proximum, ad Judicem provocatur veluti ad ministrum & instrumentum suæ iniquitatis. Lites enim non sunt per se expetendæ, nec juramentum; sed adhibendæ ut remedium aliquando necessarium contra injustitiam debitoris, aut iniqui aggressoris, quemadmodum Apostolus provocavit coactus ad tribunal Cæsaris, quamvis Ethnici, Act. 25. 2. Cum proximus est in ea necessitate constitutus, in qua, vel gratis vel mutuò dare deberes; Jure quippe naturali tenemur subsidia necessaria conferre proximo indigenti; etiamsi inimicus sit, & dictis, vel factis nos læserit. Quare contra Legem naturalem & Evangelicam peccant, qui, cum possent, nedum

nedum fratri indigenti commodent, quin commodatum prius, ob simultatem dein exortam, violenter repetunt, proptereaque audire merentur illud Matth. 18. *Serve nequam . . . . . nonne ergo oportuit & te misereri conservi tui?* 3. Lis per accidens iis est illicita, quibus existit occasio proxima scandali & ruinæ spiritualis, ut accidit plerisque, qui ex impotentia & animi imbecillitate litigare nequeunt absque charitatis dispendio, adeo ut litigare sit illis idem ac inimicitias gerere, necesséque sit illos à Sacramentis remove, donec non solum controversia fuerit finita; sed maxime donec prævaleat charitas supra cupiditatem, qua hætenus commoda temporalia Deo prætulerunt, ad quod non satis attendunt animarum Medici. Quid enim prodest homini quod reconcilietur proximo, si corde permaneat aversus à Deo? Tamdiu autem aversus est à Deo, quamdiu in rebus creatis finem ultimum ponit. Porro in iis ultimum finem ponit, qui paratus est eadem inimicitias repetere, si ipsum similiter vexari contingeret.

Cum ergo Lege naturali teneamur Deum super omnia diligere, & rebus omnibus, etiam vita privari, potius quam ab ipso per peccatum separari, Christus in hoc præcepto: *qui vult tecum iudicio contendere, & tunicam tuam tollere, dimitte ei & pallium, & his similibus: quicumque te angariaverit mille passus, vade cum illo alia duo. Qui non odit patrem suum, & matrem, & uxorem . . . . . adhuc autem & animam suam, non potest meus esse discipulus.* Luc. 14. non aliud quam recta ratio à nobis exigit, nempe ut parati simus tum omnia dimittere, cum ea sine peccato conservare non possumus.

Nec



Nec indignari debent parentes, quòd filii eos odisse jubentur, cùm filii simili odio in seipfos flagrare debeant, *qui non odit Patrem suum & matrem*, inquit, *ad hoc autem & animam suam*; est enim perversus amor, quem Lex Evangelica corrigit, & rectum odium, quod ipsa commendat. Oderis sive in te, sive in parentibus concupiscentiam carnis, concupiscentiam oculorum, & superbiam vitæ, & rectum erit odium tuum; quia te & parentes in vitam æternam diliges. Cùm autem diligis iniquitatem, sive in te, sive in parentibus, & sæcularibus desideriis obsecundas, tum perversus & noxius est ille amor; quia avertit à Deo, & sic diligentes in æternum perdet.

5. Honestum quidem est operari, quæ sunt laude digna, ut opera virtutis; sed in operibus virtutis intendere hominum gloriam & laudes, turpe esse docent non solum Theologi, ut sanctus Thomas 2. 2. quæst. 132. sed etiam Philosophi Gentiles: *Magnanimo*, inquit Aristoteles, 4. Ethic. cap. 3. *cura non est, ut laudetur, magis curat veritatem, quàm opinionem*. Quin ipse Tullius; quamvis inanis gloriæ vitio laborasse videatur, sic tamen scribit Lib. 1. de Offic. *Cavenda est gloriæ cupiditas*. Denique inanis gloria, quodam naturali veluti instinctu est omnibus exosa.

6. Peccat in Legem naturalem, qui proximum qua in re opus ei fuerit, non adjuvat; cùm possit, sive manum & operam præbendo, sive commodando: & mutuam pecuniam credendo: sive benignè erogando, si ille non habeat unde reddat; hæc est enim Lex, quam nemo ignorare sinitur, *quæcumque vultis, ut faciant vobis homines, & vos eadem facite illis*.

7. Benedicere, aut maledicere maledicentibus nobis, idem est ex S. Thoma in cap. 5. Matth. ac bona, vel mala optare: atqui Lex naturalis primum jubet, alterum vetat; quia ex dictis debemus esse benevoli erga omnes. Multa quidem reperiuntur in veteri & novo Testamento, quæ videantur contraria huic præcepto, ut Psal. 68. *Fiat mensa eorum in laqueum.* Et Luc. 10. *Va tibi Capharnaum.* Sed hæc facile solvuntur, inquit sanctus Augustinus, Lib. 1. de Serm. Domini in monte cap. 42. *quia, & Propheta per imprecationem quod esset futurum cecinit, non optantis voto, sed spiritu prævidentis; ita & Dominus, ita & Apostolus.*

8. Ex communi hominum sensu & Lege naturaliter indita Christus dixit Luc. 14. *Recumbe in novissimo loco.* Et Apostolus Philipp. 2. *In humilitate Superiores invicem arbitrantes.* Quotquot enim callent civilem hominum agendi rationem, quam modestè de se loquuntur, verbis & factis testantur se alios sibi antepone, iisque honoris causa primum locum deferunt, alioquin inurbani, agrestes & ridiculi haberentur. Quin ipsimet subditi vitio vertunt, quòd Domini plus de se quàm de aliis existiment. Verùm quam exterius præferunt modestiam amatores mundi, eam viri probe intus in corde gerunt, cæterosque (servata dignitate & gradu honoris, quem in Republica obtinent) sibi sincerè anteponunt; quia ut ex professo docet S. Thomas 2. 2. quæst. 161. art. 3. recta ratio postulat, ut imaginem Dei in quolibet homine, etiam subdito & inimico, revereamur. Hæc autem reverentia, seu observantia, non est sine aliqua animi inclinatione ac demissione.

Dixi, *servata dignitate & gradu; Cavendum quippe*

quippe est Præposito, ut monet sanctus Augustinus in regula num. 10. *Ne apud eos, quos oportet esse subiectos, dum nimium servatur humilitas, regendi frangatur auctoritas.* Quare num. 11. subdit idem S. Doctor, *honore coram vobis prælatus sit vobis, timore coram Deo substratus sit pedibus vestris.*

Ergo Christus nihil circa mores ordinavit, quod non præscribat ratio, quam si infideles ipsi consulere velint, prævia omni opinione seposita, mirabuntur quantum luminis Evangelium attulerit ad perfectam Legis naturalis intelligentiam, cogenturque fateri eum, qui vitam suam ad normam Legis Evangelicæ exegerit, virum fore sapientissimum, & cumulatè perfectum.

#### §. IV.

*Utrum Lex Evangelica sit veteri gravior?*

Priusquam huic quæstioni fiat satis,

Nota 1. Legem Evangelicam ex dictis dupliciter esse spectandam. 1. Secundum quod in ea præcipuum est, scil. secundum gratiam & Spiritum quem confert, & à quo dicitur Rom. 8. *Lex Spiritus vitæ.* 2. Juxta quod in ea est secundarium, nempe doctrinam & litteram.

Nota 2. in doctrina & littera præcipi, vel prohiberi non solum actus exteriores, putà eleemosynam, debiti solutionem, homicidium, &c. sed præcipuè actus interiores, v. gr. dilectionem proximi etiam inimici; iræ, & cujuslibet inordinati affectus compressionem. His prænotatis, ad quæstionem

R. 1. Si ratio præcisè habeatur actuum exteriorum, certum est Legem veterem longè esse  
gravio-

graviolem Lege Evangelica; de ea quippe sic loquitur Princeps Apostolorum Act. 15. vers. 10. *Nunc ergo quid tentatis Deum, imponere jugum super cervices discipulorum, quod neque patres nostri, neque nos portare potuimus? Et ratio est, quia, inquit S. Thomas q. 170 art. 4. ad plures actus exteriores obligabat Lex vetus in multiplicibus caeremoniis, quam Lex nova, quæ præter præcepta Legis naturæ paucissima superaddidit, . . . . . licet aliqua sint postmodum superaddita ex institutione sanctorum Patrum, in quibus etiam Augustinus dicit (nempe Ep. 55. aliàs 119. cap. 19.) esse moderationem attendendam . . . . . dicit enim de quibusdam, quod ipsam Religionem nostram, quam in manifestissimis, & paucissimis celebrationum Sacramentis Dei voluit misericordia esse liberam, servilibus premunt oneribus: adeo ut tolerabilior sit conditio Judæorum, qui legalibus Sacramentis, non humanis præsumptionibus subji-ciuntur.*

Dices: Præceptum Confessionis Sacramentalis, & prohibitio polygamiae, ac libelli repudii in Lege Evangelica, sunt onera adeò gravia, ut propterea multi infideles à nostra Religione deterreantur, quin & Apostoli perculsi arctissimo matrimonii vinculo per Christum invec-to, dixerint, *si ita est causa hominis cum uxore, non expedit nubere.* Ergo Lex Evangelica respectu exteriorum operum, est gravior veteri.

Distinguo consequens; Est gravior secundum quid, Transeat: est absolute & simpliciter gravior, Nego consequens; Pondus enim Legis non expenditur ex uno aut altero præcepto, sed ex tota præceptorum collectione. Porro sicut ingens pælearum acervus plus habet ponderis, quam parum ferri, licet ferrum ex natura sua sit pælea gravior:



gravius : ita Lex vetus ob sexcenta ferè præcepta , quæ in ea numerantur , simpliciter est gravior Lege Evangelica , quæ paucissima continet præcepta , etsi unum aut alterum ex iis fortè sit ponderosius. Deinde Confessio Sacramentalis pœnitentibus magnæ levationi est, nedum oneri, cùm ex ea solatium, consilium, & remedium capiant ; nec sensus pudoris , qui eam comitatur comparandus est dolori , quem inurebat circumcisio. Polygamia verò & libellus repudii erat indulgentia ad tempus infirmis concessa , ut suprà diximus.

R. 2. Doctrina & littera Legis Evangelicæ , quatenus se extendit ad actus interiores & exteriores , longè est gravior Lege veteri. Ita S. Thomas art. 4. mox laudato : *Alia autem, inquit, difficultas est circa opera virtutum in interioribus actibus . . . .* & quantum ad hoc præcepta novæ Legis sunt graviora præceptis veteris Legis ; quia in Lege nova prohibentur interiores motus animi , qui expressè in veteri Lege non prohibebantur in omnibus, etsi in aliquibus prohiberentur , in quibus tamen prohibendis pœna non apponebatur. Hoc autem est difficillimum non habenti virtutem. Enimverò, abnegare seipsum , Deum diligere usque ad contemptum sui , uti hoc mundo tanquam non utamur, motus iræ , superbiæ , voluptatis nos continuo laceffentes compescere, quemadmodum littera docet, non solum difficile est sine Spiritu vivificante , sed etiam impossibile. Unde Apostolus , 2. Cor. 3. scribere non dubitavit, *littera occidit* : quia multitudine præceptorum existit carnalibus occasio peccati, & mortis æternæ.

R. 3. Lex Evangelica si spectetur , ut spectari debet, secundum quod in ea est præcipuum & essentiale,

sentiale, hoc est, quatenus est Lex Spiritus & gratiæ, non est onus premens portantem se, quemadmodum Lex vetus; sed levans, reficiens ac delectans.

Probatur 1. ex Scriptura, Matth. 11. *Jugum meum suave est, & onus meum leve.* 1. Joan. 5. *Mandata ejus gravia non sunt.*

Probatur 2. ex Patribus. Sanctus Augustinus Serm. 64. aliàs 22. de verbis Apostoli: *Hæc sarcina*, inquit, *non est pondus onerati, sed alæ volantis; habent enim & aves pennarum suarum sarcinas, portant illas in terra, portantur ab illis in cælo.* Et sanctus Bernardus Ep. 341. sic scribit: *Leve Salvatoris onus, quò crescit ampliùs, eò portabilius est. Nonne & aviculas levat, non onerat pennarum numerositas ipsa? Tolle eas, & reliquum corpus fertur ad ima. Sic disciplina Christi, sic suave jugum, sic onus leve, quod quò magis deponimus, eo deprimimur ipsi; quia portat potiùs, quàm portatur.*

Probatur 3. ratione; Quia Lex Evangelica est ipsa bona voluntas, & justitiæ dilectio: atqui suave est & perjucundum, iis incumbere, in quæ pro-pendit animus; pœna verò inde avocari renitente voluntate: *Nulla modo onerosi sunt labores amantium*, inquit S. Augustinus Lib. de bono viduitatis cap. 21. *sed etiam ipsi delectant, sicut venantium, negotiantium, ludo aliquo sese oblectantium; nam in eo quod amatur, aut non laboratur, aut si laboratur, labor amatur.* Et capite 69. Lib. de Natura & Gratia expensens illud Joannis: *Mandata ejus gravia non sunt*, ait, *quomodo enim est grave, cum sit mandatum dilectionis? aut enim quisque non diligit, & ideo grave est: aut diligit, & grave esse non potest.*

Dices : Mens illa est admodum paucorum, Lex autem Evangelica data est omnibus, saltem Fidelibus : Ergo Lex Evangelica non est reponenda in justitiæ dilectione.

Distinguo maj. Est paucorum comparatè ad carnales, qui sunt in majori numero, Conc. Est paucorum, si absolutè spectentur. Nego maj. Sic dicimus pauca esse grana cum palea in area permixta, quæ tamen multa sunt in horreo collecta ; ut advertit sanctus Augustinus.

Distinguo etiam minor. Lex Evangelica data est omnibus, id est, lata pro omnibus, & promulgata singulis Fidelibus, Conc. Recepta est ab omnibus, Nego min. Scriptum quippe est de Spiritu Sancto, per quem charitas diffunditur in cordibus nostris, *quem mundus non potest accipere*, Jo. 14. Nomine autem *mundi*, significat mundi dilectores, concupiscentiis carnis & oculorum servientes, ut docet sanctus Augustinus, tract. 74. in Joann. Porro : *Si quis Spiritum Christi non habet, hic non est ejus*, Rom. 8. Ergo sicut erant in Lege veteri, qui pertinerent ad Evangelium, ut sancti Patriarchæ & Prophetæ, qui Deo serviebant in novitate spiritus, & non in vetustate litteræ : ita in Lege Evangelica, plures non re, sed nomine duntaxat Christiani, ut suprà dicebat sanctus Augustinus, pertinent ad Legem veterem, utpotè qui non receperint nisi litteram Legis Evangelicæ, quæ est ipsis gravissimum jugum.

Instabis, atqui plures ex iis, qui justitiam diligunt, graves patiuntur difficultates circa Legis Evangelicæ præcepta : ergo sub nullo respectu Lex Evangelica dici potest jugum suave & leve.

Distinguo anteced. Qui justitiam diligunt, sed nondum

nondum plenè & perfectè, patiuntur graves difficultates ex infirmitate carnis, quemadmodum palato malè affecto cibus delicatior fit pœna, Concedo: Qui iustitiam plenè diligunt, patiuntur graves difficultates, quæ oriuntur ex ipsa Divina Lege, quæ est verus animæ cibus & refectio, Nego anteced. Nam ex sancto Bernardo mox laudato, quò amplius crescit jugum Christi, eò portabilius est. Et sanctus Augustinus Deum alloquens, Lib. 10. Confess. cap. 28. ait: *Cum inbæsero tibi ex omni me, nusquam erit mihi dolor & labor . . . . . nunc autem, quoniam quem tu imples, sublevas eum, quoniam tui plenus non sum, oneri mihi sum.*

Itaque Lex Evangelica est quidem verissima iustitiæ dilectio, lex vitæ, vivificans & Spiritum conferens; sed non in una & eadem semper mensura recipitur. Aliis tribuit, ut bonum promptè & delectabiliter operentur: aliis ut, ubi difficultatem sentiunt, fidelissimis & perseverantissimis precibus, ut loquitur sanctus Augustinus, facilitatem à Domino impetrent, juxta illud Zach. 12. *Effundam super domum David, & super habitatores Jerusalem Spiritum gratiæ & precum, & aspicient ad me, quem confixerunt.* Spiritum precum in Lege Evangelica futurum prædicit, ut si desit illa gratiæ copia, quæ primis Ecclesiæ sæculis abundabat, & etiam nunc in quibusdam exuberat, saltem præsto sit orationis Spiritus, qui adjuvet infirmitatem nostram, ut impleamus, quod jubetur.

Porro, qui ab infirmitate liberari postulat, ut quod jubetur, impleat, procul dubio præcepta Legis amat; nisi enim multum amaret, gratiam pro iis implendis tam perseveranter non peteret, ut videre est in carnalibus, qui aliud à Deo non



petunt, quàm ut eos incolumes in hac vita conservet, & inita consilia ex sententia succedant, quia hoc unum desiderant. Jam verò quis non intelligat, eum, qui exauditus optatis potitur, quique contra carnis & mundi illecebras fortiter pugnat, etsi ejusmodi tentationes non amet, delectari tamen, quòd ab iis vinci non possit?

## §. V.

*Utrum in Lege Evangelica dentur consilia?*

R. **D**antur, ut patet ex variis Scripturæ locis, Isaïæ 9. Christus prædicatur futurus Consiliarius, Matth. 19. 21. *Si vis perfectus esse, vade, vende quæ habes, & da pauperibus.* Unde Christus necessitatem præcepti non imponit, sed liberæ electioni permittit, quod perfectius est, 1. Cor. 7. *De virginibus . . . præceptum Domini non habeo: consilium autem do, tanquam misericordiam consecutus à Domino, ut sim fidelis; hoc est, ut pro munere Apostoli, quod misericorditer consecutus sum, fideliter exponam mentem Dei, & saluti omnium optimè consulam.*

Q. 2. *In quo differt consilium à præcepto?*

Respondet S. Thomas quæst. 108. art. 4. illud esse discriminis inter præceptum & consilium, quòd præceptum necessitatem imponat, consilium verò det optionem: Oportet igitur, inquit, quòd præcepta novæ Legis intelligantur esse data de his, quæ sunt necessaria ad consequendum finem æternæ beatitudinis, in quem Lex nova immediatè introducit. Consilia verò oportet esse de illis, per quæ melius & expeditius potest homo consequi finem prædictum; Consilium quippe est de meliori bono.

Q. 3.

Q. 3. *Consilia congruuntne potius Legi Evangelicæ, quàm veteri?*

Affirmat sanctus Thomas laudato mox articulo, quia Lex Evangelica est lex libertatis, vetus verò lex servitutis; nam ex Philosopho, quem laudat quæst. 108. art. 1. ad 2. liber est, qui sui causa est, id est, qui ex se ipso agit, nec urgetur ab extrinseco: servus verò, qui minis & metu pœnarum ad agendum impellitur: atqui homo in Lege Evangelica amoris pondere, & interiori instinctu gratiæ, ut loquitur sanctus Doctor, fertur ad ea, quæ honesta sunt: in Lege autem veteri agebatur timore pœnæ extrinsecus immisso: ergo Lex Evangelica est lex perfecta libertatis, ut dicitur Jac. 1. vers. 25. vetus verò servitutis, & *in servitutem generans*, Gal. 4. vers. 24.

Ut autem perspicuum fiat, consilium congruere liberis & amicis, præceptum verò servis, duo in præcepto sunt distinguenda. Primum est ordinatio rationis ad bonum. Secundum est vis obligandi sub pœna. In primo conveniunt præceptum & consilium; Consiliarius enim æquè ac præcipiens ad bonum movere intendit, nonnunquam tamen cum aliquo discrimine; dominus quippe in suum potius quàm in fervorum commodum præcepta dare solet; Consiliarius verò, nisi velit decipere, unice consulit utilitati alterius.

Sed quoad secundum, nempe vim obligandi sub pœna præceptum & consilium discrepant; namque Consiliarius per consilium suum necessitatem non imponit; sed ita proponit, quod utilius & magis expedit, ut optionem permittat, atque in eo se benevolum & amicum exhibet. At dominus ulterius progreditur, potestate sua utitur

tur in subditos rerum utilium fastidiosos, iisque servire per minas eos compellit.

Ex hac explicatione tria manifestè sequuntur.

Primum, consilia non esse onera amanti, sed auxilia opportuna, quibus salutis suæ securius consulat, & mandata facilius expeditiusque impleat: *Præceptum in subditos fertur*, inquit S. Ambrosius Lib. de Viduis, *consilium amicis datur. Ubi præceptum est, ibi lex est: ubi consilium, ibi gratia.* Dominus cum auctoritate servis imperat: pater filiis benevolè consulit, ait Dominus, sic volo, sic jubeo; amicus verò, tibi idem consilium do, quod mihi metipsi. Amplectamur ergo Dei consilia non solum, ut genuinos æternæ sapientiæ foetus, sed maximè ut divinæ illius erga nos benevolentiae signa; qui enim illa spernit, à Deo dissentit, & adversus ejus beneficia ingratum se demonstrat.

Secundum, consilia apprimè convenire statui Legis Evangelicæ, minùs verò imperfectioni Legis veteris; cum illa Spiritum dilectionis infundat, & filios in bono sapientes pariat; ista verò servos erga virtutem malè affectos, timore contineat. Nam de Sapiente scriptum est, Prov. 9. v. 9. *Da sapienti occasionem, & addetur ei sapientia; doce justum, & festinabit accipere.* Quasi quis diceret, da potum sitienti, & sumet cum aviditate; quid enim justus æquè sitit ac justitiam, ad quam divina consilia viam sternunt? Contra verò de servo legitur, Prov. 26. v. 19. *Servus verbis non potest erudiri; quia quod dicis intelligit & respondere contemnit;* hoc est, frustra documenta & consilia dantur animo servili, ut qui agnitæ veritati, quam fasti-

fastidit, non acquiescat; sed urgendus est auctoritate.

Tertium, inordinato affectu eum teneri, qui se intra præcepti terminos ita concludit, ut non curet an deceat, an expediat, modò per Legem sibi licere audiat; is enim voluntatis inclinatione in bonum non propendet, sed ad illud timore pœnæ cogitur: atqui illud animi fastidium nascitur ex terrenorum cupiditate, sicut stomachi nausea ex noxiorum humorum redundantia, *præoccupatum nempe sæcularibus desideriis animum delectatio sancta declinat*, inquit S. Bernardus Lib. 5. de Ascensione.

Q. 4. *Peccatne, qui divinis consiliis non acquiescit?*

R. In eo præcisè non peccat; Quia, ex Apostolo Rom. 4. v. 15. *Ubi non est lex, nec prævaricatio*, atqui consilium non est lex, nec agendi necessitatem imponit, sed optionem permittit: Ergo.

Dixi: *Præcisè*; Quia qui consilium prætermittit, ut cupiditatibus suis indulgeat, carnis desideriis serviat, procul dubio peccat; transgreditur enim Legem, quæ dicit Exodi 20. vers. 17. *Non concupisces*: & Eccli. 18. vers. 30. *post concupiscentias tuas non eas*, quod singuli, maximè verò qui in monasteriis sanctiorem vitam professi sunt, observare debent; quamvis enim eorum statuta nequidem sub peccato veniali per se obligent, peccant tamen contra Legem naturalem & divinam, aliquando etiam cum discrimine salutis æternæ, cum ea contemnunt aut negligunt, ut inordinatis animi affectibus serviant. Adde, quòd vix ista contingant sine aliorum offensione, & disciplinæ regularis imminutione.

Dices: Ergo peccat quisquis consilia Legis



Evangelicæ non sequitur; cùm sine aliquo inordinato affectu prætermitti nequeant.

Nego sequelam, & ejus confirmationem, quem enim Christus non admisit, ut sequeretur se, Marci 5. vers. 19. Is absque peccato ad suos rediit annuntiaturus, quanta Deus ipsi fecisset: contra verò excusandus non videtur, qui Christo vocanti non respondit, divitiarum amore præpeditus, Matth. 19. Unde sanctus Thomas qu. 108. art. 4. distinguit inter consilia Legis Evangelicæ: alia quippe sunt generalia, & simpliciter dicta: *Quæ, quantum est de se, sunt omnibus expedientia*, sed non singulis: alia specialia & secundùm quid, quæ omnibus & singulis conveniunt. Generalia vocat professionem perfectæ paupertatis, castitatis, & obedientiæ, quibus amputatur, quantum fieri potest, omnis mundi concupiscentia, scilicet divitiarum, & carnis, ac superbiæ vitæ, ut animus omni cura solutus, liberè Deo vacet. Sed ista consilia ita dantur toti corpori Ecclesiæ, ut ad singula ejus membra non dirigantur; nam, ut ait Apostolus, si totum corpus oculus, ubi auditus? hoc est, si omnes monasticam vitam profiteantur, quomodo stabit humana societas?

Vera quidem Ecclesia præ Hæreticorum sectis in hac parte enitet, cùm in ejus corpore nunquam defuerint, sicut apud Pseudo-Reformatos, qui perfectionem illam Evangelicam fuerint amplexi: *Sed unusquisque proprium donum habet ex Deo, alius quidem sic, alius verò sic*, inquit Apostolus, 1. Corinth. 7. Hoc unum quisque caveat solum, ne gratiæ Dei desit; permagni quippe interest, Deum interiùs vocantem audire; quia non sine salutis periculo viam quis ingrederetur, in qua Deus se ducem

ducem non præberet. Sed præter ejusmodi consilia universim proposita, alia quæ vocantur à sancto Thoma consilia secundum quid, singulis speciatim dantur in Lege Evangelica, nimirum abstinere nonnunquam à licitis, & ultra præceptum, verbi gratia, misericordiæ, patientiæ, temperantiæ, progredi, quando expedit: vel ad vincendas tentationes, verbi gratia, iræ, vindictæ, libidinis: vel ad liberiùs vacandum orationi: vel ad exulceratum ànimum proximi demulcendum, & ad spargendum bonum Christi odorem. Porro qui spernit ejusmodi consilia: ut cupiditati & inordinato affectui indulgeat, procul dubio peccat, non præcisè propter consilium prætermissum, quod, ut jam diximus, per se non obligat; sed propter transgressionem Legis dicentis, *non concupisces*.

Q. 5. *In quo consistit vitæ Christianæ perfectio, an in observatione consiliorum Evangelicorum potius quam mandatorum?*

R. Consistit in observatione mandatorum. Probatur ex Scriptura, Matth. 6. vers. ultimo, Christus perfectionem ponit in præcepto dilectionis proximi: *Estote ergo vos perfecti, sicut & Pater vester cælestis perfectus est*. In dilectione autem proximi includitur dilectio Dei, utpotè quæ sit ratio illius & motivum.

Probatur 2. Ex sancto Augustino, Libro de Natura & Gratia, cap. 70. in quo sic habet: *Charitas ergo inchoata, inchoata justitia est; charitas provecta, provecta justitia est; charitas magna, magna justitia est; charitas perfecta, perfecta justitia est . . . . . quæ tunc maxima est in hac vita, quando pro illa ipsa contemnitur vita*. Unde concludit sanctus Doctor, virginem non debere se extollere supra conjugatam;

quia licet virginitas sit donum excellentius castitate conjugali; mulier tamen nupta potest esse paratior quam virgo ad fundendum sanguinem pro Christo, & ita esse perfectior in statu conjugii minus perfecto.

Probatur 3. ratione duplici. Prima, ultimus finis est ultima cujusque rei perfectio, atqui charitas est finis legis, teste Apostolo, 1. Timoth. 1. Ergo in charitate reponenda est Legis perfectio, ac proinde hominis; scopus enim Legis est perficere subditos. Altera ratio; quia ut habetur in Collationibus Patrum, consilia perfectæ paupertatis, castitatis, & obedientiæ spectari debent veluti instrumenta, quibus perficitur charitas: *Jejunia, inquit Abbas Moyses Coll. 1. cap. 7. vigiliæ, labores, corporis nuditatem, lectionem, cæterasque virtutes debere nos suscipere noverimus, ut scilicet per illas ab universis passionibus noxiis illæsum parare cor nostrum, & conservare possimus, & ad perfectionem charitatis istis gradibus innitendo conscendere . . . . .* Ob hoc enim quis ferramenta cujuslibet artis instituere sibi met, ac præparare festinat, non ut ea possideat vitiosa, nec ut emolumentum illius fructum, qui speratur ex ipsis, in nuda instrumentorum possessione constituat; sed ut eorum ministerio peritiam finemque illius disciplinæ, cujus hæc adjumenta sunt, efficaciter apprehendat. In eadem sententia sanctus Paulinus vir consularis, & ex opulentissimo pauperrimus propter Christum factus, cum inde celebris ubique haberetur, sic scribit Epistola secunda ad Sulpitium Severum: *Quæ nobis gratia, si in alieno tantum Fideles fuerimus, nisi de propriis serviamus, id est, de libero voluntatis arbitrio, ex toto corde nostro diligentes Deum? Quamobrem temporalium bonorum relictio sive distractio, non decursus stadii, sed*  
ingres-

*ingressus ; nec ut meta, sed ut janua est. Non enim tum vincit, cum exuitur Athleta, qui idèò nudatur, ut incipiat dimicare . . . . . Et natator amnem interpositum superaturus exuitur ; nec tamen transnabit, nisi totius corporis nisu torrentis impetum scindat, & laborem nationis exhauriat. Igitur qui in monasterio ad paupertatis & castitatis scopum, scilicet, amorem Dei non contendit, continuò exhauriens sentinam amoris proprii, ex quo crescunt elatio, ira, rixæ, suspiciones malæ, & alii charitati contrarii affectus, eum similem dixeris artifici, qui exquisitissima quæque artis suæ instrumenta comparat, eaque nitida, polita, & rectè ordinata in officina diligenter servat, ita tamen, ut nullum inde opus conficiat.*

## § VI.

*Utrum Lex Evangelica sit aliquando mutanda?*

**C**ertum est, præcepta moralia nunquam esse mutanda, cum pertineant ad Legem naturalem, quæ ex dictis est immutabilis. Quæstio itaque esse potest duntaxat de aliis præceptis.

R. Lex Evangelica mutanda non est, nisi in fine sæculi.

Probatur I. Ex Scriptura, Matth. 24. *Prædicabitur hoc Evangelium regni in universo orbe in testimonium omnibus gentibus, & tunc veniet consummatio.* De præceptis fidei & spei speciatim habetur, I. Corinth. 13. vers. 10. & 11. quod evacuabuntur, cum venerit, quod perfectum est, scil. visio intuitiva; interim verò manent fides, spes, & charitas. De præceptis etiam cæremonialibus idipsum constat ex cap. 7. ad Hebr. ubi Christus dicitur habere  
semp



sempiternum Sacerdotium: atqui tamdiu duratura sunt præcepta cæremonialia Legis Evangelicæ, quamdiu duraturum est ejus Sacerdotium, quod essentialiter ordinatur ad Sacrificium offerendum, & Sacramenta conficienda: Ergo.

Probatur 2. ratione, quam urget S. Thomas quæst. 106. art. 4. Quia sicut Lex vetus se habuit ad Legem Evangelicam, ita se habet Lex Evangelica ad beatitudinem, & visionem Dei intuitivam: atqui Lex Evangelica proximè & immediatè debuit succedere Legi veteri, tanquam ejus complementum & perfectio: ergo Legi Evangelicæ immediatè succedet beatitudo, & visio Dei intuitiva, ac proinde durabit usque ad consummationem sæculi. Minor est evidens.

Major probatur; Finis Legis erat Christus, quem venturum prædicebat, cujus passionem figurabat in Sacrificiis; cujus immensa dona & beneficia adumbrabat in Sacramentis & cæteris legalibus cæremoniis: Ergo jam præsentem Christo, hoc est, veritate, & collatis donis, necesse fuit, ut umbræ figuræ, & promissa evanescerent. Atqui similiter Lex Evangelica prædicit, ac promittit, Christum rursus venturum cum gloria; & Legis suæ cultores secum assumpturum: hac fide, hac spe nos interiùs per gratiam, exterius per doctrinam, nutrit ac roborat; atque ad tantam felicitatem promerendam & capiendam idoneos reddit, adeo ut, inquit S. Thomas, nihil possit esse in statu vitæ perfectius, nec ultimo fini propinquius: quàm Lex Evangelica, ac proinde immediatè illi succedet visio beatifica.

Tracta-



# Tractatus DE FIDE, SPE, ET CHARITATE.

**T**res illæ virtutes vocantur Theologicæ; quia virtus Theologica dicitur ea, quæ Deum habet pro objecto materiali, saltem primario, & divinam ejus perfectionem pro formali: atqui sic se habent tres illæ virtutes; nam Fides respicit Deum ut primam veritatem; Spes ut nostram beatitudinem; Charitas ut summam bonitatem: Ergo. Vide quæ de virtutibus Theologicis in genere, & de earum differentia à moralibus dicta sunt, Tract. de Gratia pag. 394. & seq. in prima editione.

Dixi, *saltem primario*; Quia præter Deum alia secundariò per fidem credimus, ut immortalitatem animæ rationalis, Sacramenta: per spem speramus

ramus gratiæ auxilia: per charitatem diligimus proximum.

Juxta morem in Scholis receptum, distribui-  
mus hunc Tractatum in tres partes, in quarum  
prima agemus de Fide; in secunda de Spe; in  
tertia de Charitate.

\*\*\*\*\*  
\*\*\*\*\*

## PRIMA PARS

### De Fide.

**G**raviores Fidem spectantia jam expendimus tum  
in Prolegomenis, tum Tract. de Gratia, ubi  
de Justificatione. Quamobrem hic nonnulla dun-  
taxat veluti spicas post messem derelictas lege-  
mus, ac primò quidem accuratius investigabi-  
mus naturam & definitionem Fidei. Deinde quæ-  
remus, qui sint illius actus, & quæ eorum necessi-  
tas. Tertio dicemus de peccatis Fidei oppositis.

## CAPUT PRIMUM.

### De Definitione Fidei.

**D**uplex in Scholis profertur Fidei definitio. A-  
lia petitur ex Apostolo Hebr. 11. quæ, cum  
sit à Spiritu Sancto inspirata ac dictata, diligen-  
tius à nobis est exponenda. Sed quia constat ter-  
minis metaphoricis, & obscurioribus: Theologi  
aliam confecerunt juxta Dialecticorum regulas.

§. I.

## §. I.

*Exponitur Definitio Fidei ab Apostolo tradita.*

Q. 1. *Quomodo Fides ab Apostolo definitur?*

R. Definitur Hebr. 11. vers. 1. *Sperandarum substantia rerum, argumentum non apparentium.*

Q. 2. *Quid hic substantia significat?*

R. Tria. 1. Significat inchoationem, quo sensu principia dicuntur scientiæ substantia; quia virtute continent omnes conclusiones, & ab iis incipit omnis disciplinæ profectus; atqui similiter, inquit S. Thomas, quæst. 4. art. 1. *Prima inchoatio rerum sperandarum in nobis est per assensum fidei, quæ virtute continet omnes res sperandas; eo enim ipso, quo firmiter credimus vera, & per Christum acquisitu possibilia, quæ dicuntur de felicitate æterna, disponimur ad illa speranda.* 2. Nomine substantiæ intelligi potest fundamentum; quia sicut substantia sustentat accidentia; ita fides sustentat spem nostram: *Domus Dei*, inquit S. Augustinus Lib. 2. de Trinit. cap. 7. *credendo fundatur, sperando erigitur, amando perficitur.* 3. Substantia hic Græcè hypostasis, id est, subsistentia; quia Fides tanta certitudine bona speranda nobis repræsentat, ac si jam subsisterent. Hoc sensu Apostolus, Hebr. 11. vers. 27. laudans fidem Moy-  
sis, ait, *invisibilem tanquam videns sustinuit.*

Q. 3. *Cur Fides ab Apostolo vocatur argumentum: cum ipsa non sit discursiva?* Fides, inquit S. Joannes Damascenus lib. 4. cap. 12. non est inquisitivus assensus.

Respondet S. Thomas laudato art. 4. metaphoricam esse huiusmodi locutionem, in qua sumitur causa pro effectu; nempe argumentatio, quæ  
quærit



quærit veritatem, ac tandem parit certitudinem, efficitque, ut intellectus firmiter adhæreat conclusioni demonstratæ: *Unde, inquit S. Doctor, ipsa firma adhæsiō intellectus ad veritatem Fidei non apparentem, vocatur hic argumentum. Unde alia littera (quam sequitur S. Augustinus Lib. 13. de Trin. cap. 1.) habet, conviçtio; quia, scilicet, per auctoritatem divinam intellectus credentis convincitur ad assentiendum iis, quæ non videt; quasi evidentissima argumentatione, & veluti digito demonstrarentur. Hinc S. Chrysostomus in hunc locum sic exclamat: Papæ, quale illud est, quod talem facit evidentiam (nimirum credibilitatis) qualis est, dum res ipsæ palam proponuntur?*

Q. 4. *Estne apta & conveniens ejusmodi definitio?*

R. Est aptissima & convenientissima; quia virtus rectè definitur per ordinem ad suum actum; Charitas, v. g. dicitur virtus inclinans ad diligendum Deum super omnia, & proximum sicut seipsum: temperantia quoque definitur virtus refrænans concupiscentias, & modum imponens delectationibus corporeis: atqui in laudata definitione Fides describitur per ordinem ad suum actum proprium, quo scilicet inchoatur vita æterna in nobis, & firmiter assentimur rebus sperandis non apparentibus.

Q. 5. *Cur Apostolus Fidem describit per ordinem ad res sperandas, cum pertineant ad voluntatem, Fides autem sit virtus intellectus?*

R. Quia Apostolus describit Fidem Christianam: atqui Fides Christiana propriè & strictè sumpta, non est firmus assensus quibuslibet rebus à Deo revelatis, v. g. quòd canis secutus sit Tobiam peregrinantem, & domum reversus blandimento

dimento suæ caudæ lætitiā præsetulerit, Tob. II. quamvis enim illud & similia fide divina credi debeant, utpotè quæ sint à Deo revelata; Fides tamen illa propriè & strictè loquendo non est Christiana; quia res sic creditæ nec sunt sperandæ, nec diligendæ. Cur autem Apostolus res sperandas potius exprefferit quàm res diligendas; hanc rationem affert Angelicus Doctor, quòd amor æquè sit præsentium & visorum, ac futurorum & non apparentium. Beati v. gr. Deum visum & præsentem diligunt, sperare verò non possunt; ac proinde Fides cum sit non apparentium, debuit explicari per res sperandas, quæ nec præsentibus, nec visæ esse possunt; nam ex eodem Apostolo, Rom. 8. vers. 24. *Spes quæ videtur, non est spes; nam quod videt quis, quid sperat?*

Quamvis autem Fides subjectivè sit in intellectu, describi debuit per ordinem ad actus voluntatis, ad quam sperare pertinet; quia eorum est directrix: quemadmodum enim prudentia, licet sedem habeat in intellectu, definitur tamen per ordinem ad actiones voluntatis: nempe habitus recta cum ratione activus, hoc est, directivus actionum voluntatis juxta rectam rationem, adeò ut nulla sit actio bona & honesta, nisi prudenter fiat. Similiter Fides Christiana residet quidem in intellectu, cum pro objecto habeat veritatem à Deo revelatam; sed tota est practica non secus ac prudentia. Unde ab Apostolo Fides Christiana describitur, Gal. 5., *Fides quæ per charitatem operatur*; ita ut illius officium sit dirigere actiones voluntatis ad vitam æternam, non quidem secundum dictamen rectæ rationis; illud enim ad prudentiam pertinet; sed juxta verbum Dei, & regulas

las ab ipso revelatas. Quare Fides idem præstat Christianis ad patriam cœlestem pergentibus, quod columna nubis Judæis ad terram promissam tendentibus; sicut enim columna per diem erat nubes protegens, per noctem verò ignis lucens, & in utraque specie viam demonstrabat in horrenda solitudine, quam pes hominis non calcaverat; sicque ubi illa stetisset, Judæi castra metabantur; statim autem ut eam recedere adverterent, castra movebant; *Per verbum Domini figebant tentoria, & per verbum illius proficiscebantur; erantque in excubiis Domini juxta imperium ejus per manum Moyfi*, Num. 9. Ita veri Christiani per fidem ambulant, quæ pro ipsis nubes est respectu eorum quæ videntur, ne in iis mentis oculos defigant; & demonstratio est rerum sperandarum non apparentium, ut ad illas nitantur, juxta illud Apostoli, 2. Corinth. 4. *Non contemplantibus nobis quæ videntur, sed quæ non videntur: quæ enim videntur, temporalia sunt: quæ autem non videntur, æterna sunt.* Ergo, qui aliter res intuetur, quàm ad lumen Fidei, illas in fallaci lumine intuetur, & falsò de iis judicat.

Hinc Guilielmus Parisiensis in encomio Fidei Tract. de Moribus cap. 1. Fidem sic inducit laudes suas prosequentem: *Ego sum prima vita mentis humanæ, dicente Habacuc: Justus ex fide vivit: Ego sum prima, quæ mentem humanam mortifico, & Deo subjicio: Ego sum columna lucis, ex Ægypto erroris eruens intellectum, & protegens contra tela Hereticorum & Philosophorum.* Adde, & contra fallacias sensuum. Porro ex his patet quàm convenienter, & quàm divinè fidem definierit Apostolus.

## §. II.

*Quomodo Fides definiri possit juxta Dialecticorum  
Leges ?*

R. **D**efinitur , virtus Theologica divinitus infusa , qua firmiter assentimur propter divinam veritatem , omnibus quæ Deus revelavit, & nobis per Ecclesiam credenda proposuit.

Priores illæ definitionis voces, *virtus Theologica divinitus infusa*, exprimunt genus proximum, in quo Fides convenit cum spe & charitate; quælibet enim est virtus Theologica divinitus infusa. Adduntur verò reliquæ voces tanquam differentia, qua Fides essentialiter differt à quacunque alia virtute etiam Theologica.

Cum autem per hanc definitionem satisfieri possit variis quæstionibus, quas Theologi prolixè agitant circa naturam & proprietates Fidei, operæ pretium est singulas definitionis particulas diligentius expendere. Itaque,

Dicitur 1. *Virtus*; Quia virtus est habitus, qui facit bonum habentem se, & opus ejus bonum: atqui ejusmodi est Fides; bonum enim est ac honestum credere Deo dicenti, utpotè qui sit summa veritas; & laudabilis est, qui fidem illi præbet.

Dices 1. Veræ virtutes sunt inter se connexæ: atqui Fides manet in peccatoribus sine aliis virtutibus, ut constat ex dictis ubi de Justificatione: ergo Fides non est vera virtus.

Distinguo maj. Sunt connexæ in perfecto gradu, Concedo: In gradu imperfecto, Nego major. Nam potest quis servare justitiam erga proximum,



dicitur immutare cor Principum, ut decipiat eos: Ergo Fidei potest subesse falsum.

Nego conseq. Et ad singula subsumpti momenta respondeo.

Ad primum S. Thomas qu. i. art. 3. ad tertium, respondet, ante prædicationem Evangelii duo distinguenda in Judæo: alterum est Fides divinis oraculis de Messia venturo: & huic Fidei non poterat subesse falsum. Alterum sunt conjecturæ humanæ, ex quibus falso colligebat, divina oracula non cadere in Christum Dominum, aliumque expectandum, brevi tamen venturum, cum cerneret instare tempus à Prophetis præfixum; sed error ille, non ex Fide divina, sed ex humana conjectura nascebatur; *hoc ad fidem credentis pertinebat, post nativitatem Christi, inquit Angelicus Doctor, quod crederet eum quandoque nasci: sed illa determinatio temporis, in qua decipiebatur, non erat ex fide, sed ex conjectura humana.*

Ad secundum similiter respondendum, quod Fide divina teneamur credere hostiam consecratam realiter continere Christum, ideoque esse adorandam; non verò quod hæc hostia, quæ elevatur à Sacerdote, sit consecrata, quia Deus id non revelavit. Unde semper adoratur sub aliqua conditione saltem tacita, ac proinde nulla in credente & adorante falsitas.

Ad tertium: tenetur quidem rusticus credere Pastori, quem putat vera enuntiare, cum tamen illud falsum sit; aliàs nimia inveheretur perturbatio, si cuique liceret dissentire, eo prætextu, quod Pastor fallere possit; sicut enim prudentia exigit, ut credamus eum esse revera pauperem, qui signa paupertatis præfert, eique opem feramus,

mus, si facultas adsit, quamvis fortè se pauperem mentiatur; similiter postulat, ut rustici assentiantur Pastori, quem norunt cum aliis communione esse conjunctum. Sed in hypothese quòd alicubi falsum doceat, Fides illorum in hac parte non erit divina, sed humana duntaxat, quia non niteatur veracitate divina.

Nec dicas, verum esse actum misericordiæ in eo, qui eleemosynam confert ficto pauperi; ergo & in nostra hypothese verum actum Fidei divinæ; disparitas enim est inter virtutes morales & intellectuales, quòd illæ conformitatem postulent duntaxat cum recta ratione, istæ verò cum objecto. Unde etiamsi falsum sit, hunc mendicum inopia laborare, ut præ se fert, recta ratio dicat ut eum pro facultate juvemus, & opus misericordiæ exercebimus practicè verum; quia erit rectæ rationi consentaneum; speculativè verò falsum; quia erit objecto dissentaneum. At virtus intellectualis ita essentialiter consistit in conformitate cum objecto, ut jam sit error & vitium, si objecto sit difformis; conclusio v. gr. quæ elicitur ex præmissis falsis, scientia non est quantumcunque illæ præmissæ videantur certæ & indubitatae.

Ad quartum: multa Deus prædicit futura, sed sub conditione, v. gr. si Ninivitæ non resipuerint: conditione autem non posita, effectus non sequitur; quia prædictus aut promissus non est, nisi sub illa conditione. Quis enim falsitatis aut infidelitatis arguet Patremfamilias, qui mercenariis promisit denarium diurnum, si laboraverint in sua vinea, quem tamen serò denegat iis, qui per totam diem otio torpuere? quòd autem non decipiat, nisi permissivè & occasionaliter, evici-

evicimus, contra Pseudo-Reformatos, Tractat. de Attributis, ubi de reprobatione positiva.

Dices 3. Fides ex S. Thoma q. 4. art. 5. non est vera virtus: Ergo.

Disting. ant. Fides charitate formata, non est virtus, Nego ant. Contrarium enim luculenter probat Angelicus Doctor laudato art. Fides informis, & charitate destituta, ut in peccatoribus, subdistinguo: non est virtus perfecta & simpliciter dicta, Concedo: non est virtus secundum quid, hoc est, non est virtus intellectus, Nego ant. Namque ex dictis inclinatur semper ad verum. Unde si scientia & ars sunt virtutes intellectuales, à fortiori Fides divina, quæ supernaturalis est, quæque disponit ad justificationem; & impetrat ulteriores gratias.

Instabis: atqui Fides non potest esse sine charitate; nam ex S. Thoma citata quæst. art. 3. charitas est forma fidei; atqui res esse nequit sine sua forma, sine anima rationali v. g. non existit homo: Ergo nec sine charitate existit Fides, juxta illud Jacobi 2. *Sicut enim corpus sine spiritu mortuum est, ita & fides sine operibus mortua est.*

Nego subsumptum, cujus confirmationis distinguo maj. Charitas est forma fidei extrinseca, & accidentalis, Concedo: intrinseca & essentialis, Nego maj. Namque Fides informis & formata est unus & idem habitus, qui si sit in persona charitate & gratia sanctificante instructa, dicitur Fides formata: si verò in peccatore charitate spoliato, dicitur Fides informis. Unde patet, quòd esse informe, nihil sit aliud hìc, quàm denominatio petita à privatione charitatis; esse verò formatum, denominatio petita à charitate in-

existente, quæ ideo dicitur forma à vita omnium virtutum; quia ordinat earum actus ad ultimum finem, illosque reddit meritorios vitæ æternæ; vivens enim dicitur, qui seipsum movet, & principium internum illius motus, vita. Cum ergo homo per charitatem seipsum moveat in ultimum finem, meritò Justus dicitur vivere, & charitas, qua ornatur, vita ipsius, peccatorem verò dicimus mortuum, & fidem ejus mortuam, sicut cætera ejus bona opera; quia nec seipsum movet in Deum, à quo averfus est, nec ad eum ita tendunt actus fidei informis, & alia bona opera, ut illum promereantur. Atque hoc sensu metaphorico aquæ quiescentes dicuntur mortuæ, fluentes verò vivæ.

Distinguo similiter minorem, res esse nequit sine sua forma essentiali, ut homo sine anima rationali, Concedo: sine forma extrinseca & accidentali, Nego min. Porro S. Jacobus non comparat Fidem sine operibus cum homine sine spiritu, adeò ut quemadmodum homo mortuus & sine spiritu, non est homo; ita nec Fides mortua & sine bonis operibus, sit vera Fides: sed comparat eam cum corpore, quod sine spiritu adhuc existit, quamvis mortuum; quia spiritus non est quid corpori intrinsecum, sicut homini.

Dicitur 2. *Theologica*; quia illa virtus est Theologica, quæ habet Deum pro objecto materiali saltem primario, & aliquod ejus attributum pro objecto formali & motivo: atqui Fides habet Deum pro objecto materiali saltem primario; Pater enim, & Filius, & Spiritus Sanctus sunt res sperandæ tanquam nostra beatitudo: & divinam veritatem pro objecto formali & motivo: ideo quippe



pe credimus Deo dicenti, quia est verax, & ipsa met veritas : Ergo.

Dices 1. Fides ex Apostolo est non apparentium : atqui lumine naturali apparet Deum existere ; *invisibilia enim ipsius à creatura mundi per ea, quæ facta sunt, intellecta conspiciuntur.* Rom. 1. Ergo Fides non habet Deum pro objecto materiali, ac proinde non est virtus Theologica.

R. 1. Saltem lumine naturali non apparet Deum esse Trinum in Personis, secundam Personam esse Filium à Patre genitum, & Spiritum Sanctum ab utroque procedere : Ergo ex hac parte saltem Fides est virtus Theologica. Sed omis- sis variis Philosophorum opinionibus circa quæ- stionem, quæ in eorum Scholis agitur, utrum scientia, fides & opinio possint simul consistere.

R. 2. Res non apparentes in mente Apostoli, esse res intuitivè non visas, etiamsi abstractivè cognoscantur. Ille enim ipse, qui dicit Rom. 1. divinitatem, & ejus attributa per ea, quæ facta sunt, intellecta conspici, ea nihilominus invisibilia vocat. Et Hebr. 11. v. 27. scribit Moysen, qui procul dubio Deum ex creaturis abstractivè no- verat, illum invisibilem sustinuisse tanquam visi- bilem, nempe per Fidem ; definitque universali- ter v. 6. *Credere . . oportet accedentem ad Deum ; quia est*, sive qui accedit, sit idiota, sive sit Theo- logus. Et ratio est, quia demonstratio existen- tiæ Dei ex creaturis non semper habetur ad ma- num, ad eam opus est conatu animi, industria & labore ; difficultatibus identidem obnubilatur, propter quas ad Fidem recurrere necesse est. Un- de S. Thomas q. 2. art. 4. sic docet : *Necessarium est homini accipere per modum fidei, non solum ea, quæ*  
sunt

*sunt supra rationem, sed etiam ea, quæ per rationem cognosci possint. Et hoc propter tria. 1. Quidem ut citius homo ad veritatis divinæ cognitionem perveniat . . . 2. ut cognitio Dei sit communior . . . 3. propter certitudinem. Ratio enim humana in rebus divinis est multum deficiens. Quare in forma,*

Distinguo antec. Fides est non apparentium, id est, eorum, quæ intuitivè non videntur, Concedo : non apparentium per rationis discursum, subdistinguo : ut plurimum, Concedo : dicitur enim Eccli. 3. *plurima super sensum hominis ostensa sunt tibi* : semper, Nego antec. quia credere oportet Deum existere, quod naturale lumen non fugit.

Itaque illud est discriminis inter rem præsentem intuitivè visam, & rem absentem abstractivè cognitam, quòd res præsens intuitivè visa, certius & perfectius cognosci non possit, nec proinde credi. Annon rideret amicus, quem præsentem video, loquentem audio, & cum quo confabulor, si diceret, ut crederem sibi affirmanti se esse præsentem? Visio enim intuitiva excludit omnem fidem, & obscuritatem. S. quidem Thomas Christum præsentem credidit. Joan. 20. sed aliud vidit, aliud credidit : vidit hominem, non credidit : non vidit Deum, sed credidit. At rei absentis abstractiva cognitio præterquam quod difficilius habetur ; non est æquè certa & constans ac lumen fidei, ejus evidentia difficultatibus obscurari potest, nec eas citò vincit, quemadmodum Fides. Esto, actus scientiæ per suam evidentiam excludat actum Fidei, quod S. Thomas videtur asserere qu. 1. art. 5. & q. 2. art. 4. ad 2. tamen habitus scientiæ & fidei possunt in eodem subjecto

subjecto simul consistere & actus proprios secundum varias subjecti circumstantias & affectiones elicere.

Dices 2. Fides præter Deum, plura habet objecta; Fide enim credimus Angelos, animam rationalem; septem Sacramenta & cætera gratiæ mysteria: ergo Fides non est virtus Theologica.

Distinguo antec. Credimus tanquam objecta secundaria, propter divinam revelationem, Concedo: tanquam objecta primaria, & independenter à divina revelatione, Nego antec. & conseq. Namque ad rationem virtutis Theologicæ, satis est, quòd objectum ejus primum sit Deus, ad quem cætera referuntur; sic charitas est virtus Theologica; licet pro objecto habeat Deum, & proximum; Deum quidem tanquam primum objectum; proximum verò tanquam secundarium objectum, sed propter divinam bonitatem diligendum.

Dicitur 3. *divinitus infusa*; Fides enim est donum Dei. Probaturque 1. ex Apostolo Philipp. 1. vers. 29. *Vobis donatum est pro Christo non solum ut in eum credatis, sed ut etiam pro illo patiamini.* 2. Ex Traditione, quam asserit sanctus Augustinus contra errorem Semipelagianorum, qui docebant, initium Fidei esse à nobis. Consule in eam rem Tractatum de Gratia pag. 482. & 483. 3. Ratione Theologica; Fides non est sine cogitatione: atqui ex Apostolo 2. Cor. 3. vers. 5. non sumus sufficientes cogitare aliquid à nobis, quasi ex nobis: Ergo nec credere.

Dices: illa virtus non est supernaturalis, quæ nititur motivo naturali: atqui Fides nititur motivo naturali: Ergo non est supernaturalis.

Minor

Minor probatur. Ideo absque erroris formidine assentimur Deo dicenti ; quia verax est : atqui lumine naturali novimus Deum esse veracem, omnipotentem, & perfectum in omni genere perfectionis : Ergo.

Nego min. Ad cujus confirmationem nonnulli respondent, nobis non esse evidens, Deum aliquid dixisse aut revelasse, ac proinde opus esse lumine supernaturali, ut credatur.

Sed hæc responsio non satisfacit ; namque primus Seraphinorum adhuc viator, cum non posset illuminari, nisi à Deo, evidenter cognovit sibi à Deo revelata mysteria, quæ credere tenebatur : nec dubitandum est, quin divina revelatio aliquando clarè innotuerit sanctis Patriarchis, ut Adamo, Abrahamo, quibusdam Prophetis, ac præsertim Apostolis. Quare rejecta illa responsione,

Respondeo. Quamvis nobis evidens sit Deum esse veracem, ea tamen quæ dixit non sunt evidèntia ; unde etiamsi intellectus ex evidenti revelatione necessario judicet credibilia esse, quæ dicuntur, non tamen determinatur ad actu credendum, nisi ex imperio voluntatis, *intrare quis in Ecclesiam potest nolens*, inquit sanctus Augustinus Tract. 36. in Joan *sed credere non potest nisi volens*. Et sanctus Bernardus Lib. 5. de Consider. cap. 6. *Fides est voluntaria animæ quædam, & certa prælibatio nondum manifestatæ veritatis*. Itaque evidens revelatio spectari debet quemadmodum motiva credibilitatis, quæ diximus in Prolegomenis, & in Tractatu de Incarnat. esse evidenter credibilia, & efficere res Fidei evidenter credibiles : atqui resurrectio Lazari v.g. & illuminatio cæci nati licèt evidenter probent, Christum esse Filium Dei ab eo



eo missum ; quia sunt indubitati effectus omnipotentia, quos Deus utpote summa veritas & bonitas adhibere non potest ad confirmandum mendacium ; divinam tamen Christi personam & missionem non exhibent evidentem , sicut principium illud , *totum est majus sua parte* , evidenter demonstrat corpus esse majus brachio. Et ratio est, quia miracula , & alia Dei testimonia sunt quid merè extrinsecum rei credendæ , putà divinæ Christi personæ , nullumque ordinem ad illam habent, nisi ex Dei voluntate ; contra verò laudatum principium virtualiter continet conclusionem , quæ ex eo deducitur. Porro divina revelatio quantumcunque clara & evidens , æquè est extrinseca rebus revelatis , ac motiva credibilitatis. Ergo nullam eis tribuit evidentiam, nec proinde movet ad assensum.

Instabis : tam naturale est credere Deo evidenter loquenti , quàm homini , quem novimus esse veracem. Ergo.

R. 1. Argumentum illud nimis probat ; æquè enim concluderetur, amorem Dei , & cæteros actus virtutum moralium esse naturales ; quia tam naturale est colere & amare Deum , quàm colere & amare parentes , & viros sapientes ; & ita vincerent Pelagiani & alii gratiæ Christi hostes.

R. Itaque 2. Distinguo ant. Tam naturale est credere Deo evidenter loquenti , persuasionem humanam & motivo naturali , Concedo : persuasionem divinam , & motivo supernaturali , Nego antec. Sic naturale est matri amare filium motivo naturali , nequaquam autem motivo supernaturali.

Dicitur 5. *qua firmiter assentimur propter divinam veritatem.* Quibus vocibus notatur objectum formale

male Fidei ; illud enim est objectum formale virtutis , quod est motivum & ratio , sub qua virtus versatur circa suum objectum materiale , objectum formale Ethicæ v. g. est dirigibilitas actionum humanarum ad honestatem ; quia Ethica versatur circa actiones humanas , quatenus dirigibiles ad honestatem : atqui Fides versatur circa suum objectum materiale , Deum nempe , & ea omnia , quæ nobis revelavit , quatenus sunt ab ipso revelata, eaque credit propter summam ejus veritatem : Ergo.

Hic in Schola movetur quæstio magis subtilis quam utilis, utrùm ipsa revelatio ingrediatur rationem objecti formalis , & cum divina veritate moveat ad assensum ; an verò sit duntaxat conditio, sine qua veritas divina non moveret, quemadmodum applicatio ignis ad lignum non est causa inflammationis , sed conditio , sine qua ignis non combureret lignum. Alii primum affirmant ; quia verbum Dei est motivum , & ratio , propter quam credimus ; quærenti enim cur credamus mysterium Trinitatis , una est responsio ; quia Deus dixit : atqui in hac responsione includitur verbum Dei , seu revelatio simul cum veritate divina : ergo.

Alii contrà contendunt , & ut videtur probabilius , revelationem esse conditionem duntaxat, sine qua non crederemus ; sic enim Christo docenti credimus , quomodo discipuli Magistro : atqui verba Magistri non sunt causa assentiendi conclusioni propositæ & explicatæ , sed solæ præmissæ, ex quibus conclusio eruitur : ergo. Sed ista sunt levioris momenti, quàm ut diutius eis immoremur, fatif.

fatisque nobis est nosse, quod apud omnes constet, aliud non esse formale fidei objectum, quàm primam veritatem nobis revelatam.

Dicitur 5. *omnibus quæ Deus revelavit*; quibus vocibus denotatur adæquatum fidei materiale objectum; illud quippe est objectum adæquatum virtutis; circa quod virtus ita versatur, ut ad aliud se non extendat: atqui Fides ita versatur circa res omnes à Deo revelatas, ut se non extendat ad alia, quantumcunque vera: Ergo objectum materiale fidei totale & adæquatum, quod communiter vocant, sunt res omnes à Deo revelatæ: formale verò summa Dei veritas revelans.

Est autem aliquis ordo inter res revelatas, ut docet S. Thomas qu. 1. artic. 1. quæ enim sperandæ sunt, nempe Deus & ejus possessio, primario spectantur à fide, cæteræ verò secundo & quatenus ordinantur ad beatitudinem quam speramus, ut Incarnatio, septem Sacramenta, &c. Ergo Deus est primum & attributionis fidei objectum, cæteræ verò res revelatæ secundarium: *nihil cadit sub fide, inquit Angelicus Doctor, nisi in ordine ad Deum: sicut etiam objectum medicinæ est sanitas, quia nihil medicina considerat, nisi in ordine ad sanitatem.*

Dicitur 6. *& nobis per Ecclesiam credenda proposuit*; quæ voces amplam præbent differendi materiam.

Ac primò quidem iis innuitur, ad fidem non semper requiri, ut Deus per se cuilibet immediate revelet, quemadmodum contendunt Pseudo-Reformati, quorum errorem longè absurdissimum (docentium neminem teneri credere voci Pastoris, nisi Spiritus Sanctus ipsi intus revelet vera esse

esse quæ audit) fusè confutavimus in Prolegomenis pag. 95. & sequentibus.

Dixi, *ad fidem non semper requiri*, &c. ut innuerem immediatam revelationem aliquando esse necessariam; ut in primo Angelo, à quo inferiores credenda didicerunt; in Moyse, qui Legem Israëlitæ docuit, & in Apostolis, per quos Evangelium in universo orbe disseminatum est.

Cum igitur Religione jam stabilita, Deus per seipsum credenda singulis immediatè non revelet, sequitur, nos ad Fidem concipiendam aliquo medio debere certiores fieri, rem fuisse à Deo revelatam, ac proinde in hoc statu præter revelationem, requiri fidei propositionem.

Est autem duplex fidei propositio, alia privata, quæ solet fieri à parentibus in familia, à ludimagistro in Schola, à Parocho in Parochia, ab Episcopo in Diœcesi: alia publica, quæ fit à communi fidei Magistro, & supremo controversiarum Judice.

Ambæ illæ propositiones in quibusdam conveniunt, & in aliis discrepant. In eo conveniunt, quòd utraque debeat ita auditoribus apparere credibilis, ut judicent oppositum esse incredibile & falsum, putà contrariam Pseudo-Reformatorum doctrinam. Alioquin si existimarent se habere fundamentum dubitandi, non possent firmum dare assensum: vel si doctrina Calvinistarum credibilis videretur; liceret ipsis elicere actum fidei contrarium, quod repugnat. Et hæc dicta sint propter nonnullos, qui Ecclesiæ Romanæ ita adhærent, quia in ea potest haberi salus etiam securius, ut doctrinam Pseudo-Reformatorum nolint condemnare. Hæc autem conde-  
mnatio



mnatio debet esse explicita in iis , qui ab hæresi redeunt ; in Fidelibus verò sufficit implicita.

Discrepant autem duæ illæ propositiones , 1. privata propositio quantumcunque videatur credibilis , absolutè tamen potest esse falsa , cum fiat à privata persona , quæ falli potest & fallere ; publica verò propositio est infallibilis auctoritatis. 2. Illa non habet , saltem universaliter , vim cogendi contumaces , sicut ista.

Hic nascitur gravis controversia , ad quem pertineat publica propositio. Pseudo-Reformati docent pertinere ad Scripturam sacram , in qua , inquiunt , clarè continentur quæcumque Deus revelavit ; Magister enim per scripta , quæ dictat discipulis , proponit quidquid vult , ut ab ipso discant : atqui unus est Magister noster Christus : ergo Christus per Scripturam sacram , quæ est verbum ipsius , nobis proponit quidquid vult credi à nobis.

Contra 1. Deus plura revelavit à nobis credenda , quæ non sunt scripta , ut docuimus in Prolegomenis , ubi de Traditione. 2. Scriptura ex magna sui parte obscura est , & explicatione indiget : ubi autem clara fuit , falsis Hæreticorum interpretationibus detorquetur. Quare sicut in Politicis opus est Judice , qui genuinum legis sensum contra protervos vindicet ; ita & in Religione Christiana necesse est , ut quis cum auctoritate Scripturam sacram certò interpretetur , asferatque contra Hæreticos & peccatores verbum Dei adulterantes , & errori suo ac cupiditati accommodantes ; *neque enim natæ sunt hæreses* , inquit S. Augustinus Tract. 10. in Joannem , *nisi dum Scripturæ bonæ intelliguntur non bene* , & quod in

*eis non benè intelligitur, etiam temerè & audaciter assertur.* 3. Nobis non constat Scripturam esse verbum Dei, nisi aliqua infallibilis auctoritas ipsi testimonium reddat; quot enim Libros sacros Hæretici expunxerunt è Canone, & alios spurios obtruderunt? Annon Manichæi integrum vetus Testamentum, & plures partes novi Testamenti rejecere? Quid Lutherani & Calvinistæ etiam nunc inter se dissentiunt circa Epistolam S. Jacobi? Lutherus stramineam illam vocat, Calvinus verò illam veneratur uti verbum Dei. Denique quæ via Christiani Ethnicis, qui fabulas suas, & Mahumetanis, qui Alcoranum anteponunt Libris sacris, suadebunt illos Libros esse verè Divinos, nisi ex Testimonio indubitatae auctoritatis? ubi autem illa auctoritas, nisi in Ecclesia?

2. Itaque in definitione Fidei ultimò adduntur hæ voces, *quæ Deus nobis per Ecclesiam credenda proposuit*, ut significetur revelationem divinam nobis non innotescere, nisi per propositionem Ecclesiæ, juxta tritum illud sancti Augustini effatum Lib. contra Epistolam Fundamenti cap. 4. *Evangelio non crederem, nisi me Ecclesiæ Catholicæ commoveret auctoritas.*

Sed meritò quæritur, quibus signis evidens fiat sive infidelibus, sive fidelibus tam insigne donum collatum esse Ecclesiæ, ut nec falli, nec fallere possit, auctoritatemque habeat compellendi contumaces ad parendum suis definitionibus? quod enim Catholici docent de Ecclesia, idipsum dicere potest quivis infidelis de sua secta. Mahumetanus v. g. dicet se ideo credere Alcorano, quia societas, in qua natus est, Librum illum uti sacrum & divinum proponit. Unde plurimi  
refert

refert ut Christianus certis & indubitatis argumentis demonstret Ecclesiæ Christianæ eas dotes competere, quas nulla alia secta probabiliter sibi tribuere possit.

R. Vera Christi Ecclesia per motiva, quæ credibilitatis vocant, putà per prophetias & miracula, evidenter demonstrat se esse à Deo institutam ac planè divinam, proindeque veracem, & infallibilis auctoritatis. Illa enim societas non nisi vera docet, cujus doctrinæ Deus evidens testimonium perhibet: atqui Deus per motiva credibilitatis evidens testimonium perhibet Ecclesiæ: Ergo. Consule quæ in hanc rem latè persecuti sumus Tract. de Incarnat. à pag. 51. ad 75.

Nec dicas, motiva illa militare potius pro Scripturis sacris quàm pro Ecclesia; namque Ecclesia coruscabat miraculis, & doctrinæ ejus credebatur in mundo, priusquam scripssissent Apostoli. Quin S. Irenæus testatur sua ætate, nempe tertio ineunte sæculo, quasdam nationes ad illud usque tempus Fidem servasse sine Scripturis; ac proinde miracula, & alia credibilitatis motiva litteris Apostolorum non favent: nisi mediante Ecclesia, hoc est, quatenus Ecclesia jam in culmine auctoritatis posita, ut loquitur S. Augustinus, proponit Libros sacros uti continentes eam ipsam doctrinam, quam ubique sparferat, priusquam adornarentur.

Dixi, *litteris Apostolorum*; certum est enim oracula Prophetarum evincere Libros illorum esse Divinos.

Ergo Ecclesia sine scripto docebat, & credebatur propter motiva credibilitatis, se esse columnam & firmamentum veritatis, se accepisse

claves regni cœlorum , ut quæcunque solveret, aut ligaret super terram , rata haberentur in cœlis ; qui illam audiret , Christum audire , & qui sperneret, Christum quoque spernere , atque adeo habendum ut Ethnicum & Publicanum.

Ergo Ecclesia testimonium antecedenter non accipit à Scripturis , sed consequenter duntaxat & ex hypothesi , quòd admittantur ab iis , quos docet , respectu quorum utitur argumento ad hominem , ut vocant : nempe ex concessis Scriptura sacra est verbum Dei , atqui Scriptura sacra tribuit Ecclesiæ infallibilem auctoritatem , visibiles notas præbet , quibus certò secernitur vera Christi Ecclesia à sectis Hæreticorum & Schismaticorum , quæ se falsò Christianas vocant. Sed si quis Fidem denegaverit Scripturis sacris , nihilominus Ecclesia auctoritatem suam , & cætera insignia tuebitur ex motivis credibilitatis ; & ex constanti Traditione demonstrabit nihil quidquam nunc se docere , quod non docuerint , & miraculis confirmaverint Apostoli , & primi ejus Pastores : ac proinde non est vitiosus circulus , quo Scriptura probatur per Ecclesiam , & Ecclesia per Scripturam , ut demonstravimus in Prolegomenis pag. 175. Porro quæ hîc summatim colligimus , pluribus Capitibus , & distinctis Paragraphis probata sunt in iisdem Prolegomenis , ad quæ Lectorem remittimus.

Dices : mens necessariò assentitur propositioni evidenter veræ : atqui plures Judæi , ac Gentiles non assentiebantur signis & virtutibus , quæ per Apostolos & eorum Successores videbant fieri , ergo signa illa non erant evidenter vera , nec sufficienter reddebant credibilia , quæ docebantur.

Distin-



Distinguo majorem , Mens necessariò assentitur propositioni evidenter veræ , si attendat , ut par est & eam percipiat , Concedo : si negligat , & ex pravo voluntatis affectu aliò avocetur , Nego majorem ; qui enim præmissas demonstrationis non perpendit , nec ponderat , facilè negat consequentiam , quæ ex iis evidenter elicitur . Porro Judæi & Gentiles increduli , illi nimis addicti legalibus , isti suis superstitionibus , satis non attendebant ad ea , quæ fiebant & dicebantur ab Apostolis .

Instabis : atqui Scribæ & Pontifices Judæorum prævio diligenti examine comprobarunt , cæcum à nativitate , fuisse à Christo illuminatum , Joannis . 9 . adeo persuasi fuerunt , veram fuisse Lazari resurrectionem , & minimè fictitiam , ut cogitaverint ipsum interficere , Joan . 12 . & de claudo , quem sanaverat S . Petrus , Act . 4 . sic pronuntiarunt : *notum signum factum est per eos . . . manifestum est , & non possumus negare* , neque propterea crediderunt : Ergo .

Distinguo anteced . Non crediderunt , & in eo peccarunt contra prudentiam & rectam rationem , Concedo : non crediderunt defectu motivi sufficienter demonstrantis , doctrinam Christi esse omninò credibilem , Nego antecedens . Ex hoc enim argumento solum concludi potest , satis non esse ad credendum , quòd objectum evidenter credibile proponatur ; sed insuper requiri , ut voluntas piè afficiatur ad credibilia , determinetque intellectum ad assensum ; nam ex dictis , nemo credit nisi volens , actus Fidei est Liber , & minimè necessarius : Atqui sola gratia voluntatem disponit , frangit ejus duritiem , & aperit corda au-

dientium, ut intendant iis, quæ extrinsecus proponuntur juxta illud Act. 16. vers. 14. cujus (Lydiæ) Dominus aperuit cor intendere iis, quæ dicebantur à Paulo. Et cap. 13. vers. 18. crediderunt, quotquot erant præordinati ad vitam æternam.

Q. 2. *Estne necesse, fieri Ecclesiæ novam revelationem, ut dogmata Fidei definiat, infallibiliterque proponat uti veritates à Deo revelatas?*

R. Minimè; quia Christus omnia, quæ ad Religionem Christianam pertinent, Apostolis immediatè revelavit, Joannis 15. vers. 15. *Omnia, quæcunque audivi à Patre meo, nota feci vobis.* Cap. 16. vers. 13. *Cùm autem venerit ille Spiritus veritatis, docebit vos omnem veritatem.* Et cap. 14. vers. 26. *Ille vos docebit omnia, & suggeret vobis omnia, quæcunque dixerò vobis.* Act. 15. Apostoli congregati ad finiendam controversiam circa legalia natam, non novam revelationem à Deo expectant, sed ex Scripturis, & ex iis, quæ contigerant, ex quo Evangelium fuerat promulgatum, judicium ferunt, conveneruntque Apostoli & Seniores videre de verbo hoc. *Cùm autem magna conquisitio fieret, surgens Petrus, dixit, &c.* Quibus notatur studium & diligentia Apostolorum ad explicandum, quod jam revelatum fuerat: & hunc morem hætenus Ecclesia observavit in Conciliis Generalibus, in quibus Patres Scripturam & Traditionem consulunt, priusquam aliquid statuant circa motas controversias.

Q. 3. *Quomodo ergo Ecclesia infallibiliter proponit, cùm nova ei non fiat revelatio?*

R. Auxilio Spiritus Sancti, quem Christus promisit nunquam ei defuturum, Matth. 28. vers. ultimo: *Ecce, ego vobiscum sum omnibus diebus usque*  
ad

*ad consummationem sæculi.* Quæ verba non solum Apostolos, sed & eorum successores evidenter spectant; cum Apostoli non essent victuri usque ad consummationem sæculi, nisi in suis successoribus. Plura vide in Prolegomenis cap. 9. §. 1. de infallibilitate Ecclesiæ.

## §. III.

*Confectaria quædam colliguntur ex definitione Fidei.*

**E**x definitione Fidei superioribus Paragraphis elucidata, plura veluti necessariæ conclusiones deducuntur.

1. Quòd Fides sit una specie, juxta illud Ephes. 2. *Unus Dominus, una Fides, unum Baptisma.* Quia omnis habitus vel actus speciem desumit ab objecto formali, adeo, ut, si unicum habeat objectum formale, sit unus specie habitus vel actus; charitas v. gr. five tendat in Deum, five in proximum, una est specie virtus; quia unicum ejus objectum formale est bonitas divina: atqui Fides unicum habet objectum formale, scilicet primam veritatem: Fides five sit informis, five formata, viva, aut mortua; implicita, specie & essentialiter una est, aliquando quidem imperfecta, aliquando verò perfecta; quemadmodum homo idem est essentialiter, five sit puer, five adolescens, five juvenis.

2. Fides Theologica non reperitur in Hæreticis, neque in Beatis, neque in damnatis.

Non in Hæreticis, quamvis plura mysteria credere videantur; quia carent motivo formali Fidei, quod est prima veritas per Ecclesiam credenda proponens. Unde sicut cognitio eclipsis

Lunæ non est scientia in rustico, quia ignorat causam hujusce effectus: ita Fides, qua Hæreticus credit v. gr. mysteria Trinitatis & Incarnationis, non est Fides Theologica & supernaturalis; quia ad credenda illa mysteria non movetur veritate divina, sed persuasione humana: Sic qui vel unum hominem non diligit, neque Deum, neque alios homines charitate diligit, sed dilectione merè humana, juxta illud 1. Joan. 4. vers. 20. *Si quis dixerit, quoniam diligit Deum, & fratrem suum oderit, mendax est.*

Non in Beatis: tum, quia visio Dei intuitiva omnem excludit obscuritatem: tum quia Fides est rerum sperandarum, atqui Beatis nulla est res speranda, cum possideant, quod in via speraverant. Et hæc ratio efficaciter concludit pro damnatis, etiam iis, qui fidem ad extremum vitæ servarunt; quia illis omnibus nulla superest spes, sed mera desperatio.

In animabus verò, quæ in purgatorio detinentur, Fides agnoscenda est, utpote quæ adhuc beatitudinem sperent, & eam obscure cognoscant.

Dices 1. Idem judicium ferri debet de Hæreticis, qui unum aut alterum duntaxat Fidei articulum non credunt, ac de Theologo, qui, cum in aliqua parte erret, in cæteris tamen rectè sentit; & de quolibet fideli, qui semel aut bis peccavit contra aliquam virtutem, putà sobrietatem: atqui nec Theologus, nec fidelis amittunt habitum, quo instructi erant ille Theologiæ, iste sobrietatis: Ergo nec Hæreticus habitum Fidei Theologiæ respectu eorum, quibus assentitur.

Nego maj. Disparitas est 1. quoad Theologiam, quia in Theologia diversa sunt media, quibus



bus applicantur propositiones Fidei singulis ejus conclusionibus: sæpius autem contingit, tyronem Theologum defectu medii, non videre connexionem quarundam conclusionum, cum principiis Fidei, & ideo eas negare, cum tamen aliis firmiter adhæreat; quia suppetunt ei rationes, per quas certò eas deducit ex propositionibus. At in materia Fidei auctoritas Ecclesiæ est unicum, quo nobis constare possit, aliquid esse à Deo revelatum, ac proinde Hæreticus, qui existimat, Ecclesiam falli circa Fidei articulum, quem non vult credere, nullum habet medium infallibile ad assentiendum aliis articulis, & ita eos credit ex proprio judicio & naturali persuasione, nullatenus verò ex fide Theologica.

Quoad verò morales virtutes: vel sunt infusæ & supernaturales: vel sunt acquisitæ & naturales. Si primum, pereunt per quemlibet actum lethaliter malum; quia actus ille, utpote actualis aversio à Deo, destruit unionem cum Deo, scilicet gratiam sanctificantem, seu charitatem, in qua omnes virtutes morales infusæ radican-  
 Si secundum, distinguendum est cum S. Thoma qu. 5. art. 3. ad tertium, duplex motivum in virtutibus moralibus acquisitis: aliud est generale, & omnibus virtutibus commune, nempe obedire Deo præcipienti, à qua generali obedientia qui per contemptum recedit, omnem veram virtutem amittit; quia virtus nec esse, nec concipi potest sine communi & transcendentali illa obedientia: aliud verò est motivum proximum, cuiuslibet virtuti acquisitæ proprium, scilicet specialis honestas, quæ in quolibet actu virtutis refulget: ejusmodi autem honestas, cum sit intrinseca

actui, tam multiplex est, quàm ipse actus, ac proinde fieri potest, ut quis hanc sobrietatis honestatem non intendat, absque eo quòd censeatur abjicere omnem sobrietatem, quemadmodum si quis oderit vel unum hominem, charitatem prorsus amittit, quia recedit à bonitate divina quæ est unicum charitatis motivum extrinsecum singulis charitatis actibus, nec proinde in illis dividitur, sicut honestas moralis in actibus virtutum moralium.

Dices 2. Beati credunt futuram corporum resurrectionem, & nonnulla identidem Deus ipsis revelat: ergo in Beatis est Fides Theologica.

Nego consequentiam; Quia sublato primario objecto virtutis, tollitur ipsa virtus: atqui res sperandæ sunt primum objectum Fidei Theologicæ. Ergo. Beati itaque, cum intuitivè videant primam veritatem, necessariò & absque speciali virtute assentiuntur iis, quæ ipsis evidenter revelat.

3. Fides à tempore Apostolorum non crevit quoad substantiam; quia Fides non post crescere quoad substantiam, nisi fiat Ecclesiæ nova revelatio; cum motivum Fidei sit divina revelatio: atqui ex dictis §. præcedenti, à tempore Apostolorum non fit Ecclesiæ nova revelatio: Ergo.

Dixi 1. à tempore Apostolorum; namque certum est, ab Adamo usque ad Christi tempus, quod dicitur Gal. 4. plenitudo temporis, quia Fidei mysteria tum plenius fuerunt revelata; Deum plura revelasse, novos identidem exaratos fuisse Libros, quos fide divina credimus esse sacros. Cum autem Apostoli post ascensionem Christi plura scriperint afflatu Spiritus Sancti, vel hoc uno argu-  
mento

mento adducitur ad credendum, ipsos revelationem accepisse, non solum ex ore Christi Domini, sed etiam interiori inspiratione Spiritus Sancti, juxta illud Joan. 16. vers. 13. *Cum autem venerit ille Spiritus veritatis, docebit vos omnem veritatem.*

Quin S. Thomas qu. 1. art. 7. vult, aliquo sensu dici posse articulos Fidei à tempore Adami non crevisse quoad substantiam, quatenus nempe omnia, quæ successu temporis revelata sunt, implicite continebantur in iis, quæ credidit Adamus, quemadmodum omnes conclusiones continentur in primis principiis.

Ad prima autem Fidei principia pertinet, quòd credatur, Deum existere; & providere hominum saluti, ut habetur Hebr. 11. *Credere . . . oportet accedentem ad Deum, quia est, & inquirentibus se remunerator sit.* Quem textum expendens Angelicus Doctor, sic scribit: *In esse divino includuntur omnia, quæ credimus in Deo æternaliter existere, in quibus nostra beatitudo consistit. In fide autem providentiæ includuntur omnia, quæ temporaliter à Deo dispensantur ad hominum salutem, quæ sunt via in beatitudinem.*

Dixi 2. *Quoad substantiam*; certum enim est, Ecclesiam, ea, quæ Apostolis fuerunt obscurius tradita, in dies magis explicare, & contra nascentes hæreses clarius proponere, sic definiit tum esse Baptismum ab Hæreticis collatum, cum Sanctus Cyprianus, & plures alii de eo ambigerent. Sic in variis Conciliis accuratius & distinctius exposuit quæ revelata sunt, atque adeo credenda circa mysteria Trinitatis, Incarnationis & Gratiae. Ad quæ respiciens Vincentius Lirinensis commo-  
nitorio 1. cap. 27. scribit: *Quod est, depositum custodi, 1. Tim. 6. id est, quod tibi creditum est non*  
quod

quod à te inventum quod accepisti, non quod excogitasti: rem non ingenii sed doctrinæ: non usurpationis privatae, sed publicæ Traditionis, rem ad te perductam, non à te prolata: in qua non auctor debes esse, sed custos; non institutor, sed sectator: non ducens, sed sequens. Depositum, inquit, custodi, Catholicæ Fidei talentum inviolatum, illibatum conserva. Quod tibi creditum est, hoc penes te maneat, hoc à te tradatur. Aurum accepisti, aurum redde: nolo mihi pro aliis alia subicias, nolo pro auro impudenter plumbum, aut fraudulentè æramenta supponas, nolo auri speciem, sed naturam planè . . . doctrina esto spiritualis tabernaculi Beseleel, pretiosas divini dogmatis gemmas exsculpe, fideliter coapta, adorna sapienter, adjice splendorum, gratiam, venustatem. Intelligatur te exponente, illustrius, quod antea obscurius credebatur. Per te posteritas intellectum gratuletur, quod ante vetustas non intellectum venerabatur, eadem tamen quæ didicisti, doce, ut cum dicas novè, non dicas nova. Cap. 3. in exemplum semen adducit, quod idem manens germinat, crescit, folia explicat, eademque in messem maturescit; unde sic concludit: quodcunque igitur in hac Ecclesiæ Dei agricultura fide patrum satum est, hoc idem filiorum industria decet, excolatur & observetur, hoc idem floreat & maturescat, hoc idem proficiat & perficiatur. Fas est enim ut prisca illa cœlestis Philosophiæ dogmata processu temporis limentur, poliantur; sed nefas est ut amittantur, nefas ut detruncantur, ut mutilentur. Accipiant licet evidentiam, lucem, distinctionem; sed retineant necesse est plenitudinem, integritatem. Et cap. 32. Christi verò Ecclesia sedula & cauta depositorum apud se dogmatum custos, nihil in his unquam permutat, nihil minuit, nihil addit, non amputat necessaria, non apponit superflua, non amittit sua, non usurpat aliena; sed omni industria hoc unum studet, ut  
vetera



*vetera fideliter sapienterque retractando, si qua illa sunt antiquitus informata & inchoata, accuset & poliat: si qua jam expressa & enucleata, consolidet, firmet: si qua jam confirmata & definita, custodiat.*

Dices: ex S. Gregorio Hom. 16. in Ezech. quantò mundus ad extremum ducitur, tantò nobis æternæ scientiæ aditus largiùs aperitur: ergo doctrina Religionis Christianæ aliunde est petenda, quàm à veteribus.

Distinguo anteced. Quantò mundus ad extremum ducitur hoc est, ad extremam ætatem, quæ cœpit in Christo, juxta illud Apostoli, 1. Corinth. 10. *In quo fines sæculorum devenerunt*, Concedo: quantò ad extremum, scilicet ultimæ ætatis mundi, quam immediatè sequetur omnium resurrectio, & judicium universale; subdistinguo: aditus scientiæ largiùs aperitur respectu multitudinis, quia plura in dies ab Ecclesia definiuntur, & explicitè credenda proponuntur, Concedo: respectu omnium Pastorum, & maxime Apostolorum, quasi non cognoverint explicitè quidquid in Scripturis & Traditione continetur, Nego anteced. Itaque distinguendum est inter capita seu duces multitudinis, & ipsam multitudinem. Generatim loquendo Principes & optimates in quolibet statu naturæ corruptæ quo fuerunt Christo propinquiore, eo plura cognoverunt, & explicitè crediderunt, ut Apostoli in nova lege, Joannes Baptista limes veteris Legis, & veluti lucifer Solem justitiæ immediate præcedens, plusquam Propheta fuit, Matth. cap. 11. David Spiritu Sancto afflatus scribit Psal. 118. *supra senes & omnes docentes*

tes se intellexisse ; Abraham anterioribus Patriarchis plenius percepit mysteria fidei. Ita S. Thomas q. 1. art. 7. ad quartum. *Ultima consummatio gratiæ, inquit, facta est per Christum, unde & tempus ejus dicitur tempus plenitudinis, Gal. 4. & ideo illi, qui fuerunt propinquiore Christo, vel ante, sicut Joannes Baptista, vel post, sicut Apostoli, plenius mysteria fidei cognoverunt.* Et in argumento *sed contra*, confirmat suam sententiam auctoritate S. Gregorii citata Homil. 16. in Ezech. cujus hæc verba refert : *secundum incrementa temporum crevit scientia sanctorum Patrum, & quanto viciniore adventui Salvatoris fuerunt, tanto Sacramenta salutis plenius ceperunt.*

Quod verò spectat multitudinem, quæ communiter scientiam salutis non accipit, nisi solitudine & industria Pastorum, dubium non est quin plura discat, quo remotior est à Christo, cum successu temporis magis ac magis elucidentur, quæ obscurius revelata sunt in Scripturis & Traditione : & sicut novæ in dies oriuntur difficultates & controversiæ, ita multiplicentur Ecclesiæ definitiones.

Dixi, *generatim loquendo* ; extraordinariè enim fieri potest, ut nonnulli remotiores plura cognoverint : tum ex speciali Dei privilegio, quod præsumere licet fuisse concessum Moyse & Isaïæ : tum ex aliorum incuria ac negligentia, qui veluti in meridiana luce oculos claudunt, & obdormiunt.

Ergo meritò proscripta est ab Academia Parisiensi anno 1665. & postmodum à Clero Gallicano anno 1700. sequens quorundam Modernorum propositio : *Puto omnia esse hodie melius examinata ; banc ob rem in omni materia, & præcipuè in morali libentiùs juniores, quàm antiquiores lego, & sequor . . .*  
doctrina

*doctrina fidei à veteribus, doctrina morum magis à junioribus petenda. Contra quam propositionem sic insurgunt sacri Antistites. Hæc propositio est temeraria, scandalosa, perniciofa, erronea, sanctis Patribus, & antiquis Doctõribus contumeliosa, spreta in moribus Christianorum componendis, necessaria Scripturarum ac Traditionum auctoritate & interpretatione, moralem Theologiam arbitrariam facit, viamque parat ad humanas traditiones & doctrinas, Christo prohibente, stabiliendas.*

Ergo novitas doctrinæ in iis, quæ spectant fidem & mores, præsefert speciem falsitatis, & ideo vitanda juxta illud mandatum Apostoli 1. Tim. 6. v. 20. *Timothee, depositum custodi, devita profanas vocum novitates.* Ex quibus verbis sic infert Vincentius Lirinensis 1. commonitorii c. 26. *si profana est novitas, sacrata est vetustas.* Et c. 9. *Id enim est proprium Christianæ modestiæ & gravitatis, non sua posteris traducere, sed à majoribus accepta servare.*

## CAPUT II.

### De interno Actu Fidei.

**C**irca internum fidei actum, duo à nobis sunt expendenda. Primum, quæ sit ejus natura & proprietates. Alterum, quæ & quanta ejus necessitas.

#### §. I.

#### *De Definitione, & Proprietatibus interni actus Fidei.*

**Q. I.** *Quid est internus Fidei actus?*

**R.** Est firmus mentis assensus rei revelatæ

velatæ ab Ecclesia propositæ, propter primam veritatem. Responsio constat ex dictis §. 2. de definitione fidei.

Q. 2. *Quot requiruntur ad illum assensum?*

R. Quinque vulgò numerantur actus necessariò prærequisiti, ut mens firmum præbeat assensum rei revelatæ. Primus est perceptio eorum, quæ prædicantur; nam ex Apostolo, Rom. 10. vers. 17. *Fides ex auditu, auditus autem per verbum Christi.* Secundus est mentis inquisitio & examen, utrùm qui verba facit, fidem mereatur? nam *Qui credit citò, levis corde est.* Eccli. 19. vers. 4. assensus fidei, utpotè actus virtutis, debet esse prudens. Tertius est iudicium, quo mens, ponderatis motivis credibilitatis, verbi gratia prophetiis, miraculis, certò iudicat omninò credibilia esse, quæ dicuntur. Quartus est alterum iudicium, quo mens non solum iudicat rem esse credibilem, sed decernit hîc & nunc esse credendam, quemadmodum ad eliciendos actus aliarum virtutum, putà misericordiæ, satis non est quòd mens iudicet laudabile esse opem ferre proximo indigenti; sed insuper requiritur ut decernat hîc & nunc ei opitulandum. Quintus est actus voluntatis, qui dicitur pia affectio & credulitatis affectus, quo voluntas imperat intellectui, ut firmum veritati revelatæ & sufficienter propositæ assensum præbeat; nam ex sancto Augustino, Lib. de Prædestinat. Sanctior. cap. 5. *Credere, vel non credere est in arbitrio voluntatis humanæ.* Et ratio est, quam capite præcedenti §. 2. attulimus, scilicet, quòd veritas proposita, quantumcunque credibilis appareat, maneat semper obscura & inevidens, nec proinde necessariò mentem deter-



determinet ad credendum, quemadmodum conclusio, quæ evidenter deducitur ex principio per se noto, per sui evidentiam intellectum cogit ad assensum.

Q. 3. *Estne necesse ad eliciendum actum fidei, ut præcedat iudicium certum de credibilitate rei credendæ?*

R. Constans est Catholicorum doctrina, agnoscendum esse ejusmodi iudicium tanquam necessarium: tum quia ex Apostolo, Hebr. 11. Fides est argumentum, seu convictio rerum sperandarum: tum quia assensus fidei debet esse prudens: ad prudentiam autem requiritur certitudo saltem moralis, aliàs non esset virtus mentis, sed opinio duntaxat. Unde meritò Innocentius XI. anno 1679. damnavit hanc propositionem: *Assensus fidei supernaturalis, & utilis ad salutem, stat cum notitia solum probabili revelationis, imò cum formidine, qua quis formidet ne non sit locutus Deus.* Definitioni Summi Pontificis subscripsit Clerus Gallicanus anno 1700. his verbis: *Hæc propositio scandalosa est, perniciosa, & Apostolicam fidei definitionem evertit.* Sed de evidentia motivorum credibilitatis ex professio egimus, Tract. de Incarnat. pag. 52. & seq.

Q. 4. *Omnes illi actus ad assensum fidei prærequisiti, suntne supernaturales?*

R. 1. Tres primi actus possunt naturaliter elici, cum objecta eorum sint naturalis ordinis, & solo lumine naturali percipi possint; quivis infidelis, v. g. naturaliter audit & percipit, quæ ab Evangelii præcone dicuntur; utrùm autem hæc ita se habeant, naturaliter potest perpendere miracula ac prophetias, quæ in confirmationem proferuntur, & ex iis judicare, quòd Evangelium sit credibile; hæc enim duo lumine naturali nota

sunt, scilicet vera miracula, verasque prophetias esse à Deo, & Deum optimum maximum iis mendacium confirmare non posse. Non est tamen negandum, quin Deus gratia sua aliquando inclinet corda hominum ad audiendum Concionatores, & ad perpendenda, quæ in doctrinæ confirmationem proferuntur, ut Act. 16. v. 14. habetur de Lydia: *Cujus Dominus aperuit cor intendere his, quæ dicebantur à Paulo.*

R. 2. Quartus actus, quo mens judicat hic & nunc esse credendum, censeri debet supernaturalis, cum inde exurgat pia voluntatis motio, & credulitatis affectus, qui ex mox dicendis est supernaturalis, favetque Concilium Arausicanum II. Can. 7. in quo sic habet: *Si quis per naturæ vigorem bonum aliquod, quod ad salutem vitæ æternæ pertinet, cogitare ut expedit, vel eligere posse confirmat absque illuminatione & inspiratione Spiritus Sancti, hæretico fallitur spiritu.*

Confirmatur responsio ex constanti Theologorum doctrina, qua docent virtutibus moralibus infusis respondere in intellectu prudentiam infusam, qua dirigantur in suis actibus supernaturalibus, ad quos non pertingit prudentia naturalis & acquisita.

R. 3. Pia voluntatis affectio, seu credulitatis affectus, est supernaturale Dei donum. Responsio est de fide. Probaturque 1. ex Scriptura Joan. 6. *Nemo potest venire ad me, nisi Pater . . . traxerit eum.* Rom. 9. *Non volentis, neque currentis, sed misereantis est Dei.* 2. Ex Can. 7. mox laudato Concilii Arausicani II. quo damnantur Semipelagiani, asserentes, initium fidei esse à nobis, quatenus voluntas nostra debet esse parata ad assentien-  
dum

dum divinæ revelationi. 3. Ex sanctis Patribus: *Credere*, inquit sanctus Augustinus, Lib. de Prædest. Sanctorum cap. 5. *vel non credere est in arbitrio voluntatis humanæ, sed præparatur voluntas à Domino.* Et Enchiridion, cap. 3. expendens verba Apostoli, *non volentis . . . est*, sic scribit; *restat ut propterea dictum intelligatur, non est volentis, &c. ut totum Deo detur, qui hominis voluntatem præparat adjuvando, & adjuvat præparatam.* Et S. Fulgentius, Lib. de Incarnat. & Gratia cap. 18. *ut velimus credere*, inquit, *misericiordiæ prævenientis illuminamur dono.*

Q. 5. *Firmus ille fidei assensus estne simplex, seu complexa mentis operatio, an iudicium, an discursus?*

R. 1. Non est mera apprehensio; quia apprehensio sive simplex, sive complexa, est prima mentis operatio, neque affirmans, neque negans, ut si quis apprehendat illos terminos, *Deus justus, Deus injustus*, nihil affirmando aut negando: atqui per assensum fidei affirmamus, quid sit Dei proprium v. g. quòd sit justus & negamus, quid sit ab eo alienum, putà quòd sit injustus: ergo assensus fidei non est mera apprehensio: Difficultas solum est, utrùm sit discursivus, pertineatque ad tertiam mentis operationem.

R. 2. Assensus fidei non est discursivus, nisi virtualiter.

Probatur; Assensus discursivus elicitur ex alio præcedenti assensu dato præmissis, v. g. ex præmissa fidei propositione, *Christus est homo*, cui assentior utpotè quæ sit expressè revelata, elicio contra Apollinarem hunc assensum, ergo Filius Dei assumpsit animam rationalem; quia homo essentialiter est animal rationale; prior assensus est iudicium, & posterior est discursus Theologicus:

atqui assensus fidei non elicitur ex alio præcedenti assensu dato præmissis ; sed mens apprehensis hisce terminis , *Deus in dicendo vera dixit* , statim absque illatione & discursu assentitur propositioni à Deo revelatæ : Ergo assensus fidei non est discursus , sed iudicium.

Confirmatur. Deus cùm homini loquitur , non rationes , sed instar Iudicum solam opponit auctoritatem , cū mens humana omne debet obsequium : *Nec decebat aliter* , inquit Lactantius , Lib. 3. Institut. cap. 12. *ut cū Deus ad hominem loqueretur , argumentis assereret suas voces ; tanquam ei fides non haberetur ; sed ut oportuit , est locutus quasi rerum omnium maximus Iudex , cujus non est argumentari , sed pronuntiare verum.*

Dices : Sicut mens non assentiretur huic propositioni , Christus est risivus , nisi prius cognosceret Christum esse hominem ; ita nec iudicaret Christum esse hominem ; nisi perspicuum ipsi esset , Deum illud dixisse , & in dictis esse veracem : atqui prior assensus est illativus , ac discursivus : ergo & posterior.

Nego maiorem & paritatem ; Nam motivum proximum & immediatum hujus assensus , ergo Christus est risivus , non est divina revelatio ; sed connexio hujusce propositionis cum alia immediate revelata , nempe Christus est homo ; ac proinde prius cognoscatur & credatur necesse est Christum esse hominem , quàm ex ea eliciatur , Christum esse risivum. Contra verò motivum proximum & immediatum assensus fidei , est prima veritas , seu revelatio , per quam immediate res proposita est credibilis & actu creditur ; & sicut facultas visiva uno actu fertur in colores & lucem,



cem, per quam sunt visibiles; ita mens unico assensu adhæret huic propositioni revelatæ, Deus est prima veritas, quæ procul dubio non elicitur ex nulla præmissa prius cognita.

Instabis: Atqui ex ista propositione eliciuntur cæteri assensus fidei, quemadmodum prima principia in scientiis cognoscuntur absque discursu, sed ex iis eliciuntur omnes conclusiones; ideò enim fide divina creduntur, quæ Deus dixit, quia Deus est prima veritas, & in dicendo infallibilis auctoritatis.

Nego subsumptum. Non enim credimus Deo dicenti, Christus est Deus, quia Deus dixit se esse primam veritatem, ita ut prior propositio non sit credibilis, nisi propter connexionem, quam habet cum posteriore; sed immediatè eam credimus propter primam veritatem in illa relucen-tem; sicut facultas visiva per unam & eandem visionem percipit colores & lucem, per quam colores sunt visibiles.

Dixi: *Assensum fidei non esse discursivum nisi virtualiter*; Quia sicut scientia Angelorum, licèt non sit formaliter discursiva, cum uno & eodem actu percipiunt conclusiones in principiis, & principia in conclusionibus: æquivalet tamen discursui, & absque imperfectione se extendit ad ea omnia, quæ mente non possumus assequi, nisi successivè procedendo à noto ad ignotum. Similiter assensus fidei, quamvis simul terminetur ad rem revelatam, tanquam ad objectum materiale, & ad primam veritatem revelantem, tanquam ad objectum formale; virtualiter tamen continet huncce discursum: Illud est verum & omninò credendum, quod est à prima veritate revelatum:

atqui prima veritas revelavit Christum esse Deum:  
Ergo.

Q. 6. *Assensus fidei estne certior scientia, & qualibet alia virtute intellectuali?*

Nota, triplicem esse certitudinem, scilicet objectivam, formalem, & subjectivam. Certitudo objectiva, est firma & constans veritas objecti, quod cognoscitur. Formalis est firma veritas medii seu rationis, per quam objectum cognoscitur, sicut existentia creaturarum est certum medium & firma ratio, per quam cognoscimus Deum existere. Certitudo subjectiva est firma mentis adhæsiō objecto suo.

Certum est, assensum fidei non esse certitudine objectiva certiolem scientia, v. gr. Theologica, Metaphysica, aliisque virtutibus intellectualibus; quia Deus æquè est primarium objectum Theologiæ & Metaphysicæ, ac Fidei: atqui Deo nulla esse potest veritas firmior ac constantior: Ergo difficultas solum superesse potest de certitudine formali; seu medii & subjecti.

R. 1. Assensus fidei est certior certitudine formali, seu medii assensu cujuslibet scientiæ; quia nititur medio, seu motivo certiore, & magis infallibili, nempe prima veritate.

Dices 1. Lumen naturale, quo nituntur omnes scientiæ, est æquè certum ac lumen fidei, cum utrumque sit à Deo: Ergo.

Nego anteced. Quia sicut principia, ex quibus eliciuntur conclusiones, sunt certiora ipsis conclusionibus; ita prima veritas, cujus lumen rationis est impressio quædam & participatio, infinitè certior est lumine rationis. Adde, nonnulla quandoque rationi apparere certa & evidentialia, quæ

quæ tamen vera non sunt. Unde sanctus Thomas quæst. 4. art. 8. ad secundum scribit, quòd etsi visio cæteris paribus sit certior auditu, nihilominus: *Si ille, inquit, à quo auditur multum excedit visum videntis, sic certior est auditus, quàm visus. Sicut aliquis parvæ scientiæ magis certificatur de eo, quod audit ab aliquo scientifico, quàm de eo, quod sibi secundum suam rationem videtur. Et multò magis homo certior est de eo, quod audit à Deo, qui falli non potest, quàm de eo, quod videt propria ratione, quæ falli potest.*

Dices 2. Illa cognitio est certior, quæ dubitationem non admittit: atqui scientia non admittit dubitationem, assensus verò fidei admittit saltem involuntariam: Ergo scientia est fide certior.

Distinguo minor. Assensus Fidei dubitationem admittit ex parte subjecti, propter rei revelatæ inevidentiam, Conc. Ex parte motivi, Nego minor. Unde,

R. 2. Assensus Fidei secundum quid est minus certus ex parte subjecti assensu dato conclusioni demonstrativæ: absolutè tamen & simpliciter est certior quolibet alio assensu. Ita S. Thomas cit. art. 8.

Prima pars probatur; Quia ex mox concessis assensus Fidei admittit dubitationem saltem involuntariam in credente, quam evidentia scientiæ absolutè excludit. Idèò autem Fidelis nonnunquam pulsatur timore, ne fallat eum Fides sua: vel quia non semper advertit, ut par est, ad motivum, cui innititur Fides Christiana, quemadmodum rusticus nunc assensum negat conclusioni, quem priùs dederat, cùm urgeretur evidentibus rationibus, quæ jam ex ejus mente excide-

runt ; vel quia myſteria noſtra naturam ſuperant, nec ea mens humana per ſe ipſam attingit , niſi fallaci lumine. Unde ſicut ſenſuum fallaciis obſiſtat necesse eſt , cū verſatur circa ſpiritualia naturalis ordinis ; ſic ſecum eam pugnare oportet, cū ad ſupernaturalia aſſurgit verbo Dei innixa.

Secunda pars probatur ; Quia illud abſolutè & ſimpliciter certius eſt certitudine ſubjecti, cui ſubjectum ita adhæret, ut paratum ſit renuntiare cuilibet evidentia, quæ videri poſſet oppoſita aſſenſui jam dato ; atqui Fidelis ita firmiter adhæret rebus revelatis propter primam veritatem infinite credibilem , ut paratus ſit renuntiare cuilibet in contrarium rationis iudicio ; quia in ipſis terminis repugnat, primam veritatem eſſe falſitatem ; Unde ſanctus Auguſtinus, Lib. 7. Confess. cap. 10. *Facilius, inquit, dubitare me vivere, quam non eſſe veritatem, quæ per ea, quæ facta ſunt, intellecta conſpicitur.*

Ergo Fides omninò perit in eo , qui cum advertentia contumaciter dubitat , vel de una propoſitione, quam Eccleſia definit eſſe à Deo revelatam , probaturque iisdem argumentis , quibus ſupra negavimus, ullam remanere Fidem Chriſtianam in Hæreticis.

Q. 7. *Aſſenſus Fidei eſtne ita bonus , ut fieri non poſſit malus ex prava intentione, puta inanis gloriæ ?*

R. Affirmativè ; Quia aſſenſus Fidei non poteſt eſſe niſi à gratia & ex impulſu Spiritus Sancti ; Fides enim donum Dei eſt, Ephes. 2. atqui repugnat Spiritum Sanctum impellere ad malum culpæ : ergo qui ex inani gloria , aut quolibet alio pravo motivo vellet credere , non eliceret niſi actum



actum Fidei humanæ , ut supra diximus de Fide Hæreticorum.

Q. 8. *Assensus Fidei estne meritorius?*

R. Si assensus sit Fidei vivæ, quæ per charitatem operatur, est meritorius de condigno : si verò sit Fidei mortuæ & informis , est meritorius duntaxat de congruo.

Prima pars probatur 1. ex Scriptura, Hebr. 11. *Sancti per fidem vicerunt regna , operati sunt justitiam , adepti sunt repromissiones.* Gal. 5. v. 6. *In Christo Jesu neque circumcisio aliquid valet , neque præputium , sed Fides , quæ per charitatem operatur.* 2. Timoth. 4. vers. 7. & 8. *Fidem servavi , in reliquo reposta est mihi corona justitiæ.* 2. Ratione ; quia omnes conditiones ad meritum de condigno requisitæ , quas supra numeravimus , pag. 141. conveniunt assensui fidei vivæ ; est enim actus bonus , supernaturalis , ab homine justo viatore , liberè elicitus , adjunctam habens Dei promissionem , qui ..... *credit in me , non morietur in æternum ,* Joan. 12. vers. 26.

Secunda pars probatur 1. ex Scriptura , Roman. 3. vers. 28. *Arbitramur enim justificari hominem per Fidem.* Et cap. 5. vers. 1. *Justificati ergo ex Fide.* 2. Ex Concilio Tridentino Sess. 6. cap. 6. ubi statuit , Fidem primo loco disponere ad justificationem. 3. Ex sancto Augustino , qui Epistola 186. aliàs 106. ad Paulinum sic habet : *Si quis dixerit , quòd gratiam benè operandi Fides mereatur , negare non possumus , imò verò gravissimè confitemur.* Et ante eum scripserat sanctus Ambrosius , Lib. 2. de Pœnit. cap. 8. *Fides impetrat veniam tamquam ex singrapha.* Cùm autem Fides mortua , & informis sit sine gratia justificante & charitate , meritum

ejus non est de condigno, sed de congruo tantum; quia ut diximus citato loco de Merito, status gratiæ sanctificantis requiritur ad meritum de condigno, juxta illud 1. Cor. 13. *Si . . . . charitatem autem non habuero, nihil sum . . . . nihil mihi prodest.*

Q. 9. *Rationes, quæ movent ad credendum minuuntne fidei meritum?*

R. 1. Si movent, ut prudenter credatur, quemadmodum motiva credibilitatis, nullatenus minuunt fidei meritum; quia quod efficit, ut assensus fidei sit prudens, procul dubio non minuit ejus meritum: atqui ita se habent motiva credibilitatis: Ergo.

R. 2. Si rationes illæ sunt causa assensus, adeò, ut sine iis voluntas non esset parata ad imperandum assensum, meritum minuunt, juxta vulgatum illud S. Gregorii effatum, Homil. 28. in Evangel. *Fides non habet meritum, cui humana ratio præbet experimentum.* Quia, ut ratiocinatur S. Thomas, qu. 2. art. 10. *Sicut homo actus virtutum moralium debet exercere propter judicium rationis, non propter passionem: ita credere debet homo ea, quæ sunt fidei, non propter rationem humanam, sed propter auctoritatem divinam:* Ergo quemadmodum non exercet actum virtutis moralis, qui facit ea, quæ virtutis sunt, sed ex passione, v. g. delinquentem corripit ex præcipiti iræ impetu, opem fert indigenti ex inanis gloriæ appetitu: similiter actum fidei non elicit, nec proinde meretur, qui ad assentiendum non inducitur auctoritate divina, sed evidenti ratiocinio.

R. 3. Rationes, quæ se habent consequenter ad assensum fidei, ut si quis firmus in fide, & ex  
deside-

desiderio illius fovendæ, tum in se, tum in aliis, excogitet rationes, quibus res sperandæ amplius credibiles appareant, sitque paratus ad satisfactionem omni poscenti rationem de ea, quæ in ipso est fide & spe, ut optat S. Petrus 1. Epist. cap. 3. nedum minuant fidei meritum, quin illud augment: denotant enim propensiolem voluntatem in ea, quæ sunt fidei. Sed si in fide hæsitans quærit rationes, quibus in ea firmetur, amittit meritum fidei; quia ex Tertullian. Lib. de Præscript. cap. 11. *Nemo quærit, nisi aut qui non habuit, aut perdidit, nempe fidem.*

R. 4. Rationes, quæ rem revelatam demonstrant, v. g. Dei existentiam, non minuunt meritum, si idem in voluntate maneat credulitatis affectus; *Quia*, inquit S. Thomas cit. art. 10. ad 2. *non diminuunt rationem charitatis, per quam voluntas est prompta ad ea credendum, etiamsi non apparerent, alioquin Theologia esset saluti exitiosa.* Sic virtutis opus, etsi privato amori arrideat, utpotè honorificum & quæstuosum, non erit propterea minus laudabile & præmio dignum, si voluntas, sprete ejusmodi illecebris, recta ad Deum tendat.

Q. 10. *Credere Deo, credere Deum, & credere in Deum, suntne actus essentialiter diversi?*

R. Minimè, quia habent idem motivum, seu objectum formale, scilicet, primam veritatem, quin & idem objectum materiale primarium, nempe Deum, ad quem omnia credenda referuntur: *Per illa tria*, inquit S. Thomas qu. 2. art. 2. ad 1. *designatur unus & idem actus habens diversam rationem ad fidei objectum.* Responsio patebit ex ipsa terminorum expositione. Itaque

Credere

Credere Deo, est credere vera esse, quæ Deus dixit propter infinitam ejus in dicendo veracitatem. Credere Deum, est credere Deum esse, ex eodem motivo divinæ in dicendo veracitatis. Credere in Deum, est credere Deum, non simpliciter, sed ex affectu charitatis tendentis in Deum, tanquam in ultimum finem. Credere primo & secundo modo, est commune omnibus fidelibus justis & peccatoribus: credere autem tertio modo, est proprium justorum. Credere primo & secundo modo duntaxat, est actus fidei informis, imperfectæ & mortuæ: credere tertio modo, est actus fidei formatæ, perfectæ & vivæ, de qua Apostolus, Hebr. 10. vers. 22. *Accedamus cum vero corde, in plenitudine fidei*: Fides enim plena ex mente & corde, ex cognitione & amore simul proficiscitur. Hanc fidem Scripturæ exigunt, Joan. 6. *Hoc est opus Dei, ut credatis in eum, quem misit ille*. Non ait, ut credatis ei, vel eum, sed in eum quem ille misit. Cap. 11. *Qui credit in me, etiamsi mortuus fuerit, vivet*, cap. 14. *creditis in Deum, & in me credite*. Hanc fidem profiteamur in utroque Symbolo, Apostolorum nempe & Constantinopolitano: *Credo in Deum Patrem omnipotentem . . . & in Jesum Christum Filium ejus unicum . . . & in Spiritum Sanctum*. Justorum est illa professio, non peccatorum, utpotè, qui in Deum non tendant, tanquam in suum ultimum finem; cum solus Deus sit finis noster ultimus & beatitudo, in illum solum credere licet. Credimus homini probi, & hominem probum. Credimus Ecclesiæ & Ecclesiam; sed neque in hominem probum, neque in Ecclesiam, neque in ullam creaturam credere fas est; quia nulla creatura potest esse finis noster

ulti-



ultimus. Ita ferè S. Augustinus Tract. 29. in Joan. ubi expendens illa Christi verba, *hoc est opus Dei, ut credatis in Deum, quem misit ille*, sic scribit: *ut credatis in Deum, non, ut credatis ei. Sed si creditis ei: non autem continuo, qui credit ei, credit in eum. Nam & demones credebant ei, & non credebant in eum. Rursum etiam de Apostolis ipsius possumus dicere: Credimus Paulo, sed non credimus in Paulum: credimus Petro, sed non credimus in Petrum.* Credenti enim in eum, qui justificat impium, deputatur Fides ejus ad justitiam: *Quid est ergo credere in eum? Credendo amare, credendo diligere, credendo in eum ire, & ejus membris incorporari. Ipsa est ergo Fides, quam de nobis exigit Deus, & non invenit quod exigit, nisi donaverit quod inveniat.* Similia habet sanctus Doctor Serm. 144. aliàs 61. de verbis Domini.

Q. 11. *Estne proprium fidei purificare corda hominum?*

R. Affirmat S. Petrus, Act. 15. *Fide*, inquit *purificans corda eorum.* Et ratio est, quia res tum dicitur pura, cum non est permixta alteri, utique viliori; nam si meliori admisceatur, purior evadit: argentum, v. gr. sine admixtione stanni, aut alicujus vilioris metalli purum est, purius autem cum auro mixtum: atqui Fides corda hominum separat à rebus infimis, & transfert ad ea, quæ sunt meliora & speranda: informis quidem imperfectè, formata verò perfectè: Ergo.

Minor ostenditur. Ac 1. quidem Fides mentes ab errore expurgat; hinc vanas ac fallaces mundi inanitates detegit, horrendaque supplicia impœnitentibus ineluctabilia revelat: inde tanquam præsentem exhibet veram felicitatem virtutis cultoribus præparatam. 2. Si sit adhuc informis.

formis, corda, quæ in ipsius lumine se criminum conscia deprehendunt, timore pænæ concutit, ac veluti ferramento Medici, ut loquitur sanctus Augustinus, Tractat. 9. in primam Joan. utiliter vulnerat ad pœnitentiam, qua tollitur putredo, & introducitur charitas vera cordis munditia.

## §. II.

*De necessitate interioris actus Fidei.*

**D**e parvulis nulla potest esse quæstio, cum nullius actus sint capaces, & certum sit eos salvari, si percepto Baptismo, è vita excedant. Agitur hic de solis adultis.

Monuimus verò, Tract. de Incarn. pag. 31. 32. duplicem distingui necessitatem, alteram medii, alteram præcepti, & utriusque differentiam ibidem exposuimus. Quibus præsuppositis

Q. I. *Estne aliqua necessitas, & quæ eliciendi interiores actus Fidei?*

R. Neceffe est necessitate, tum medii, tum præcepti elicere interiores actus fidei.

Probat 1. ex Scriptura, Rom. 10. *Corde . . . creditur ad justitiam*, scil. accipiendam. Hebr. 11. *Sine fide . . . . . impossibile est placere Deo; credere enim oportet accedentem ad Deum, quia est, & inquirentibus se, remunerator sit.* 2. Ex Concilio Tridentino, Sess. 6. cap. 8. *Fides est humanæ salutis initium, fundamentum, & radix omnis justificationis; sine qua impossibile est placere Deo, & ad filiorum ejus consortium pervenire.* 3. Ex S. Augustino, Serm. 27. aliàs 20. de verbis Apostoli, *domus Dei credendo fundatur, sperando erigitur, diligendo perficitur.* Et Lib. de Prædestinatione Sanctorum, cap. 7. *Ipsa (Fides) pri-*

ma

*ma datur, ex qua impetrentur cætera.* Denique opera supernaturaliter bona sunt adultis necessaria necessitate medii, & præcepti ad remissionem peccatorum obtinendam, & gloriam consequendam: atqui Fides est principium, & necessaria radix omnium bonorum operum supernaturalium, *nihil sine ea sanctum, nihil vivum*, inquit sanctus Leo, Serm. 4. de Nativit. Ergo.

Confirmatur ex censura Alexandri VII. & Cleri Gallicani anno 1700. qui hancce propositionem proscripserunt: *homo nullo unquam vitæ suæ tempore tenetur elicere actum fidei, spei, & charitatis ex vi præceptorum divinatorum ad eas virtutes pertinentium.*

Momenta, quæ nostræ responsioni opponuntur ex Rom. cap. 2. & Act. 10. solvimus, Tract. de Gratia, cap. 5. §. 1.

Q. 2. *Quoties tenetur adultus elicere actus fidei?*

Fuit quorundam Modernorum hæc propositio, sed damnata à Summo Pontifice Innocentio XI. anno 1679. & à Clero Gallicano anno 1700. *Satis est actum fidei semel in vita elicere.* Quare rejecta illa sententia,

R. 1. Quærere, quoties Christianus teneatur ex fide agere, idem ferè videtur, ac si interrogares, quoties Philosophus prudenter operari debeat; quemadmodum enim Philosophus in omnibus rectam rationem tenetur consulere, & ad prudentiæ leges cunctos actus suos componere, ita Christianus studeat necesse est omnes gressus suos ad lumen fidei dirigere; *Nam justus ex fide vivit*, ait Apostolus, Galat. 3. & Hebr. 10. ipsa est lucerna lucens, cui attendendum est in caliginoso sæculi loco, in quo degimus: ipsa est columna lucis, viam rationi

rationi ignotam ostendens, qua ad terram promissam tendere nos oporteat.

R. 2. Est peculiaris obligatio, eliciendi actus fidei. 1. In articulo mortis, ut constat ex praxi Ecclesiæ, juxta quam Pastores tum maxime solent exigere actus fidei, spei, & charitatis. 2. Initio usus rationis; quia non habemus accessum ad Deum, nisi per fidem: atqui non sine gravi Dei contemptu, quis sufficienter monitus diutius moraretur sese ad Deum convertere. Sed in eo magis peccant parentes & Pastores, qui liberis ac subditis hæc necessaria salutis monita dare negligunt. 3. Cum pulsat gravis contra fidem tentatio; contraria enim contrariis repelluntur, odium per dilectionem, motus libidinis & impuditiæ per actus charitatis; 4. Quando urget præceptum, quod impleri non potest sine actibus fidei, verbi gratia, cum sumenda est Eucharistia, audiendum Sacrum, preces fundendæ; tunc enim per accidens obligat præceptum fidei.

Q. 3. *Qualis debet esse ille actus fidei, an explicitus, an implicitus, quo quis crederet quæcumque docet Ecclesia, cum interim prorsus nesciat quænam illa sint?*

R. Quædam explicitè credi necesse est: tum quia Apostolus citato cap. 11. ad Hebr. docet, accedentem ad Deum debere explicitè credere quia est, & inquireribus se remunerator est: tum quia Fides implicita est involuta tenebris ignorantiae, & veluti lumen absconditum sub modio, quod mentem collustrare nequit, nec proinde dirigere mores.

Q. 4. *Quænam credenda sunt explicitè?*

R. Alia sunt explicitè credenda necessitate medii, alia necessitate præcepti.

Q. 5.



Q. 5. *Quid necessitate medii credendum est explicitè?*

R. 1. In omni statu etiam naturæ necessarium est necessitate medii explicitè credere Deum esse, remunerari servientes sibi, & animam esse immortalem: est communis Theologorum sententia. Imò contraria opinio damnata est ab Innocentio XI. tanquam scandalosa, & à Clero Gallicano, tanquam hæretica, ut retulimus Tract. de Incarnat. pag. 33. 34. Idipsum enim Apostolus expressè docet laudato sæpius cap. 11. ad Hebr. *Sine fide, inquit, impossibile est placere Deo; quæ verba necessitatē medii perspicuè denotant. Quæ autem sit illa Fides, explicat his sequentibus verbis: Credere enim oportet accedentem ad Deum, quia est, & inquirentibus se remunerator sit.*

Porro loquitur 1. de Fide Patriarcharum, qui sanctitate floruerunt in Lege tum naturæ, ut Abel, Noë, Abraham: tum scripta, ut Moyses, Samuel, David. 2. De remuneratione speranda, non in hac vita, sed in futura, quod necessario supponit animam non interire cum corpore.

R. 2. In Lege Evangelica necesse est prætereà explicitè credere mysteria Sanctissimæ Trinitatis & Incarnationis. Responsio quoad utramque partem fusè probata est. Prima, Tract. de Trinitate, Tom. 1. pag. 671. Secunda, Tract. de Incarnatione, pag. 31. & sequentibus: Ubi plura diximus notatu digna & scitu necessaria, præsertim Pastoribus.

Q. 6. *Quænam sunt explicitè credenda necessitate præcepti in Lege nova?*

R. 1. Non eadem notitia ab omnibus exigitur, sed alii plura aliis scire debent, unusquisque pro ratione sui officii & conditionis. Nam Cle-

ricis, qui rudiores docere tenentur, satis non est nōsse utcumque Religionis mysteria, media ad salutem necessaria, putā Sacramenta, & præcepta moralia, quibus Christiani mores informantur; sed insuper requiritur, ut ea omnia novērint explanare, difficultates solvere, & in captivitatem redigere omnem intellectum adversus scientiam Dei sese extollentem, in obsequium Christi, ut loquitur Apostolus, 2. Cor. cap. 10. v. 5. Similiter Patresfamilias (quos S. Augustinus idē vocat familiæ suæ Episcopos, quia domesticos præceptis fidei & morum imbuere debent) magis explicitē credere convenit.

R. 2. Una est Theologorum sententia, omnes & singulos scire teneri articulos Symboli Apostolorum; probaturque ex praxi universalis Ecclesiæ, quæ à primis sæculis hancce salutis scientiam hætenus à Fidelibus exegit, ut patet tum ex cap. *Baptizandos*, de Consecratione dist. 4. ubi habetur, *baptizandos oportet Fidei Symbolum discere*: tum ex Rituali Parochorum, ex cujus præscripto monendi sunt patrini sui officii esse, ut curent infantes, quos de sacro fonte levant, discere Symbolum, cum adoleverint: tum ex Catechismo Romano, qui sic habet: *Quæ primum homines tenere debent, illa sunt, quæ S. Apostoli Divino Spiritu afflati, duodecim Symboli articulis distinxerunt.*

Sed duplici modo Symbolum sciri potest: 1. Memoriter. 2. Quoad substantiam duntaxat, scil. cum quis, etsi Symbolum ex ordine recitare non valet, interroganti tamen respondere potest ad singulos articulos. Quæritur autem, an posterior ille modus sufficiat.

R. 3.

R. 3. Omnes adulti Symbolum Apostolorum memoriter tenere debent.

Probatur 1. Ex Canonibus Ecclesiæ, cap. *Vos, §. Ante omnia*, de Consecratione dist. 4. habetur ex sancto Augustino, *ante omnia Symbolum & Orationem Dominicam, & vos ipsi tenete, & illis, quos susceperitis de sacro fonte, ostendite*, Cap. 7. Synodi Quinisextæ, *nisi qui has duas sententias*, (scilicet Symbolum & Orationem Dominicam,) *& memoriter tenuerit, & ex toto corde crediderit, & in oratione frequentissime frequentaverit, Catholicus esse non poterit.* Ex sancto Augustino, Lib. 8. Confess. capite 2. & ex aliis constat Catechumenos, priusquam sacrum fontem ingrederentur, ex Lege Ecclesiastica distinctè & publicè recitasse illam Fidei formulam, quin etiam nunc patrini jubentur illam cum Oratione Dominica, pronuntiare pro parvulis, quos ad Baptisma offerunt. Meritò autem Ecclesia orationem, quam docuit Magister noster, Symbolo adjungi voluit; quia Fides, sicut non nisi ipso donante, accipitur, ita nec conservatur, nec fructificat, nisi per ejus auxilium, quod assiduis orationibus implorare necesse est.

Probatur 2. ratione. Fides ex Apostolo, Ephes. 8. vers. 13. & 16. nobis data est veluti spiritualis armatura, quam nobis licet nunquam deponere, cum adversum nos continuò instet bellum: *Propterea, inquit, induite armaturam Dei . . . . . in omnibus sumentes scutum fidei, in quo possitis omnia tela nequissimi ignea extinguere*: Atqui Fidem ad manum non habebimus, nisi probè & memoriter Symbolum teneamus: Ergo.

Confirmatur ex sancto Augustino, Serm. 58. aliàs Homil. 42. de Symbolo cap. 11. ubi sic ha-

bet: *Quotidie dicite, quando surgitis, quando vos ad somnum collocatis. Ne dicatis, dixi heri, dixi hodie . . . . . commemora fidem tuam, inspice te. Sit tanquam speculum tibi Symbolum tuum, ibi te vide . . . . . & gaude quotidie in fide tua. Sint divitiæ tuæ, sint quotidiana ista quodammodo indumenta mentis tuæ. Numquid non quando surgis, vestis te? sic & commemorando Symbolum tuum vesti animam tuam, ne fortè eam nudet oblivio, & remaneas nudus, & fiat, quod ait Apostolus, quod absit à te; Si tamen vestiti non nudi inveniamur, 2. Corinth. 5. vers. 3. Vestiti enim erimus fide nostra. Ipsa Fides & tunica est & lorica; tunica contra confusionem: lorica contra adversitatem.*

Enimverò quivis experiri potest, quod alii non pauci experti sunt, nempe nihil esse efficacius ad excutiendam somnolentiam in operibus, & tepescentem intentionem erigendam, quàm si ex affectu identidem pronuntietur: *Credo in Jesum Christum Dominum nostrum, qui venturus est judicare vivos, & mortuos, nihil promptius ad repellendas mundi & carnis illecebras, quàm si opponatur hæc fidei professio, credo carnis resurrectionem, vitam æternam, & sicut in Symbolo Constantinopolitano canitur, expecto resurrectionem mortuorum, & vitam venturi sæculi. Unde S. Augustinus, Tract. 46. in Joan. expendens illud Apostoli, Christum habitare per fidem in cordibus vestris, ait: Fides tua de Christo, Christus est in corde tuo. Hinc est illud, quòd dormiebat in navi, & cùm periclitarentur discipuli, excitaverunt eum . . . . . & facta est tranquillitas magna . . . . . sic & tu. Intran̄t venti cor tuum (scilicet tentationes) audisti convitium, irasceris: convitium ventus est, iracundia fluctus est, periclitaris, disponis respondere, disponis maledictum pro maledicto reddere,*  
jam



*jam navis propinquat naufragio. Excita Christum dormientem; ideo enim fluctuas, & mala pro malis reddere præparas: quia Christus dormit in navi; in corde enim tuo somnus Christi, oblivio fidei. Nam si excites Christum, id est, si recolas fidem . . . . quasi imperatur ventis, & fluctibus, & fit tranquillitas magna.*

Satis ergo non videbitur Confessionario, quòd pœnitens sciat Symbolum quoad substantiam, nisi & memoriter teneat, præsertim lingua vernacula, si Latinam non calleat. Et quamvis negligentia in eo non censeatur peccatum lethale, juxta Navarr. cap. 11. Manual. num. 22. & alios benemultos; est tamen ratio sufficiens differendi absolutionem, quando pœnitens jam monitus discere neglexit, nec aliter à somnolentia excitari potest. Vix ingenii tarditas eum excusabit, cum stupidissimi quique faciliè cantilenas ediscant.

Singulis quoque necessaria est notitia, 1. ex S. Thoma q. 2. art. 7. Mysteriorum, quæ solemniter celebrantur, cum sine ea non posset recoli grata memoria, propter quam ab Ecclesia proponuntur. 2. Sacramentorum suscipiendorum, ac præsertim Eucharistiæ, & Sacrificii Missæ, qui ex præcepto diebus festivis interesse debent, alioquin ea sanctè, ut par est, tractare non possent. 3. Præceptorum Decalogi & Ecclesiæ, in quibus continentur, quæ facere & quæ vitare tenentur.

### §. III.

*Satisfit nonnullis difficultatibus circa Symbolum Apostolorum.*

Q. 1. *Quid est Symbolum?*

R. Secundum vim nominis Græci, est

collectio seu collatio multorum ad aliquod opus, quo sensu, Prov. 23. vers. 21. qui partes suas ad convivium afferunt, dicuntur dare Symbola. Sumitur etiam nomen illud pro signo vel tessera militari, qua veri milites ab aliis discernuntur.

Apud Scriptores Ecclesiasticos Symbolum in utraque significatione accipitur, nempe pro ordinata collectione articulorum fidei; & signo, quo Fideles tanquam veri milites Christi exterius se produnt, & ab aliis distinguuntur.

Q. 2. *Propositio fidei estne idem quod articulus fidei?*

R. Minimè; licet enim articulus fidei sit propositio fidei; non omnis tamen propositio est articulus.

Q. 3. *In quo ergo differunt articulus, & propositio?*

R. In eo potissimum, quòd propositio sit cujuslibet rei immediatè à Deo revelatæ; articulus verò sit præcipuarum rerum ad æternam salutem pertinentium. Hinc quòd Saul fuerit primus Rex Israël, & quòd Jesse genuerit Davidem, sunt propositiones fidei, utpotè quæ fuerint immediatè à Deo revelatæ; sed non sunt articuli fidei, sicut ista: Jesus Christus est unicus Dei Filius Patri consubstantialis; quia illæ non sunt rerum sperandarum, quemadmodum ista.

Q. 4. *Unde primariè illæ propositiones dicuntur fidei articuli?*

R. Ita dicuntur per analogiam ad membra corporis humani, quæ suis articulis constant; est enim articulus quoddam diminutivum artus, quasi particula membri, & quasi junctura, qua artus seu membra coaptantur & copulantur; sed vulgò articulus sumitur pro ipso membro. Est autem membrum pars corporis insignior, constans ex partibus

partibus minoribus, & habens specialem usum & functionem, ut brachium compositum ex ossibus, nervis, musculis, &c. quæ membra dici nequeunt, cum singulis non competat specialis & distincta functio.

Articuli igitur Fidei sunt veluti membra, in quæ dividitur Fides tanquam corpus integrum. Unde definiri potest articulus fidei,

Primaria fidei propositio omnibus ab initio ad credendum explicitè proposita, & peculiarem difficultatem continens.

Dicitur 1. *Primaria*, id est, rerum sperandarum, quæ ad vitam æternam pertinent, vel tanquam ejus objectum, ut Deus unus in tribus Personis subsistens, vel tanquam medium necessarium, ut Verbi divini incarnatio, Christi passio, resurrectio, &c.

Dicitur 2. *Omnibus ab initio ad credendum explicitè proposita*, ut distinguatur ab eis propositionibus, quæ successu temporis ab Ecclesia fuerunt definitæ, v. gr. quoddam liceat pingere imagines, quoddam duo Libri Machabæorum sint Canonici, &c.

Dicitur 3. *Peculiarem difficultatem continens*; Quia sicut membrum corporis ex multis partibus minoribus constat; quæ separatim non habent specialem functionem; ut mox diximus; ita articulus fidei aliquando ex pluribus propositionibus exurgit, quæ singulæ non habent peculiarem difficultatem, v. gr. tertius Symboli articulus, *qui conceptus est de Spiritu Sancto, natus ex Maria Virgine*, tres fidei propositiones includit: primam, quoddam Christus sit conceptus de Spiritu Sancto; secundam quoddam natus sit ex Ma-

ria ; tertiam, quòd Maria sit Virgo, quarum propositionum prima peculiarem difficultatem sola continet ; posito enim quòd Christus conceptus sit de Spiritu Sancto, posteriores propositiones necessario sequuntur, nempe quòd natus sit, & quòd Maria sit Virgo. Quòd autem Christus passus sit, alia occurrit difficultas à præcedente distincta. Unde his verbis : *passus sub Pontio Pilato, mortuus & sepultus*, novus constituitur articulus, constans ex tribus propositionibus ita coaptatis, ut si assensus primæ præbeatur, nimirum quòd Christus sit passus, facile credetur mortuus & sepultus.

Q. 4. *Quot sunt Symbola ?*

R. Quatuor, tertium tamen cum secundo vulgò confunditur ex eo, quòd illud integrè contineat cum nova aliqua additione ; unde tria duntaxat Symbola nonnunquam numerantur.

Primum est Apostolorum, qui ad instructionem Fidelium collegerunt brevem summam fidei capitum, ad quæ cætera facile reduci possunt, ut sicut omnium credentium est cor unum, esset quoque os unum, & una confessio, ex sancto Irenæo, Lib. I. contra Hæreses, c. 3.

Secundum, Nicænum dicitur, quia editum est in Concilio Nicæno ad convellendam Arii Presbyteri Alexandrini impietatem, qua negabat Filium Patri consubstantialem.

Tertium est Constantinopolitanum, in quo propter Macedonium Constantinopolitanum Episcopum, abjudicantem Spiritui Sancto divinitatem, & Manichæos asserentes Deum non esse Condito rem rerum corporearum, nonnulla addita sunt à Patribus Symbolo Nicæno.

Quar-



Quartum est S. Athanasii, non quòd sanctus Athanasius sit illius auctor, non enim prodiit nisi post ejus mortem; sed quòd contineat doctrinam, quam sanctus Doctor mira eruditione, & pluribus laboribus & periculis asseruit adversus Arianos. Unde Symbolum illud non est aliud quàm major explicatio Symboli Nicæni & Constantinopolitani.

Q. 5. *Unde opus illud, quod circumfertur sub nomine sancti Athanasii habet auctoritatem Symboli?*

R. Ab Ecclesia; cùm enim Symbolum sit regula fidei omnibus Fidelibus proposita, non est cujusvis Pastoris eam constituere. Porro Symbolum S. Athanasii nuncupatum, erat in auctoritate septimo sæculo; illius quippe meminit Concilium Augustodunense anno 670.

Q. 6. *Apostoli suntne reverà auctores Symboli, quod eorum nomine insignitur?*

Visum est Moderno cuidam, eatenus duntaxat illud Symbolum dici Apostolorum, quatenus eorum doctrinam continet, quemadmodum circumferuntur Canones, qui dicuntur Apostolorum, quos constat ab Apostolis non fuisse conditos. Sed hæc opinio adversatur Ecclesiæ traditioni. Quare

R. Apostoli reverà sunt auctores Symboli eorum nomine nuncupati.

Probatur ex constanti Ecclesiæ traditione.

Tertullianus Lib. de Præscript. cap. 37. *Superest igitur, inquit, ut demonstremus an hæc nostra doctrina, cujus regulam supra edidimus, de Apostolorum traditione censeatur.*

S. Ambrosius Epistol. ad Syricium Summum Pontificem sic scribit: *Credatur Symbolo Apostolorum.*

rum, quod Ecclesia Romana semper intemeratum custodit & servat. Et Serm. ultimo de Jejuniis Eliæ ait: *Duodecim enim Apostolorum Symbolo Fides sancta concepta est, qui veluti periti artifices in unum convenientes clavim suo Symbolo conflaverunt. Clavim enim quandam ipsum Symbolum dixerim, per quam referantur tenebrae, & lux Christi advenit.*

Rufinus quarto sæculo illud Symbolum, tanquam opus Apostolorum, usque ad suam ætatem creditum exposuit: id ipsum Libro uno præstitit S. Augustinus quinto sæculo.

Cassianus Lib. 6. de Incarnat. cap. 3. *Collata, inquit, ab Apostolis Domini totius Catholicæ Legtis fide, quidquid per diversum divinatorum voluminum corpus immensa funditur copia, totum in Symboli colligitur brevitate perfecta.* Mitto alios, ut S. Hieronymum, Leonem, &c.

Cum autem illud Symbolum duobus modis edi potuerit. 1. Ut unus Apostolus integrum opus confecerit, & cæteri illud approbaverint: 2. Ut omnes in unum convenerint, & singuli manuum operi adhibuerint: posterior hic modus communiter admittitur; ipsa Catholici Symboli brevis & perfecta confessio, inquit S. Leo Epist. 13. ad Pulcheriam, *duodecim Apostolorum est insignita sententiis.* Quin Auctor Serm. 115. inter Sermones sancti Augustini de Tempore, assignat singulis Apostolis suum articulum, S. Petro primum, & sic deinceps. Sed id dicitur gratis & sine fundamento.

Q. 7. *Symbolum Apostolorum estne inter Scripturas sacras numerandum?*

R. Minimè; quia Apostoli non illud condiderunt, tanquam Dei amanuenses & ejus nomine, sed tanquam Ecclesiæ Pastores, eo modo quo eorum

eorum successores in Conciliis Oecumenicis Canones exarârunt, qui licet contineant verbum Dei, conflati tamen non sunt dictante Spiritu Sancto, sed assistente duntaxat.

Probatur responsio 1. quia Ecclesia, quæ identidem texuit Catalogum Librorum sacrorum, ut in Concilio Laodicæno cap. 60. Carthagenensi III. cap. 43. Tridentino, Sessione 4. Symbolum Apostolorum non recensuit. 2. Quia mutationes aliquando factæ sunt in Symbolo Apostolorum; nam Rufinus testatur hanc sententiam, *descendit ad inferos*, omissam fuisse in Ecclesia Romana. Sanctus etiam Augustinus eam omittit Lib. 1. de Symbolo cap. 3. sicut & particulam, *Catholicam*, cap. 6. ejusdem Libri: atqui non licet quidquam mutare circa textum Scripturæ sacræ: Ergo Symbolum Apostolorum non est Scriptura sacra.

### CAPUT III.

#### De externo actu Fidei.

Q. 1. *Extatne præceptum exterius profitendi Fidem?*

R. Extat Rom. 10. v. 9. & 10. *Si confitearis in ore tuo Dominum Jesum, & in corde tuo credideris . . . . . salvus eris, corde enim creditur ad justitiam: ore autem confessio fit ad salutem.* Quibus verbis Apostolus docet actum internum fidei sufficere ad remissionem peccatorum, & justificationem impetrandam, *corde enim creditur ad justitiam*, ad salutem verò æternam consequendam insuper requiri externam fidei professionem, *ore autem confessio fit ad salutem.* Unde S. Augustinus Lib. de Fide

Fide & Symbolo c. 1. *Fides*, inquit, à nobis duplex officium exigit, cordis & linguæ. Et ratio est, quia nulla est vera virtus, quæ per actus internos non tendat ad actus exteriores, ut Religio ad cultum exteriorem Deo exhibendum, misericordia ad sublevandum pauperem, cujus interiùs miseretur, fortitudo ad subeunda mortis pericula, ubi recta ratio illud exigit; nec crederetur Religiosus, misericors, fortis, qui nollet data occasione, exteriùs Deum colere, misero opem ferre, mortis periculum subire. Ergo à pari, qui habet in corde affectum credulitatis, non quiescit in assensu interno rebus revelatis; sed prorumpit in actus exteriores, qui respondeant interno illi affectui: *Credidi*, inquit Regius Psaltes Psal 115. *propter quod locutus sum*. Similiter Apostolus 2. Cor. 4. *habentes autem eundem Spiritum fidei . . . & nos credimus, propter quod & loquimur*. Et Glossa in illud 2. Thessal. 1. *Impleat . . . opus fidei in virtute, ut clarificetur nomen Domini*, dicit opus fidei esse confessionem. Denique sanctus Augustinus vult Fidem ita appellari, quia per eam fit quod dicitur, *quis est*, inquit Serm. 148. aliàs Hom. 17. *qui non credit, quòd Iesus sit Christus? qui non sic vivit, quomodo præcepit Christus. Multi enim dicunt: Credo. Sed Fides sine operibus non salvat. Opus autem Fidei ipsa dilectio est, dicente Paulo Apostolo, & Fides, quæ per dilectionem operatur . . . Cum dilectione Fides Christiani: sine dilectione fides dæmonis*. Non itaque sola oris confessio, sed quæcunque alia exterior actio relata ad finem fidei, est opus fidei, non quidem elicitum, sed imperatum.

Q. 2. *Confessio Fidei estne ad salutem necessaria necessitate medii, sicut interior mentis assensus?*

R. Per



R. Per se non est necessaria , nisi necessitate præcepti ; quia infidelis justificatus per actum perfectæ contritionis , hoc est , per Fidem , quæ per charitatem operatur , salvari poterit , si decedat priusquam occasio profitendi fidei sese obtulerit : Ergo confessio fidei necessaria non est necessitate medii : sed præcepti tantum.

Dixi, *per se* ; nam per accidens potest esse necessaria necessitate medii , putà ratione Baptismi , in quo fit professio fidei.

Q. 3. *Quotuplex est præceptum confessionis fidei ?*

R. Duplex , affirmativum nempe , quo fidei confessio imperatur , & negativum , quo prohibetur fidei negatio , sive verbis , sive factis ; habitus enim est contrariorum , inquit Philosophi , hoc est , eadem virtus , quæ inclinatur ad actum honestum , avertit ab actu contrariè opposito : eodem præcepto , quo jubemur proximum diligere , parentes colere , prohibemur proximum odisse , & parentes contumelia afficere : Ergo eodem fidei præcepto tenemur , & Fidem non negare , & Fidem aliquando profiteri.

Q. 4. *Quandonam obligat præceptum affirmativum profitendi fidem ?*

R. Cum S. Thoma qu. 3. art. 2. duobus in casibus obligare , nimirum cum per omissionem confessionis subtraheretur honor debitus Deo , aut etiam utilitas proximis impendenda , putà , si aliquis interrogatus de fide , taceret , & ex hoc crederetur , vel quod non haberet fidem , vel quod fides non esset vera , vel alii per ejus taciturnitatem averterentur à fide. In hujusmodi enim casibus confessio fidei est de necessitate salutis.

Confir-

Confirmatur auctoritate Innocentii XI. qui anno 1679. hanc propositionem quorundam Modernorum proscriptit, *si à potestate publica quis interrogetur, fidem ingenuè confiteri, ut Deo & fidei gloriosum consulo: tacere ut peccaminosum per se, non damno.*

Duo sibi objicit Angelicus Doctor. Primum: proprius finis fidei est conjungere mentem humanam veritati divinæ: atque id fieri potest absque exteriori confessione: ergo. Secundum, tradere aliis doctrinam fidei, non est cujuslibet fidelis: atqui exterior fidei confessio est quædam fidei doctrina: ergo non exigitur à quolibet fidei.

Respondet ad primum, finem fidei, sicut & aliarum virtutum debere referri ad finem charitatis. *Et idèò quando honor Dei, vel utilitas proximi hoc exposcit, non debet esse contentus homo, ut per fidem suam ipsi veritati divinæ conjungatur: sed debet fidem exterius confiteri.* Ad secundum autem, in casu, inquit, necessitatis, ubi fides periclitatur, quilibet tenetur fidem suam aliis propalare, vel ad instructionem aliorum Fidelium, sive confirmationem, vel ad reprimendum infidelium insultationem. Multò magis sapientum mundi, à quibus puritatis virtus, ut loquitur sanctus Gregorius Lib. 10. Moral. cap. 1. fatuitas creditur, & quod in opere fidei veritas approbat, illud vituperant, & in derisum vertunt, quæ quidem derisio, ex sancto Thoma 2. 2. quæst. 75. art. 2. valde nociva est, quia per hoc homines à bene agendo impediuntur, secundum illud Gregorii, qui in aliorum actibus exoriri bona respiciunt, mox ea manu pestiferæ exprobrationis evelunt. Quare qui tacet aut dissimulat in ejusmodi circumstantiis, fidem videtur deferere, nec illud Christi Luc. 9. vers. 26. effugiet, qui me erubuerit

*& meos sermones, hunc Filius hominis erubescet, cum venerit in maiestate sua.*

Quod spectat negativum fidei præceptum, certum est illud obligare semper & pro semper, quia nunquam licet malè agere: atqui fidem negare sive ex animo, sive ex simulatione tantum est actio per se mala: ergo.

Dices 1. Jehu Lib. 4. Regum cap. 10. simulavit se velle sacrificare idolo Baal, ac propterea laudatur v. 30. ergo licet aliquando simulare falsam Religionem.

Nego consequens, laudatur quidem Jehu, quòd cultum Baal destruxerit; sed simulatio ejus vocatur à S. Augustino Lib. de Mendacio cap. 2. impium mendacium.

Dices 2. Eliseus 4. Regum 5. v. 19. permisit Naaman Syro adorare in templo Remmon: ergo.

Distinguo antecedens, Permisit adorare, id est, incurvare se, dum Rex, qui solebat illi initi, ad adorandum procumberet, Concedo: permisit adorare idolum sive ex animo, sive per simulationem, Nego antecedens.

Q. 5. *Peccaretne contra præceptum negativum fidei, qui negaret se Sacerdotem, aut Missæ Sacrificio interfuisse?*

R. Minimè, quia mendacium illud est non fidei negatio, sed conditionis aut actionis cujusdam, sine qua potest quis esse Christianus & Catholicus.

Q. 6. *Licetne Christiano ad declinandam persecutionem gestare vestes infidelium?*

R. Non licet, si vestes illæ sint signa determinata falsæ Religionis, secus si distinguant duntaxat nationem à natione, Turcam v.g. ab Hispano.

Ex

Ex quo sequitur eum peccare contra Fidem,

1. Qui cœnam manducaret cum Hæreticis, ne v. g. offensam patris incurreret, & ab ipso fortè exhæredicaretur; quia actio illa est signum falsæ Religionis.

2. Qui tempore persecutionis libellum acciperet ab infideli Magistratu sibi familiari, quo significaretur, quamvis falsò, ipsum satisfecisse impio edicto; qui simularet falsam Religionem. Hinc graves expositulationes S. Cypriani Serm. de lapsis, & Cleri Romani Epistola, quæ est 31. inter Epistolas S. Cypriani, adversus Libellaticos, quos in numero Apostatarum à fide reponunt, eo quòd ejusmodi libellis pretio comparatis, viderentur sacrificasse idolis.

3. Qui manducaret carnes præcepto Ecclesiastico certis diebus, puta Quadragesimæ vetitas, in hypothesi quòd Princeps hæreticus, in odium Religionis Catholicæ, omnibus subditis præcepisset ejusmodi carnibus vesci; in hac quippe hypothesi esus ille esset signum falsæ Religionis; & ideo Eleazarus maluit mori, quàm carnes suillas Lege veteri prohibitas comedere, 2. Machab. 6. Extra verò hunc casum, liceret ad vitandam persecutionem, manducare carnes Lege Ecclesiastica prohibitas; quia Lex humana non obligat cum tam gravi detrimento, ut diximus Tract. de Legibus.

4. Contra Fidem peccaret, qui interesset conventibus & concionibus Hæreticorum, si extaret edictum obligans ad ejusmodi conventus & conciones in signum falsæ Religionis. Secus si nullum tale esset edictum, nec periculum propriæ



priæ salutis, nec scandalum. Sed de iis plura, ubi de scandalo.

Q. 7. *Qui simulatè tibus coram idolo incenderet animum ad Christum dirigens, amitteretne fidem?*

R. Graviter quidem peccaret contra negativum Fidei præceptum, sed Fidem non amitteret, utpote qui mente firmiter adhæret revelationi divinæ per Ecclesiam propositæ.

Q. 8. *Qui fugit tempore persecutionis, peccatne contra præceptum positivum confitendæ fidei?*

R. Non peccat, si ex ejus fuga nullum oritur Fidei scandalum, juxta ea, quæ diximus ad quartum quæsitum. Probatur autem responsio, 1. ex Scriptura Matth. 10. *Cum persequentur vos in civitate ista, fugite in aliam.* 2. Exemplo Apostolorum, S. Athanasii, & aliorum Sanctorum, qui fugerunt. 3. Judicio Ecclesiæ, quæ Tertullianum nimix severitatis & erroris arguit, quod quemlibet fugientem damnaret. 4. Quia qui fugit, Fidem profitetur, nedum neget; non enim fugeret, si Fidem abjurare vellet. 5. Quia qui maneret absque necessitate aut utilitate, culpandus esset; quia ex S. Thoma 2. 2. qu. 124. art. 1. ad tertium: *Non debet homo occasionem dare alteri injustè agendi.*

Dices: Christus Joan. 10. reprehendit mercenarium, qui videt lupum venientem, & fugit: Ergo fugere est contra confessionem fidei.

Nego consequens: Si ut jam diximus, fuga illa non conjiciat proximum in periculum amittendæ Fidei, alioquin Pastor fugiens tempore persecutionis, non magis contra Fidem peccaret, quam si fugeret tempore pestis. Ad summum deesset Pastoralis officio, bonus enim Pastor dat animam suam

*pro ovibus suis*, Joan. 10. scilicet cùm id necessitas aut evidens utilitas postulat; nam in quibusdam circumstantiis prudentia exigit, ut vitam pro grege & communi Ecclesiæ utilitate conservet. Consule in hanc rem egregiam S. Augustini Epistolam 228. aliàs 180.

## CAPUT IV.

### De Peccatis Fidei oppositis.

Q. I. *Quot sunt peccata Fidei opposita?*

R. Tria vulgò numerantur, scilicet infidelitas, hæresis, & Apostasia. Qui enim non assentitur rebus à Deo revelatis, vel Fidem seu Baptismum nunquam suscepit, ut Pagani, qui colunt idola, Mahumetani & Judæi; & privatio si-  
ve carentia Fidei in eo dicitur infidelitas, quæ dividitur in Paganismum, Mahumetismum, & Judaismum: vel ex parte recedit à Fide, quam amplexus fuerat in Catechumenatu, aut in Baptismo, & privatio Fidei in illo dicitur hæresis à verbo Græco *αἵρεσις*, quod significat, *eligo*, quia Hæreticus non omnibus, quæ docet Ecclesia, mentem suam subjicit; sed ex illis eligit, quæ videntur verisimiliora; contra illud Tertulliani Lib. de Præscript. cap. 6. *nihil ex nostro arbitrio inducere licet, sed nec eligere, quod aliquis de arbitrio suo induxerit*, vel denique Catechumenus, aut baptizatus totaliter Fidem & Auctorem ejus Christum abjicit, transitque si-  
ve ad Paganismum, si-  
ve Mahumetismum, si-  
ve Judaismum, & illa Fidei abdicatio dicitur apostasia. Addi posset quarta peccati species contra Fidem, nempe Atheismus, quo quis nullum  
agno-

agnoscit Deum, nequidem falsum, quemadmodum Paganus.

Q. 2. *Illa peccatorum divisio fitne per differentias essentialiales, quæ constituent diversas physicè peccati species?*

R. Minimè; quia omnia illa peccata pugnant contra unam specie virtutem Fidei, & contra unicum ejus objectum formale, nimirum revelationem divinam ab Ecclesia propositam.

Differunt ergo solùm accidentaliter, quatenus unum, v. g. apostasia ad plura se extendit, quàm hæresis, & reperitur in alio subjecto, quàm infidelitas. Baptizatus tamen teneretur exprimere in Confessione Sacramentali, an à Fide recessisset per apostasiam, vel per atheismum, vel per hæresim duntaxat; quia duo priora peccata longè sunt graviora. Adde quòd apostasia vulgò sit transitus ad professionem falsæ Religionis, putà ad Paganismum, Judaismum, vel Mahumetismum. Porro supersticiosi illi cultus sunt peccata specie distincta.

Q. 3. *Quotuplex est infidelitas?*

R. Duplex, nempe negativa, & positiva. Negativa est defectus, seu, ut ajunt, carentia fidei in eo, qui nihil unquam audivit, nec audire potuit de Evangelio. Positiva est privatio fidei in eo, qui Evangelium audivit, & ei contradicit, vel saltem credere contemnit.

Q. 4. *Infidelitas estne peccatum?*

R. Negativa peccatum non est; sed pœna peccati: positiva verò est peccatum formaliter, utpote quæ sit voluntaria. Ita S. Thomas quæst. 10. art. 1. *Infidelitas*, inquit, *dupliciter accipi potest, uno modo secundum puram negationem: ut dicatur infidelis ex hoc solo quòd non habet fidem. Alio modo potest intelligi*

*secundum contrarietatem ad fidem, qua scilicet aliquis repugnat auditui fidei, vel etiam contemnit ipsam. Et in hoc propriè perficitur ratio infidelitatis, & secundum infidelitatem est peccatum. Si autem accipiatur secundum negationem puram, sicut in illis, qui nihil audierunt de fide, non habet rationem peccati, sed magis pænæ, quia talis ignorantia divinarum ex peccato primi parentis consecuta est. Qui autem sic sunt infideles, damnantur quidem propter alia peccata, quæ sine fide remitti non possunt: non autem damnantur propter infidelitatis peccatum. Unde Dominus dicit Joan. 15. si non venissem, & locutus eis non fuisset, peccatum non haberent. Sed de eis plura Tract. de Gratia passim, & Tract. de Actibus humanis, ubi de ignorantia.*

*Q. 5. Debentne tolerari infidelium ritus?*

*R. Vel infideles sunt politicè subditi: vel non sunt subditi. Si primum, possunt impediri eorum ritus; quia Principes jus habent impediendi in suo regno ea, quæ pugnant sive adversus Legem naturæ, ut idololatria; sive adversus veram Religionem, ut hæresis; sermo enim infidelium ut cancer serpit, & faciliè pacem Reipublicæ perturbat. Hinc Leges tum Constantini de claudendis Paganorum templis, & sacrificiis abolendis; tum aliorum Imperatorum de Hæreticis puniendis. Si secundum, tolerari debent, nec licet eis bellum inferre præcisè ob injuriam illatam Deo per idololatriam, incestus, adulteria, &c. quia ad horum vindictam sumendam requiritur jurisdictio, qua carent Principes Christiani in non subditos.*

*Dixi, præcisè: nam si illa Dei injuria in subditos Regis redundaret, v. g. contumeliis fidem illorum proscinderent, filias aut uxores eorum pelli-*



pellicerent, bona invaderent, Principes Christiani illos licitè ac justè punirent.

Q. 6. *Princeps Christianus potestne tolerare ritus infidelium subditorum?*

Respondet S. Thomas q. 10. art. 11. posse justa de causa; quia *humanum regimen*, inquit, *derivatur à divino regimine*, & ipsum debet imitari. Deus autem, *quamvis sit omnipotens & summè bonus*, permittit tamen aliqua mala fieri in universo, quæ prohibere posset, ne eis sublatis, *majora bona tollerentur*, vel etiam *pejora mala sequerentur*. Sic ergo in regimine humano, illi qui præsumunt, rectè aliqua mala tolerant, ne aliqua bona impediuntur, vel etiam ne aliqua mala pejora incurrantur, sicut Augustinus dicit in Libro de Ordine, *aufer meretrices de rebus humanis, turbaveris omnia libidinibus*.

Q. 7. *Licetne communicare cum infidelibus?*

R. Licet in civilibus, modò absit scandalum vel periculum subversionis; id enim permittit Apostolus I. Cor. 10. v. 27. *Si quis vocat vos infidelium, & vultis ire, omne quod vobis apponitur manducate*. Et Tertullianus Lib. de Idololatria cap. 14. *Licet*, inquit, *convivere cum Ethnicis, commori non licet: convivamus cum omnibus, collætetur ex communione naturæ, non superstitionis: pares anima sumus, non disciplina, compossessores mundi, non erroris*.

Cùm autem Judæi præ cæteris infidelibus infesti sint Religioni Christianæ, & soliti eam blasphemis proscindere, Jure Canonico, Cap. Omnes, cap. Nullus, 28. qu. 1. & cap. Judæus, extra. tit. de Judæis, prohibentur Christiani cum eis habitare, comedere, in balneo lavari, ab eis medicinam accipere, & in ipsorum servitio commorari.

R. 2. Nefas est directè & proximè communicare cum infidelibus in eorum superstitionis ritibus,

bus, putà Sacrificiis, Lustrationibus, Festis, &c. quia illa sunt per se mala, & ab Apostolo expresse prohibita, 2. Cor. 6. *Nolite ducere jugum cum infidelibus . . . . quæ autem conventio Christi ad Belial, aut quæ pars fidei cum infidele?*

R. 3. Licet indirectè & remotè communicare cum infidelibus in iis, quæ cum per se sint indifferentia, æquè in bonum usum ac in superstitionis sum converti possunt, v. g. vendere agnos, boves, pannos, flores, &c. quibus fortè infidelis emptor utetur ad Sacrificia & cultum idolorum; quia cum abusus ille sequatur per accidens respectu vendentis, non potest illi imputari.

Dixi, *remotè*; graviter enim peccaret, qui proximè cooperaretur sacrilegiis infidelium, v. gr. qui vestes conficeret in ornatum idoli, agnum venderet Judæo, sciens non emi, nisi ad immolandum: statuam Apollinis exculperet in idolum erigendam; quia etsi res illæ per se indifferentes sint, in iis tamen circumstantiis determinatæ sunt tanquam media ad finem per se malum.

Confirmatur; quamvis venenum & arma per se vendere licitum sit, quia Reipublicæ æquè utilia ac noxia esse possunt; in omnium tamen sententia reus est homicidii, qui vendit vel toxicum noto venefico, vel enses mox duello conflicturis: Ergo à pari particeps est idololatriæ, qui effingit statuam in idolum convertendam. *Tu colis*, inquit Tertullianus Lib. de Idol. cap. 6. *qui facis ut coli possint. Colis autem non spiritu vilissimi nidoris alicujus sed tuo proprio, nec anima pecudis impensa, sed anima tua. Illis ingenium tuum immolas, illis sudorem tuum libas, illis prudentiam tuam accendis. Et cap. 8. dicit eandem esse rationem templi, aræ, ædi-*

ædiculæ, & domus in honorem idolorum. Cap. autem 4. & 5. ostendit, quàm meritò sua ætate disciplina Ecclesiæ non reciperet picturæ & sculpturæ artes, utpote quæ (idololatria tum ubique diffusa) magis ad cultum idolorum, quàm ad alios licitos usus deservire viderentur, tandemque excusationes ejusmodi artificum refellit. Jam, inquit, illa objici solita vox: *non habeo aliud quod vivam districtius reperi potest, vivere ergo habes? Quid tibi cum Deo est, si tuis legibus? . . . . Pateat ergo Ecclesia omnibus (etiam falsariis, furibus) qui manibus & suo opere tolerantur, si nulla est exceptio artium, quas Dei disciplina non recipit.*

Dices: In casu necessitatis licet petere juramentum ab Ethnico, quamvis per falsos Deos prævideatur juraturus, Sacramenta à peccatore, & mutuam pecuniam ab usurario: Ergo licitum est communicare indirectè etiam proximè peccato alterius.

R. 1. Si exemplis agatur, quæ in moralibus sæpius fallunt, oppono censuram, qua Innocentius XI. & Clerus Gallicanus hanc propositionem perstrinxerunt. *Famulus, qui submissis humeris scienter adjuvat herum suum ascendere per fenestras ad stuprandam virginem, & multoties ei subservit deferendo scalam, aperiendo januam, aut quid simile cooperando, non peccat mortaliter, si id faciat metu notabilis detrimenti, putà ne à domino malè tractetur, ne torvis oculis aspi-ciatur, ne domo expellatur.*

Censura autem Cleri Gallicani sic se habet: *Hæc propositio scandalosa est, perniciofa; verbis Dominicis & Apostolicis apertè contraria, & bæretica: quam enim dabit homo commutationem pro anima sua? Matth. 16. v. 26. Rom. 1. v. 32. Et digni sunt*

morte non solum qui ea faciunt, sed etiam qui consentiunt facientibus. Ex quo exemplo concluderet aliquis contra argumentum, quod nobis objicitur: Ergo nunquam licet indirectè communicare peccatis alienis. Quare ad elucidandam utcunque rem in moralibus & praxi omnium difficillimam.

R. 2. Negando consequentiam; neque enim invocatio falsi numinis in juramento, neque sacrilegium in administratione Sacramenti, neque usura in mutuo, proximè sequuntur ex actione seu postulatione alterius, utpote qui non petat ab Ethnico, à Sacerdote impio, & ab usurario nisi opus honestum, quod honestè & piè præstare possunt ac debent: abusus autem juramenti, Sacramenti, & mutui, per accidens est respectu petentis, ac proinde non est ipsi tribuendus, cum ad illum non tendat ejus petitio, sed malæ voluntati duntaxat Ethnici, Sacerdotis, & usurarii ascribendus. Sic caupo apponit vinum hospitibus, famulus domino suo, quo contingit eos inebriari, sed præter intentionem ministrantium; ministerium quippe eorum non erat actio determinatè tendens ad ebrietatem, sed ad honestam corporis refectionem. At famulari Ethnico ad idolum effingendum, adultero ad adulterium, furi ad furtum, homicidæ ad homicidium, ebrioso ad ebrietatem, nempe fundendo vinum, dum penè temulentus est, sunt actiones per se malæ, cum determinatè tendant ad opus per se illicitum, nec proinde faciendæ ullo timore pænæ etiam gravissimæ.

Confirmatur. Magistratus capite damnat & quidem justè, eum qui metu gravioris pænæ co-  
opera-



operatus est hero ad furandum, vel ad interficiendum adversarium, deferendo scalam, aperiendo januam, aut quid simile præstando. Quid ita, nisi quia est causa voluntaria damni proximo allati? Ergo qui sciens & volens cooperatur ad idololatriam, fabricando idolum, ad stuprum aperiendo januam, deferendo litteras amatorias, ad ebrietatem infundendo pocula vino jam semigravi, est causa moralis ejusmodi criminum. Sed de his iterum, ubi agemus de scandalo.

Aliæ moventur quæstiones circa infidelitatem, 1. an infideles sint capaces dominii. 2. an licitè possint cogi ad fidem. 3. an, ipsis invitis, liceat baptizare eorum infantes. Sed ista alibi expendimus. Primum quidem, Tract. de Justitia & Jure cap. 16. Secundum & tertium, Tract. de Baptismo cap. 8.

Q. 8. *Quid est hæresis?*

R. Est hominis Christianismum profitentis error pertinax contra veritatem immediatè à Deo revelatam, & ab Ecclesia propositam.

Dicitur 1. *hominis Christianismum profitentis*; quia ex dictis, hæresis est fidei jam susceptæ ejuratio.

Dicitur 2. *error pertinax*; namque ex sancto Augustino Epist. 43. aliàs 162. relata cap. *Dixit Dominus* 24. quæst. 3. *qui sententiam suam, quamvis falsam atque perversam, nulla pertinaci animositate defendunt . . . . . corrigi parati, cum invenerint, nequaquam sunt inter Hæreticos deputandi.*

Ergo qui ex ignorantia etiam crassa aut affectata, contrarium aliquid fidei credit, quamvis ob negligentiam culpandus sit, hæreticus tamen non est; quia error illius est sine pertinacia; *errare potero, inquit S. Augustinus, sed hæreticus non*

ero ; nimirum quia se sentiebat paratum deferre iudicio Ecclesiæ.

Dicitur 3. *contra veritatem immediatè revelatam* ; quia si quis affirmet aut neget contra Conclusiorem Theologicam , quæ mediatè tantum revelata est , propositio ejus dicitur erronea , non verò hæretica : si contra communem Theologorum sententiam , propositio est temeraria : si verba tendant ad solvendam Ecclesiæ unitatem , turbasque excitandas , propositio est schismatica : si in peccatum inducant , & ab officiis pietatis avertant , propositio est scandalosa.

Q. 9. *Licetne legere libros Hæreticorum ?*

R. 1. Jure naturali iis interdicitur Librorum Hæreticorum lectio , quibus est occasio peccati & ruinæ. Responsio per se patet. Sed difficultas est , utrum aliqua lege positiva omnibus prohibeatur ejusmodi lectio.

R. 2. Nulla est lex positiva in Galliis recepta , quæ absolute & generaliter prohibeat lectionem quorumlibet Librorum Hæreticorum , sive jam editi , sive in posterum edendi fuerint , sed satis fuit Ecclesiæ Pastoribus , & Christianis Principibus interdicare eorum Hæreticorum Libros , quorum errores compescere ac extinguere studuerant. Sic Leo X. & Paulus III. Lutheranorum Libros prohibuerunt , Concilium Constantiense Wicleffi , Nicænum II. Iconoclastarum , Chalcedonense Eutychetis , Ephesinum Nestorii , Nicænum I. Arii , ut refert Nicephorus Lib. 8. Hist. cap. 18. Imperatores quoque suam auctoritatem interposuere , ut ejusmodi ex hominum memoria prorsus deleantur.

Constantinus apud Socratem Lib. 1. Hist. cap. 6.

Arii

Arii scripta cremari jussit, vetuitque sub pœna capitis ne retinerentur, aut legerentur. Idipsum præstitere Theodosius & Valentinianus lege 3. de sancta Trinitate.

Ex his intelliges, quàm periculosa, quàmque noxia semper visa fuerit Patribus lectio Librorum Hæreticorum, præsertim indoctis & semidoctis hominibus, sive Laicis, sive Clericis. Enimverò si quis litigans per scriptum, in quo momenta suæ causæ exponit, & argumenta partis adversæ explodere nititur, Lectorem in suam sententiam facile trahit, aut saltem inclinat; quî non commovebitur semidoctus ex captiosis & fallacibus argumentis vafrosum Hæreticorum? namque ex Apostolo 2. Tim. 2. v. 17. *sermo eorum ut cancer serpit*. Hinc pastoralis sollicitudo hætenus cavit, ne ejusmodi Libri manibus tenerentur, nisi eorum, quorum officium est, sanam doctrinam veri, & contradicentes refellere. Et hæc de Libris Hæreticorum.

Sed non minùs, imo multò magis periculosa sunt scripta fucatis quibusdam luminibus resperfa Pseudo-Policorum, & impiorum hominum, quos Libertinos vocant, ut qui Fidem sibi facere præsumant, & ab Ecclesia accipere dedignentur, homines mente corrupti, modicæ, & ut veriùs dicatur, nullius Religionis; Religio quippe ita vocatur, quia mentes auctoritati divinæ subjicit, & ligat Ecclesiæ, per quam divina oracula nobis panduntur. Illi autem, spretis credibilitatis motivis, quibus tanquam validissimis vinculis æterna sapientia prudentes quosque Doctrinæ Catholicæ astrictos tenet, saniora, ut illis videtur, quàm scripserint Apostoli, meditantur, alteram Religio-

nem,

nem, eamque præstantiorem excogitare ac delinere non verentur, & fallaci ingenii acumine, ac fucata scribendi facundia ita legentium oculos perstringunt, ut difficilè reperiatur, qui ex eorum consuetudine, vel ex frequenti scriptorum lectione non fluctuet circa fidem, qui jam judicata non retractet, atque ex proprio sensu temerè definiat. Quamobrem nihil in Religione, ac moribus magis pestiferum infestumque, quàm ejusmodi Libri. Sub gravibus quidem pœnis prohibentur, sicut & omnium Hæreticorum Libri in Bulla, quæ dicitur in *Cæna Domini*; & in Indice; sed ejusmodi Leges non vigent in Gallia, ut jam monuimus.

Q. 10. *Cur Pius IV. in Indice ipsius auctoritate edito, prohibet Bibliorum sacrorum in vulgarem linguam converforum lectionem?*

R. Rationem affert ibidem hisce verbis: *Cum experimento manifestum sit, si sacra Biblia passim sine discrimine permittantur, plus ob hominum temeritatem detrimenti, quàm utilitatis oriri, hac in parte judicio Episcopi aut Inquisitoris stetur, ut cum consilio Parochi vel Confessarii à Catholicis Auctoribus versorum lectionem in vulgari lingua eis concedere possint, quos intellexerint ex ejusmodi lectione non damnum, sed fidei ac pietatis augmentum capere posse.* Circa quam regulam nonnulla notanda sunt.

Primò, lectio sacrae Scripturae hac sanctione ne ipsis quidem mulierculis ac rudioribus absolute interdicitur; sed iis duntaxat, qui ex ea plus detrimenti, quàm utilitatis acciperent, ut legenti perspicuum fiet.

Secundò, constat experientia, lectionem sacrae Scripturae quibusdam esse noxiam, ac primò quidem Hæreticis, & aliis nimium de se præsumentibus;



bus; nam ex sancto Augustino Tract. 10. in Joan. *neque natæ sunt hæreses, nisi dum Scripturæ bonæ intelliguntur non bene, & quod in eis non bene intelligitur, etiam temerè & audacter asseritur.* 2. Nonnullis etiam Catholicis, quos comperimus vel lapsos, vel gravibus tentationibus agitados ex lectione quorundam capitum Geneseos & Ezechielis, quæ apud Judæos juvenibus non licebat legere, sicut nec Canticum Canticorum. Denique, annon cum evidenti salutis periculo, legerent Epistolam ad Romanos, qui jam præcipientes ruunt in desperationem, quique vix divelli queunt à præconcepta opinione, quòd conditi sint ad pœnas æternas, nec sit eis liberum declinare à malo, & facere bonum?

Tertiò, detrimenta illa spiritualia non nascuntur ex sacris Scripturis, quemadmodum ex Hæreticorum, & aliorum impiorum hominum libris; sed ex temeritate, & malè affecta voluntate legentium; nam ex Apostolo 2. Tim. 3. v. 16. & 17. *Omnis Scriptura divinitus inspirata, utilis est ad docendum, ad arguendum, ad corripiendum, ad erudiendum in justitia; ut perfectus sit homo Dei, ad omne opus bonum instructus.* Absit ut credatur verba à Spiritu Sancto dictata posse ad aliud incitare, quàm ad amorem Dei, & fugam peccati. Sed quemadmodum Sacramenta per se efficacia ad sanctificandos Fideles, obsunt tamen malè dispositis; ita & lectio sacrarum Litterarum. Quæ autem animi præparatio sit ad eas asserenda, latè exposuimus in Proleg. pag. 24. & sequentibus.

Quartò, spectandum est qua occasione fuerit præscripta ejusmodi regula, nempe cum Novatores palàm & ubique deblaterarent quemlibet privatam,

vatum, præsertim si firmiter credat se prædestinatum, interius edoceri à Spiritu Sancto, quis sit Scripturæ sensus, aded ut Cerdones & Sartores eam non lecitarent modò, sed etiam enucleare, & ex ea disputare præsumerent, non sine magna Ecclesiæ perturbatione, & evidenti infirmorum periculo. Quid verò in ejusmodi angustiis consultius facere potuit vigilantia pastoralis, quàm confirmare primùm Canones, quibus prohibetur Laicis sub pœna excommunicationis ferendæ, disputare de rebus Fidei, ut Cap. *Quæcumque §. inbibemus*: tit. de Hæreticis in 6. deinde è manibus indoctorum auferre sacra Biblia vulgari lingua edita? Sed absurdissimo errore cum suis auctoribus nunc anathemate perculso, & procul ejecto, amotum est periculum, quod Ecclesiæ filiis imminabat, Pastoresque liberius repetunt pristinum morem, quo subditos urgebant, maximè eos, qui sæcularibus negotiis distendebantur, ut sacras Litteras frequentius legerent, meditenturque: *tuum est magis, qui negotiis vacas*, inquit S. Chrysostomus Hom. 3. de Lazaro, *perpetuò stas in acie, frequentes accipis plagas. Non potest fieri, non potest, inquam, ut quisquam salutem assequatur, ni perpetuò versetur in lectione spiritali.* Tum prævertens excusationem eorum, qui paupertatem causari solent, quominus emant sacros Libros, sic pergit: *Sunt instrumenta nostræ artis, quibus animam nostram fabricamus. Nunquam artifex in quacunque necessitate fuerit, vendet instrumenta suæ artis. Hoc instrumento vas ligneum poteris reddere aureum in honorem sanctificatum. Quemadmodum arma regalia reposita iis, qui habitant, magnam præbent custodiam . . . . sic ubicunque fuerint Libri spirituales, illinc expellitur, omnis vis diabolica,*  
*multa-*

*multaque inhabitantibus accedit consolatio, quandoquidem ipse etiam Librorum aspectus potest nos reddere segniores ad peccatum.* Sed plura de fructibus, qui ex lectione Scripturæ sacrae percipi possunt, & de animi præparatione ad eam afferenda diximus Prolegomenis toto capite tertio jam citato, & consulendo.

5. Cum laudata Regula ad consilium Confessarii referat, qui ex lectione sacrorum Librorum non damnum, sed fidei ac pietatis augmentum capere possint, satis intelligitur ipsius officii esse, ut exploret, num pœnitentes sacrae Scripturæ vacent, vel non. Si lectitent, inquireret, quo fine, an gloriæ & honorum cupiditate aut curiositate, ut plerumque accidit Scholaribus, qui Libros sacros evolvunt ea ferè mente, qua Philosophi Scholæ suæ Principes consulunt, nempe ut litteram duntaxat, quæ occidit, assequantur, nullatenus solliciti promereri Spiritum, qui solus vivificat. Si negligunt: sicut ad frequentem Sacramentorum usum, sic ad sacram lectionem hortabitur, maximè Clericos; ideo quippe Scriptura sancta dicitur à Patribus Liber Sacerdotalis, seu Manuale; quia nunquam excidere debet ex eorum manibus; quin ejus lectionem, si necesse sit, imponet veluti in pensum quotidianum, indoctisque indicabit, quas Bibliorum partes majori cum fructu legere debeant. Sed quia Sancta sanctè tractanda sunt, imprimis suas curas conferet, ut singuli ea, qua par est, reverentia, pietate, ac studio sacrae illi lectioni incumbant.

Q. II. *Quenam sunt Hæreticorum pœnæ?*

R. In Jure Canonico plures numerantur extra. tit. de Hæreticis, & in 6. eodem titulo, ut excommu-

communicatio , irregularitas , tum eorum , qui hæresim professi sunt , tum filiorum. Sed in Gallia nec filii nec patres ad Ecclesiam reversi censentur irregulares.

Q. 12. *Quotuplex est apostasia?*

R. Quadruplex vulgò recensetur, nempe apostasia à Fide, ab Obedientia , à Religione , & ab Ordine. Sed prima duntaxat pertinet ad materiam, quam hìc tractamus.

Apostasia à Fide est infidelitas , qua Christus & Fides Christiana jam suscepta penitus deseritur. Supra autem diximus , apostasiam à Fide non differre ab hæresi , nisi accidentaliter secundum magis & minus ; apostasia quippe est totalis desertio Fidei & Auctoris ejus ; hæresis verò est desertio duntaxat quorundam dogmatum. Unde Calvinistæ non sunt Apostatæ, si strictè loquamur , sed Hæretici , utpote qui Christo adhæreant , & plura Fidei dogmata retineant.

Apostasia ab Obedientia est ea, qua quis præcepta Prælati non solum negligit , quod est inobedientiæ, sed insuper iis formaliter se opponit , eaque contumax abjicit.

Apostasia à Religione , est criminosa recessio à quolibet Ordinis Religiosi instituto , cum proposito non revertendi , sive retineatur habitus, sive abjiciatur.

Dicitur 1. *criminosa recessio* ; quia qui licitè recedit , ut electus ad Dignitatem Episcopalem , non est apostata.


Dicitur 2. *à quolibet Ordinis Religiosi instituto* ; si quis enim sine dispensatione recedit ad laxiorem, quam-



quamvis graviter peccet, imò excommunicationem incurrat, si sit ex Ordine Mendicantium, ex extravag. 1. de Regularibus, non est tamen Apostata.

Dicitur 3. *Cum proposito non revertendi*; qui enim habet animum redeundi aut permanendi in statu Religioso, vagus est, non apostata, etiamsi habitum dimiserit ad tempus. Sed Religiosus professus habitum temerè dimittens, incurrit excommunicationem, cap. *Ut periculosa*, tit. *Ne Clerici, vel Monachi*, in 6. Censetur autem habitum dimittere, qui omninò abscondit, ita ut nullum signum præferat, quo Religiosus deprehendi possit.

Apostasia ab Ordine est ea, qua quis à sacris Ordinibus dimisso habitu, transit ad statum laicæ conversationis, putà conjugii.



\*\*\*\*\*  
\*\*\*\*\*

## SECUNDA PARS

### De Spe.

**S**pei nomen aliquando usurpatur metaphoricè,  
 1. pro ipsa re speranda, ut Tit. 2. *expectamus beatam spem.* 2. Pro causa efficiente, sive principe, sive instrumentali spei nostræ; quo sensu dicitur amico præpotenti, quod sit unica spes nostra, hoc est, quod per ipsum solum speremus consequi finem optatum. Sic compellamus Deum Psalm. 90. *Tu es, Domine, spes mea*, id est, tua gratia tuoque auxilio nititur spes mea, & Beatam Virginem tanquam causam instrumentalem spei nostræ, *vita, dulcedo, & spes nostra, salve.* Sed propriè sumitur pro sperandi vel actu, vel habitu, ut 1. Cor. 13. nunc tamen manent tria hæc, Fides, spes, & charitas. Hic agitur de Spe posteriori modo sumpta, circa quam quæremus  
 1. Quid sit. 2. Quodnam ejus objectum. 3. Utrum & quomodo differat à fide & charitate.  
 4. Quæ ejus necessitas. 5. Quæ certitudo.  
 6. Quæ peccata ipsi opposita. 7. Quæ ejus causæ. 8. Qui effectus.

---

## CAPUT PRIMUM.

De Spei definitione, objecto, & divisione.

Spes propriè dicta spectari potest genericè & speci-

specificè; alia enim est appetitus sensitivi, quæ dicitur passio, quamque sanctus Thomas 1. 2. quæst. 40. artic. 3. agnoscit in belluis: alia est appetitus rationalis seu voluntatis, & hæc totuplex est, quotuplex est bonum, quod speratur. Unde alia est spes militum, qui sibi proponunt victoriam: alia mercatorum, qui lucrum appetunt: alia Christianorum, qui ad beatitudinem cœlestem anhelant; & spes ista est verè Theologica, utpotè quæ versetur circa Deum, qui solus est beatitudo nostra.

Quamvis nostra disputatio sit duntaxat de spe Theologica, operæ tamen pretium est accuratius exponere genericam spei definitionem, circa quam omnes conveniunt tum Philosophi, tum Theologi, ut ex ea colligamus, quæ debeat esse spei Theologicæ definitio, circa quam dissentiant Theologi; effatum enim est in Scholis receptum, scilicet ea quæ conveniunt generi, necessario convenire & speciei, v. gr. quod est essentiale animali & virtuti, genericè spectatis, illud quoque essentiale est cuilibet speciei animalis, & virtutis. Quamobrem,

Q. 1. *Quid est spes genericè spectata?*

R. Definitorum communi Philosophorum & Theologorum suffragio, motus appetitus efficaciter tendentis in bonum absens, arduum, apprehensum ut possibile.

Dicitur 1. *motus appetitus*, sive sensitivi, si spes sit passio & actus necessarius; sive rationalis, si sit actus Liber tendens in bonum mente apprehensum. His autem vocibus significatur, spem non pertinere ad intellectum; sed ad appetitum seu voluntatem; quia spes fertur in bonum,

quodd non est objectum intellectus sed appetitus.

Dicitur 2. *Efficaciter tendentis in bonum*, ut distinguatur à simplici complacentia & volitione inefficaci, quale potest esse desiderium inefficax victoriæ in imbelli; spes enim est desiderium efficax obtinendi bonum concupitum.

Dicitur 3. *In bonum absens*, quo spes differt, tum ab amore, qui æquè est boni præsentis ac absentis: amamus enim bonum sive sit præsens, sive sit absens: tum à gaudio, quod est fruitio boni præsentis & possessi. Spes autem, licèt ex amore procedat, non potest esse, nisi boni futuri & absentis; ex Apostolo enim Rom. 8. v. 24. *Spes quæ videtur, non est spes; nam quod videt quis, quid sperat?*

Dicitur 4. *Arduum*, hoc est, obtentu difficile, ut distinguatur spes à desiderio, quod est etiam boni absentis, sed apprehensi ut obtentu facilis: dives esuriens v. gr. non sperat, sed desiderat alimenta; pauper verò desiderat simul & sperat: ille, quia aliqua alimenta ipsi apponentur statim ut iusserit: iste, quia ipsi comparanda sunt vel labore & industria, vel multis precibus idoneis ad flectendam divitum misericordiam. Hinc Philosophi desiderium reponunt in appetitu concupiscibili, qui, nullo obistente, fertur in bonum, & aversatur malum: spem verò in irascibili, quem ita appellant; quia quodammodo irritatus difficultatibus, quibus septum proponitur bonum, stimulatur & accenditur ad illas superandas.

Dicitur 5. *Apprehensum ut possibile*; quia ex S. Thoma 1. 2. qu. 40. art. 1. ad tertium, *nullus movetur ad id, quod æstimat impossibile adipisci*; canis, inquit,



inquit, non insequitur leporem, quem nimis remotum conspicit, quia ejusmodi prædam apprehendit ut impossibilem.

Ergo objectum spei genericè spectatæ, materiale quidem est res bona; formale verò ejus bonitas absens, ardua, & possibilis; illud enim est objectum materiale actus aut habitus, circa quod actus vel habitus versatur; formale verò, quod est ratio, sub qua actus vel habitus versatur circa objectum materiale; atqui spes versatur circa rem bonam quatenus bona est, absens, ardua, & possibilis: Ergo.

His præmissis de spe in genere.

Q. 2. *Quid est Spes Theologica?*

R. Est virtus supernaturalis Theologica, per quam certa cum fiducia futuram beatitudinem, & media illius assequendæ expectamus per Dei auxilium.

Dicitur 1, *Virtus*; Quia virtus facit bonum habentem se, opus ejus bonum: atqui spes Theologica facit bonum habentem se, juxta illud Ps. 33. *Beatus vir, qui sperat in eo*, & opus ejus bonum; quia, ut argumentatur S. Thomas quæst. 17. art. 1. opus bonum dicitur quod propriam regulam attingit; sicut, inquit, *dicimus vestem esse bonam, quæ nec excedit, nec deficit à debita mensura*: humanorum autem actuum duplex est regula, altera proxima, scil. ratio, altera remota & suprema, nempe Deus: atqui actus spei utramque regulam attingit 1. rationem, quæ dicat tendendum in ultimum nostrum finem, & beatitudinem, 2. Deum, cujus auxilio innititur.

Dices: Spes est in peccatoribus: ergo non facit bonum habentem se.

Q 9 3

R. 1.

R. 1. Argumentum illud nimis probat : inde enim concluderetur, præter charitatem, quæ sola excludit peccatum, nullam esse virtutem.

R. 2. Distinguendo consequens; Spes non facit bonum simpliciter & absolute, Conc. Quia à sperante non excludit omne peccatum lethale: non facit bonum secundum quid, Nego consequentiam; Peccator enim quatenus sperans in Deo, ut decet, bonus est & laudabilis, licet aliunde sit vituperandus. Quemadmodum igitur quodlibet sidus aërem collustrat, sed modo dispari; quia non eadem uniuscujusque claritas; sol omnino fugat tenebras, Luna & Stellæ ex parte duntaxat magis aut minus pro cuiusque claritate; sic cogites animam illustrari virtutibus: charitas ad instar Solis suo præcellenti fulgore, omnes peccati, saltem lethalis, tenebras expellit, cætera tanquam luminaria minora eas duntaxat, quæ propius & immediatius ipsis opponuntur, ut religio impietatem, fortitudo ignaviam, Fides infidelitatem, spes desperationem & præsumptionem; sicut enim stella à stella differt in claritate, ita virtus à virtute in perfectione, nulla in suo genere imperfecta, nisi comparatè ad aliam perfectionem.

Dicitur 2. *Supernaturalis*; ac proinde à Deo infusa, juxta illud Rom. 15. *Deus . . . . . spei repleat vos omni gaudio & pace in credendo, ut abundetis in spe, & virtute Spiritus Sancti.* Et ratio est, quia spes tendit in Deum supernaturaliter possidendum.

Dicitur 3. *Theologica*; quia habet Deum pro objecto primario.

Dicitur 4. *Per quam certa cum fiducia futuram beatitudinem expectamus*; quia spes veluti anchora, animam

nam tentationibus & procellis hujus vitæ agitatam, firmat in promissis Dei, juxta illud Apostoli, Hebr. 6. vers. 19. 20. *Confugimus ad tenendam propositam spem, quam sicut anchoram habemus animæ tutam ac firmam.* Sed de certitudine Spei postea.

Dicitur 5. *Et media illius assequenda*, quibus denotatur secundarium spei objectum, nempe gratia & bona opera, sine quibus vana esset spes nostra, & mera præsumptio, quæ est peccatum Spei Theologicæ oppositum, ut infra dicitur.

Dicitur 6. *Expectamus per Dei auxilium*; quia beatitudo naturæ viribus non est possibilis: *infinitæ virtutis est*, inquit S. Thomas quæst. 17 art. 2. *ad infinitum bonum perducere*; ideoque magis propriè vitam æternam expectare dicimur, quàm sperare; nam ex eodem Angelico Doctore, 1. 2. quæst. 40. art. 2. ad primum; *Quod aliquis sperat per propriam virtutem adipisci, non dicitur expectare, sed sperare tantum: sed propriè dicitur expectare quod sperat ex auxilio virtutis alienæ.*

Ergo primum spei objectum materiale est Deus possidendus: *Non enim minus aliquid ab eo sperandum est, quàm sit ipse*, ait S. Thomas cit. qu. 17. art. 2. secundarium verò sunt ea etiam temporalia, per quæ Deus decrevit nos ad seipsum adducere. Consequentia sequitur ex allata definitione; objectum enim materiale cujuslibet virtutis est res, circa quam adæquatè versatur: atqui spes adæquatè versatur primariò circa futuram beatitudinem, quæ non est aliud, quàm Deus possidendus; secundariò verò circa media, quibus obtineri potest; *Sicut & Fides*, inquit S. Thomas q. 17. art. 2. ad secundum, *principaliter quidem respicit Deum & secundariò respicit ea, quæ ad Deum ordinantur, nec*

quidquam aliud attendit; namque *homini qui anhelat ad aliquid magnum*, ait idem sanctus Doctor eodem articulo ad tertium, *pravum videtur omne aliud, quod est eo minus.*

Dixi: *Per quæ Deus decrevit*, &c. Temporalia enim secundum se spectata, æquè possunt esse impedimenta salutis ac adjumenta, nec illius consequendæ evadunt media, nisi ad eam fuerint ordinata & quidem à Deo; nam sine ejus motione à nobis ordinari nequeunt; ac proinde non ex affectu ad illa, sed ex affectu ad vitam æternam illa quærere, & petere debemus; alioquin illa non ex gratia & virtute, sed ex cupiditate expecteremus. Sed de iis plura ubi de Oratione, Tom. 4. Tractatu de Religione, cap. 4. §. 4.

Q. 3. *Quod est objectum formale spei?*

R. Hic in varias sententias abeunt Theologi. Alii statuunt omnipotentiam divinam & misericordiam, seu Deum, ut omnipotentem & misericordem, nitunturque auctoritate S. Thomæ, qui quæst. 28. art. 4. ad secundum, ex eo distinguit spem ab aliis virtutibus, quòd *addat ex parte objecti quandam specialem rationem, scilicet arduum & possibile adipisci.* Et qu. 17. art. 6. in Corpore: *Spes, inquit, facit Deo adhærere, prout est in nobis principium perfectæ bonitatis, in quantum scilicet, per spem divino auxilio innitimur ad beatitudinem obtinendam.* Atqui quod est ratio tendendi in objectum materiale, & distinguendi virtutem ab aliis, procul dubio est formale virtutis objectum; justitia v. gr. & liberalitas, licet versentur circa idem objectum materiale, nimirum circa pecuniam numerandam, sunt tamen duæ virtutes distinctæ; quia sub diversa ratione pecuniam respiciunt, justitia quidem ut debitam, libera-



liberalitas verò ut gratuitam largitionem : Ergo.

Alii contra asserunt, bonitatem divinam relativè ad nos, seu Deum ut nobis bonum, esse objectum formale spei; quia inquiunt, sicut desiderium nascitur ex amore; nemo quippe id desiderat, circa quod indifferens est; ita spes nascitur ex amore concupiscentiæ; atqui idem est objectum formale amoris & desiderii, scilicet, bonitas objecti diversimodè apprehensa in amore simpliciter & absque circumstantia præsentis, aut absentis; in desiderio determinatè ut absens & futura: Ergo à pari idem est objectum formale spei Theologicæ, & amoris concupiscentiæ, quo expectamus possidere Deum, ut summum bonum nostrum.

Sed utraque scientia facilè conciliari posse videtur; & si supersit difficultas, erit purè metaphysica, à Philosophis potius quàm à Theologis excutienda.

Atque ut mentem aperiā, prætermittendum est, quod apud omnes constat, nimirum voluntatem non ferri in objectum nisi sub ratione boni, aut mali: boni quidem prosequendi, mali verò fugiendi; ac proinde sicut verum saltem apparens est objectum formale mentis assensus: ita bonum est necessariò objectum formale conatus voluntatis in rem amatam, nihil intelligibile, nisi sub ratione veri: nihil appetibile, nisi sub ratione boni. Atqui nec possibilitas, nec omnipotentia, ex qua possibilitas repetitur, alliciunt voluntatem ratione sui præcisè, sed ratione bonitatis, cum qua apprehenduntur conjunctæ, namque omnipotentia, qua pœnam æternam concipimus

possibilem, spem non injicit, sed timorem propter malum pœnæ, quam peccantibus inferre concipitur. Ergo sicut malum pœnæ per omnipotentiam possibile & impendens, est objectum formale, seu motivum temporis; ita Deus ut nobis bonus & possidendus per omnipotentiam divinam & misericordiam, est formale spei objectum; ac proinde objectum formale spei non est simplex, sed complexum, ex bonitate divina relative ad nos, & ex omnipotentia & misericordia, quibus possessio Dei fit possibilis.

Ergo beatitudinis possibilitas per omnipotentiam & misericordiam divinam minus est formale objectum spei, quàm circumstantia, conditio, & modificatio ejus objecti formalis, nempe beatitudinis per auxilium Dei consequendæ. Nec aliud vult S. Thomas locis laudatis, ut colligitur ex qu. 17. art. 2. in quo ex professo probat, beatitudinem æternam esse proprium spei objectum. Et art. 4. sic habet; *Spes duo respicit, scil. bonum, quod obtinere intendit, & auxilium, per quod illud bonum obtinetur. Bonum autem, quod aliquis sperat obtinendum, habet rationem causæ finalis; auxilium autem, per quod aliquis sperat obtinere illud bonum, habet rationem causæ efficientis.* Ex quibus verbis sic argumentari licet, causa finalis est primum movens ad opus; atqui ex S. Thoma, bonum, quod spes obtinere intendit, nempe beatitudo æterna, habet rationem causæ finalis; Ergo beatitudo æterna est spei objectum motivum, seu formale.

Dices 1. In eo qui sperat Deum ut suam beatitudinem, duo sunt distinguendi actus, alter desiderii, quo tantum bonum absens & futurum desiderat, & hic actus pertinet ad charitatem, cujus  
objectum

objectum est bonitas divina: alter spei, quo conatur ad illud bonum, nixus omnipotentia & misericordia divina, quas respicit tanquam proprium objectum formale; inde enim movetur ad conandum: Ergo.

R. 1. Utrum in eo, qui sperat, concurrant duo actus distincti, alter desiderii, alter spei, quaestio est planè Philosophica: nobis satis est, quòd sperans feratur in Deum ut suum bonum, arduum quidem, sed obtentu possibile per divinum auxilium. Videtur tamen unicum elicere actum, qui virtualiter duplex est. Quemadmodum enim qui desiderat bonum absens, non elicit duos actus, alterum amoris, alterum desiderii; sed unico actu, nempe desiderii fertur in suum objectum; quid est enim desiderium, nisi amor boni absentis? Similiter qui sperat, unico actu movetur efficaciter in bonum suum absens, arduum, & possibile, ita ut ratio absentis, ardui, & possibilis sit circumstantia, conditio & modificatio unius & ejusdem objecti, nimirum beatitudinis objectivæ, quæ est causa finalis & motiva unius realiter actus, scil. spei, virtualiter autem duplicis; in spe enim intelligitur amor & desiderium; nisi enim quis amaret & desideraret bonum, non niteretur illud assequi. Sed utut sit,

R. 2. Negando, desiderium illud semper esse actum charitatis; peccator enim desiderat, ac sperat veniam & vitam æternam, non per charitatem, qua caret, sed per spem Theologicam.

Dixi: Desiderium vitæ æternæ non semper esse actum charitatis, ut innuerem, illud aliquando à charitate, aliquando verò à virtute spei proficisci

ficisci. In quo autem differant duo illa desideria, dicetur capite proximè sequenti.

Dices 2. Appetere Deum ut bonum nostrum, est referre Deum ad nos tanquam ad finem, & amare illum amore concupiscentiæ: atqui inordinatus est ille amor; rectus enim ordo postulat, ut omnia ad Deum tanquam ad ultimum finem referantur: Ergo.

Distinguo major. Est referre Deum ad nos tanquam ad finem, cui optamus tantum bonum, Conc. Tanquam ad finem, cujus gratia cætera assumuntur tanquam media, Nego major.

Distinguo similiter minorem, inordinatus est amor, quo Deum ad nos referimus tanquam ad finem, cujus gratia, Conc. Tanquam ad finem cui, Nego minor.

Finis *cui*, est persona, cui optamus bonum, quod aliquando tanti æstimamus, ut ipsum sit nobis quoque finis, cujus gratia multa facimus, sic sapientia v. gr. quatenus propter illam acquirendam oramus, vigilamus, laboramus, est finis cujus gratia: quatenus autem illam nobis optamus, sumus ejus finis cui. Contra verò sumus finis cujus, gratia pecuniæ, alimentorum & necessariæ suppellectilis, quæ nobis comparamus; quia non spectantur illa tanquam bona propter se expetibilia, quemadmodum sapientia; sed propter nos duntaxat tanquam media necessaria, & ad usus nostros accommodata.

Porro turpe est & flagitiosum, Deum ad se referre tanquam ad finem cujus gratia; hoc enim est Deum minoris facere quàm nos ipsos, & perverso ordine uti ultimo fine veluti medio: *Omnis humana perversio est*, inquit sanctus Augustinus Lib. 83.



Lib. 83. quæst. 30. (*quod etiam vitium vocatur*) fruendis uti velle, atque utendis frui. Et rursus omnis ordinatio (*quæ virtus etiam nominatur*) fruendis frui, & utendis uti. Fruendum est autem honestis, & utendum utilibus. Et Lib. 15. de Civ. Dei cap. 7. boni utuntur mundo, ut fruantur Deo: mali autem e contra ut fruantur mundo, uti volunt Deo.

Sed honestè & piè Deum ad nos referimus tanquam ad finem cui, in eo quippe testamur summam ejus bonitatem & omnimodam perfectionem; sic refertur causa ad effectum, fons ad rivulum, plenitudo ad vacuum, misericordia ad miserum, perfectivum ad perfectibile. Sic subditus Principem suum honorat, dum benevolentiam ejus sibi conciliare satagit, & gratiam seu favorem ejus, amicitiaë cujuslibet aulici præponit.

Instabis 1. Atqui per amorem spei, qui est amor concupiscentiaë, Deum non appetimus propter se, sed propter nos duntaxat: ergo inordinatus est ille amor.

R. 1. Argumentum illud nimis probare, cùm ex eo æquè concludi possit, nullam agnoscendam esse virtutem præter charitatem, quæ solum Deum propter se diligit: imò nos inordinate à Deo auxilium petere in adversis; ejusmodi enim precum sumus finis cui; cùm tamen ipse testetur Psal. 49. se eas ducere honori & gloria: *Invoca me, inquit, in die tribulationis; eruam te, & honorificabis me*; est enim solemnis confessio omnipotentis bonitatis divinae. Inde ergo sequitur duntaxat, amorem spei non esse æquè perfectum ac amorem charitatis, quod ultrò fatemur; nam ex sancto Thoma quæst. 17. artic. 8. *Perfectus amor est, quo aliquis secundum se amatur, utpotè cui aliquis vult bo-*

*num, sicut homo amat amicum. Imperfectus amor est, quo quis amat aliquid non secundum ipsum, sed ut illud bonum sibi ipsi proveniat, sicut homo amat rem, quam concupiscit. Primus autem amor pertinet ad charitatem quæ inhæret Deo secundum seipsum. Sed spes pertinet ad secundum amorem; quia ille qui sperat, aliquid sibi obtinere intendit.*

R. 2. Distinguo subsumptum; atqui per amorem spei Deum non appetimus propter se, sed propter nos, ita ut apprehendamus illum ut summum bonum appetibile propter se, nec per imperfectum spei amorem excludamus perfectiorem motum charitatis, Concedo: Non appetimus propter se, sed propter nos, ita ut Deus nobis videatur ut medium nobis utile & necessarium, nec aliter amabile, quàm in ordine ad nos, Nego subsumptum; Amor enim spei sub illo respectu esset inordinatus & turpis, excluderétque charitatem, quemadmodum cupiditas prædominans. Sed absit à Spe Theologica tanta perversitas, quin ipsa disponit ad amandum Deum propter se: Spes, inquit S. Thomas cit. art. 8. *introducitur ad charitatem, in quantum aliquis sperans remunerari à Deo, accenditur ad amandum Deum, & servandum præcepta ejus.* Et S. Bernardus Tract. de diligendo Deo cap. 9. *Si frequens ingruerit tribulatio, ob quam & frequens ad Deum conversio fiat, & à Deo frequens liberatio consequatur, nonne etsi fuerit ferreum pectus, vel cor lapideum toties liberati, emolliri necesse est ad gratiam liberantis, quatenus Deum homo diligat non propter se tantum, sed & propter ipsum?*

Instabis 2. Amor mercenarius est vituperandus; atqui amor spei est mercenarius, ex sancto Bernardo cit. Tract. de diligendo Deo cap. 12.

*Est*

*Est qui confitetur Domino, quoniam potens est; & est qui confitetur, quoniam sibi bonus est, & item, qui confitetur, quoniam simpliciter bonus est. Primus servus est, & timet sibi. Secundus mercenarius, & cupit sibi. Tertius filius, & desert patri. Itaque & qui timet, & qui cupit, utrique pro se agunt. Ergo.*

Distinguo major. Amor mercenarius strictè sumptus, qui pro mercede temporalia expectat, quo sensu Joan. 10. reprobatur Pastor mercenarius, Conc. Mercenarius in lata significatione, qui aliam mercedem præter Deum non intendit, Nego majorem: Nam Christus, Matth. 5. v. 13. Spe hujusce mercedis nos nutrit & roborat: *Gaudete, inquit, & exultate, quoniam merces vestra copiosa est in cælis.* Et Hebr. 11. v. 26. laudatur Moyse, quòd aspexerit in hujusmodi remunerationem. Porro S. Bernardus loquitur de eo, qui facit opus Dei intuitu bonorum temporalium: *facit & mercenarius, inquit, cit. c. 12. sed quia non gratis, propria trahi cupiditate convincitur.*

Q. 4. *Potestne quis sperare alteri beatitudinem æternam?*

Respondet S. Thomas qu. 17. art. 3. cum hac distinctione: vel proximus spectatur ut alter à nobis, vel ut unitus, ac veluti unum quid nobiscum per amorem, consanguinitatem, & aliud simile vinculum: Si primo modo spectetur, non possumus illi sperare beatitudinem Spe Theologica, juxta illud S. Augustini, Enchir. cap. 8. *Fides & suarum rerum est & alienarum . . . . . spes autem nonnisi bonarum rerum est, nec nisi futurarum, & ad eum pertinentium, qui earum spem agere perhibetur.* Et ratio est, quia Spei Theologicæ objectum formale & motivum, est bonum divinum; motivum autem desiderii, quo optamus alteri beatitudinem, si amore non sit nobis unitus, non potest esse nisi

nisi bonitas, quæ in ipso est, ac proinde desiderium illud non erit actus Spei Theologicæ.

Sed si proximus secundo modo spectetur; scilicet ut aliquo vinculo nobis unitus, illi tanquam nobis ipsis beatitudinem speramus spe Theologica: quia motivum hujusce desiderii non est aliud, quam bonitas divina possidenda, nec incitatur ad ejus possessionem appetendam ex aliqua bonitate, quæ sit in nobis, cum naturalis impetus nos impellat in nostri amorem & prosecutionem nostri boni, etiamsi nullam in nobis apprehendamus perfectionem.

Q. 5. *Quotuplex est Spes Theologica?*

R. Una est specie; quia unicum est ejus objectum formale & motivum; accidentariò tamen, & ex quibusdam adjunctis dividitur sicut Fides in spem informem, & spem formatam.

Spes informis est spes sine charitate, ut in peccatoribus; spes formata est spes conjuncta cum charitate, ut in Justis. Spes informis dicitur mortua; quia separata à charitate, vel est sine motu & actu sicut corpus ab anima separatum: vel si operetur, opera ejus, etsi supernaturaliter bona, disponantque ad justificationem, viva tamen non sunt, nec meritoria vitæ æternæ, ut diximus ubi de conditionibus necessariis ad meritum de condigno. Plerumque autem spes informis otiosa est, 1. propter malam conscientiam: *Ille sperat*, inquit S. Augustinus in Psalm. 31. *qui bonam conscientiam gerit: quem verò pungit mala conscientia, retrahit se à spe*, nimirum timor, qui ex mala conscientia nascitur, diffidentiam injicit. 2. Propter frigus cupiditatis, qua peccatoris animus astringitur & quomodo agglutinatur rebus terrenis & cœlestium oblivisci.



vificitur : nullus autem sperat bona spiritualia, nisi ea vehementer desideret : quomodo verò desideraverit , qui non amat ? Spes ergo jacet in corde frigidus peccatoris velut radix sterilis, & si quando sperare videtur , plerumque vana confidentia est & præsumptio , ut infra dicetur.

Spes verò formata dicitur viva ; quia charitas est veluti spiritus vitalis vivificans, & ponens in actu virtutes, quas informat. 1. Quia tribuit bonam voluntatem , inspirat desiderium cœlestium bonorum , ex quo facile sequitur conatus ad superanda ardua quæque. 2. Quia operit multitudinem peccatorum, & conscientiam mundat : atqui mens benè conscia fiduciam , hoc est , firmam spem sumit, ut habetur, 1. Joan. 3. v. 21. *Si cor nostrum non reprehenderit nos , fiduciam habemus ad Deum.* 3. Quia constituit nos Dei amicos : vera autem amicitia excludit omnem diffidentiam. Unde S. Ambrosius laudatus à S. Thoma, qu. 17. art. 8. scribit in Lucæ c. 17. *ex fide est charitas , ex charitate spes , non quidem informis ; hæc quippe charitatem præcedit , sed formata & perfectior , ut interpretatur Angelicus Doctor , his verbis : Secundum ordinem perfectionis charitas prior est naturaliter. Et ideo adveniente charitate , spes perfectior redditur , quia de amicis maximè speratur.* Porro spes viva, sicut & Fides viva est propria Christianorum, juxta illud primæ Petri cap. 1. v. 3. *Benedictus Deus, & Pater Domini nostri Jesu Christi , qui secundum misericordiam suam magnam regeneravit nos in spem vivam.*

Q. 6. *Licetne sperare in homine ?*

R. Licet tanquam in causa instrumentali, quando Deus ea utitur ad nostram salutem : non licet  
D. Habert Theolog. Tom. III. Rr autem

autem sperare in homine tanquam in causa principali ; scriptum est enim Jer. 17. *Maledictus homo, qui confidit in homine*, probatque S. Thomas qu. 17. art. 7. hac ratione : *Sicut*, inquit, *non licet sperare aliquod bonum præter beatitudinem sicut ultimum bonum, sed solum sicut id, quod est ad finem beatitudinis ordinatum : ita non licet sperare de aliquo homine, vel de aliqua creatura, sicut de prima causa movente in beatitudinem. Licet autem sperare de aliquo homine, vel de aliqua creatura, sicut de agente secundo & instrumentali, per quod aliquis adjuvatur, ad quæcunque bona consequenda in beatitudinem ordinata.*

Dices : Spes utpote Theologica, non nititur, nisi omnipotentia & misericordia divina : Ergo nullatenus ponenda est in homine, etiam ut causa instrumentali, sed solum in auxilio divino ; alias niteretur potestate creata, & sub illo respectu non esset Theologica.

Nego conseq. Quia instrumentum non agit, nisi virtute causæ principalis. Unde sicut qui tegitur gladio custodientis se, non confidit propriè in gladio, sed in persona gladio instructa ; similiter qui, ut securius salutis suæ consulat, ad sapientem confugit, & consiliis ejus se regendum præbet, ea mente & persuasione, quod Deus eo tanquam ministro utatur, non alio, quàm in Deo spem suam collocat ; secus si præcipuè ob naturales ejus dotes, & naturali quadam animi propensione se illi adjungeret ; tunc enim spem suam poneret in homine, & non in Deo ; quod maxime cavendum.

## CAPUT II.

## De Differentia Spei à Fide &amp; Charitate.

Q. 1. *Spes estne virtus à Fide distincta?*

Negant Pseudo-Reformati, contenduntque veram fidem nihil aliud esse, quam certam fiduciam in promissis Dei; quam hæresim confutavimus, Tract. de Gratia, ubi de justificatione c. 4. & §. 8. Quare cum omnibus Catholicis,

R. Spes est virtus à fide distincta, probaturque 1. ex Scriptura, 1. Cor. 13. v. 13. *Nunc autem manent fides, spes, & charitas: tria hæc*; ubi Apostolus manifestè spem à fide distinguit. 2. ratione; quia illæ virtutes essentialiter distinguuntur, quæ habent diversum non solum subjectum, sed etiam objectum formale; omnis quippe habitus & actus suam essentiam desumit ab objecto formali: atqui sic se habent fides & spes; fides est virtus intellectualis intellectum informans: spes verò residet in voluntate, tanquam in proprio subjecto: fides tendit in objectum quatenus verum, in Deum nempe, ut est prima veritas; spes autem respicit Deum, ut est summum bonum, & supernaturalis nostra beatitudo objectiva: Ergo fides & spes sunt duæ virtutes essentialiter distinctæ.

Q. 2. *Spes distinguitur à charitate?*

R. Apostolus citato loco non solum eam distinguit, sed insuper opponit tanquam relatum correlato; postquam enim dixit, *nunc autem manent fides, spes, charitas, tria hæc*; subdit statim: *major autem horum est charitas.* I. r. nihil est ma-

jus respectu sui ipsius, sed respectu alterius correlati : ergo.

Dices : Illæ virtutes non distinguuntur , quæ habent idem objectum formale : atqui spes & charitas idem habent objectum formale : Ergo.

Minor probatur. Objectum spei ex dictis capite præcedenti , est supernaturalis beatitudo objectiva , seu Deus possidendus , ut summum nostrum bonum : atqui idem est charitatis objectum ; nam charitatis consummata in Beatis est frui Deo , gaudere de Deo præsentem , & in illo quiescere tanquam in summo bono : charitatis verò proficientis in viatoribus , est desiderare ejus conspectum & possessionem , ægréque ferre ejus absentiam : ergo idem est utriusque virtutis objectum formale , ac proinde spes & charitas sunt una & eadem virtus.

R. 1. Negari non posse, quin charitas in viatoribus tendat in Deum, tanquam in ultimum nostrum finem, desideriumque fruendi tanto bono, sit proprius illius actus, quemadmodum Eminentiſſimus Cardinalis *De Noailles*, efficaciter & multum cum eruditione demonstrat in sua Institutione Pastoralis, adversus spurios Mysticos. Enimvero nihil amanti optatius, quàm frui amati præsentia ; nihil molestius, quàm ab illo divelli, aut separari. Annon sponsa, per quam exprimitur juxta S. Patres quilibet justus in amore Dei perfectus, ex purissimo charitatis affectu per vicos & plateas quærebat dilectum ? Cant. 3. Annon Apostolus ex ardentissimo Christi amore dicebat Philipp. 2. *Coarctor . . . . è duobus desiderium habens dissolvi, & esse cum Christo, multò magis melius : permanere autem in carne, necessarium propter vos.* Sed hæc



hæc responsio nedum solvat difficultatem, illam potius auget, nec parùm torquet Theologos, ubi statuendum est discrimen spem inter & charitatem.

Alii ita admittunt Deum ut beatitudinem nostram objectivam, esse objectivum formale charitatis, ut definiant, objectum spei esse præcisè omnipotentiam & misericordiam divinam, quibus objectum charitatis possibile redditur, ut quemadmodum in politicis virtus fortitudinis inservit justitiæ legali ad tuendum ordinem, & conservandam pacem, quibus consistit regni felicitas; ita spes charitati inserviat ad superandum arduum, quod in ejus objecto apprehenditur.

Refelluntur 1. Ex dictis capite præcedenti. 2. Ex Patribus, qui asserunt, possessionem Dei ut ultimum nostrum finem per spem & charitatem expeti; sed ratione planè diversa; ideoque duas illas virtutes esse omninò distinctas; nam virtutes & cæteri habitus magis distinguuntur ex objecto formali, quàm ex objecto materiali, ut sæpè diximus. Sanctus Gregorius Nyssenus Hom. 1. in Cantica, spem à charitate in eo distinguit, quòd illa mercedem, ista solam operis honestatem respiciat: *Nonnullis, inquit, fit etiam salus per timorem, quando intuentes ad minas suppliciiis gehennæ separantur à malo: sunt etiam aliqui, qui propter spem mercedis repositam iis, qui piè vixerint, se rectè & ex virtute gerunt, non charitate bonum possidentes . . . . . sed qui animo currit ad perfectionem, expellit quidem timorem: est enim ejusmodi servilis affectio . . . despicit ipsas quoque mercedes, ne videatur mercedem pluris facere, quàm eum qui donat lucernam.* Ubi S. Doctor tres gradus distinguit in ascensu ad Deum. In primo

eos collocat, qui timore impelluntur. In secundo, qui alliciuntur spe mercedis, quæ non potest esse nisi Deus, alioquin aberrarent. In tertio, qui solo charitatis amore ducuntur. S. Basilius in Proœmio Regularum fusiùs disputatarum, & S. Gregorius Nazianzenus Orat. 40. eandem distinctionem secuti, primos vocant servos, secundos mercenarios, tertios filios. Ergo in mente illorum Patrum, spes in eo distinguitur à charitate, quòd spectet, non quidem omnipotentiam & misericordiam, sed mercedem, quam per divina illa attributa obtinere nititur: merces autem illa non potest esse aliud, quàm Deus ipse, quatenus est summum nostrum bonum. Sanctus Chrysostomus pluribus in locis, ut Hom. 17. in Epist. ad Hebræos, docet servanda esse præcepta, non solum spe mercedis, sed etiam amore illius, qui legem tulit: *Etiam si, inquit, merces non esset proposita, oporteret esse bonum; sed tamen cum mercede sumus boni.* Et Hom. 5. in Epist. ad Rom. *Nec propter minas supplicii, nec propter promissionem regni, sed propter eum, qui legem tulit.* Similia habet S. Augustinus Lib. 21. de Civ. Dei cap. 15. *Sed (si quod absit) illius tanti boni spes nulla esset, malle debuimus in hujus conflictationis molestia remanere, quàm vitiis in nos dominationem non eis resistendo permittere.* Cassianus collatione 11. cap. 6. hæc verba refert Abbatis Chere-  
montis: *Tria sunt, quæ faciunt homines à vitiis temperare, id est, aut metus gebennæ . . . aut spes & desiderium regni cælorum, aut affectus boni ipsius, amorque virtutum.* Et cap. 8. sic concludit: *Quamobrem nobis studendum est de hoc timore ad spem, & de spe ad charitatem Dei, vel ipsarum virtutum amorem perfectò mentis conscendamus amore.* De triplici etiam gradu nempe servo-  
rum,

rum, mercenariorum, & filiorum simili modo loquuntur S. Climacus gradu primo, & Venerabilis Beda in cap. 15. Lucæ: *Fides est, inquit, quæ futuri judicii ac suppliciorum metu vitiorum facit contagia declinare: spes, quæ mentem nostram de præsentibus avocans, universas corporis voluptates cælestium præmiorum expectatione contemnit: charitas, quæ nos ad amorem Christi, & spiritualium virtutum fructum, mentis ardore succendens, quicquid illis contrarium toto facit odio detestari.* S. Bernardum, & S. Thomam in eandem rem laudavimus, cap. præced. Ergo constat ex communi SS. Patrum doctrina. 1. Spem à charitate distingui. 2. Utramque virtutem tendere ad Deum possidendum, sed sub diversa ratione formali: spem quidem ut mercedem & bonum nobis, charitatem verò sine intuitu mercedis, sed sublimiori motivo, sequenti responsione elucidando. Itaque

R. 2. Negando minorem, & argumenti, in ejus confirmatione adducti, distinguo minorem: Idem est objectum spei & charitatis materiale, Concedo: Idem est objectum formale, Nego minorem: Spes enim, ut sæpiùs diximus, fertur in Deum ut bonum sibi; *Et qui timet*, inquit S. Bernardus cit. cap. 12. Lib. de diligendo Deo, *& qui cupit, utrique pro se agunt.* Charitas verò tendit ad Deum ut bonum in se, refertque ad eum & ipsum amantem, & ejus beatitudinem & cætera omnia, quæ per spem concupiscuntur: *Charitatem voco*, inquit S. Augustinus, Lib. 3. de Doctrina Christ. cap. 10. *motum animi ad fruendum Deo propter ipsum, & se atque proximo propter Deum.* Et Lib. 10. Conf. cap. 22. *Ipsa est, Deum alloquitur, beata vita gaudere ad te, de te, ipsa est, & non est altera.* S. quoque

que Bernardus cit. c. 12. post laudata verba, & qui timet, & qui cupit, utrique pro se agunt, subdit: sola, quæ in filio est charitas non quærit, quæ sua sunt. Et cap. 14. Denique, inquit, cupiditas tunc rectè à superueniente charitate ordinatur, cum mala quidem penitus respuuntur, bonis verò meliora præferuntur, nec bona nisi propter meliora appetuntur. Quod cum plenè per Dei gratiam affectum fuerit, diligitur corpus propter animam: anima propter Deum; Deus autem propter seipsum. Sed ponderanda imprimis quæ scribit cap. 15. ubi de eo, qui spe impellitur, sic scribit: Diligit itaque in secundo gradu Deum, sed propter se, non propter ipsum. At verò cum ipsum cæperit occasione propriæ necessitatis colere & frequentare cogitando; legendo, orando, obediendo; quadam hujuscemodi familiaritate paulatim sensimque Deus innotescit, consequenter & dulcescit, & sic gustato quàm suavis est Dominus, transit ad tertium gradum, ut diligit Deum, non jam propter se, sed propter ipsum. Sanè in hoc gradu diu statur: & nescio si à quoquam hominum quartus in hac vita perfectè apprehenditur, ut se scilicet diligit homo tantum propter Deum. Afferant hoc si qui experti sunt: mihi, fateor, impossibile videtur. Erit autem procul dubio cum introductus fuerit servus bonus fidelis in gaudium Domini sui, & inebriatus ab ubertate domus Dei. Quasi enim miro quodam modo oblitus fuit, & à se penitus velut deficiens totus pergit in Deum, & deinceps adhærens ei, unus cum eo spiritus erit. Quibus verbis sanctus Doctor, 1. perstringit errorem sua ætate nondum natum, & nostra damnatum in novis Mysticis, qui præsumunt suos discipulos perducere via breviori ad eum statum perfectionis, in quo anima sui oblita tam perfectè Deo adhæret propter ipsum solum, ut nec pulsetur beatitudi-

nis



nis desiderio, nec afficiatur proficiendi studio; nec sit illi curæ, comprimere inordinatos concupiscentiæ motus. 2. Ita distinguit spem inter & charitatem, ut nihilominus utrique virtuti assignet idem objectum materiale, nempe Deum possidendum. 3. Differentiam essentialem utriusque virtutis repetit (& quidem juxta antiquiores Patres, quorum verba laudavimus) ex earum objecto formali, seu ex diversa ratione & motivo, quo spes & charitas tendunt in Deum possidendum; spes quippe tendit in Deum, ut bonum nobis; charitas verò, ut bonum simpliciter & absolutè, ad quod & beatitudinem nostram & nos ipsos & cætera refert.

Ergo in mente sancti Bernardi & aliorum Patrum, in prima nostra responsione laudatorum, divina misericordia & omnipotentia statui nequeunt pro formali spei objecto. Latum est autem discrimen spem inter & fortitudinem, quæ in exemplum allata est; namque fortitudinis officium & actus est amovere malum, moderari timorem, qui illud refugit, & regere impetum audaciæ in illud insurgentis. At spes, siue spectetur, ut virtus, siue ut passio, fertur in bonum, tanquam in proprium objectum, illudque prosequitur, quamvis arduum, innixa siue propriis viribus, si sit passio, siue alienis, putà omnipotentia & misericordia divina, si sit virtus Theologica. Bonum autem, quod est objectum spei in peccatore ad justificationem per gratiam sese disponente, non sunt bona temporalia, cum eorum cupiditatem conetur abjicere: non est etiam Deus, ut in se bonus; cum illam charitate nondum diligit, &

per spem disponatur ad purissimo illo modo diligendum, ut supra dicebat sanctus Bernardus : restat ergo, ut dicamus bonum, quod spes Theologica prosequitur, esse Deum, ut nobis bonum.

Instabis 1. Amor concupiscentiæ non est actus virtutis, sed vitii : atqui actus, quo quis sibi bonum concupiscit, est concupiscentiæ. Sic enim S. Bernardus cit. cap. 12. scribit : *Facit & mercenarius* (opus Dei) *sed quia non gratis, propria trahi cupiditate vincitur.* Porro ubi proprietas, ibi singularitas. Ubi autem singularitas, ibi angulus. Ubi verò angulus, ibi sine dubio sordes, seu rubigo : Ergo.

Distinguo maj. Amor concupiscentiæ rerum temporalium, qui ex S. Augustino propriè dicitur cupiditas, est actus vitii, Conc. Amor concupiscentiæ beatitudinis, sapientiæ, & aliorum bonorum spiritualium est actus vitii, Nego major. Quin laudatur & commendatur in Scripturis : *Cogitatum habe in præceptis Altissimi . . . & concupiscentia sapientiæ dabitur tibi*, Eccli. 6. vers. 37. *Concupiscite ergo sermones meos, diligite illos*, Sap. 6. vers. 12. & infra vers. 14. *Præoccupat* (sapientia) *qui se concupiscunt, ut illis prior se ostendat.* Et vers. 21. *Concupiscentia itaque sapientiæ deducit ad regnum perpetuum.* Itaque sunt obscænæ concupiscentiæ, sunt & sanctæ concupiscentiæ, ex Origene Hom. 7. in Levit. secundum versionem Ruffini. Unde S. Thomas 2. 2. quæst. 26. art. 3. ad tertium, non dubitat spem vocare amorem concupiscentiæ, quod aliquis, inquit, velit frui Deo, pertinet ad amorem, quo Deus amatur amore concupiscentiæ. Usus tamen obtrahit, ex S. Augustino, Lib. 14. de Civ. Dei cap. 7. *Ut si cupiditas, vel concupiscentia dicatur, nec addatur ejus rei sit, non nisi in malo possit intelligi.*

Insta-

Instabis 2. Atqui nihil possumus amare, nisi illud sit nobis bonum: Ergo fictitius est ille amor charitatis, à spuriiis Mysticis excogitatus, quo Deus dicitur amari, ut est bonus in se, & sine relatione ad nos.

Antecedens probatur; Quia, ut aliquid actu ametur aut appetatur, satis non est, quòd sit simpliciter & absolutè bonum; sed insuper requiritur, ut amanti sit bonum vel utile, vel jucundum, vel honestum & conveniens; alioquin, cum omne ens secundum se spectatum, sit simpliciter bonum, esset etiam cuilibet amabile & appetibile, quod longè absurdissimum est; quàm multa enim in se bona valde, sunt aliis noxia, & ideò fugienda? aqua v. g. expellit calorem, quamvis in se bonum, utpote ipsi infestum; optimas carnes bos fastidit, quas leo concupiscit. Quis hominum nesciat Deum esse summè bonum? Illum tamen peccator non amat; quia illum non apprehendit, ut sibi bonum, nec unquam amare poterit, nisi voluntas ejus misericorditer præparetur, experieturque per gratiam, quàm suavis sit Dominus, & quàm bonum sit ipsi diligere suum Creatorem. Hinc vulgare apud Philosophos effatum, *amicabilia quæ sunt ad alterum, veniunt ex amicabilibus, quæ sunt ad se ipsum*, Ethic. 9. Ergo amor nostri est veluti prima radix, ex qua oriuntur & crescunt cæteri amores; ac proinde una est ratio amandi Deum, scilicet, bonitas ejus relativè ad nos spectata, fictitiumque ac prorsus impossibile amare Deum, quatenus præcisè bonus est in se.

Distinguo anteced. Non possumus amare supernaturaliter, Nego: Naturaliter, subdistinguo, in statu naturæ corruptæ, Conc. In statu

statu naturæ integræ, Nego antec. & conseq. *Primum dilige Deum*, inquit S. Augustinus Serm. 368. aliàs 37. Lib. 50. Hom. *deinde teipsum; post hæc dilige proximum sicut teipsum. Prius tamen disce amare teipsum; sic dilige proximum sicut teipsum: Nam si teipsum non nosti amare, quomodo proximum poteris in veritate diligere? . . . qui diligit iniquitatem, odit animam suam: Si ergo amando iniquitatem, teipsum non solum non diligis, sed etiam odio habes; quomodo aut Deum, aut proximum diligere poteris?*

Enimverò amor sui, qui supponitur præcedere tanquam radix amoris Dei, & cujuslibet creaturæ, vel est inordinatus & malus: vel ordinatus & bonus: atqui neutrum dici potest. Non primum, aliàs natura humana, utpotè necessaria radix fructus mali, esset substantia mala, & à malo principio; bona quippe arbor non potest malos fructus facere, Matth. 7. Non secundum, 1. quia is amor non est ordinatus & bonus, qui caret suo debito fine: atqui ejusmodi esset proprius ille amor, utpotè qui terminaretur ad ipsum amantem, ut supponitur, nec tenderet ad Deum, qui est ultimus rerum omnium finis. 2. Quia Deus non solum est rerum omnium finis, sed etiam principium: atqui inevitens esset inordinatio in operibus Dei, si (quod absit) voluntates humanas formaret, inclinaretque ad aliud, quàm ad se ipsum, & independentem à libera earum electione ante omnia converteret ad privatum bonum. Ergo prima Dei impressio & motio in natura creata adhuc integra est ad illum propter se amandum super omnia.

Confir-



Confirmatur : Omnis pars primariò tendit in bonum totius ; illudque naturaliter præfert propriæ salutis , manus v. g. absque mora & cunctatione imminenti periculo se exponit ad tuendum caput , ex quo pendet salus totius corporis : atqui Deus habet rationem totius respectu cujuslibet creaturæ : ergo naturale est homini in statu naturæ integræ plus diligere Deum , quàm se ipsum. Ita S. Thomas 1. part. qu. 60. art. 5. *Videmus, inquit, quòd naturaliter pars se exponit ad conservationem totius corporis ; sicut manus exponitur ictui absque deliberatione ad conservationem totius corporis. Et quia ratio imitatur naturam, hujusmodi imitationem invenimus in virtutibus politicis ; est enim virtuosi civis , ut se exponat mortis periculo pro totius Reipublicæ conservatione ; & si homo esset naturalis pars hujus civitatis, hæc inclinatio esset ei naturalis. Quia igitur bonum universale est ipse Deus , & sub hoc bono continetur etiam Angelus & homo , & omnis creatura ; quia omnis creatura naturaliter secundum id quod est, Dei est, sequitur, quòd naturali dilectione etiam Angelus & homo plus & principalius diligat Deum, quàm se ipsum ; alioquin si naturaliter plus seipsum diligeret, quàm Deum, sequeretur, quòd naturalis dilectio esset perversa , & quòd non perficeretur per charitatem, sed destrueretur.*

Ad confirmationem respondeo ambigüe opponi, ut res ametur, satis non esse, quòd sit bona in se , sed insuper requiri , ut sit amanti conveniens ; si enim per hanc vocem, *conveniens*, intelligatur, quòd amans debeat esse ordinatus ad illam rem , vera est propositio ; convenit enim unicuique servare debitum ordinem : si verò sensus sit, rem illam, ut ametur , semper debere referri ad ipsum amantem tanquam ad finem , falsitas  
pro-

propositionis perspicua est vel solo membrorum exemplo; unicuique enim convenit, ut sese periculo objiciat pro salute totius corporis; minimè verò, ut commune bonum corporis ad propriam incolumitatem referat.

Urgebis: Sequeretur, charitatem præcedere omnes virtutes, & motum spei in peccatore esse inordinatum; utpotè qui sit amor sui; absurdum consequens: ergo & antecedens.

Distinguo sequelam majoris ut supra; Charitatem præcedere omnes virtutes in statu naturæ integræ, Conc. In statu naturæ corruptæ, in quo gratia naturam paulatim sanat, & liberat à servitute cupiditatis, Nego sequelam. Nam ex Patribus supra laudatis, maximè ex S. Bernardo, peccator, cujus voluntatem gratia prævenit, à timore incipit, tum in spem erigitur, ac tandem *transit ad tertium gradum, ut diligit Deum non jam propter se, sed propter ipsum. Sanè in hoc gradu diu statur: & nescio si à quoquam hominum quartus in hac vita perfectè apprehenditur, ut se scil. diligit homo tantùm propter Deum. Afferant hoc, si qui experti sunt: mihi, fateor, impossibile videtur.* Absit autem, ut inordinatus dicatur spei motus, quo introducitur charitas, cùm ille motus sit à Spiritu Sancto, disponatque ad diligendum Deum super omnia: *Quod enim Dei est, immundum esse non potest*, inquit sanctus Bernardus cit. cap. 12.

Porro recentiores Mystici, quos Quietistas vocant, damnati sunt, quòd non solum cum sancto Bernardo & omnibus Catholicis assererent, hominem in hac vita diu stare posse in eo gradu, in quo diligit Deum non jam propter se, sed propter

propter ipsum ; sed ulteriùs progressi hanc propositionem evulgarent, quæ est prima ex vigintitribus, quas Innocentius XII. confixit anno 1699. *Datur habitualis status amoris Dei, qui est charitas pura, & sine ulla admixtione motivi proprii interesse . . . .* Neque timor pœnarum, neque desiderium remunerationum habent amplius in eo partem. Non amatur amplius Deus propter meritum, neque propter perfectionem, neque propter felicitatem in eo amando inveniendam. Ut autem intelligatur, quàm meritò damnata sit ejusmodi propositio, expendendum est ex professo, quæ sit spei necessitas, quamdiu hanc vitam mortalem vivimus. Sit itaque

## CAPUT III.

### De Spei Necessitate.

Q. I. *Actus spei suntne adultis necessarii ad salutem ?*

R. Sunt necessarii tum necessitate medii, tum necessitate præcepti naturalis & divini.

Prima pars, quæ est de necessitate medii, probatur 1. iisdem momentis, quibus supra demonstravimus fidei necessitatem : *Nempe*, ait sanctus Bernardus Serm. 10. in Psalm. 9. *germana fidei speique cognatio est, ut quod illa futurum credit, hæc sibi incipiat sperare futurum . . . . Dicit fides, parata sunt magna & inexcogitabilia bona à Deo Fidelibus suis : Dicit spes, illa mihi servantur.* Hinc est, quòd in Scripturis fides & spes soleant simul conjungi, quasi essent una & eadem virtus, cùm tamen sint essentialiter distinctæ, Rom. 4. v. 3. de fide dicitur : *Credidit Abraham Deo, & reputatum est illi ad justitiam :*  
de

de spe verò v. 18. *Qui in spem contra spem credidit.* Et v. 20. *In repromissione etiam Dei non hæsitavit diffidentia.* Hebr. 11. v. 9. *Fide demoratus est (Abraham) in terra repromissionis tanquam in aliena.* Hæc quoad fidem: quoad spem autem v. 10. *Expectabat enim fundamenta habentem civitatem.* Quin spes Hebr. 11. indirectè ponitur in definitione fidei: *Est autem fides*, inquit Apostolus, *sperandarum substantia rerum*, & increduli vocantur filii diffidentiae, Eph. c. 2. v. 2. & cap. 5. v. 6. Infirmus enim frustra credit se posse sanari à Medico, nisi & speret se sanandum, imò ejus diffidentia signum foret ipsum non credere. Sicut ergo accedentem ad Deum credere oportet quia est; quia pœnitentibus peccata dimittit, deprecantes exaudit, inquirentibus se remunerator est; similiter eadem speret necesse est, alioquin fides ejus inanis foret; spes enim est dispositio necessaria tum ad veniam peccatorum obtinendam, ex Concilio Tridentino Sess. 6. c. 6. juxta illud Prov. 28. 9. 25. *Qui sperat in Domino, sanabitur.* Et Matth. 9. *Confide, fili, dimittuntur tibi peccata tua*: tum ad cæteras gratias impetrandas, Jac. 1. v. 7. *Non ergo æstimet homo ille (qui hæsitat diffidentia) quòd accipiat aliquid à Domino.*

Probatur 2. ex sanctis Patribus. S. Clemens Alexandrinus Lib. 1. Stromatum sic scribit: *Fides est ad salutem inclinatio, post quam timor, spes, & pœnitentia.* S. Ambr. Lib. 1. de Pœnitentia c. 1. *Nemo*, inquit, *potest bene agere pœnitentiam, nisi speraverit indulgentiam.* S. Aug. Serm. 352. aliàs 27. inter 50. Homil. c. 3. docet, spem non minùs esse necessariam ad conservandam vitam spiritalem, quàm respirationem ad vitam animalem. *Judam tradito-*  
rem,



rem, inquit, non tam scelus, quod commisit, quàm indulgentiæ desperatio fecit penitus interire . . . . quod fecit in corpore suo, hoc factum est in anima ipsius . . . . Quomodo ergo qui sibi collum ligant, inde se occidunt, quia non ad eos intrat spiritus aëris hujus: sic illi, qui desperant de indulgentia Dei, ipsa desperatione intus se suffocant, ut eos Spiritus Sanctus visitare non possit.

Ex his autem sic conficitur argumentum: illud est necessarium necessitate medii, sine quo nec remissio peccatorum, nec æterna salus obtineri possunt; atqui ex dictis sine spe adulti nec remissionem peccatorum, nec salutem æternam obtinere possunt: Ergo spes necessaria est necessitate medii.

Secunda pars, quæ est de necessitate præcepti tam naturalis, quàm divini, probatur 1. quoad præceptum naturale; quia recta ratio exigit, ut media ad salutem necessaria assumamus: atqui spes ex dictis est medium necessarium ad salutem æternam: Ergo.

Probatur 2. quoad præceptum divinum, Pf. 65. *Sperate in eo omnis congregatio populi.* Eccli. 11. *Dirige viam tuam, & spera in illum.* Osee 12. *Spera in Deo tuo semper.* 2. Petr. c. 1. *Sperate in eam, quæ vobis offertur gratiam.*

Confirmatur auctoritate Alexandri VII. & Cleri Gallicani, qui proscripserunt hanc propositionem: *Homo nullo unquam vitæ suæ tempore tenetur elicere actum fidei, spei & charitatis, ex vi præceptorum divinatorum ad eas virtutes pertinentium.* Quam propositionem Clerus Gallicanus anno 1700. declarat scandalosam, in praxi perniciosam, erroneam, inducentem Fidei & Evangelii oblivionem.

Q. 2. *Quandonam tenemur elicere actus spei?*

D. Habert Theolog. Tom. III.

Ss

R. I.

R. I. Generatim quoties tenemur operari propter vitam æternam; non enim ad eam nitimur propriis viribus, sed omnipotentis Dei auxilio, quod misericorditer promisit sperantibus in se. Vide ergo an sit aliquod tempus, quo non teneamur tendere ad vitam æternam, quæ est ultimus noster finis; & intelliges, utrum spes in nobis aliquando debeat manere otiosa. Enimverò sicut spes victoriæ conficit exercitum, spes lucri in unum corpus erigit mercatores; ita spes adipiscendæ vitæ æternæ congregavit Ecclesiam. Quid enim pollicitus est Imperator noster, cum primos Evangelii sui præcones misit ad conscribendos militiæ suæ milites, & conducendos, qui ejus nomine negotiarentur donec veniat? *Euntes*, inquit, Matth. 10. *prædicate dicentes, quia appropinquavit regnum cælorum.* His promissis illecti innumeri nomen suum dederunt militiæ Christianæ, & collecta est Ecclesia. Exinde regnum cælorum vim patitur, unus veri Christiani ardor illud rapere, unum studium augere lucra Domini sui; *qui enim de futuro sæculo non cogitat*, inquit S. Aug. Serm. 9. aliàs 96. de Tempore, *nec propterea Christianus est, ut id quod Deus in fine promittit, accipiat, nondum Christianus est*, aut saltem abortivus censendus; quotquot enim sumus Christiani, in Christo renascimur in spem vivam, juxta illud 1. Petri c. 1. v. 3. *regeneravit nos in spem vivam per resurrectionem Jesu Christi, ex mortuis in hæreditatem incorruptibilem, & incontaminatam, & immarcescibilem; conservatam in cælis.* Qua autem virtute & industria arduum illud opus aggredimur? an propria? *sed maledictus, qui confidit in homine.* Jer. 17. Ergo & in seipso, quia & ipse homo est.

Restat igitur, ut quemadmodum monet Apostolus

stolus 1. Theſſal. 5. ſemper ſimus induti loricam fidei & charitatis, & galeam ſpem ſalutis; hoc eſt, nihil præſumamus de nobis, ſed ſicut nobis eſt continua pugna, ita continuo ſpem noſtram in Dei miſericordia & omnipotentia figamus.

R. 2. Communis eſt Catholicorum ſententia, præceptum ſpei præſertim obligare in hiſce caſibus, 1. initio uſus rationis; ſicut enim tunc tenetur homo ad Deum ſe convertere per fidem, ut ſupra diximus; ita & per ſpem & charitatem. 2. in articulo mortis, & ita fert diſciplina & praxis Eccleſiæ, juxta quam Paſtores in ejuſmodi circumſtantiis exigunt à quolibet Fidei, ut non ſolum credat, ſed etiam ſperet carnis reſurrectionem & vitam æternam, ad quam jamjam migraturus eſt.

3. quando graves tentationes contra ſpem ingruunt, & animus concutitur motibus deſperationis; quia ſicut infidelitati opponenda eſt fides, odio dilectio, ſuperbiæ humilitas; ita ſpes deſperationi. Nec audiendi ſunt Pſeudo-Myſtici, dùm dicunt, Fideles charitate perfectos gratum Deo ſacrificium oblaturus, ſi, ubi æterna ſalus ipsis deſperata apparet, omnem ejus ſpem abjiciant ex motivo puriſſimi amoris; proſcripta quippe eſt illa doctrina ab Innocentio XII. cujus Conſtitutionem unanimi conſenſu amplexi ſunt Antiſtites Gallicani, & promulgarunt unusquiſque in ſua Diœceſi anno 1699. 4. Cùm urget pœnitentiæ præceptum; nam ex S. Ambroſio ſupra laudato, *nemo poteſt bene agere pœnitentiam, niſi ſperaverit indulgentiam.* 5. Denique quando inſtat orationis neceſſitas, poſtulandum quippe eſt in fide & cum fiducia, ut latè proſequimur Tract. de Religione, ubi de conditionibus Orationis. Cùm autem ora-

tio debeat esse continua, saltem moraliter, ut ibidem demonstramus, vel inde colligitur quàm frequentes & continui actus spei esse debeant.

Q. 3. *Existitne in hac vita is perfectionis status, in quo nec timor pœnarum, nec desiderium remunerationis æternæ ullam partem habeant?*

Affirmarunt novi Mystici, ut patet ex eorum propositione allata ad calcem præcedentis capituli, sed cùm fuerit à Sede Apostolica rejecta & damnata, ac deinceps ab universo Clero Gallicano,

R. Non existit.

Probatur 1. ex Scriptura Rom. 8. v. 23. & seq. *Nos ipsi primitias Spiritus habentes, & ipsi intra nos gemimus adoptionem filiorum Dei expectantes redemptionem corporis nostri. Spe enim salvi facti sumus . . . Si autem quod non videmus, speramus, per patientiam expectamus.* Hæc dicuntur de perfectissimis Christianis, etiam de ipso Apostolo, qui raptus est usque ad tertium cælum, cuique nemo se adæquare præsumet, nedum antepone. Et Philipp. 3. vers. 12. & seq. *Non quòd jam acceperim, aut jam perfectus sim . . . fratres, ego me non arbitror comprehendisse. Unum autem, quæ quidem retro sunt obliuiscens, ad ea verò quæ sunt priora extendens meipsum, ad destinatum persequor . . . quicumque ergo perfecti sumus, hoc sentiamus.*

Probatur 2. ex sanctis Patribus. S. Aug. in Psal. 122. initio sic scribit: *Non præter spem esse debemus, inò cum magna fiducia præsumere, quia si per charitatem ipse nobiscum in terra est, per eandem charitatem & nos cum eo in cælo sumus . . . Ille deorsum est compassione charitatis, nos sursum sumus spe charitatis; spe enim salvi facti sumus, Rom. 8.* S. Bernardus supra laudato capite 15. de diligendo Deo: *Nescio,* inquit,



inquit, *si à quoquam hominum quartus (gradus) in hac vita perfectè apprehenditur, ut se scilicet diligat homo tantum propter Deum. Afferant hoc, si qui experti sunt: mihi, fateor, impossibile videtur. Erit autem procul dubio, cum introductus fuerit servus bonus fidelis in gaudium Domini sui.* Ubi S. Doctor non negat dari aliquos actus in hac vita, quibus homo diligat Deum non propter se, sed propter ipsum; id enim agnovit in iis, qui tertium gradum attigerunt. Sed contendit nullum esse statum vitæ hujus, in quo amor sui partem non habeat, nec ulla spe mercedis æternæ moveatur.

Probatur 3. ratione, quia quamdiu hic degimus, nunquam desunt tentationes, corpus quod corrumpitur, aggravat animam identidem erigendam oratione, quæ sola Dei misericordia & omnipotentia nititur: caro concupiscit adversus spiritum, adversarius noster diabolus semper circuit quærens quem devoret: Ergo ex Apostoli præcepto, Eph. 6. in omnibus assumendum est scutum fidei, & galea spes salutis, hoc est, fiducia in Deum, *in quo sunt vires nostræ, ex adjutorio enim ejus vincimus, non ex præsumptione nostra, S. Aug. Conc. 2. in Ps. 90.*

## CAPUT IV.

### De Spei Certitudine.

Q. 1. *Spes Theologica estne certa?*

R. Certa est ratione sui: incerta respectu nostri: simpliciter tamen & absolutè certa dici debet. Tres sunt responsionis partes.

Prima pars, quæ est de certitudine spei ratione sui, probatur 1. ex Scriptura, Psal. 23. *Qui susti-*

nent te, non confundentur. Eccli. 2. vers. 11. *Respicite, filii nationes hominum, & scitote quia nullus speravit in Domino, & confusus est.* Rom. 8. *Spes non confundit.* 2. Tim. 1. *Scio cui credidi, & certus sum, quia potens est depositum meum servare.*

Probatur 2. ratione. Illa virtus est certa ratione sui, quæ nititur medio certo & infallibili; scientia v. g. est cognitio certa, quia habetur per medium certum & necessarium: contra verò opinio non est certa, quia medium ejus est incertum: atqui Spes Theologica nititur medio certo & infallibili, nempe omnipotentia & misericordia divina, adde & veracitate, seu fidelitate in promissis; ait enim Psal. 36. *Adjuvabit eos Dominus, & liberabit eos, & eruet eos à peccatoribus, & salvabit eos, quia speraverunt in eo.* Quæ postrema verba expendens S. Bern. Serm. 9. in Psalm. 9. sic habet: *Dulcis causa, attamen efficax, attamen irrefragabilis. Si hæc sapimus, ut quid cunctamur . . . huic uni tam solidæ, tam perfectæ, tam beatæ spei, tota devotione animi, toto fervore spiritus inhærere? Si quid illi impossibile, si quid vel difficile est, quære aliud in quo speres, sed verbo omnia potest, quid facilius dictu? . . . an verò de facilitate jam non dubitas, sed ipsa tibi est suspecta voluntas? planè & voluntatis testimonia credibilia facta sunt nimis . . . Denique quando in se speranti desit illa majestas, quæ tam studiosè monet in se sperari? De quacunque tribulatione, inquit, clamaverint ad me, exaudiam eos. Ecce numeræ tribulationes . . . dummodo ad alium non convertaris, dummodo clames ad eum: dummodo speres in eum, nec humile aliquid vel terrenum, sed Altissimum ponas refugium tuum. Quis speravit in eo, & confusus est? facilius est cælum & terram transire, quàm verbum ejus evacuari.*

Secunda pars, quæ est de incertitudine spei respectu nostri, est contra Pseudo-Reformatos, qui definiunt, fidem esse certam fiduciam, qua quisque firmiter credat se esse prædestinatum, & sibi indubitanter applicet promissiones generatim factas. Probatur autem Catholica responsio ex Scriptura, Eccli. 9. *Nescit homo, utrum amore, an odio dignus sit, sed omnia in futurum servantur incerta.* 1. Cor. 10. v. 12. *Qui se existimat stare, videat ne cadat.* Philipp. 2. v. 12. *Cum metu & tremore vestram salutem operamini.* Vide, quæ in hanc rem diximus Tract. de Gratia c. 4. §. 8.

Tertia pars, nempe quodd spēs simpliciter & absolutè certa dici debeat, probatur; quia res quælibet æstimari & denominari debet ex iis, quæ sunt ei propria; non verò ex iis, quæ ipsi per accidens adveniunt; ars v.g. & prudentia sunt virtutes certæ & infallibiles, licet dubium esse possit, an aliquis ad illarum virtutum regulas opus suum exegerit: atqui Spēs Theologica ex dictis prima nostra responsione, est certa ratione sui, utpote quæ nitatur promissis Dei veracis & omnipotentis, de quibus nefas est dubitare & diffidere: quidquid sperans patitur incerti & fluctuationis, nascitur ex defectu liberi arbitrii, & pravitate cordis humani, cujus consilia & intentiones penetrari nequeunt. Ita S. Thomas q. 18. art. 4. ad 3. *Quodd aliqui, inquit, habentes spēm deficiant à consecutione beatitudinis, contingit ex defectu liberi arbitrii ponentis obstaculum peccati, non autem ex defectu divinæ potentie vel misericordie, cui spes innititur. Unde hoc non præjudicat certitudini spei. Et in responsione ad 2. Spes non innititur principaliter gratie jam habitæ, sed divinæ omnipotentie & misericordie: per quam etiam qui*

S s 4

gratiam

*gratiam non habet, eam consequi potest, ut sic ad vitam æternam perveniat, de omnipotentia autem Dei & misericordia ejus certus est, quicumque fidem habet.*

Dices: illa virtus non est certa ratione sui, quæ est causa timoris: atqui Spes Theologica est causa timoris; efficax enim desiderium possidendi bonum absens & arduum, naturaliter producit timorem illius amittendi, & quidem eò majorem, quò bonum illud pluris æstimamus, & obtentu difficilior apparet: ergo Spes Theologica, non est certa ratione sui.

Confirmatur. Ideo opinio non est cognitio certa, quia conjuncta est cum erroris periculo, & injicit timorem falsi: ergo nec Spes Theologica, utpote quæ timore amittendæ beatitudinis, & excidendi à gratia sperantes percellat, qui enim tantum malum non metuit, aut ab omni spe dejectus est, aut certè nimium de se præsumit, & in Spem Theolicam peccat, ut dicetur infra.

Distinguo maj. Si per se & ratione sui timorem injiciat, quemadmodum opinio, Concedo: si per accidens & ratione alterius, nempe subjeçti, quod deficere potest, Nego maj. Nempe prudentia & ars sunt cognitiones certæ, quia nituntur regulis infallibilibus; quanta tamen anxietas in artificie, præsertim cùm tractat materiam pretiosam, quatenus timor in viro prudente, cùm de re magni momenti consulitur? uterque tamen certas habet regulas suæ disciplinæ; sed metuit ne ab iis recedat, deficiatque.

Distinguo similiter min. Spes Theologica est causa timoris per accidens & ratione subjeçti, nempe sperantis, qui deficere potest; hoc est, minus quàm par sit adhærere Dei promissis, & confortari



fortari in potentia virtutis ejus, ut loquitur Apostolus, Concedo: est causa timoris per se & ratione sui, Nego min. de infinita enim Dei misericordia & omnipotentia nullus dubitaverit, nisi infidelis & insipiens.

Ex timore igitur id unum colligere licet, nempe spem non esse certam respectu nostri; quia periculum est, ne quis desit gratiæ Dei, propter pravitatem cordis sui, & innatam voluntatis levitatem ac inconstantiam. Sed timor ille nedum remittat spem nostram, quasi sit incerta, quin illam acuit, & ad Deum confugere vehementius impellit, juxta illud Psalm. 13. *Qui timent Dominum, speraverunt in Domino.* Paradoxum & contra communem hominum sensum prima fronte videtur, quòd timor sit causa sperandi: timor quippe perspicit malum imminens, & vitatu difficile; spes verò bonum absens & arduum. Sed distinguendum inter timorem hominis, & timorem Dei: hominem tùm timemus, cùm nobis male vult, & ideo manus ejus fugimus, certi quòd non parceret, si in ejus potestatem nos venire contingeret. Deum verò timemus ne deserat, ne propter peccata à se projiciat; atque ejusmodi timore impellimur confugere ad illum, cujus natura est bonitas omnipotens, & opus misericordia, *qui timent Dominum, speraverunt in Domino.* Nec frustra; subditur enim *adjutor eorum, & protector eorum est.* Adjutor, inquit S. Bernardus, ut liberentur à malis: protector, ne jam liberati iterum labantur. Quare? Quibus meritis? quia *speraverunt in eo, quoniam in me speravit, inquit, liberabo eum,* Psalm. 90. *hoc enim totum hominis meritum, si totam spem suam ponat in eo, qui totum hominem salvum*

*facit ; spes nostra seu desiderium est veluti hydria in mente S. Augustini : pro cuius amplitudine haurimus ex fonte divinæ bonitatis. Et S. Bernardus ad sensum tropologicum pro more transferens quod legitur Deuter. 11. Omnis locus, quem calcaverit pes vester, vester erit . . . nullus stabit contra vos, sic scribit : pes vester utique spes vestra est. Et quantumcunque illa processerit, obtinebit, si tamen in Deum tota figatur, ut firma sit, & non titubet.*

Spem certam ac firmam exigit S. Doctor, utpote quæ debeat omnipotentiae & misericordiae divinæ, quibus nostra beatitudo fit acquisitu possibilis, sicut enim Deus meretur in dictis infinitam fidem ; quia est prima & infinita veritas : ita & in promissis infinitam spem ; quia est infinita & omnipotens bonitas. Cum autem operari sequatur esse, ac proinde creatura finita non possit nisi finito modo agere, restat, ut contendamus semper crescere in fide, spe, & charitate, orantes cum Ecclesia, *da nobis Domine, fidei, spei, & charitatis augmentum.*

Ergo per excessum non peccatur contra spem, neque contra duas alias virtutes Theologicas, fidem scilicet & charitatem, sed per defectum duntaxat, si ratio habeatur earum objecti ; in eoque differunt à virtutibus moralibus. Adversus istas quippe aequè peccatur per excessum, (sola iustitia excepta) ac per defectum ; quia objecto earum, utpote bono creato & finito, voluntas adhærere potest plusquam oporteat & deceat ; bona enim creata sunt moderatè amanda, & propter majora dimittenda. Sed bonum in quod tendunt fides, spes, charitas, est increatum & infinitum, ac proinde in illud voluntas magis ac magis

magis sese extendere debet. Porro qui ita sunt affecti, rectè dicuntur ex toto corde credere, sperare, ac diligere.

Dixi, *si ratio habeatur earum objecti*; quia ratione subjecti potest quis excedere circa virtutes Theologicas; nimia quippe & imprudens contentio circa hujmodi virtutes, quæ noceret sanitati, improbanda esset tanquam excessus, quemadmodum inordinatus zelus, nimia sui fiducia, &c. Sed qui censetur excessus per ordinem ad subjectum, defectus est per ordinem ad objectum, quod meretur infinitè credi; concupisci, & diligere.

Ergo qui sperat in Domino, quomodo præscribit Fides Catholica, & nos jam exposuimus, verè exuit infirmitatem humanam, & induit fortitudinem Dei, ut dicat cum Apostolo, *cum infirmor tunc potens sum, omnia possum in eo, qui me confortat*; quid enim non possit, qui innititur omnipotentiae & misericordiae divinae, quam Fides docet non defuturam, modo ipse non desit? Hinc S. Bern. confidenter scribit Serm. 9. in Psal. 90. *Quidquid agendum sit, quidquid declinandum, quidquid optandum, tu es Domine, spes mea . . . sperent in aliis alii, fortè hic in scientia litterarum: hic in astutia sæculi; ille in nobilitate, ille in dignitate, ille in alia qualibet vanitate confidat, propter te omnia detrimentum feci, & ut stercora arbitror, quoniam tu es, Domine, spes mea. Speret qui vult in incerto divitiarum: ego verò ne ipsa quidem nisi abs te victui necessaria spero . . . Si mihi præmia promittuntur, per te obtinenda sperabo. Si insurgant adversum me prælia, si sæviet mundus, si fremat malignus, si ipsa caro adversus spiritum concupiscat, in te ego sperabo. Fratres, hoc sapere,*

*pere, ex fide vivere est, nec alius ex sententia dicere potest: quoniam tu es, Domine, spes mea.*

Ergo præcipua cura sit Confessariis & Pastoribus, ut eos, quorum saluti deserviunt, bona spe in Deum compleant, meticulosos confirment, doceantque timorem, quem Ecclesia donum Dei agnoscit nedum animum dejicere, & à Deo repellere, quin ad ipsum impellere quasi ventum secundum flantem à tergo, ut relinquentes pristinam agendi consuetudinem, velocius ad æternæ salutis portum feramur: contra verò timorem, quem peccatores sibi fingunt tanquam murum oppositum, quo ipsis ad Deum intercluditur accessus, injici à spiritu maligno, ut spem adimat, aut saltem minuat, quo nihil perniciosius; *qui enim hæsitat*, inquit S. Jac. cap. i. *similis est fluctui maris, qui à vento movetur & circumfertur; non ergo æstimet homo ille, quid aliquid accipiat à Domino; nec justificabitur peccator nisi timor Dei illum in spem erigat; nec justus in virtute proficiet, nec perseverabit, nisi ita de se diffidat, ut firmam spem in Deo ponat.* *Vir duplex animo*, addit autem Apostolus citato loco, *inconstans est in omnibus viis suis*, hoc est vir, cujus animus veluti in duos dissectus, spe scilicet & metu, fiducia & diffidentia, audacia & desperatione, multa in sua anxietate tentat ac movet, sed nihil promovet; si ex una parte assurgit, ex altera miserè cadit. Quare Confessarius oleum operamque perdet, nisi pœnitentem eò adduxerit, ut de se prorsus diffidat; & certam spem in Deo collocet, quod magis perspicuum fiet ex dicendis capite sequenti.



## CAPUT V.

## De Peccatis oppositis Spei Theologicæ.

Q. 1. *Quotuplex peccatum est Spei oppositum?*

R. Duplex, scilicet desperatio & præsumptio.

Q. 2. *Quid est desperatio?*

R. Est diffidentia assequendi beatitudinem, & obtinendi media ad illam necessaria. Itaque sicut Spei Theologicæ duplex est objectum obtentu possibile, primum, nempe beatitudo, seu possessio Dei; & secundarium, scilicet auxilia gratiæ, & bona opera, quibus tanquam mediis ad beatitudinem pervenitur: ita desperationis duplex assignatur objectum obtentu impossibile sive absolute, sive moraliter, hoc est, nimis difficile; nimirum beatitudo & media ad illam necessaria, puta pœnitentia, & alia bona opera. Porro bonum apprehensum ut possibile proponitur voluntati desperanti, ut incommodum disconveniens, & malum quoddam abjiciendum, seu fugiendum: apprehensum verò ut possibile, speranti exhibetur, ut conveniens & appetibile: & ideo desperatio est quidam voluntatis recessus à beatitudine, & mediis ad illam ordinatis: spes contra se habet ut accessus & conatus ad beatitudinem, & ad media, scilicet bona opera, quibus obtineri potest beatitudo.

Q. 3. *Quid est præsumptio?*

R. Est temeraria expectatio beatitudinis, & mediorum illius assequendæ.

Dicitur temeraria, id est, vana, inutilis, & carens omni fundamento. Ejusmodi autem expectatio

ctatio potest esse dupliciter temeraria, 1. quidem, quia non innititur divinæ misericordiæ, & omnipotentiae; sed viribus humanis sive propriis, sive alienis. 2. quia inordinatè confidit in divina misericordia & omnipotentia, expectando scilicet quæ Deus nedum promiserit, imò se negaturum minatus est. Vana illa expectatione deluduntur, qui sibi meritum per bona opera in Deo facta comparare negligunt, & pœnitentiam ad mortem differunt, interim cupiditatibus suis laxantes habenas, quia ita audiunt quod scriptum est Ezech. 33. vers. 12. *Impietas non nocebit ei (impio) in quacunque die conversus fuerit ab impietate sua, ut aures suas obturent ad ea, quæ alibi dicuntur: Dies Domini sicut fur in nocte, 1. Thess. 5. vers. 2. Qua hora non putatis Filius hominis veniet, Luc. 11. vers. 39. Ne tardes converti ad Dominum, neque differas de die in diem, subito enim veniet ira illius, Eccli. 5. vers. 8. Iniqui regnum Dei non possidebunt; nolite errare. 1. Cor. 6. vers. 9. Unde S. Aug. Serm. 21. novæ editionis scribit: Si mihi legis de Libro sancto, sicut indulgentiam tibi promissam esse converso, sic tibi promissum crastinum diem, differ ad crastinum. Prorsus quando te converteris, dabit: sed ipsum quando, quando est? Nusquam promittitur, ac proinde vana est illius expectatio.*

Ergo desperatio contra spem pugnat per defectum: præsumptio verò per excessum, scilicet ex parte subjecti sperantis, quod Deus non promissit: nam ex parte objecti excessus esse nequit, sed solummodo defectus, ut capite præcedenti probavimus.

Q. 4. *Desperatio & præsumptio suntne cum infidelitate conjunctæ?*

R. 1.

R. 1. Sunt aliquando, cum scilicet oriuntur ex judicio speculativè falso; ut si quis desperaret se veniam consecuturum, aut pœnam æternam evasurum, credens cum Novatianis, Ecclesiæ non esse concessam potestatem remittendi graviora peccata post Baptismum commissa; vel cum Pseudo-Reformatis: Deum aliquos antecederet prædestinasse ad malum culpæ, & ad supplicia æterna; ejus desperatio conjuncta esset cum hæresi. Cum autem illa circumstantia addat desperationi novam peccati speciem, in Confessione Sacramentali est explicanda, ideoque inquirendum à pœnitentibus, quam ob causam desperaverint. Idem dicendum est de præsumptione: potest enim oriri ex falsa & hæretica opinione vel Pelagianorum, quod solis liberi arbitrii viribus vitam æternam promereri possimus; vel Novatorum, quod fide sola sine bonis operibus justificemur & salvemur.

R. 2. Desperatio & præsumptio plerumque in Catholicis sunt sine infidelitate: attamen semper denotant fidem modicam & imperfectam.

Prima pars probatur; quia desperatio & præsumptio sunt defectus voluntatis, non adhærentis iis, quæ intellectus lumine Fidei illustratus judicat esse absolutè & universaliter vera; atqui necesse non est ad peccatum, ut peccans apprehendat generalem Fidei regulam morum ut falsam, judicetque legem prohibentem, aut præcipientem esse iniquam; sed satis est, quod ad eam non attendat, & voluntas ejus aliò inclinet; *sicut ille qui fornicatur*, inquit sanctus Thomas qu. 20. art. 29. *eligendo fornicationem ut bonum sibi ut nunc habet corruptam æstimationem in particulari, cum tamen retineat*

*tineat universalem æstimationem veram secundum fidem, scilicet quoddam fornicatio sit mortale peccatum; judicium enim practicè falsum circa objectum singulare, potest consistere cum judicio, speculativè verò circa idem objectum; Christianus fornicator v. gr. speculativè judicat fornicationem in genere esse quid malum & illicitum, alioquin esset hæreticus; & simul practicè judicat sibi bonum esse fornicari in his singularibus circumstantiis. Similiter qui spem salutis abjicit, ita generatim credit Deum velle omnes homines salvos fieri, impossibilia non præcipere: dedisse Ecclesiæ potestatem, quælibet peccata dimittendi, ut spectata gravitate peccatorum, & continua tentationum molestia spe decadat minùs ex incredulitate quàm ex ignavia. Idem dicendum de eo, qui contra spem peccat præsumptione; cernere enim est illum contra laxiores opiniones acriter propugnare necessitatem pœnitentiæ, & aliorum bonorum operum; contra Semipelagianos constanter afferre non in nobis gloriandum, sed in Deo solo, à quo est omne posse, velle, & operari: cùm interim soli industriæ & labori innitatur, pensum orationis perfunctoriè solvat, ipsique in litteris occupato hora precandi intempestivè adveniat: quibus perspicuum sit, Christianum posse speculativè dogmata Fidei credere, & simul practicè pelagianicè vivere, confiteri se nosse Deum, factis autem negare, ut loquitur Apostolus Tit. i. v. 16.*

Secunda pars, nempe desperationem & præsumptionem denotare fidem modicam & imperfectam, probatur; quia Fides viva fugat mentis tenebras, quas obducit dæmon; ne & desperans perpen-



perpendat Dei charitatem, qua sic dilexit mundum, ut Filium suum unigenitum daret, Joan. 3. & præsumens non advertat propriam infirmitatem, bonorumque temporalium vanitatem. Cum autem illa eadem sint perfecta ei, qui ex fide vivit, veluti in clara luce, nunc contra desperationem se firmat hisce verbis Apostoli Rom. 8. *Qui etiam proprio Filio non pepercit . . . . quomodo non etiam cum illo omnia nobis donavit? . . . . Quis ergo nos separabit à charitate Christi? . . . Certus sum enim quia neque mors, neque vita . . . . neque creatura alia poterit nos separare à charitate Dei, quæ est in Christo Jesu.* Nunc contra præsumptionem propriæ infirmitatis, & rerum temporalium vanitatis bene conscius opponit, *sufficiencia nostra ex Deo est, 2. Cor. 3. Existimo omnia detrimentum esse propter eminentem scientiam Jesu Christi Domini mei . . . & arbitror ut stercora, ut Christum lucrifaciam. Philipp. 3.*

Q. 5. *Desperatio & præsumptio suntne peccata lethalia?*

R. Sunt ex genere suo lethalia, si adfuerit sufficiens consensus.

Probatur; quia peccata virtutibus Theologicis opposita sunt ex suo genere aliis graviora. Cum enim, inquit, S. Thomas qu. 20. art. 3. *virtutes Theologicæ habeant Deum pro objecto, peccata eis opposita important directè & principaliter aversionem à Deo. In quolibet autem peccato mortali, principalis ratio mali & gravitas est ex hoc quodd avertit à Deo. Si enim posset esse conversio ad bonum commutabile sine aversione à Deo, quamvis esset inordinata, non esset peccatum mortale. Et in eo illud, quod primò & per se habet aversionem à Deo, est gravissimum inter peccata mortalia. Atqui desperatio & præsumptio, utpote peccata spei Theologicæ*

D. Habert Theolog. Tom. III. T t logicæ

logicæ opposita, directè avertunt à Deo: Ergo ex suo genere sunt peccata mortalia, eaque gravissima.

Minor probatur, simulque elucidatur in hunc modum. Fides docet, & ratio naturalis demonstrat Deum esse ultimum finem, ad quem tendere oportet, primum rerum principium, à quo omnia bona expectanda sunt. Illinc voluntas sperigitur; Deum concupiscit, & nihil prætereà, nisi propter ipsum: hinc bona expectat non ab ulla creatura, sed à Deo solo, cujus omnipotenti misericordia & bonitate innititur. Hic est supremus cultus, quem Deus primo loco à creatura rationali exigit, *invoca me in die tribulationis*, inquit, Psal. 49. *eruem te & honorificabis me.* Divinum illum honorem Deo denegare, summa injuria est: ad creaturam transferre, species est idololatriæ. Nihilominus tantæ impietatis reos se quodammodo constituunt, & qui desperat, & qui præsumit: ille quidem; quia ut patet, directè, & ut loquitur S. Thomas, principaliter avertit se à Deo ultimo omnium fine. Sed quò perrecturus? Audi Apostolum de ejusmodi perditis, Ephes. 4. *Qui desperantes semetipsos tradiderunt impuditiæ, in operationem immunditiæ omnis.* Præsumens quoque; utpote qui pelagianicè gloriatur sive in se, sive in eo, in quo confidit, & cujus se creaturam quandoque nuncupare non putet, ut significet se illi devinctum tanquam auctori bonorum suorum, honorem ad creaturam iniquè transferens, quem Deus, (à quo bona cuncta fluunt sive immediatè, sive ministerio hominis, quem implet veluti carnalem) sibi reservat, & ut debitum exigit in omnibus ferè Scripturæ paginis: *gloriam meam alteri*

*non dabo*, inquit Isa. 42. & Jer. 17. *maledictus homo qui confidit in homine, & ponit carnem brachium suum, & à Domino recedit cor ejus . . . non videbit cum venerit bonum, sed habitabit in siccitate.* Et gravitate autem pœnæ colligitur culpæ atrocitas.

Nec minùs Deo exosa est altera præsumptionis species, qua quis, ut suprà dicebamus, pœnitentiam differt spe misericordiæ consequendæ. Illud quippe nequidem ab iniquissimo Principe expectaretur, ut flagitiosum civem securum faceret veniæ obtinendæ, postquam cædibus & rapinis civitatem repleverit: ejusmodi gratia nec petitur, ne speratur etiam ab indulgentissimo, nisi pro delictis præteritis, nec conceditur nisi pollicenti vitæ emendationem, alioquin spem veniæ injicere pro flagitiis in futurum committendis, quid aliud est quàm furem armare in suos concives? Illud tamen ipsum præsumens sperat à Deo optimo, maximo, quod à nequissimo Judice expectare non auderet: speret in morte veniam peccatorum: cur Deo figit illum terminum? Quia in omni genere libidinum vitam terere proposuit, & juxta Lutheranorum impietatem, (quam tamen speculative detestatur utpote Catholicus) confidit se sine bonis operibus, & mandatorum observatione vitam æternam consecuturum. Absit à Christiano ut tam indigna de Deo sentiat, Scriptura reclamante, & contra execrandam hujusmodi præsumptionem fulminante, *nemini dedit spatium peccandi Eccli. 15. vers. 21. Ignoras quoniam benignitas Dei ad pœnitentiam te adducit? secundum autem duritiam tuam, & impœnitens cor, thesaurizas tibi iram (non misericordiam) in die iræ, & revelatio-*

*nis iusti iudicii Dei, qui reddet unicuique secundum opera ejus, Rom. 2.*

Dixi in responsione 1. *si adfuerit sufficiens consensus*; quia in turbulentissimis desperationis tentationibus plerumque nullus aut saltem imperfectus adest consensus, tametsi pœnitentes conscientiae nimium timidæ hujusce criminis se insimulent. Sed Confessarius veritatem explorabit si inquirat, num ex illo affectu consueta pietatis opera intermiserint: si enim pro more in iis perseveraverint, colliget eos non consensisse, nisi imperfectè: secus, si neglexerint, præsertim cum urgeret præceptum.

Dixi 2. desperationem & præsumptionem esse peccata ex suo genere mortalia, ut innuerem, posse aliquando esse venialia propter levitatem materiæ.

Dices: quilibet dissensus propositioni revelatæ etiam in materia levi, destruit fidem, & est peccatum mortale: Ergo.

Nego consequentiam & paritatem. Disparitas est, quod dissensus ille semper sit conjunctus cum contumacia, & cum contemptu divinæ auctoritatis revelantis, & Ecclesiæ proponentis, aliàs non esset infidelitas, sed error duntaxat, ut supra diximus; contumacia autem & contemptus semper est damnabilis. At levis præsumptio vel diffidentia circa aliquod medium ad salutem omnino necessarium, potest esse sine contemptu, sed ex mera infirmitate, ac proinde non pertinet habitum spei, sicut nec levis offensa contra charitatem proximo debitam, destruit habitum charitatis.

Q. 6. *Quare desperatio & præsumptio dicuntur peccata in Spiritum Sanctum?*

R. Quia



R. Quia ex dictis pag. 188. peccata in Spiritum Sanctum sunt ea, quæ specialiter pugnant contra Dei bonitatem & ejus dona, quibus declinamus à malo: atqui sic se habent desperatio & præsumptio. Desperatio quidem, utpote quæ sit contemptus bonitatis, qua Deus seipsum offert in præmium & beatitudinem nostram. Præsumptio etiam, idque dupliciter, 1. quatenus est vana expectatio beatitudinis sine pœnitentia & bonis operibus, in qua expectatione necessario intelligitur contemptus donorum, quibus incitamur ad benè operandum. 2. Quatenus est fiducia in viribus humanis, neglecto Dei adjutorio, sine quo nec peccatum vitari, nec salus obtineri potest. Quomodo autem peccata in Spiritum Sanctum, ac proinde desperatio & præsumptio dicantur irremissibilia, exposuimus pag. 188. & 189.

Q. 7. *Desperatio & Præsumptio suntne peccata omnium gravissima?*

R. Sunt quidem omnium perniciosissima: non tamen gravissima. Ita S. Thomas qu. 20. art. 3.

Prima pars probatur; quia qui nec timore coercetur, nec spe incitatur, tanquam effrenis omni intemperantiæ se ipsum addicit, non eum movet virtutis honestas, non frangit legum auctoritas: nam ex S. Th. q. 22. art. 1. *Lex sine fide & spe locum habere non potest.* Unde S. Aug Ser. 87. *illa duo, inquit, occidunt animas, aut desperatio, aut perversa spes, id est præsumptio.* Et Ser. 20. *Si desperes, peris: si speres, peris. Ubi tibi tutus locus erit, ut ab utraque fovea te eripias? malè desperabas, audisti, in quacunque die conversus fuerit iniquus, omnes iniquitates ejus obliviscar. Malè sperare cœperas, audisti, ne tardes converti ad Dominum, neque differas de die in diem. Undique te circumdedit Provi-*

*dentia Dei misericorditer. Et Serm. 352. ne desperando augeamus peccata, propositus est pœnitentiæ portus; rursus ne sperando augeamus, datus est dies mortis incertus.*

Secunda pars probatur; quia peccatum eò gravius est, quò pugnat contra præstantiorem virtutem, quemadmodum in Physicis mors censetur majus malum quàm cæcitas, quia destruit majus bonum, scilicet vitam; atqui odium Dei directè pugnat contra præstantiorem virtutem, nempe charitatem; ergo odium Dei est gravius peccatum, quàm desperatio & præsumptio, quæ inferiori virtuti, nimirum Spei, formaliter opponuntur.

Ergo desperatio & præsumptio sunt ex suo genere peccata graviora peccatis, quæ pugnant contra virtutes morales, ut avaritia, injustitia; quia destruunt majus bonum, scilicet Spem Theologicam, quæ præstat virtutibus moralibus.

Utrùm autem sint infidelitate graviora, ambigitur. Negat S. Thomas cit. art. 3. nonnulli distinguunt. Si desperatio immediatè oriatur ex fastidio summi boni, quasi displiceat Dei possessio, est infidelitate pejor; majorem enim præferat Dei contemptum. Si autem nascatur ex quodam tædio & ignavia, secundùm quam beatitudo jus dicatur acquisitu difficilior, infidelitas gravius est peccatum; quia directè pugnat contra Dei veritatem; desperatio verò sic spectata indirectè solum contra Dei misericordiam & omnipotentiam. Atque hoc sensu Doctorem Angelicum intelligendum censent illi Theologi.

Cæterùm, parùm est malum desperationis & præsumptionis detexisse, nisi sit & illius curandi studium; quod efficax non fuerit, si ignoretur ejus causa. Quamobrem,

8. Quæ-

8. *Quænam sunt causæ desperationis & præsumptionis?*

Respondet S. Thomas, acediam, hoc est, fastidium boni spiritualis, præsertim divini esse causam desperationis: superbiam verò & inanem gloriam præsumptionis.

Ad curandum ergo desperationis morbum, expellenda est illa animi tristitia, quam S. Thomas post S. Gregorium vocat acediam: hoc est, fastidium bonorum spiritualium. Qui verò? Nempe sicut satietas nauseam parit, nec fastidians stomachus levatur nisi malorum humorum egestu; ita fastidium rerum cœlestium ingerunt terrenæ cupiditates, & mala conscientia, in Deus palatæ animæ sapere non possit, nec proinde concupisci, nisi detractis parvis affectibus; timida quippe est nequitia, & *semper . . . præsumit sæva, perturbata conscientia*, Sapientiæ 17. Unde S. August. conc. 2. in Psal. 31. vult spem & bonam conscientiam esse nomina synonyma etiam in mente Apostoli, *pro spe*; inquit, *bonam conscientiam posuit* (Apostolus; ) *ille enim sperat, qui bonam conscientiam gerit: quem verò pungit mala conscientia, retrahit se à spe, & non sibi sperat nisi damnationem. Ut ergo speret regnum, habeat bonam conscientiam.*

Sed plurimi refert exponere, quid nomine malæ conscientia intelligendum sit, ne S. Doctor peccatoribus spem salutis adimere, eosque in desperationem adducere videatur.

Mala igitur conscientia ex dictis, est iudicium erroneum, lumini Fidei & rationis practicæ repugnans, & connotans malam voluntatem, à qua imperatur. Unde vulgò mala conscientia accipitur pro mala voluntate, quamvis sit practicum

mentis iudicium, rectæ rationi oppositum; quia mala voluntas mentem impellit, cogitque ad erroneum ejusmodi iudicium ferendum. Quamobrem qui malè affectus est, non immerito dicitur homo malæ Fidei, & malæ conscientiæ, nec sperare sibi potest nisi damnationem. Sed si impius, præveniente Deo & adjuvante, mutet affectum & consilium, ac de præteritis erubescat, doleatque, incipit gerere bonam conscientiam, iudicium quippe ejus est practicè rectum, jam cum lege divina concordat, laudat & amplectitur quod illa præcipit, damnat & rejicit quod illa prohibet. Speret ergo in eum, qui justificat impium, non propter præcedentia merita, cum nulla sint, nisi mala; sed per fidem, non quam fingunt Hæretici, sed quam exponit Apostolus, quæ per dilectionem operatur: *spem enim*, inquit S. August. *ibid. gerit bona conscientia: quomodo mala conscientia tota in desperatione est, sic bona tota in spe.* Spei conatē non remoretur diffidentia, quam importunè ingerit memoria præteritorum criminum: non concidat propter conscientiæ morsus ob malè ante actam vitam: ejusmodi enim vermibus paulatim consumitur peccatorum putredo, qua consumpta, & ipsi morientur, tuncque paratum & confirmatum erit cor ejus sperare in Domino sine ea difficultate, quam initio expertus est.

Quodd autem superbia sit causa præsumptionis probatur. Duplex enim est præsumptio: altera, qua quis viribus humanis expectat salutem & ea quæ ad illam conducunt; & is manifestè sibi & proprio labore tribuit, quod à solo Deo per continuas orationes expectandum est. Altera, qua ex Dei misericordia quis sperat se consecuturum  
salu-



salutem sine bonis operibus, & veniam sine pœnitentia: *Et talis præsumptio*, inquit S. Thomas qu. 21. art. 4. *videtur oriri directè ex superbia, ac si ipse tanti se existimet, quod etiam eum peccandum Deus non puniat, vel à gloria excludat.* Enimverò intolerandæ est superbiæ, quòd filius iræ, gehennæ nedum coram Deo se dejiciat, illumque precibus & aliis bonis operibus propitium sibi reddere curret, quin de illius misericordia disponere præsumat, tanquam Dominus, qui famulo diceret: *Recede nunc tua opera uti non mihi vacat, venies cum te vocavero*; qui enim rectè vivendi horam prorogat, & oblatam gratiam ad morbum servandam definit, nonne legem Deo imponit; præscribitque tempus, quo opitulari debeat, adeò, ut jam non sit misericordis Dei, quemadmodum loquitur Apostolus, sed solventis hominis? Deus quippe nunc vocando vult misereri, sed non fit, quia non vult peccator; malitia enim & duritia voluntatis in causa est, cur non fiat. Sed ait præsumens; tunc voluntas mihi erit, cum mortis imminebit periculum. Ergo innititur baculo arundineo, nempe voluntati infirmæ & instanti, quam impræsentiarum sentit in malo ita obduratam, ut gratiæ quæ ipsi offertur, non obtemperet, damnabiliter quidem, quia cum possit, liberè non vult; sed ea voluntate in posterum volet, nisi Deus dederit plenam, expeditam, & efficacem voluntatem; nam ex Apostolo Philip. 2. *Deus est qui operatur Et velle Et perficere pro bona voluntate.* Ex quibus perspicuum est cujuslibet præsumptionis causam esse superbiam, qua quis se pluris existimat, quàm debeat.

Ergo præsumptio humilitate expugnanda est; ac proinde qui vult confidere in Domino, se & cætera pro nihilo putet, dicatque cum regio Propheta Psal. 118. *Defecit in salutare tuum anima mea.* Bonus defectus, inquit S. August. quia ubi deficit humanum, totum est divinum; tum præsertim Apostolus potentem se credidit; cum maximè se sensit infirmum, 2. Cor. 12. v. 10. Quia Deus non dereliquit, qui de ipso præsumunt; præsumentes verò de se, & de virtute sua glorientes humiliat, ut dicitur Judith. 6. v. 15. *Beatus, igitur, cujus nomen Domini spes ejus;* sed quis ille? *qui non respexit in vanitates & insanias falsas,* Ps. 39. Sed deficit in salutare Dei. Omnes quidem illud concupiscunt: quàm verò pauci à seipsis & cæteris rebus deficiant, ut sola omnipotentis Dei bonitate, & misericordia nitantur, probat adversitas, quæ plerosque ita dejicit, ut eò se miseros inclinare soleant, quòd nulla eis spes supersit, nisi in Domino, hoc est, spes otiosa, quæ eos sustentare nequeat. In rebus ergo prosperis stabant solis suffulti præsidiiis humanis, veluti ædes ruinosaë tignis & arrectariis & aliis ejusmodi adminiculis innixæ; quæ si subduxeris, statim corruunt, utpote quæ iis, non parietibus inclinatis niterentur. Qui autem Spe Theologica confidit in Domino, sicut mons Sion non commovebitur, etiamsi cætera desint: quingloriatur in tribulationibus: *Gloriamur in spe gloriæ filiorum Dei,* inquit Apost. Rom. 5. *non solum autem, sed gloriamur in tribulationibus, scientes quòd tribulatio patientiam operatur, patientia autem probationem, probatio vero spem: spes autem non confundit.*

Ex his colliges, quàm continua nobis debeat esse pugna contra præsumptionem & superbiam, utpote vitia Spei Theologicæ maximè noxia; quamvis

vis enim habitum ejus non semper destruant, actum tamen ejus impediunt, efficiuntque ut nostra agendi ratio, & tota vitæ series viribus humanis, non Dei auxilio innitatur.

## CAPUT VI.

### De Causis Spei Theologicæ.

Q. 1. *Quæ sunt causæ Theologicæ?*

R. Ex quatuor causis, quæ vulgò recensentur, scil. finalis, efficiens, formalis, & materialis, nulla potest esse quæstio, nisi circa materiale. Certum quippe est Deum esse causam finalem & efficientem Spei Theologicæ: finalem quidem, quatenus est nobis bonus: efficientem verò, quatenus eam infundit in cordibus nostris; Spes enim Theologica est virtus supernaturalis, quæ non potest haberi, nisi per infusionem à Deo. Causa autem formalis Spei nulla est, utpotè quæ ipsa sit forma informans animam, vel per modum habitus, si spectetur ut habitualis, quemadmodum in infantibus & dormientibus: vel per modum actus, si sermo sit de spe actuali.

Cum autem duplex sit causa materialis: alia ex qua totum componitur, ut homo ex corpore: alia in qua forma accidentalis, ut habitus & actus, residet tanquam in subjecto: certum est Spei nullam esse causam materiale ex qua: cum enim spes sit forma spiritualis, non componitur ex materia, quemadmodum substantiæ corporeæ completæ. Tota igitur difficultas est circa causam materiale in qua, seu subjectum Spei Theologicæ. Itaque

Q. 2. *Quodnam est subjectum Spei Theologicæ?*

R. Nulla

R. Nulla est Spes Theologica, nisi in habentibus fidem; quia Fides ex Apostolo est substantia, seu fundamentum rerum sperandarum: *Domus Dei*, inquiebat supra S. Augustinus, *credendo fundatur, sperando erigitur, diligendo perficitur*: atqui sublato fundamento, quod superstruitur corruat necesse est: ergo sublata fide, pereunt spes & charitas. Sed sicut paries potest esse sine tecto, & fundamentum sine parietibus; ita spes sine charitate, ut in peccatoribus, & Fides sine spe in iis qui desperant.

Ergo Spes Theologica non est in damnatis, Hæreticis & Beatis, cum nulla in iis sit Fides.

Confirmatur speciatim de damnatis contra Origenem & alios, quos misericordes vocant; quia ex quodam commiserationis affectu docebant pœnas damnatorum aliquando finiendas, & ita spem eis superesse contra expressissima Scripturæ verba, Prov. 17. *mortuo homine impio, nulla erit ultra spes*, Matth. 25. vers. 40. *Ibunt hi in supplicium æternum*: Quibus verbis præcluditur evasio Misericordium, qui ita concedebant ignem Inferni fore æternum, ut negarent pœnas reproborum similiter æternas. Unde meritò S. Augustinus Lib. 21. de Civ. Dei cap. 27. scribit, Ecclesiam ferre nequivisse ejusmodi hominum disputationem. Et cap. 17. eos tantò errasse deformius, & contra recta Dei verba perversius, & quantò sibi videbantur sentire clementius.

Ergo spes remanet in animabus detentis in Purgatorio; tum quia Fides in eis remanet, ut suprà diximus: tum quia possessio Dei, quam diximus primum Spei objectum, est ipsis bonum absens & arduum, cum illud non sint consecuturæ nisi per aceros cruciatus.

CA.



## CAPUT VII.

## De Effectibus Spei Theologicæ.

Q. 1. *Qui sunt Spei Theologicæ effectus?*

R. Spes Theologica, nisi sit mortua, hæc quatuor potissimum præstat. 1. Sperantem reddit bonis operibus intentum & solertem. 2. Firmat in adversis. 3. Fugat timorem mundanum. 4. Injicit timorem Dei.

Ac primò quidem generatim, spes etiam spectata ut passio, animos accendit, sperantem attentum reddit ad opus, solertiam acuit, qua obstacula vel superet, vel declinet, & ea, quæ viderentur superflua, in proprios usus convertat: *Gemma gratissima*, inquit Sapiens, Prov. 17. *expectatio præstolantis, quocunque pergit prudenter intelligit*: hoc est, qui rem gratissimam exoptat, ac consequi desiderat, in omnibus prudenter se gerit, cautè & circumspectè agit, ne quid utilium ad finem præconceptum excidat. Illud cernere est etiam in belluis, canis v. gr. quamdiu non odoratur feram, vagatur huc illucque lentè discurrens. At ubi odorem prædæ perceperit, spemque illius consequendæ conceperit, statim incitatur, & rapido cursu ad eam recta tendit per tribulos ac spinarum aculeos, non deflectens neque à dextris, neque à sinistris, donec, vel consecutus sit, vel spem consequendi amiserit. Sic spes lucri mercatores & artifices agit, inde nascitur improbus eorum labor, & singularis illa sagacitas, qua cuncta in res suas vertunt, iisque tum maximè prospiciunt, cum alienis consulere videntur.

Porro

Porro si spei generatim spectatæ ea sit vis & actio, quid non efficiet spes viva Christianorum, in qua regenerati sunt? nam ex S. Augustino in Psal. 103. Conc. 4. sub finem: *Vita nostra modò spes est, vita nostra postea æternitas erit: vita vitæ mortalis, spes est vitæ immortalis.* Ad hanc felicitatem fertur omnis Christianorum cogitatio, dicente Apostolo Phil. 3. *Nostre conversatio in cælis est;* Et 2. Cor. 4. *Non contemplantibus nobis quæ videntur, sed quæ non videntur:* Propter illam assequendam vigilat eorum sollicitudo, prudentia & circumspectio, ne quid utilium ad tantum bonum promerendum illos effugiat. Quid verò ad illud conducere non possit, cum ex Apostolo 2. ad Corinth. cap. 6. Spes Theologica æquè per adversa ac per prospera, per gloriam & ignobilitatem, per infamiam & bonam famam illuc perducatur?

Secundò, Spes Theologica firmat in adversis, juxta illud Apostoli Hebr. 6. v. 18. 19. *Confugimus (in adversis) ad tenendam propositam spem, quam sicut anchoram habemus animæ tutam ac firmam.* Hæc scribit Apostolus similitudine ducta à nautis, qui ingruente tempestate, ne navis per abrupta feratur ad anchoras confugiunt, & ubi eas in terra defixerint, frustra minatur tempestas, navis est in tuto, fluctuat quidem, agitur maris fluctibus; sed non abducitur. Sic Christianus persecutionum procellis impetitus, & tentationum ventis vexatus, ad spem confugiat, ac in Deo eam defigat, & adversariorum minas ridebit securus: *Quemadmodum ergo, inquit sanctus Augustinus in Psalm. 64. de navi, quæ in anchoris est, rectè dicitur quòd jam in terra sit; adhuc tamen fluctuat, sed in terra quodammodo educta est contra ventos & tempestates; sic contra tentationes*

*tationes bujus peregrinationis nostræ, spes nostra fundata in illa civitate Jerusalem facit nos non abripi in saxa.*

Tertiò, Spes Theologica, si sit viva, fugat timorem mundanum, utpotè ipsi oppositum; timor quippe mundanus is dicitur, quo quis bonis temporalibus nimis addictus, ea amittere ita timet, ut pro eorum conservatione legem eludere falsis interpretationibus, vel etiam apertè transgredi paratus sit: atqui ejusmodi timor manifestè pugnat contra Spem Theologicam: Ergo.

Minor probatur. In Spe Theologica tria intelliguntur. 1. Desiderium beatitudinis & conatus ad illam. 2. Timor illius amittendæ, qui dicitur timor Dei: tum quia est donum Dei: tum quia est timor illius offensæ, per quam solam potest amitti beatitudo. 3. Fiducia in Dei bonitate & omnipotentia: atqui timor mundanus tria illa impugnat, qui enim ejusmodi timore percellitur. 1. Inordinatè concupiscit bona temporalia, ad ea per cupiditatem convertitur, & conatur; sicque ex hoc capite pugnat contra spem, quam diximus esse conatum ad cœlestia. 2. Ex ejusmodi cupiditate, tanquam ex mala radice nascitur timor temporalia amittendi, quod aliquando fieri nequit sine peccato, putà perjurio, injustitia, simonia, &c. & ita timor mundanus expellit timorem Dei, quemadmodum dicitur Eccli. 23. v. 27. *Expellit à se timorem Dei bujusmodi hominis timor*, estque lethalis ex suo genere, cùm avertat à Deo, impellatque ad gravissima quæque peccata. Hinc frequentes in Scripturis commōitiones, ut caveamus à timore mundano tanquam ab efficaciori Satanæ dolo, qui, aucupis instar, quos illecebris allicere non potuit, hos vanis terroribus in

in laqueos propellit : *Timorem eorum ne timueritis*, 1. Petr. 3. *Quis tu, ut timeres ab homine mortali, & à filio hominis, qui quasi fœnum ita arefcet ?* Isa. 51. v. 12. *Nolite timere opprobrium hominum*, Ibid. vers. 7. *Nolite timere eos, qui occidunt corpus*, Matth. 10. Christianus ergo homini minanti respondeat, unus est mihi metus, scilicet ne te timeam, & ad Deum deprecatio mea, ut spernam minas tuas, juxta præceptum ejus. 3. Timor mundanus sola nititur prudentia carnis, & sapientia sæculi, ac proinde adversatur fiduciæ, qua Spes Theologica Christianos defixos & firmos tenet in omnipotentia Dei & misericordia, juxta illud Psalm. 26. *Dominus protector vitæ meæ, à quo trepidabo ?* In quem locum sic scribit S. Augustinus, *protegitur Imperator scutatis, & non timet : protegitur à mortalibus mortalis, & securus est : protegitur mortalis ab immortalis, & timebit, & trepidabit ? ... quid mihi facit bellum ? potest mihi auferre spem meam ? potest mihi auferre quod dat Omnipotens ? sicut non vincitur qui dat, sic non auferitur quod dat : si auferri potest datum, vincitur dator ... Ergo quia nemo nobis potest auferre quod Deus dat, non timeamus nisi Deum.* Et in Psalm. 32. Conc. 2. *Fera sævit, Deum time ; serpens insidiatur, Deum time ; homo te odit, Deum time ; Diabolus te impugnat, Deum time.* Tota enim creatura sub illo est, quem juberis time-  
re. Porro quod doctrinâ hîc auribus extrinsecus intonat, illud ipsum Spes Theologica, si viva sit, interiùs operatur. Dico, *si viva sit* : uti debet esse spes Christianorum, ut qui sint regenerati in spem vivam, nam si sit mortua & informis, ut in carnalibus, superbis, ac de se præsumentibus, manet iners & sine fructu.

Dices :



Dices : Rom. 13. Commendatur timor humanus, five mundanus : *Si malum feceris, time* (Principem) *non enim sine causa gladium portat.* Et Luc. 18. vituperatur Judex, qui nec Deum timebat, nec hominem reverebatur : Ergo timor mundanus non est malus.

Nego antec. Quia ex S. Thoma qu. 19. art. 3. timor quo timetur Princeps vel Judex, quatenus in eo relucet aliquid divinum, scil. potestas ipsi à Deo concessa, qua utitur tanquam Dei minister ad impediendum, vel puniendum malum, propriè est timor Dei, non hominis. Solus igitur timor ; quo quis inducitur ad peccandum, dicendus est humanus, vel mundanus.

Instabis : Quod nobis inest à natura, non est malum, cùm illud sit à Deo : atqui inest nobis à natura timere mortem, & alia vitæ incommoda : Ergo.

Distinguo minor. Cum S. Thoma cit. art. ad 3. timere secundum rectam rationem, Conc. Time-re contra rationem, Nego min. *Quodd autem homo, inquit S. Doctor, propter ista recedat à justitia, est contra rationem naturalem. Unde Philosophus dicit in 3. Ethic. quodd quædam sunt, scil. peccatorum opera, ad quæ nullo timore aliquis debet cogi ; quia pejus est hujusmodi peccata committere, quàm pœnas quasvisque pati.*

Quartò, Spes Theologica injicit timorem Dei, quia ex S. Thoma qu. 19. art. 3. *Timor ex amore nascitur ; illud enim timet homo amittere quod amat : Atqui Spes Theologica est amor & desiderium possidendi Deum : ergo ex illa nascitur timor tanti boni amittendi, qui, ut diximus, propriè est timor Dei.*

Q. 2. *Quotuplex est timor Dei ?*

D. Habert Theolog. Tom. III.

U u

R. Tri-

R. Triplex , nempe servilis , quo timet quis puniri à Deo : filialis , quo timetur offensa Dei : & initialis , quo timetur simul pœna & culpa.

Timor servilis ita vocatur ; quia servi vulgò non continentur in officio , nisi metu pœnarum. Ideò autem servi urgendi sunt minis ; quia ut plurimùm student propriis commodis , nec ad eos , utpotè mercenarios , pertinet res domestica.

Hinc timor Dei in peccatoribus dicitur servilis ; serviunt enim suis cupiditatibus , & mala sua voluntate averfi sunt à Deo , nec curant ejus honorem & gloriam ; unde pœnarum metu à malo deterreantur necesse est.

Ergo in timore servili duo sunt distinguenda. Alterum quod est ipsi intrinsecum & essentiale , nempe fuga pœnæ. Alterum quod est ipsi extrinsecum & accidentale , nimirum ipsa servilitas , seu repugnantia , cum qua peccator gehennæ metu abstinet ab iis , quæ malè concupiscit. Primum est à Deo : secundum à cupiditate & mala voluntate. Et sicut fides informis , vel spes informis eadem manens potest fieri formata ; quia , ut diximus , esse informe est quid accidentarium fidei & spei ; similiter timor servilis potest esse sine servilitate , & evadere filialis & initialis , hoc est , conjungi cum bona voluntate & charitate.

Timor itaque filialis sic nuncupatur ; quia est proprius filiorum , qui animo volenti & liberis affectibus jussa parentum implent , nec aliud timeant , quàm ipsis displicere. Hic timor dicitur etiam castus ; quia casta conjux non minis agitur sicut adultera , sed amore duntaxat , ex quo id unum timet , scil. ne sponso vel minimam afferat molestiam. Ergo timor ille , non ex spe , sed ex chari-

charitate oritur, quia peccatum spectat ut malum amici; spes verò ut malum sperantis, quatenus nempe est impedimentum beatitudinis.

Timor initialis ita dicitur, quia est initium & inchoatio timoris filialis, nec differt ab eo, nisi ut perfectum ab imperfecto, sicut puer à viro, calor remissus à calore intensiori; qui enim agit ex timore initiali, declinat à peccato partim ex amore iustitiæ, quatenus peccatum est offensa Dei: partim ex timore pænæ æternæ; quia cum amor sit in eo admodum remissus, indiget timore fervili, quo veluti calcaribus incitetur. Unde juxta S. Augustinum ubi minor est charitas, major est pænæ timor; & ubi charitas major, ibi minor est timor: perfecta autem & consummata charitas ut in Beatis omnem pænæ timorem expellit, quemadmodum summus calor, qualis est in igne, nihil frigoris secum admittit; calor verò remissus plus minus frigoris patitur in eodem subjecto, prout magis vel minus est remissus.

Q. 3. *Triplex ille Dei timor estne bonus?*

R. 1. Certum est timorem filialem & castum esse optimum, cum sit effectus charitatis: *Timor filialis*, inquit S. Thomas, qu. 19. art. 10. *neceſſe eſt quòd creſcat, creſcente charitate, ſicut effectus creſcit creſcente cauſa: quàn tò enim aliquis magis diligit aliquem, tantò magis timet eum offendere, & ab eo ſeparari.*

Ergo timor filialis remanet in patria, juxta illud Psalm. 18. *Timor Domini ſanctus, permanens in ſæculum ſæculi*; quia ibi perfecta est charitas.

Ergo timor summus filialis fuit in Christo Domino, teste Propheta Iſaia, cap. 11. ubi sic habet: *Replebit eum Spiritus timoris Domini*; quia sicut Deum summè diligebat, ita summè reverebatur.

Advertit tamen sanctus Thomas cit. qu. 19. art. 11. timorem filialem non esse in Beatis, nec proinde in Christo Domino, tanquam fugam mali possibilis; sed per modum aversionis ac detestationis, scilicet peccati, & perfectæ reverentiæ erga Deum, ex qua tremunt Potestates; quia non apprehendunt peccatum ut malum possibile, quod fugere debeant, cum revera sit ipsis impossibile.

Ergo timor initialis quatenus oritur ex nascente charitate & amore justitiæ, bonus est, ut patet ex mox dictis. Difficultas est duntaxat circa timorem servilem, quem adjunctum habet timor initialis.

R. 1. Extra controversiam quoque est servilitatem ipsam, quam diximus, esse extraneam & accidentalem timori pænæ esse malam; tum quia oritur ex mala voluntate: tum quia est formale odium justitiæ, & legis eam præcipientis. De ejusmodi servilitate intelligendus est S. Augustinus Epist. 145. aliàs 144. ad Anastasium, in qua sic scribit: *Inaniter putat victorem se esse peccati, qui pænæ timore non peccat; quia etsi non impletur foris negotium malæ cupiditatis; ipsa tamen mala cupiditas intus est hostis. Et quis coram Deo innocens invenitur, qui vult fieri quod vetatur, si subtrahas quod timetur? Ac per hoc in ipsa voluntate reus est, qui vult facere quod non licet fieri, sed ideo non facit, quia impune non potest fieri. Nam quantum in ipso est, mallet non esse justitiam peccata prohibentem atque punientem. Et utique si mallet non esse justitiam, quis dubitaverit quod si posset, auferret? ac per hoc quomodo justus est justitiæ talis inimicus? Et in Psal. 32. Conc. 1. Qui timendo non facit malè, malè faceret, si liceret: itaque etsi facultas non datur,*



*tur, rea voluntas tenetur.* Eadem repetit in Pf. 118. Serm. 25.

Tota igitur controversia est circa timorem servilem, quatenus præcisè est fuga pænæ, utrum scilicet bonus sit, an malus.

Pseudo-Reformati non distinguentes inter servilitatem timori adjunctam, & ipsum gehennæ timorem essentialiter spectatum, absolutè definirunt gehennæ metum esse peccatum, contra quam impietatem extat Can. 8. Sess. 6. Concilii Tridentini. *Si quis dixerit, inquiunt Patres, gehennæ metum, per quam ad misericordiam Dei de peccatis dolendo confugimus, vel à peccando abstinemus, peccatum esse, vel peccatores peiores facere; anathema sit.* Quare

R. 3. De fide est timorem servilem secundum essentialiam spectatum, esse bonum: patet ex Canone mox laudato.

Probatur 1. ex Scriptura, Luc. 12. vers. 5. *Timete eum, qui postquam occiderit, habet potestatem mittere in gehennam: ita dico vobis, hunc timete.* Innumera proferri possunt testimonia ex Lege, Psalmis, & Prophetis, quibus Deus peccatores ad meliorem frugem se recipere compellit: atqui per absurdum est, quin & blasphemum asserere Deum uti malis artibus propter bonum finem.

Probatur 2. ex Patribus. Sanctus Augustinus in Psal. 127. de timore servili, sic habet: *Bonus est & ille timor utilis est: sed nondum est ille castus permanens in sæculum sæculi.* Et Serm. 157. aliàs 13. de verbis Apostoli cap. 13. *Qui, inquit, adhuc bene agit, quia pœnam timet, Deum non amat, nondum est inter filios: utinam tamen vel pœnam timeat. Timor servus est, charitas libera est, & ut sic dicamus, timor est servus cbaritatis. Ne possideat diabolus cor tuum, proce-*

*dat servus in corde tuo, & servet dominæ venturæ locum. Fac, fac, vel timore pænæ, si nondum potes amore iustitiæ. Veniet domina, & servus abscedet. S. Thomas illud ipsum ex professo docet qu. 19. art. 4. Si servilitas, inquit, esset de ratione timoris servilis, oporteret quoddam timor servilis simpliciter esset malus. Sicut adulterium simpliciter est malum, quia id, ex quo contrariatur charitati, pertinet ad adulterii speciem. Sed prædicta servilitas non pertinet ad speciem timoris servilis, sicut nec infirmitas ad speciem fidei informis . . . . Et ideo timor servilis secundum suam substantiam bonus est; sed servilitas ejus est mala.*

Superfluum est appellare alios Patres, qui, vel testantur se timore judiciorum Dei percelli, ut S. Ephrem, S. Bernardus in sermonibus ad populum inde corda auditorum concutere nituntur.

Probatur 3. ratione; Quia bonus est ille timor, quo constringitur mala voluntas, ne in exteriora peccata prorumpat, continentur homines sub disciplina, peccatores disponuntur ad justitiam, iusti incitantur ad perseverantiam: atqui hujusmodi est timor servilis; sine eo quasi aggere rupto vitia Rempublicam invaderent, leges proculcarerentur, jaceret Superiorum auctoritas, pueri voluntati suæ dimissi evaderent præcipites, ut dicitur Eccli. 30. Juvenes vix ad virtutem possent institui, nulla esset ratio coercendi protervos, nullus ordo, nulla pax & tranquillitas in societate humana.

Primo itaque loco continendi sunt homines metu pænarum: *Cum enim per timorem continent se à peccato, inquit sanctus Augustinus in Psal. 127. fit consuetudo justitiæ, & incipit quod durum erat amari, & dulce-*

*dulcescit Deus , & jam incipit homo propterea iuste vivere , non quia timet pœnas , sed quia amat æternitatem. Quin jam justificatus adhuc indiget isto timore ; nam ex eodem sancto Augustino Lib. Annotationum in Job cap. 40. Nisi gaudium spei nostræ cum timore damnationis esset , in nobis negligens esset ipsa securitas & superba præsumptio ; neque in Psalmo nobis diceretur : Exultate ei cum tremore.*

Apage ergo spurios Mysticos , qui docent in statu perfectionis nullum timoris gehennæ sensum admittendum , & ejus aculeos , quantum fieri potest , evellendos , contra expressum Domini præceptum ipsis Apostolis quantumcunque perfectis impositum citat. cap. 12. Luc. *Timete eum, qui . . . habet potestatem mittere in gehennam. Ita dico vobis, hunc timete.* Enimverò quamdiu in terris agimus , caro concupiscit adversus spiritum , corpus quod corrumpitur , aggravat animam ; facileque torporem inducit , nisi metus judiciorum Dei identidem somnolentum pungendo excitet. Porro quis malum dixerit timorem tam utilem , tamque necessarium ?

Dices : Bonus dici nequit ille timor , qui peccata multiplicat , & hominem pejorem reddit ; atqui ejusmodi est timor pœnæ ; mala quippe voluntas , quæ nullo terrente , instar canis dormientis sopita quiescebat , præceptorum minis laecessita exardescit in omne genus pravi affectus , iræ , odii , illiciti desiderii , quæ eò magis exuberant , quò peccator arctius timore constringitur ; adeo ut peccatum , quod prius erat mortuum , per timorem fiat supra modum peccans , ut loquitur Apostolus , Rom. 7. Ergo timor pœnæ re vera malus est.

Distinguo maj. Qui peccata multiplicat per se, Conc. Per accidens, Nego maj. namque sicut ex Apostolo, Rom. 7. Lex per se sancta est, & mandatum sanctum, justum & bonum, licet peccatum per mandatum operatum sit omnem concupiscentiam; ita metus gehennæ per se sanctus est, justus & bonus, quamvis illius occasione mala voluntas, quasi per antiperistasim amplius inflammetur grasseturque; quia inordinati illi motus oriuntur ex mala voluntate, nullatenus verò ex Lege, vel ex timore servili, qui per se ligat manum, tollitque saltem opus malum, si non possit cohibere ejus affectum.

Instabis 1. Imprudentis est Medici adhibere remedium ita efficax ad curandum leviores morbum, ut alium graviorem & periculosiorem conciliet: atqui ex concessis sic se habet timor pœnæ: Ergo.

R. 1. Si valeret illud argumentum, vincerent Manichæi, asserentes Legem veterem fuisse malam & à malo principio, quia ejus occasione peccatum, quod erat mortuum, revixit & operatum est omnem concupiscentiam, ut dicitur, Rom. 7.

R. 2. Negando minor. Quia juxta sanctum Augustinum, qui habet quod malè concupiscit, infelicior est quàm si non haberet; malo quippe usu roborantur habitus vitii, ac tandem naturæ vim obtinent. Quare ut homo nequam ad meliorem frugem reducatur, ante omnia libidinum materia ipsi etiam invito subtrahenda est, excandescat licet ac tumultuetur; nam desuetudine cupiditates restringuntur, & per timorem pœnæ bonum operantī justitia tandem dulcescit; quemadmodum docet sanctus Augustinus, Tract. 9. in 1. Joan.



Joan. Si propter pœnas, inquit, *Deum times, non a-  
inas : non bona desideras, sed mala caves ; sed ex eo quod  
mala caves, corrigis te, & incipis bona desiderare ; &  
cùm cupis bona desiderare, est in te timor castus, ne amit-  
tas ipsa bona.*

Instabis 2. Ille timor est per se malus, qui ad-  
versatur charitati : atqui timor servilis adversa-  
tur charitati ; nam timor non est in charitate,  
sed *perfecta charitas foras mittit timorem*, inquit S.  
Joannes 1. Epist. cap. 4. & S. Augustinus supra  
laudatus, *veniet domina*, inquit, *& servus abscedet* :  
timor quippe charitatem introducit, juxta san-  
ctum Doctorem, sicut acus filum, quod pannum  
non ingreditur, nisi acus prius exierit : Ergo.

Distinguo minor. Adversatur ratione servili-  
tatis, quæ ipsi accidentaliter adjuncta est, Con-  
cedo : Namque servilitas est odium justitiæ &  
mala voluntas ; charitas verò est ipsa justitiæ di-  
lectio & bona voluntas, quæ duo inter se pu-  
gnant, ut patet : adversatur ratione sui, & quate-  
nus præcisè est timor pœnæ, Nego minorem. Et  
quidem ad mentem sancti Evangelistæ ; ait enim,  
*timor pœnam habet* : atqui timor non potest esse  
pœna, nisi sit voluntati contrarius : quod e-  
nim est secundum voluntatem, placet, nec pœna  
esse potest.

Porro timor pœnæ non est contrarius nisi ma-  
læ voluntati, quæ cùm feratur in malum, ipsi ob-  
sistit timor pœnæ, tanquam agger oppositus, &  
ita displicet, & est voluntati quoddam pœnale  
malum. Sed tantum abest, ut diligenti justiti-  
am timor pœnæ sese opponat ; quin illi faveat  
non secus ac naviganti ventus secundus ; quem-  
admodum enim ventus flans à tergo navem im-

pellit ad portum ; quem navigans quantocius appellere desiderat , adeò ut remigio opus non sit , nisi admodum levi , cùm contra magno remigum conatu opus sit , quando navis agitur vento à fronte flante , qui ideò dicitur adversus , quia repugnat nautæ voluntati . Similiter timor gehennæ quantum adversatur & pœnalis est voluntati in malum propensæ , tantum juvat voluntatem ad Deum anhelantem tamquam ventus secundus , & eo auxilio plus vel minùs indiget , prout charitas est minùs , vel magis intensa . Hoc salutifero timore jam incitatus Regius Psaltes , qui Deum tam ardentè sitiebat , illum in se perfici rogabat , Psal. 118. *Confige timore tuo carnes meas , à judiciis enim tuis timui .* In quem locum S. Augustinus scribit : *Si jam timuerat , vel timebat , cur adhuc ut timore suo Deus configeret carnes ejus , orabit ? an addi sibi volebat timorem , ut tantum timeret , quantum sufficeret crucifigendis suis carnibus , id est , concupiscentiis affectibusque carnalibus , tanquam dicens :*

*Perfice in me timorem tuum , timui enim à judiciis tuis ?*



TER.

\*\*\*\*\*  
\*\*\*\*\*

# TERTIA PARS

## De Charitate.

**P**ostrema ista pars, quam aggredimur, non solum huicce Tractatui, sed & aliis, qui hoc Volumine continentur, veluti fastigium ac coronidem imponet. Charitas quippe est culmen domus Dei, quæ ut supra docebat S. Augustinus, *fide fundatur, spe erigitur, charitate perficitur*. Domus autem sine suo culmine & tecto, non est Dei habitatio, sed draconum, struthionum, & aliarum hujusmodi bestiarum, ut habetur, Isa. 13. *Sic familiaris est Deo charitas, ut ipse habere mansionem nolit ubi charitas non fuerit*, Lib. de Spiritu de Anima cap. 16. inter opera S. Augustini; scriptum est enim Joan. 14. *Si quis diligit me . . . ad eum veniemus, & mansionem apud eum faciemus*.

Differuimus primo loco de Actibus humanis ad honestatem dirigendis, quæ potissimum repetitur ex ultimo fine, nempe Deo, ad quem homo in omnibus suis actibus tendere debet; sed frustra Deum intendit sine charitate, utpotè quæ sola Deum apprehendat: *In hac vita*, inquit S. Augustinus Epist. 55. aliàs 52. *virtus non est nisi diligere quod diligendum est: id eligere, prudentia est: nullis inde averti molestiis, fortitudo est: nullis illecebris, temperantia est; nulla superbia, justitia est. Quid autem eligamus, quod præcipuè diligamus, nisi quo nihil melius inveni-*

invenimus? *Hoc Deus est . . . . Imus autem non ambulando, sed amando. Quem tantò habebimus præsentiorum, quantò eundem amorem, quo in eum tendimus, potuerimus habere puriorem. Et in Psalm. 98. Qui plenus est charitate, plenus est Deo; quia apertè scriptum est, Deus charitas est, 1. Joan. 4.*

Tractatu de peccatis, inquisivimus causas ejusmodi morborum animæ & remedia, quibus sanentur. Sed illa absque charitate prodesse nequeunt; *Ita ut ipsam fidem non faciat utilem nisi charitas; sine charitate quippe fides potest quidem esse, sed non prodesse, inquit S. Augustinus Lib. 15. de Trinitate cap. 18. tunc plena sanitas, quando perfectà charitas, idem Libro de Perfect. Just. cap. 3. ipsa sola operit multitudinem peccatorum, 1. Petr. 4.*

Rectam conscientiam & legem tanquam certas regulas, quibus dirigantur mores, tradidimus; sed qui Deum non diligit, opera sua ad ejusmodi regulas non exiget: *Quod ita sit, vel timore pænæ, vel aliqua intentione carnali, ut non referatur ad illam charitatem; quam diffudit Spiritus Sanctus in cordibus nostris; nondum fit quemadmodum fieri oportet, quamvis fieri videatur, sanctus Augustinus, Enchir. cap. 121. Deinde rectam non gerit conscientiam qui malè affectus est; unusquisque enim judicat prout affectus; malè autem affectus est, qui Deum non diligit ex sancto Augustino, Tract. 123. in Joann. Nescio, inquit, quo inexplicabili modo, quisquis seipsum, non Deum amat, non se amat: & quisquis Deum, non seipsum amat, ipse se amat. Qui enim non potest vivere de se, moritur utique amando se: non ergo se amat, qui, ne vivat, se amat. Cum verò ille diligitur, de quo vivitur, non se diligendo magis diligit, qui ideò non se diligit, ut eum diligit, de quo vivit. Ergo cum*



cùm ea dicatur recta conscientia, qua quis salutaria eligit, noxia reprobat, manifestum est rectam illius non esse conscientiam, qui malè se amat, hoc est, qui seipsum, non Deum amat, nec posse bona conscientia consulere propinquis & amicis; *nemo enim potest veraciter amicus esse hominis; nisi fuerit ipsius primitus veritatis*, inquit S. Augustinus citata Epist. 155. naturale quippe est diligere proximum sicut seipsum; ac proinde qui malè, hoc est, falsò se amat & verè odit, malè quoque & falsò proximum diligit; nihil autem in moribus perniciosius perversa illa propinquorum & aliorum amicitia, ut quæ venenum cupiditatis sub specie benevolentiae animis instillet.

Quid refricem illud Apostoli, *finis . . . . præcepti est charitas*, 1. Timoth. 1. & Rom. 13. *plenitudo ergo legis est dilectio*: vana esse Medici præcepta, nisi ad sanitatem perducant; & inutilia Legis mandata, nisi charitatem, quæ sola est animæ sanitas, operentur? Sed illud attendendum est magis, quod Lex Evangelica, sub cujus littera premuntur mali Christiani, & in qua vivunt boni, primariò & essentialiter consistat in charitate, per quam parit filios adoptionis, aufert spiritum servitutis, & Deus mittit Spiritum Filii sui in corda nostra clamantem: *Abba Pater*, Gal. 4. v. 6. Unde S. Augustinus Lib. 15. de Trinit. cap. 18. sic habet: *Charitas est donum Dei, quo nullum excellentius: solum est quod dividit inter filios regni æterni, & filios perditionis æternæ. Dantur & alia per Spiritum sanctum munera, sed sine charitate nihil prosunt. Nisi ergo tantum cuique impertiatur Spiritus Sanctus, ut eum Dei & proximi faciat amatorem, à sinistra non transfertur ad dexteram, nec Spiritus propriè dicitur donum,*

num, nisi propter dilectionem. Et Tract. 7. in 1. Joan. Omnes qui non diligunt, alieni à Deo sunt; & quamvis intrent basilicas, non possunt tamen numerari inter filios Dei; Quomodo alieni, qui Christum credunt, & confitentur? Quia Evangelium ejus non receperunt, nisi secundum corticem & litteram. Dæmon credidit, & confessus est, Luc. 4. v. 34. Scio te, inquit, quis sis, sanctus Dei. Sed frustrà, quia non credidit ea fide: quæ per dilectionem operatur, & in qua diximus præcedenti Tractatu, repositam esse Legem Evangelicam; in qua manent veri Christiani, juxta illud Christi Domini Joan. 15. vers. 9. *Manete in dilectione mea.*

Ergo S. Augustini conclusio in Psal. 103. sit & nostra: *Quidquid dicimus, quidquid diximus, & quidquid dicere poterimus, vel nos, vel qui post nos, vel qui ante nos, non habet finem nisi charitatem;* Cùm sine ea nec actus humani ad debitum finem dirigantur, nec morbi animæ, id est, peccata curentur, nec recta conscientia haberi, nec Lex Dei universim sumpta adimpleri possit.

Sed, inquit S. Gregorius Hom. 30. in Evang. *si unusquisque requiratur, an diligat Deum? tota fiducia & secura mente respondet, diligo;* Quia dæmon falsa charitatis specie homines quam sæpissimè deludit instar monetæ adulteratorum, qui, ut advertit Guillelmus Parisiensis, non vilem, sed pretiosiorum nummum adulterare solent. Idcirco quæremus. 1. Quid sit charitas. 2. Quodnam ejus objectum. 3. Quis sit statuendus ordo in iis, quæ sunt charitate diligenda. 4. Qui charitatis effectus. 5. Quæ peccata ipsi opposita.

## CAPUT PRIMUM.

## De Nomine &amp; Definitione Charitatis.

Q. 1. *Quotuplici modo sumitur nomen charitatis?*

R. Triplici. 1. Pro quolibet amore naturali etiam civili, ut Prov. 15. *Melius est vocari ad olera cum charitate, quàm ad vitulum saginatum cum odio.* 2. Pro divina natura, quæ tota bonitas est, ut 1. Joann. 4. *Deus charitas est.* 3. Pro amore benevolentiae, quo Deum super omnia diligimus, ut 1. Cor. 13. *Si . . . charitatem autem non habuero, nihil sum.*

Dixi: *Pro amore benevolentiae*; Quia amor concupiscentiae seu spei, quo Deum diligimus, ut nobis bonum non dicitur charitas.

Porro agimus hic de charitate tertio modo sumpta, quæ est species amoris benevolentiae. Cum autem notitia speciei haberi non possit, quin probè cognoscatur illius genus, nemo v. g. intelliget quid sit homo, nisi prius noverit quid sit animal.

Q. 2. *Quid est amor benevolentiae?*

R. Generatim est amor, quo quis alteri bene vult & facit, quantum in ipso est, non sui, sed illius gratia.

Dicitur 1. *Amor*: Quæ particula designat genus, in quo amor concupiscentiae & benevolentiae conveniunt; uterque enim est amor.

Dicitur 2. *Quo quis alteri bene vult*; Amare enim est bene velle.

Dicitur 3. *Et benè facit, quantum in ipso est*, ut significetur amorem benevolentiae non esse meram

ram complacentiam in bono alterius, aut inertem commiserationem ob malum illius; neque enim dives avarus censetur benevolus erga pauperem, cui bene precatur nihil illi erogans, *non diligamus verbo, neque lingua*, inquit S. Joannes 1. Epist. cap. 3. *sed opere & veritate*. Addit, *& veritate*, ut intelligamus verum non fore amorem benevolentiae, si data occasione, ad opus non tendat: *Amor*, inquit S. Gregorius, *magna operatur si est; aut si operari renuit, amor non est*. Et sanctus Augustinus in Psalm. 31. *Dilectio vacare non potest: quid enim de quocumque homine male operatur, nisi amor? Da mihi vacantem amorem, & nihil operantem*. Ergo Deum non diligit amore benevolentiae, nisi verbo tenus, qui ita in orationibus ingeminat, *sanctificetur nomen tuum*, ut non tangatur cum læditur ejus honor, indifferenterque, ne dicam, delectabiliter, audiat linguam detrahentem, impudicam, &c.

Dicitur 4. *Non sui, sed illius gratia*; quibus exprimitur differentia amorem benevolentiae inter & amorem concupiscentiae: ille omnia vult & facit in gratiam amici, hic in gratiam amantis, ut fusè probavimus, pag. 632. Pater v. gr. alimenta filio suppeditat amore benevolentiae, & pabulum jumento amore concupiscentiae; quia primum facit in gratiam filii, secundum verò in gratiam sui, & proprium commodum; illic est benevolus, hic cupidus & sui amans.

Q. 3. *Differuntne amor benevolentiae & amicitiae?*

R. Non differunt nisi extrinsecè & connotativè, nempe amor benevolentiae est & amicitiae, si connotet amicum redamantem: secus si non connotet; amor quippe amicitiae est reciprocus.

Porro



Porro totuplicis generis est amor benevolentiae & amicitiae, quotuplex est communicatio bonorum in qua fundatur. Quare alia est amicitia consanguineorum, alia justorum, alia qua vincuntur inter se usurarii, fures & latrones; sed hæc posterior amicitia mala est & perversa; quia ejusmodi homines malè se amant, utpotè qui non bonum, sed malum sibi reciprocè velint.

His ita elucidatis circa amorem benevolentiae in genere, jam descendendum est ad charitatem, quæ, ut suprâ diximus, est nobilissima species amoris benevolentiae. Itaque

Q. 4. *Quid est Charitas?*

R. Definitur, Virtus infusa Theologica, qua Deum super omnia diligimus, & cætera propter ipsum.

Dicitur 1. *Virtus*; Quia habentem se facit simpliciter bonum, cum aliæ virtutes bonum faciant duntaxat ex parte, Christianus v. g. temperans, sed avarus, bonus quidem est quatenus credit Deo, & moderatur voluptates; sed malus est quatenus pecuniæ nimium cupidus; & idè non est bonus absolutè & simpliciter, sed malus; quia deficit ab ultimo fine, qui est regula actuum humanorum. Charitas verò facit simpliciter bonum, utpotè quæ excludit omne peccatum saltem grave, hominem Deo conjungit, & ad illum omnes virtutes movet agitque tamquam earum forma & vita, sine qua dicuntur informes, imperfectæ, ac mortuæ: *Habere nomen Christi*, inquit S. Augustinus, Tract. 7. in 1. Joan. *& malus esse potest: habere autem charitatem, & malus esse non potest*: Ergo nullus habitus æquè meretur nomen virtutis ac charitatis.

Dicitur 2. *Infusa*, juxta illud Rom. 5. *Charitas Dei diffusa est in cordibus nostris per Spiritum Sanctum, qui datus est nobis.* Et Concilii Tridentini Sess. 6. cap. 7. *Hæc omnia simul infusa accipit homo (in justificatione) per Jesum Christum, cui (infitur) fidem, spem, & charitatem.* Sed illud fufius probavimus Tract. de Gratia, ubi de Virtutibus infusis, pag. 402. & de necessitate gratiæ ad initium bonæ voluntatis, cap. 5. §. 1.

Ergo charitas non est Spiritus Sanctus, sed quid ab ipso distinctum; est enim oppositio relativa inter causam & effectum, infundentem & infusum.

Dices: 1. Joannis 4. habetur, *Deus charitas est:* Ergo.

Distinguo anteced. Deus charitas est objectivè & principativè sumpta, Concedo: Charitas est, qua formaliter diligimus, Nego anteced. Itaque sicut Deus est sapientia, justitia; ita est ipsa bonitas infinitè sui communicativa, & ut sic est objectum & principium, seu causa efficiens nostræ dilectionis & charitatis, qua formaliter illum diligimus.

Instabis: Atqui Deus non solum est objectum & causa efficiens charitatis, quæ in nobis est, sed etiam ipsamet charitas: ergo nulla solutio.

Probatur subsumptum, 1. ex Magistro Sententiarum, qui Lib. 1. dist. 17. ita distinguit inter habitum charitatis, & ejus actum seu amorem actuale, ut concedat ipsum actum infundi quidem à Spiritu Sancto, ac proinde ab ipso distinguere tanquam effectum à causa; sed contendat habitum esse ipsummet Spiritum Sanctum, 2. ex S. Augustino Lib. 8. de Trinitate cap. 8. ubi sic scribit:

bit : *Fraterna dilectio , qua diligimus invicem , non solum ex Deo est , sed etiam Deum esse Scriptura declarat*, idque S. Doctor probat toto illo capite : Ergo.

Nego subsumptum, & ad ejus confirmationem

R. 1. Opinionem Magistri Sententiarum rejici à S. Thoma q. 23. art. 2. & à cæteris Theologis, à quibusdam saltem ut temerariam, ab aliis ut erroneam ; cum pugnet contra conclusionem, quæ satis evidenter elicitur ex propositione fidei. De fide enim est in justificatione infundi gratiam & charitatem, quæ cordibus inhæret, ex Concilio Tridentino Sess. 6. Can. 11. & parvulos per Baptismum induere novum hominem, fieri innocentes, immaculatos & hæredes Dei, cohæredes autem Christi, Sess. 5. Can. 5. atqui ista non possunt intelligi de parvulis in actu charitatis, cum in illis nullus sit actus : neque de Spiritu Sancto præcisè, cum inhærere nequeat : Ergo intelligantur necesse est de habitu charitatis. Sed de his plura vide Tract. de Gratia pag. 386. 387. & pag. 410. & seq.

R. 2. Locum S. Augustini re vera esse difficilem, dedisseque nonnullis errandi occasionem, ex S. Thoma cit. art. 2. ad 1. Sed opponuntur alii textus, in quibus S. Doctor perspicuè distinguit charitatem, qua Deum diligimus, à charitate, quæ Deus est, ut Tractatu 26. in Joan. *Justitia Dei*, inquit, *hic dicitur, non qua justus est Deus, sed quam dat homini Deus, ut justus sit per Deum.* Quod autem hominis justitia sit ipsa charitas, docet tum verbis sequentibus, tum Lib. de Natura & Grat. cap. ult. ubi sic habet : *Charitas ergo inchoata inchoata justitia est ; charitas provecta provecta justitia est ; charitas magna magna justitia est ; charitas perfecta*

*perfecta justitia est.* Charitas hîc & justitia incrementum suscipiunt: atqui Deus nullam mutationem admittit: ergo Deus non est ea charitas, qua illum diligimus. Et Tract. 6. in 1. Joan. *Quid est, inquit, ipse Spiritus interpellat pro Sanctis, nisi ipsa charitas, quæ in te per Spiritum facta est?* Quibus verbis adeo perspicuis explicare cogimur, quæ sanctus Doctor alibi obscurius dixit. Quare

Distinguo oppositum sancti Augustini locum. Dilectio, qua fratres diligimus, non solum ex Deo est, sed Deus ipse participativè, Concedo: Est Deus ipse substantialiter, Nego. *Quemadmodum, inquit S. Thomas cit. art. 2. ad primum, dicimur boni bonitate, quæ est Deus, & sapientes sapientia, quæ est Deus; quia bonitas qua formaliter boni sumus, est participatio quædam divinæ bonitatis; & sapientia, qua formaliter sapientes sumus, est participatio quædam divinæ sapientiæ: ita etiam charitas, qua formaliter diligimus proximum, est quædam participatio divinæ charitatis.* Hic enim modus loquendi consuetus est apud Platonicos, quorum doctrinis imbutus fuit Augustinus. Et in responsione ad secundum exponens illud, quod frequentissimum est in scriptis sancti Augustini, nempe sicut anima est vita corporis, ita Deus est vita animæ, & quomodo corpus tuum sine spiritu, quod est anima tua, si fuerit, mortuum est; sic anima tua sine Spiritu Sancto, id est, sine charitate si fuerit, mortua deputabitur, Tractatu 9. in Joannem, docet Deum per charitatem non esse formaliter, sed effectivè vitam animæ.

Justus tamen dicitur vivere vita Dei, sed participativè, quatenus amor charitatis, qui est summæ benevolentiae, transformat amantem in Deum amatum per arctissimam unionem, qua unum alteri



teri ita astringit, ut non tam similis illi, quàm unus idemque cum eo spiritus, una voluntas, & una quasi anima efficiatur, vero quidem, sed tam ineffabili modo, ut novæ excogitandæ sint voces ad explicandam illam communionem, qua quis per charitatem manet in Deo, & Deus in ipso; Deus enim sic amantem non solum assimilât sibi in moribus & virtutibus divinis; sed etiam facit consortem naturæ divinæ, ejusdem secum animi, desiderii, & affectus, omnes ejus potentias, sensus, appetitus, amores, operationes, cogitationes, intentiones cordis trahit ad se; adeo ut fiat quædam moralis communicatio idiomatum, dicaturque Spiritus Sanctus postulare, gemere, contristari, gaudere, dum ista operatur in anima, hinc nascuntur actuum humanorum merita vitæ æternæ condigna. Hinc S. Thomas cit. art. 2. ad 3. concludit quoddam etsi charitas non sit formaliter infinita, habeat tamen effectum infinitum, *dum*, inquit, *conjungit animam Deo*. Et S. Aug. Tract. in 1. Joan. *Totum simul habet, qui habet charitatem*. In Ps. quoque 149. *Quisquis habet charitatem, utquid illum mittimus longè, ut videat Deum? Conscientiam suam attendat, & ibi videt Deum . . . si charitas ibi habitat, Deus ibi habitat. Vult illum fortè videre sedentem in cælo? habeat charitatem, & in illo habitat sicut in cælo*.

Dicitur 3. *Theologica*, nulla enim virtus æquæ, ac charitas occupatur circa Deum. Fides pro objecto aliquod habet attributum divinum, scilicet veritatem Dei in verbis & promissis: spes bonitatem divinam non absolutè & simpliciter, sed quatenus nos efficere potest beatos. Charitas verò in totum Deum fertur, ad omnes infinitas ejus perfectiones se extendit. *Totus desiderabilis est . . .*

inquiebat Sponsa cap. 5. v. 16. *Dilectus meus*, in amico impensè dilecto omnia placent, ejus ingenium, forma corporis, sermo, modus agendi amantem mirificè recreant. Sic diligenti Deum ex charitate, placent ejus sapientia, justitia, verba, mandata, judicia, decreta, providentia, sive in prosperis, sive in adversis, totus est desiderabilis.

Porrò discipulus, qui ipsam personam Magistri diligit propter singularem ejus virtutem, longè perfectiùs ei adhæret, quàm alter, qui se ei tantum adjungit ob necessariam doctrinam, qua illum imbuat.

Dicitur 4. *qua Deum diligimus super omnia*, quibus charitas essentialiter differt à spe, & à quacunque alia virtute; sola quippe charitas nos & nostra ad Deum refert. Spes quidem Deum concupiscit ut suum bonum, & tantum bonum, ut sperans illud præferat omnibus suis commodis, v. g. sanitati, quam nollet recipere per magicas artes; divitiis, quas viis illicitis non compararet, sicque dici potest Deum amare super omnia secundum quid, & in aliquo genere, scilicet eorum bonorum, quæ sibi appetit. Sed per spem sine charitate Deum sibi ipsi non præfert, nec proinde illum super omnia simpliciter & absolutè diligit, cum illum non plusquam seipsum diligit, hæreatque in amore sui, non quidem positivè, quasi seipsum constituat ultimum finem, & Deum habeat veluti medium suæ felicitatis, quod est immane crimen eorum, qui se plusquam Deum diligunt, sed negativè duntaxat, spes enim illius sicut & cæteræ virtutes locum parant, nedum excludunt charitatem, quæ superveniens, sperantem efficit ejusdem cum Deo spiritus & voluntatis, ut  
jam

jam non suum, sed objecti amati commodum expectet; & sicut Deus omnia propter semetipsum operatus est, hominemque ad beatitudinem supernaturalem ordinavit in gloriam suam; sic Christianus eodem affectu per charitatem occupatus, se ipsum totum, beatitudinemque suam & cætera ex animo refert ad Dei gloriam. Et hic solus amor est simpliciter & absolutè super omnia, Deo non denegandus, nec ulli creaturæ exhibendus absque ingenti discrimine.

Dicitur 5. *Et cætera propter ipsum*; res enim amici sunt ejus in usum & commodum convertendæ: atqui omnia sive parentes, sive domestici, sive prospera, sive adversa sunt æquè ac nos res Dei summè dilecti: ergo per charitatem ea omnia propter Deum diligimus, & in ejus bonum, hoc est, gloriam & honorem convertimus. Sed de his plura inferius.

Q. 5. *Quotuplici modo Deus super omnia diligitur?*

R. Duplici, scilicet intensivè & appetiativè.

Deus diligitur intensivè super omnia, cum voluntas in eum fertur maximo conatu, & intensissimo seu ardentissimo amoris actu, qualis est amor beatificus: appetiativè verò super omnia diligitur, cum voluntas tam fortè amoris vinculo astricta est Deo, ut nulla res eam inde avellere queat. Hoc amore appetiativè summo dicebat Apostolus Rom. 8. *Certus sum enim, quia neque mors, neque vita . . . . . neque creatura alia poterit nos separare à charitate Dei.*

Q. 6. *Potestne dari amor Dei, qui sit super omnia appetiativè tantum?*

R. Non solum potest dari, sed actu & de facto datur, ut patet exemplo Justi, qui intensiori

& vehementiori dolore afficitur ob mortem patris, quem impensè diligebat, quàm ob præterita peccata, quamvis appretiativè plus doleat se in Deum peccasse, quàm patrem amisisse, paratusque sit ejusmodi orbitatem sustinere potius, quàm Deum offendere, & ejus amicitia privari.

Dices: Deus est summè diligendus tum appretiativè, tum intensivè: Ergo peccat qui illum summè non amat etiam intensivè.

Distinguo ant. Est summè diligendus etiam intensivè, id est, meretur sic diligì, & ad hunc amorem enitendum est, Concedo: sic diligendus est ex necessitate præcepti, Nego anteced. Præcepta enim sunt de rebus possibilibus: atqui nobis impossibile est, quàm diu hanc vitam mortalem vivimus, Deum diligere ea intensiōe, qua diligitur à Beatis.

Confirmatur responsio: Deus meretur amorem beatifico intensiorem & perfectiorem; est enim omni modo infinitè amabilis, utpote infinitè bonus: atqui nemo inde colliget in Beatis non esse veram charitatem, ut qui Deum non ament quantum meretur; hoc est, amore infinito tum appretiativè, tum intensivè, cujus capax non est ulla creatura, nec ipsa Christi Domini humanitas, soliusque Dei est se diligere quantum meretur.

Instabis: saltem Deus ea intensiōe debet diligi, quæ est possibilis in hocce naturæ corruptæ statu.

Distinguo: quæ est possibilis in hocce statu, & in circumstantiis, in quibus fidelis reperitur, Concedo: quæ est possibilis in hocce statu, & impossibilis in quibusdam circumstantiis, Nego. Porro concurrunt aliquando circumstantiæ, in quibus



quibus hujusmodi intensio & fervor impossibilis est etiam Justis provectæ charitatis, ut loquitur S. Augustinus. Et ratio est, quia ut quis ardeat amore vel odio, satis non est objectum apprehendi ut bonum vel malum, nisi sit præsentissimum, viscera matris v. g. magis fervent erga parvulum, quem quotidie gerit in ulnis suis, quam erga natu majorem, quem tamen magis amat appretiati- vè; similiter tempus lenit dolorem viduæ conjugem defunctum plorantis, quamvis augeat, ne- dum minuat incommoda, quæ viduam vulgò cir- cumveniunt. Quid ita? Nempe objecta remo- tiora sensus non afficiunt, appetitum non commo- vent ad voluntatis nutum, & rationis imperium, quin quàm sæpissime aliò impellunt, mentem a- vocant aut interturbant, præsertim vis imaginan- di. Hinc devotio nonnumquam remissa, & ora- tio tepida in viris etiam virtute præditis: quia Deus etsi super omnia appretiati- vè dilectus, re- motior est à sensibus, à quibus tamen mentis ope- rationes pendent, nisi Deus sua efficaci gratia in- terius corda moveat accendatque. Sed illi defe- ctus non imputantur in peccatum, nisi ex incuria & negligentia procedant; quin in hujusmodi in- firmitate, in qua non deest labor nec pugna, cha- ritas perficitur, meritum augetur.

Q. 7. *In quo præcisè consistit amor, qui appretiati- vè tantum est super omnia?*

R. Consistit in voluntatis adhæsi- one ad Deum plena & tam firma, ut nihil æquè timeat, ac illi displicere, & ab eo separari.

Dixi i. *voluntatis*; appretiatio enim, de qua a- gitur, non est mentis æstimatio, qua certò judi- cat Deum esse tantum bonum, ut nihil ei debeat

æquari, nedum præferri; quia amor non est actus intellectus, sed voluntatis. Illud quidem mentis iudicium præsupponitur amoris tanquam necessaria ejus regula & mensura; quia voluntas non fertur in incognitum, nec Deum super omnia diliget, nisi intellectus certiores eam faceret Deum esse super omnia amabilem. Sed illa mentis æstimatio seu appretiatio super omnia non est charitas, cum quivis etiam nequissimus tam certo æstimet Deum esse quid optimum, ut non possit non adhærere huicce veritati, utpote evidenter notæ.

Præterea certi sumus nos de Deo ita sentire, cum tamen nemini absque speciali revelatione constet se Deum appretiative super omnia diligere. Ergo appretiatio, de qua hic sermo, non est præcisè adhæsiō mentis, sed voluntatis.

Quid autem sit illa voluntatis ad Deum adhæsiō, intelligitur exemplo corporum gravium, quæ pondere suo eò firmitus centro adhærent, quod graviora; ita ut aliquando tantum eorum sit pondus, ut nulla vi inde avelli aut dimoveri queant. Namque amor fortis nomine ponderis solet exprimi, juxta illud tritum S. Aug. effatum, *pondus meum amor meus, illo feror, quocunque feror*. Sicut ergo immane saxum centro adhærens, non admittit eorum impetum, qui illud dimovere conantur; sic voluntas charitate instructa tanto amoris pondere Deo adhæret, ut nulla vis temptationum inde eam avellere queat, nisi ipsamet liberè se subducatur. Sed illa in Deum propensio debet esse plena, juxta primum Legis præceptum: *diliges Dominum Deum tuum ex toto corde*; alioquin si sit ex parte tantum, qualem S. Augustinus ante  
conver-

conversionem experiebatur , levis est , & ad omnem tentationis ventum facilè circumfertur ; nec proinde charitas est, quia non est super omnia.

Dixi 2. *ut nihil æquè timeat , ac illi displicere* , ut distinguatur amor charitatis ab amore concupiscentiæ, seu spei ; namque spes informis unum super omnia timet , nempe beatitudinis jacturam & (quod idem est) impœnitentiam finalem ; qui enim Deum sperat, necdum charitate diligit , non multum cavet leviora peccata, nec valdè torquetur, ubi eorum se conscium agnoscit, utpote quæ à regno cœlorum non excludant ; quin gravi tentatione pulsus, facilè se in peccatum lethale trahi finit, ex fiducia veniæ petendæ & obtinendæ.

Contrà verò qui Deum ex charitate diligit, vel levissimam ejus offensam tanquam summum malum formidat, ac vitare studet, quamvis ex infirmitate humana identidem labatur ; sed non sine acutissimo animi dolore, quem spes veniæ non lenit, imò bonitas clementissimi patris illum pudore suffundit, & ad amplius dolendum incitat.

Ergo suspecta est admodum , & vana sapiissime eorum conversio, qui post perceptum pœnitentiæ Sacramentum , cùm jam charitas cordibus eorum infusa esse debeat , ad primam quæ se offert tentationem , ad primum alienæ mulieris aspectum, &c. graviter labuntur ; voluntas enim tanto amoris pondere Deo inhærens, non ita facilè sejungi potest , cùm ne quidem à temporallibus, quæ longè minùs diligit , adeo leviter avocaretur. Frustra objicitur infirmitas carnis ; quia si in regeneratis per gratiam caro concupiscit adversus spiritum ; spiritus quoque , qui supponitur vivere sacramenti virtute , concupiscit

scit adversus carnem, unde in justificatis oritur pugna, ex qua spiritus charitate unctus & roboratus victor deberet existere; *quia fortis est ut mors dilectio*, Cantic. 8. Et Apostolus ait justificatis Rom. 6. *Peccatum vobis non dominabitur, non enim sub lege estis, sed sub gratia.* Ergo spiritualiter non vivunt, qui laceffenti peccato non repugnant, nec voluntas eorum præoccupata censeri debet amore Dei super omnia, quæ absque renisu consentit ejus offensæ.

Q. 8. *Charitas estne vera amicitia Deum inter & hominem?*

R. Communis est Theologorum sententia post S. Thomam q. 23. art. 1.

Probatur 1. ex Scriptura. Sap. 7. v. 14. dicitur de Sapientia, quæ non est sine charitate, *infitus enim thesaurus est hominibus, quo qui usi sunt, participes facti sunt amicitiae Dei*; & v. 27. *Amicos Dei & Prophetas constituit.* Joan. 15. v. 14. & 15. *Vos amici mei estis, si feceritis, quæ ego præcipio vobis. Jam non dicam vos servos . . . vos autem dixi amicos.*

Probatur 2. ratione, quia ad veram amicitiam quatuor requiruntur. 1. ut amor sit benevolentiae erga amicum; *ridiculum enim est dicere*, inquit S. Thomas cit. art. 1. *quod aliquis habeat amicitiam ad vinum, vel ad equum, quos propter se amat.* 2. ut amor sit mutuus. 3. notus utrique amanti; nam inter amicos debet esse specialis communio; nec amici dici possunt duo Justī, qui nunquam se noverunt, licet in utroque sit charitatis amor generatim erga omnes homines. 4. ut sit fundatus in bonorum communione. Atqui quatuor illæ conditiones apprimè conveniunt charitati etiam respectu Dei (nam respectu hominum res est evidens.)

1. cha.



1. charitas ex dictis est amor benevolentiae. 2. est mutuus, Joan. 14 v. 21. *Qui ... diligit me, diligitur à Patre meo, & ego diligam eum, & manifestabo ei meipsum.* 3. est manifestus tum Deo, ut patet, cum ipse amorem illum infundat cordibus nostris: tum nobis, si non certitudine metaphysica & physica, vel fidei, ut docuimus Tract. de Gratia, saltem morali, ipse enim Spiritus, ait Apostolus Rom. 8. *testimonium reddit spiritui nostro, quod sumus filii Dei.* Et 1. Cor. 2. *Nos autem non spiritum hujus mundi accepimus, sed Spiritum, qui ex Deo est, ut sciamus, quæ à Deo donata sunt nobis.* 4. Fundatur in communione bonorum 1. Cor. 1. *Fidelis Deus, per quem vocati estis in societatem Filii ejus.* Eph. 1. *Benedixit nos in omni benedictione spirituali in cælestibus in Christo.* Homines quoque in Deum refundunt, quæ ab illo acceperunt, juxta illud 1. Paralip. cap. 29. *Tua sunt omnia, & quæ de manu tua accepimus, dedimus tibi.*

Denique, licet ad veram amicitiam necesse non sit, ut amici simul vivant, cum multi à se invicem distiti amicitiam colant; nihilominus illa conditio non deest charitati: namque 1. Joan. 4. *Qui manet in charitate, in Deo manet, & Deus in eo.* Et Phil. 3. *Nostra autem conversatio in cælis est.*

Dices 1. ex concessis, qui amat in proprium bonum non amat amore amicitiae: atqui Deus omnia operatur in gloriam suam, nos quoque proximum ex charitate diligimus propter Deum; Ergo charitas non est amor benevolentiae, nec proinde amicitiae.

Distinguo min. Deus omnia operatur in suam gloriam, nos quoque ad eam referimus, quæ proximo volumus bona, ita tamen ut hæc nobis & proximo utilia sint, ac commoda, atque eo intui-

tu Deus ea nobis velit, & nos proximo, Conc. & Deus in iis nobis non prospicit, nec nos proximo, Nego minorem, & consequentiam; namque licet foveamus membra nostra propter bonum totius, verè tamen ipsis bonum volumus; quia ipsis bene non erit, nisi totum bene se habeat. Porro bonum nobis esse non potest, nisi in Dei gloriam tendamus, tumque maximè nos & proximum diligimus, cum nos & illum ad Deum puro corde referimus: *neque enim beatum facit hominem, nisi qui fecit hominem*, inquit S. Augustinus Epist. 155. aliàs 52. & qui vult vivere de se, odit animam suam, & miser efficitur.

Dices 2. amicitia non est nisi inter æquales, Ethic. c. 8. & 9. hinc inurbanè quis eum vocaret Principis amicum, qui apud illum in magna est gratia: ergo charitas non constituit Dei amicos, nec proinde dici potest amicitia respectu Dei.

Nego anteced. Namque Philosophus cap. 10. distinguit duplex amicitiae genus, alteram quam vocat æqualitatis; alteram excellentiae seu supereminentiae, quæ est inter personas in diverso dignitatis gradu constitutas, quin Principes aliquando non dedignantur scribere amicos, illos ex subditis, qui sunt illis gratiosi, quamvis isti ab illo nomine abstineant urbanitatis causa, ne videatur lædi reverentia Principi debita, quod in charitate non est timendum, cum crescente charitate, simul crescat in Deum reverentia.

## CAPUT II.

De objecto materiali & formali Charitatis.

Q. 1. *Quodnam est objectum materiale Charitatis?*

R. Ob.

R. Objectum materiale per se est Deus & quidem primum & attributionis : secundarium vero nos ipsi & proximus : indirectè autem & reductiè sunt res omnes sive naturales, sive supernaturales, quatenus cedere possunt in Dei gloriam, & nostrum ac proximi commodum. Tres responsionis sunt partes.

Prima pars probatur. Illud est objectum per se primum, & attributionis cujusque habitus ac virtutis, circa quod habitus ac virtus primum per se versatur, & ad quod cætera refert: atqui charitas per se primum versatur circa Deum & ad illud cætera refert, ut ex dictis satis intelligitur: Ergo.

Secunda pars probatur simili argumento; namque charitas per se versatur secundario circa illas personas, quibus Deus & nos amore benevolentiae volumus summum bonum, & cætera, quæ ad illud conducunt, & quidem in Dei gloriam: atqui Deus, qui est charitas, sic nobis & proximo bene vult, & nos nobis & proximo: Ergo.

Tertia pars probatur; quia charitas rerum amici curam gerit, non propter ipsas præcisè, non enim possunt esse objectum benevolentiae, sed propter amicum, cui prodesse possunt; atqui omnes creaturæ sunt res Dei, in gloriam ejus productæ & conservatæ, & diligentibus Deum convertuntur in bonum: Ergo reductiè sunt, objectum charitatis.

Dices: ex S. Gregorio Homilia 17. in Evang. Charitas non nisi inter duos haberi potest: Ergo homo charitate seipsum diligere nequit.

Confirmatur: charitas ex dictis est amicitia: atqui amicitia non est ejusdem ad seipsum, cum  
ad

ad amicitiam requiratur redamatio & mutuus amor: Ergo.

Distinguo ant. Cum S. Thoma q. 25. art. 4. charitas sumpta pro amicitia actuali & formali, non nisi inter duos esse potest, Concedo: sumpta pro amicitia fundamentali; Nego ant. Itaque charitas secundum se spectata, est principium & fundamentum amicitiae; sed nisi correspondeat alter redamans, non est actu & formaliter amicitia, quæ solet describi amor seu unio duos copulans: ad se autem ipsum non est unio, sed unitas: *quæ, inquit Angelicus Doctor, est potior unione ad alium; unde sicut unitas est principium unionis, ita amor, quo quis diligit seipsum, est forma & radix amicitiae, in hoc enim amicitiam habemus ad alios, quod ad eos nos habemus sicut ad nos ipsos.* Atque ex his patet responsio ad confirmationem.

Q. 2. *Quis hinc censendus est proximus?*

R. Omnis creatura capax beatitudinis supernaturalis, sive sit Angelus, sive homo, justus aut peccator, fidelis, aut infidelis, Hæreticus excommunicatus, Paganus, amicus, aut inimicus; quia hi omnes non solum sunt res Dei, quas propter ipsum, utpote summè dilectum, amare debemus, ut supra diximus; sed insuper amore benevolentiae vocantur à Deo, sicut & nos, in societatem Filii ejus Jesu Christi Domini nostri, ut loquitur Apostolus 1. Cor. 1. v. 9. Ergo spectandi sunt ut nobis proximi, communione non solum ejusdem naturæ, sed præsertim ejusdem hæreditatis æternæ, ac proinde diligendi amore benevolentiae tendentis ad illam unionem, quæ esse debet inter socios, fratres, cohæredes, & membra ejusdem corporis, cujus Caput est



est Christus. Hic autem amor est charitas, ut patet ex dictis.

Dixi, *creatura capax beatitudinis supernaturalis*; ut exciperem dæmones & homines damnatos, hos enim charitate diligere non licet, nec proinde inter proximos reputare, quia charitas est amor amicitiae, quo volumus proximo vitam æternam, & cætera, quæ ad eam conducere possunt: atqui non licet velle damnatis vitam æternam; ejusmodi quippe amor repugnaret charitati erga Deum, qua approbamus ejus justitiam. Ita S. Thomas qu. 25. art. 11.

Dices 1. Angeli non sunt ejusdem nobiscum naturæ: Ergo non possunt haberi tanquam nostri proximi charitate diligendi.

Nego consequentiam; Quia amor amicitiae non tam fundatur in communione naturæ, quam bonorum spiritualium, alioquin nec Deum charitate diligeremus.

Dices 2. peccatores sunt Dei inimici, & ei invisī, juxta illud Sap. 14. v. 9. *Odio sunt Deo impius & impietas ejus*; Ergo cum charitas non efficiat unius spiritus & voluntatis cum Deo, peccatores ut inimicos odisse debemus exemplo Davidis, qui Psalm. 118. ita cecinit, *iniquos odio habui*; & Psal. 138. *perfecto odio oderam illos, & inimici facti sunt mihi*. Quin Psal. 9. extrema ipsis imprecans ait: *convertantur peccatores in infernum*.

Distinguo ant. Peccatores sunt Dei inimici, & ei invisī quatenus peccatores & ratione malitiae, Concedo: impius v. gr. fabricator idoli, & idolum ab ipso fabricatum Deo sunt odio; de iis enim agitur cit. cap. 14. Sapientiae: sunt Dei inimici, & ei invisī secundum naturam, Nego

anteced. Dilexit enim nos cum adhuc peccatores essemus, nunquid voluntatis meae est mors impii, dicit Dominus Deus, & non ut convertatur à viis suis, & vivat? Ezech. 18. v. 23.

Distinguo similiter conseq. Odisse debemus peccatoris iniquitatem & malam voluntatem, Concedo: personam, Nego conseq. *Iniquus homo*, inquit S. Auguſt. Lib. 19. contra Faustum cap. 14. *in quantum iniquus est, odio habendus est: in in quantum autem homo est, diligendus est, ut illud quod rectè odimus arguamus, id est, vitium, quod possit illud quod ideo rectè diligimus, id est, humana ipsa natura, emendato vitio liberari.* Eadem docet S. Thomas qu. 25. art. 6. his verbis: *Secundum naturam suam sunt ex charitate diligendi (peccatores) secundum culpam, qua Deo adversantur, sunt odiendi quicunque peccatores, etiam pater & mater & propinqui, ut habetur Luc. 24. . . . & hoc est verè ex charitate diligere propter Deum.* Addit in responsione ad 2. hanc fuisse doctrinam Philosophorum Gentilium, *amicis peccantibus, sicut Philosophus dicit in 9. Ethicor. non sunt subtrahenda amicitiae beneficia, quousque habeatur spes sanationis eorum, sed magis est auxilium dandum (scilicet fraterna correptione) ad recuperationem pecuniae, si eam amisissent, quanto magis virtus est magis amicitiae affinis, quam pecunia?* In responsione autem ad tertium, scribit illud Psalm. 9. *Convertantur peccatores in infernum*, intelligendum vel per modum praedictionis rei futurae: vel si per modum imprecationis, eam referendam ad remotionem, quippe non ad ipsam poenam, ut scilicet peccata destruantur, & homines remaneant, vel è vivis auferantur, si emendari nequeant, & in infernum, hoc est juxta multos Interpretes, in sepulchrum detrudantur.

Dices 3.

Dices 3. excommunicati abscissi sunt à Corpore Christi, à communione Fidelium separati, pro eis orare non licet, nec Ave eis dicere, Epist. 2. Joan. vers. 10. Ergo inter proximos non sunt numerandi, nec charitate diligendi.

Nego conseq. Quia excommunicatio est pœna medicinalis ordinata ad salutem excommunicati, ut patet ex Apostolo 1. Corinth. 5. Ubi scribit se incestuosum tradidisse *Satanæ in interitum carnis, ut spiritus salvus sit in die Domini nostri Jesu Christi.* Et 2. Thessal. 3. Postquam præcepit Fidelibus, ut se subtrahant ab omni Fratre ambulante inordinate, statim subdit vers. 15. *Et nolite quasi inimicum existimare, sed corripite, ut fratrem.* Sed charitas Apostoli in incestuosum à se excommunicatum, & postea pœnitentem maximè elucet 2. Corinth. cap. 2. Ubi pro illo intercedit apud Cor. ut suo exemplo confirment illum in charitate, *ne fortè, inquit, abundantiori tristitia absorbeat.* Quin ipsemet Dominus, interrogatus Luc. 10. quis sit noster proximus; Samaritanum Judæis invisum, & à Synagoga excommunicatum appellavit, ut innueret omnem omninò hominem habendum, ut proximum. Et S. Augustinus Epist. 155. aliàs 52. ad Macedonium, referens illud Comici ethnici (Terentii) *homo sum, humani nihil à me alienum puto* scribit huic sententiæ theatra tota, plena stultis indoctisque applausisse. *Ita, inquit, omnium affectum naturaliter attingit societas humanorum animorum, ut nullus ibi hominum nisi cujuslibet hominis proximum se esse sentiret.* Ecclesia quidem prohibet ne nomina excommunicatorum in publicis precibus recitentur, eosque removet à Fidelium societate, tam in civilibus, quàm in spiritualibus,

sed ut utiliter confundantur, tandemque contumacia deposita, humiles resipiscant per gratiam Dei, quam Fideles ipsis privatim precari non cessant. Sed de excommunicatione alibi.

Dices 4. dæmones & alii damnati, sunt res Dei: Ergo debemus illos charitate diligere.

Distinguo consequ. cum S. Thoma cit. art. 11. debemus diligere eos amore, quo concupiscimus amico amplam messem, animalium domesticorum incolumitatem, Concedo: amore benevolentiae & amicitiae, Nego consequ. quia ejusmodi amore adversaremur Deo; *naturam dæmonum* inquit S. Doctor, *etiam ex charitate diligere possumus, in quantum scilicet volumus illos spiritus in suis naturalibus conservari ad gloriam Dei.*

Quæ cum ita sint, manifestum est, nullius virtutis objectum materiale tam latè patere, quam objectum charitatis. Omnes quippe aliae virtutes & artes versantur circa determinatam materiam, misericordia circa sublevandam pauperis miseriam, Theologia circa conclusiones ex propositionibus revelatis deducibiles, ars fabrilis circa lignum, aut ferrum; quæ materia cum desit aliquando, ejusmodi virtutes ferriari necesse est. Sed non sic charitas; quia præsto est illi semper materia, in qua exerceatur; omnia quippe, solo peccato excepto, in Dei gloriam tanquam in bonum dilecti referri possunt ac debent. Hanc divinam artem noverat, qui ad Philip. cap. 4. scripsit, *scio & humiliari, scio & abundare (ubique & in omnibus institutus sum) & satiari, & esurire.*

Dixi, solo peccato excepto; quia cum peccatum sit malum Dei, charitas illud summè refugit, nedum



dum eo utitur ad opera sua, v. gr. mendacio ad vitandas rixas, motivo superbiæ aut cupiditatis ad acuendos ignavi animos, &c.

Q. 3. *Quodnam est objectum formale charitatis?*

R. Est Deus quatenus infinite bonus, seu est infinita Dei bonitas, qua redditur infinite amabilis. Nomine autem bonitatis intelliguntur infinitæ Dei perfectiones, ut supra monuimus; quia bonum & perfectum sunt unum & idem, res eò est bona, quò in se perfecta, & eò est melior aut optima, quò est perfectior aut perfectissima.

Probatur autem responsio: quia objectum formale virtutis est motivum, seu ratio formalis sub qua virtus tendit in suum objectum materiale: objectum formale Fidei v. gr. est divina revelatio per Ecclesiam proposita; quia ratio propter quam fide credimus Religionis Christianæ dogmata, est divina revelatio: atqui tota ratio cur charitate diligimus Deum, nos ipsos, proximum, & res cæteras, est infinita Dei perfectio & bonitas: Ergo infinita Dei bonitas & perfectio in se spectata, est adæquatum objectum formale charitatis.

Minor elucidatur experientia eorum, quæ in civilibus contingunt, atque in exemplum profero patremfamilias ab altero impensè dilectum absque ulla spe commodi temporalis, cum supponatur amans cumulatus honoribus & bonis fortunæ: sed præcisè ob mores ejus candidos, affabilitatem, sapientiam & cæteras animi dotes præclarissimas. Quæro autem, quodnam sit motivum arctissimæ illius amicitiae, quæve diligendi ratio, nisi singularis illa perfectio & bonitas patrisfamilias secundum se spectata? Annon propter eam

charum etiam quidquid ad patremfamilias pertinet, diliguntur liberi & domestici? aliquis eorum iter habeat per urbem, in qua degit amicus, ubi resciverit ille, statim eum accersit, cogitque diversari in propria domo; quin si sit malemoratus filius aut domesticus; & inhonestè se gesserit erga amicum, inde dolet amicus, illum salutaribus monitis emendare satagit, sed non ulciscitur propter patremfamilias: quodsi sanis consiliis non acquiescat, rem totam ad prudentiam patrisfamilias refert, qui si è familia ejiciat domesticum, illius jam ejecti nullam rationem habebit amicus. In hoc exemplo cogita charitatem, qua primariò diligimus Deum, secundariò nos ipsos, proximum, & res omnes ad Deum pertinentes, utpote creatas in ejus gloriam, & intelliges, quomodo infinita Dei perfectio & bonitas sit tota ratio illum & nos & proximum amandi amore amicitiae: illum quidem; quia est ipsamet originalis bonitas: nos verò & proximum; quia illa divina bonitas per communionem aut præparationem bonorum supernaturalium in nobis & proximo relucet tanquam in Filiis Dei & Domesticis. Unde si quis sit à Deo totaliter & absque ulla spe rejectus, ut damnati, nullam habemus ad eum amicitiam; quia in illo non amplius relucet Dei bonitas; quæ est tota amandi ratio.

Nec dicas, bonitatem Dei esse quid extrinsecum nobis ac proximo, proindeque non posse esse rationem nos & illum amandi, cum nihil sit amabile, nisi propter bonitatem, quæ in ipso est. Namque necesse non est, ut objectum formale sit intrinsecum objecto materiali, sed satis est, ut ad illud habeat moralem habitudinem, quod multis patet

patet exemplis , prima veritas revelans v. gr. est intrinseca rebus revelatis , & nihilominus est motivum formale , propter quod illas credimus : æger sanitatis amore diligit acerba remedia : imagines coluntur propter excellentiam archetypi , ad quod referuntur tanquam ad aliquid ipsis extrinsecum. Similiter proximus diligitur propter bonitatem Dei in eo relucentem.

At, inquires, quomodo potest diligi homo nequissimus , crudelis inimicus , qui quovis modo nos perdere nititur ? cum voluntas amore non feratur nisi in objectum apprehensum ut bonum ?

R. Diligi potest quomodo diligimus membrum vitiatum , quod acutissimis doloribus diu noctuque nos cruciat. Nempe distinguimus substantiam inter & vitium doloris causam : substantia est nobis chara & pretiosa utpote pars nostri , quam sanam peroptamus , ideoque contra vitium eam infestans pugnamus , illudque qua vi , qua industria propellere nitimur. Sic Christus caput omnium hominum , cum adhuc peccatores essemus , propter nimiam suam charitatem dilexit nos tanquam propria membra , sed ægra & pessimè affecta ; pretiosissimo Sanguinis sui balsamo morbum , hoc est peccatum , extinguit ; sanitati ; ac justitiæ nos restituit , & ex inimicis amicos accipit , quod longè gloriosius est : nam ex S. Augustino ; multò est optabilius inimicum non habere , quàm ulciscendo vincere. Ita & nos , si charitas & Spiritus Christi habitet in nobis , diligemus fratres : bonos quidem , quia sani sunt , malos autem , ut à vitiis sanentur & boni evadant. Sed utrisque volumus , ut Deus in ipsis sit , & ipsi in Deo.

Ergo mens lumine Fidei illustrata, & igne charitatis succensa, magnum bonum in nequissimo ac inimicissimo homine apprehendit, unde eum diligere possit ac debeat, nempe ordinem quem habeat ad vitam æternam, & bonitatem divinam in eo relucentem & agentem, ut illum ad pœnitentiam adducat, sitque illi sicut & nobis societas cum Patre, & cum Filio ejus Jesu Christo ut dicitur I. Joan. cap. I. Sed maximum illud charitatis incitamentum fugit odio flagrantem, qui ut animo suo indulgeant, mente non revolvunt, nisi incredibilem inimicorum malitiam, propterea que impossibilis ipsis videtur eorum dilectio, nec mirum, quia penes nos non est malum diligere. Unde sibi contradicunt, qui de eo, qui displicuit, dicere solent in ejus contemptum, Christiano more illum amo, sed nihili illum facio. Namque aut nullatenus amant, si prorsus contemnunt; quia illud amabile non est, in quo nulla deprehenditur bonitas, quam æstimemus: aut tanti æstimant, quantum amant. Porro Charitas Christiana est amor longè præstantissimus, ut colligitur ex ejus objecto formali & nos fusè exposuimus in praxi sacramenti Pœnitentiæ Gallice edita ad 5. præceptum Decalogi: ergo qui Christiana Charitate diligit, magni faciat dilectum, necesse est.

Ergo Charitas Theologica est virtus specie una & à cæteris distincta: illa enim virtus est specie una, & à cæteris distincta, quæ unum habet formale objectum nulli virtuti commune: atqui Charitas Theologica unum habet formale objectum, nempe bonitatem divinam in se spectatam, nec objectum illud est illi commune cum altera virtute: Ergo.

Nec



Nec dicas, charitatem vocari à sanctis Patribus, præsertim à S. Augustino, omnem virtutem, adeo ut fortitudo nihil sit aliud, quàm amor fortis, temperantia amor purus, &c. ita enim vocatur, quia nunquam existit sine comitatu omnium virtutum, iis imperat, tribuitque formam & ultimam perfectionem. Denique est omnis virtus imperativè, non elicitivè; hoc est imperat omnium virtutum actus, sed non elicit.

Ergo sicut nulla Fides Theologica remanet in eo, qui contumaciter dissentit vel uni articulo; ita nec Charitas Theologica in eo, qui vel unum proximum, putà inimicum, totaliter excludit à sua benevolentia; quia objectum formale utriusque virtutis est unum simplex ac indivisibile; & tam dissentiens uni articulo, quàm malevolus erga inimicum, sese avertunt à Deo, ille, ut Deus prima veritas est; iste, quatenus Deus est summa bonitas relucens etiam in inimico.

Q. 4. *Amare Deum ob beneficia accepta estne actus Charitatis Theologicæ?*

R. Minimè, sed est actus gratitudinis, nisi illa beneficia spectentur, ut communicationes bonitatis divinæ, quomodo solet apprehendi Incarnatio, Redemptio, Visio beatifica; &c. ut dicitur sequenti responsione, quia charitas, utpote Virtus Theologica, habet Deum ut in se bonum pro objecto formali; gratus autem animus ipsum beneficium, ac proinde numeratur inter virtutes morales. In Justis tamen charitas solet imperare ejusmodi gratitudinis actus; & ita sunt in illis actus charitatis imperati, sed à gratitudine elicti.

Q. 5. *Diligere proximum propter supernaturalia dona, quibus exornatur, vel propter dotes naturales, &c.*

*temporales necessitudines, v. gr. cognationem, affinitatem, &c. estne actus Charitatis Theologicæ?*

R. 1. Dona supernaturalia dupliciter spectari possunt 1. præcisè ut habitus vel actus virtutum à charitate distinctarum, 2. ut participationes divinæ bonitatis. Si amentur primo modo, amor ille non est actus Charitatis Theologicæ, sed illius virtutis, putà fortitudinis, castitatis, quæ placet in proximo; quia ratio seu motivum hujusce amoris non est divina bonitas, sed honestas virtutis, putà fortitudinis, castitatis, quæ delectat in proximo. Sed si amentur secundo modo, quatenus sunt participationes divinæ bonitatis, amor ille est actus Charitatis Theologicæ, cum objectum formale & motivum cur proximus ametur, sit divina bonitas tam copiosè se ei communicans.

R. 2. Dotes naturales, & omnes conjunctiones temporales dupliciter etiam spectari possunt, 1. in ordine supernaturali, & quatenus subserviunt prædestinationi, ut diximus Tractatu de Attributis, ubi de divina prædestinatione. 2. In ordine naturali, quatenus præclaræ dotes & conjunctiones licitæ conferunt ad bonum publicum & felicitatem terrenam. Priori modo sunt objectum Charitatis Theologicæ; in iis quippe relucet infinita Dei perfectio, sapientia, omnipotentia, misericordia, justitia, & quidquid nomine bonitatis intelligitur. Unde sicut amatur optimus paterfamilias in sapienti administratione rei familiaris, in ordine domesticorum & distributione officiorum; ita Deus se præbet amandum ac laudandum in admirabili dispositione universi,

versi, in quo, ut cuncta suavius fortiùsque ad se ultimum finem adduceret, constituit gradus diversos, sed sic inter se connexos, ut sine se invicem stare nequeant, varias distinxit necessitudines per communionem vel ejusdem sanguinis, vel eorundem operum, per quæ homines tam arctè conjuncti se mutuò juvant, & quidem (si Charitas Theologica sit diffusa in cordibus eorum) ut per hujusmodi ministeria temporalia tam ipsi, quàm parentes & focii Deum promereantur. *Quocirca, inquit S. August. Lib. 19. de Civit. Dei cap. 16. etiamsi habuerunt servos justii patres nostri, sic quidem administrabant domesticam pacem, ut secundum hæc temporalia bona, filiorum sortem à servorum conditione distinguerent; ad Deum autem colendum, in quo æterna bona speranda sunt, omnibus domus suæ membris pari dilectione consulerent. Et infra: Qui veri patresfamilias sunt, omnibus in familia sua tanquam filiis ad colendum & promerendum Deum consulunt, desiderantes atque optantes venire ad cœlestem domum, ubi necessarium non sit officium imperandi mortalibus, quia necessarium non erit officium consulendi jam in illa immortalitate felicibus, quò donec veniatur, magis debent patres quòd dominantur, quàm servi tolerare quòd serviunt.*

Posteriori modo spectata dona naturalia & temporales conjunctiones, nempe quatenus conferunt ad felicitatem terrenam, non sunt objectum Charitatis Theologicæ, nec ullius veræ virtutis, quemadmodum S. August. scribit Epist. 155. aliàs 52. ad Macedonium virum potentem, & in Republica strenuè agentem. *Si omnis prudentia tua, inquit, qua consulere conaris rebus humanis, si omnis fortitudo, qua nullius iniquitate adversante terreris,*  
*si omnis*

*si omnis temperantia , qua in tanta labe nequissimæ consuetudinis hominum te à corruptionibus abstines , si omnis iustitia qua rectè judicando sua cuique distribuis , id laborat , id nititur , ut hi , quibus vis , bene sit , salvi sint corpore . . . . . ita non erunt veræ virtutes tuæ , sicut nec istorum beatitudo.*

## CAPUT III.

### De Necessitate Charitatis.

**C**ertum est 1. charitatem habitualement esse necessariam necessitate medii; illud enim est necessarium necessitate medii, sine quo salus obtineri nequit; atqui sine charitate habituali salus obtineri nequit; cum sine ejus infusione non remittatur peccatum.

Certum est 2. charitatem actualem non esse necessariam in parvulis, qui licet non sint capaces ullius actus, per Baptismum tamen fiunt immaculati, Deo dilecti, ita ut nihil eos ab ingressu cœli remoretur; ut docet Concilium Tridentinum Sess. 5. Can. 5.

Quæstio esse potest duntaxat de adultis, an scilicet charitas actualis sit ipsis necessaria, necessitate medii. In hypothesi quod adultus justificari possit per Sacramentum Baptismi vel Pœnitentiæ absque prævio motu charitatis: charitas actualis non erit necessaria necessitate medii absolute loquendo, sed ad summum necessitate præcepti; nam contingere potest, ut attritus necdum incipiens Deum diligere, baptizetur aut absolvatur in extremis, cum jam compos non sit rationis, & statim decedat, sicque in illa hypo-



hypothefi falutem confequatur fine prævio motu charitatis. Sed illa difficultas commodius difcussietur, ubi de Sacramento Pœnitentiæ. Quare expendemus hîc duntaxat; an charitas actualis fit adultis neceffaria neceffitate præcepti.

Cùm autem charitas ex dictis verfetur circa Deum & proximum, agendum eft diftinctis Paragraphis de præcepto amoris Dei, & de præcepto amoris proximi.

## §. I.

*De Præcepto amoris Dei.*

Q. 1. *Extatne præceptum divinum amoris Dei?*

R. Affirmativè.

Probatur 1. ex Scriptura Deut. 6. verf. 5. & 6. *Diliges Dominum Deum tuum ex toto corde tuo, & ex tota anima tua, & ex tota fortitudine tua; eruntque verba hæc, quæ ego præcipio tibi hodie, in corde tuo.* Matth. 22. verf. 38. Chriftus laudans illud præceptum, ait: *Hoc eft maximum & primum mandatum.*

Probatur 2. ex Traditione, quam sancti Patres una voce testantur. S. Aug. Lib. 1. Conf. cap. 5. Deum fic alloquitur: *Quid tibi fum ipfe, ut amari te jubeas à me, & nifi faciam, irasceris mihi; & mineres ingentes miferias? Parvane ipfa eft, fi non amem te?* Ecclefia in adminiftratione Baptifmi hætenus illud præceptum tanquam Vitæ Chriftianæ fummam propofuit: *fi vis ad vitam ingredi, ferva mandata: Diliges Dominum Deum tuum ex toto corde tuo.* Unde meritò Alex. VIII. anno 1690. & Clerus Gallicanus anno 1700. tanquam hæreticam proferipferunt hanc propofitionem: *Sufficit ut actus moralis tendat in finem ultimum interpretativè:*  
buns

bunc homo non tenetur amare, neque in principio, neque in decursu vitæ moralis.

Probatur 3. ratione, quam urget S. Thomas qu. 44. art. 1. *Per se quidem, inquit, debitum est in unoquoque negotio id quod est finis; quia habet rationem per se boni. Propter aliud autem est debitum id quod ordinatur ad finem: sicut medico per se debitum est, ut sanet: propter aliud autem, ut medicinam det ad sanandum. Finis autem spiritualis vitæ est, ut homo uniatur Deo, quod fit per charitatem, & ad hoc ordinantur sicut ad finem, quæ pertinent ad spiritualem vitam (putà alia præcepta) . . . in quolibet autem genere id quod est per se, potius est eo, quod est propter aliud, & ideo maximum præceptum est de charitate.*

Q. 2. *Quandonam obligat præceptum amoris Dei?*

Nonnulli Theologi Moderni in hac materia abierunt in absurdas & scandalosas sententias. Prima eorum propositio fuit, *præceptum amoris Dei per se tantum obligat in articulo mortis.* Secunda, *probabile est ne singulis quidem rigorosè quinquenniis per se obligare præceptum charitatis erga Deum.* Tertia, *an peccet mortaliter, qui actum dilectionis Dei semel tantum in vita eliceret, condemnare non audemus.* Quarta, *tunc solum obligat, quando tenemur justificari, & non habemus aliam viam, qua justificari possimus.* Via autem, qua justificari possumus sine dilectione Dei in opinione illorum Theologorum, est Sacramentum Pœnitentiæ, cujus auxilio immunes nos putant à præcepto charitatis. Sed ejusmodi propositiones jam proscriptas partim ab Academia Parisiensi anno 1665. partim à Summo Pontifice Innocentio XI. anno 1676. Clerus Gallicanus declaravit anno 1700. scandalosas, perniciosas, piarum aurium offensivas, impias, primum & summum

man-

datum irritum facientes, atque Evangelicæ Legis spiritum extinguentes. Quare ad propositam quæstionem

R. 1. Præceptum amoris Dei quàm sæpissimè obligat, atque semper enitendum est ad ejus observationem.

Probatur 1. ex Scriptura Deut. 6. *Diliges Dominum Deum tuum, &c. eruntque verba hæc, quæ ego præcipio tibi hodie, in corde tuo: & narrabis ea filiis tuis (notent parentes) & meditaberis in iis sedens in domo tua & ambulans in itinere, dormiens, atque consurgens. Et ligabis ea quasi signum in manu tua, eruntque & movebuntur inter oculos tuos, scribesque ea in limine & ostiis domus tuæ.*

Probatur 2. ex S. Augustino, præfatione in Psal. 31. *Dilectio, inquit, vacare non potest. Et in Psalm. 121. habet omnis amor vim suam, nec potest vacare amor in anima amantis: necesse est ut ducat. Illud in se sentit & experitur omnis amans: Sed vis nosse qualis amor sit? vide quò ducat. Non ergo monemus ut nihil ametis (quod est impossibile) sed ne mundum ametis. Obligata enim anima amore terreno, quasi viscum habet in pennis, volare non potest; mundata verò ab affectibus sordidissimi sæculi, tanquam extensis pennis, & duabus alis resolutis ab omni impedimento, id est, duobus præceptis dilectionis Dei & proximi volat. Quò nisi ad Deum ascendens volando, quia ascendit amando? Hinc Apostolus 1. Tim. 1. veram charitatem dicit ex corde puro; conscientia bona, & fide non ficta; quia, interprete S. Thoma qu. 44. art. 1. Cor impurum abstrahitur à Dei dilectione, propter passionem inclinantem ad terrena. Conscientia verò mala fecit horrere divinam justitiam propter timorem pænæ: Fides autem ficta trahit affectum in id, quod de Deo fingitur, separans à Dei veritate.*

Proba-

Probatur 3. Iis omnibus momentis, quibus probavimus Tract. de Actibus humanis, pag. 92. hominem teneri omnes actiones suas ad ultimum finem referre, saltem intentione virtuali. Quid sit autem illa intentio virtualis, & quomodo in nobis continuò manere ac operari possit, latè exposuimus eodem Tract. de Actibus humanis, pag. 43. & seq.

Confirmatur: quamdiu mortalem hancce vitam vivimus, viatores sumus tendentes ad patriam cœlestem; ergo semper progredi necesse est: *Ibunt*, inquit regius Psalter Psal. 83. *de Virtute in Virtutem*: qui enim in via subsistit, nec ultra vult progredi, viator esse desinit, & perseverantiam ipsi convenientem amittit. Quies in termino est perseverantia comprehensoris; & quamdiu inde non recedit, perseverare dicitur; contra verò perseverantia viatoris est continuus progressus, adeò ut si amplius ambulare nolit, quamvis non deserat viam, pro viatore tamen non sit habendus; nec patriam defectu perseverantiæ consecuturus. Unde illud effatum apud sanctos Patres, in via Domini nolle progredi, deficere est: *Minimè pro certo est bonus*, inquit S. Bernardus Epist. 91. *qui melior esse non vult; & ubi incipit nolle fieri melior, ibi etiam desinit esse bonus*. Atqui imus ad Deum, inquiebat supra S. Augustinus, non ambulando, sed amando. Et qui plus diligit velociùs currit, & citiùs apprehendit: Ergo.

R. 2. Theologi definiunt certa tempora, quibus præsertim eliciendi sunt actus amoris Dei.

Primò, initio usus rationis, cùm jam homini liberum est vel ad Deum, vel ad creaturam se convertere: *Creaturæ quippe rationali*, inquit S. Fulgentius,



gentius, Lib. 1. de Fide cap. 17. *alia beatitudo non potuit, nec potest esse, nec poterit, nisi ut agnoscens à quo non solum facta, sed etiam à quo rationalis facta est, majorem dilectionem exhibeat bono Creatori, quam sibi. Neque enim ei inesse posset ullatenus ratio, nisi ei posset Creatoris inesse dilectio, quia nec est alia, quæ vera sit sapientia, vel intelligentia creaturæ rationalis, nisi dilectio Creatoris.* Et S. Thomas 1. 2. qu. 89. art. 9. ad 3. sic habet: *Ab aliis peccatis mortalibus potest puer incipiens habere usum rationis, per aliquod tempus abstinere; sed à peccato omissionis prædictæ (amoris Dei) non liberatur, nisi quàm citò potest, se convertat ad Deum. Primum enim quod occurrit homini discretionem habenti, est quòd de ipso cogitet, ad quem alia ordinet sicut ad finem: finis enim est prior in intentione, & idèd hoc est tempus, pro quo obligatur ex Dei præcepto affirmativo, quo Dominus dicit: Convertimini ad me, & ego convertar ad vos, Zach. 17. vers. 1. Plures tamen Theologi putant ignorantiam in illo crepusculo luminis naturalis posse pueros aliquandiu excusare.*

Secundò, præceptum amoris Dei maximè obligat in vitæ exitu; veniente enim sponso, virgo prudens lampadem suam accendere debet, & ei obviam exire ardentissimo quo possit amore, cupiens esse cum Christo, & vitam suam ei sincerè offerens in sacrificium. Hinc est, quòd Pastores juxta Ecclesiæ disciplinam, actus fidei, spei, & charitatis à decumbentibus exigere soleant.

Tertiò, eliciendi sunt actus amoris Dei cùm tentationibus pulsamur, advertimusque charitatem in nobis tepescere, & animam nostram amore sui, vel rerum terrenarum prægravatam exci-

dere à sua rectitudine; tum enim maximè desiderio spirituali erigenda est exemplo illius, qui in simili periculo dicebat: *Ad te Domine levavi animam meam*, Psal. 24. Ne scilicet carnalibus desideriis conculcaretur.

Quartò, si eam orandi formulam, quam distavit ac præcepit Magister noster, tenemus, toties actus amoris Dei elicere debemus, quoties Orationem Dominicam, ad quam cæteræ reduci debent, ex S. Augustino, lingua proferimus: nisi enim interni affectus animi verbis nostris respondeant, verè illud Matth. 15. in nos contorquebitur; *Populus hic labiis me honorat, cor autem eorum longè est à me; sine causa autem colunt me*. Quid enim lingua nostra exprimit dicendo, *sanctificetur nomen tuum*, nisi nos ante omnia expetere Dei gloriam? *Id petimus*, inquit Tertullianus Lib. de Oratione cap. 3. *ut sanctificetur in nobis, qui in illo simus: simul & in cæteris, quos adhuc gratia Dei expectat*. Qui sonant illa verba: *fiat voluntas tua sicut in cælo & in terra?* Audi S. Cyprianum de Oratione Dominica: *Voluntas Dei est, inquit, quam Christus & docuit & fecit . . . Deum toto corde diligere, amare in illo quod Pater est, timere quod Deus est, Christo nihil omninò præponere; quia nec nobis ille quicquam præposuit, charitati ejus inseparabiliter adhærere, cruci ejus fortiter, ac fidenter assistere, quando de ejus nomine & bonore certamen est*. Quid exterius profite-mur, cum dicimus: *Credo in Deum Patrem omnipotentem, & in Jesum Christum Filium ejus unicum Dominum nostrum?* Respondet sanctus Augustinus Tract. 29. in Joannem, *credendo amare, credendo diligere; credendo in Deum ire*. Ne ergo simus ex illis, de quibus scriptum est Psalm. 80. *inimici Domini*

*Domini mentiti sunt ei, necesse est, ut is affectus sit in nobis, quem exterius lingua nostra exprimit.*

Q. 3. *Modus diligendi Deum, scil. ex toto corde, ex tota mente, &c. caditne sub præceptum?*

R. Cadit; quia tum cadit modus sub præceptum, cum actus præceptus poni nequit sine illo modo; sic attentio & devotio v. g. quæ sunt modi orationis, simul præcipiuntur cum ipsa oratione; quia verba prolata absque ulla attentione & pietatis affectu, non sunt oratio: atqui amor, quo aliquis Deum non plus diligeret, quam seipsum aut aliam creaturam, non esset amor Dei: quia amor Dei essentialiter est unio & adhæsiō ad Deum tanquam ad ultimum finem, ad quem omnia referuntur: qui autem seipsum, aut aliam creaturam plusquam Deum diligit, se ipsum, aut illam creaturam constituit pro ultimo fine: si autem supponatur quod æqualiter tantum se aut illam creaturam diligit: vel supponitur eum sibi constituere duos fines ultimos, quod repugnat secundum omnes Philosophos; vel saltem Deum non habebit pro ultimo fine, cum nolit seipsum ad illud referre, ac proinde non adhærebit illi tanquam suo ultimo fini, quemadmodum in politicis, qui Imperatori alterum vel præponeret, vel æquaret, Dominum suum honore debito fraudaret, ac læsæ Majestatis reum se constitueret. Ergo amor Dei essentialiter debet esse ex toto corde, ex tota mente, &c. ac proinde ille diligendi modus cadit sub primum Legis præceptum. Effatum itaque Theologorum, *modus præcepti non cadit sub præceptum*, non extenditur ex S. Thoma 2. 2. quæst. 44. art. 1. ad 1. nisi ad præcepta de virtutibus à charitate distinctis: *Putà,*  
Z z 2
inquit,

inquit, *sub hoc præcepto, honora patrem tuum & matrem tuam, non cadit quòd hoc ex charitate fiat.*

Q. 4. *Quid est diligere Deum ex toto corde, ex tota mente, ex tota anima, & ex tota fortitudine, seu ex totis viribus?*

R. Alii aliter hujusce præcepti terminos interpretantur.

Apud S. Thomam q. 43. art. 1. cor est voluntas; quia sicut cor est principium vitæ naturalis; ita voluntas actuum humanorum, & totius vitæ moralis: mens est intellectus; anima pars inferior, quæ complectitur sensus tum exteriores, tum interiores, & appetitum sensitivum cum omnibus ejus passionibus; quia spiritus rationalis dicitur anima ab animando, & quatenus est forma corporis organici, efficitque vitam animalem; spiritus verò per ordinem ad Deum & objecta spiritualia; fortitudo denique est facultas motrix, seu, ut loquitur S. Thomas, facultas executiva operum exteriorum, quæ imperat voluntas. Igitur juxta Angelicum Doctorem, Deum diligimus, 1. ex toto corde, quando tota nostra intentio fertur in Deum, 2. ex tota mente, quando in omnibus rationes æternas consulimus, & ad lumen fidei cuncta expendimus, ita ut simus cum Deo unius sententiæ sicut & unius voluntatis, quemadmodum contingit in amicis arctissimo amicitiae vinculo conjunctis. 3. Ex tota anima, cum sensuum motus & passionibus appetitus juxta Dei beneplacitum dirigimus, vigilamus, ne ferantur ad illicita & vana, & ubi inordinatè rationem præveniunt, resistimus. 4. Ex tota fortitudine, seu tota virtute, & totis viribus, qui sunt termini synonymi, cum ob Dei amore



morem nec labor, nec difficultas nos deterrent ab externis operibus.

S. Bernardus Serm. 20. in Cant. sic exponit illud præceptum, ut velit mentem & animam unum & idem significare. *Mibi videtur, inquit, amor quidem cordis ad zelum quendam pertinere affectionis: animæ verò amor ad industriam seu iudicium rationis, virtutis autem dilectio ad animi posse referri constantiam, vel vigorem. Dilige ergo Dominum Deum tuum toto & pleno cordis affectu: dilige tota rationis vigilantia & circumspeditione: dilige & tota virtute, ut nec mori pro ejus amore pertimescas. Sit suavis & dulcis affectui tuo Dominus Iesus, contra malè utique dulces vitæ carnalis illecebræ, & vincat dulcedo dulcedinem, quemadmodum clavum clavus expellit. Sed sit nihilominus intellectus prævia lux & dux rationi, non solum ob cavendas hæreticæ fraudis decipulas, & fidei puritatem ab eorum versutiis custodiendam, verum, ut cautus quoque sis nimiam & indiscretam vehementiam in tua conversatione vitare. Sit etiam fortis & constans amor tuus, nec cedens terroribus, nec succumbens laboribus. Tres illos divini præcepti gradus exhibet in Apostolis. Primum quidem cum contristarentur ob imminentem Magistri discessum; Diligebant dulciter, sed minus prudenter: diligebant carnaliter, sed non rationabiliter. Secundum, cum Petrus jam correctus, audito verbo, non sapis quæ Dei sunt, Matth. 18. promisit se cum Magistro moriturum, erat tota anima doctus diligere, sed adhuc infirmus; bene instructus; sed martyrii pavidus. Necdum ergo ad tertium pervenerat gradum, in quo virtute tota diligitur. Tum demum tertio illo modo dilexit, cum indutus virtute ex alto vitam suam exposuit: Ergo non abduci blanditiis,*

*ditiis, nec seduci fallaciis, nec injuriis frangi: toto corde, tota anima, tota virtute diligere est. Quamobrem disce amare dulciter, amare prudenter, amare fortiter.*

S. Augustinus Lib. 1. de Doctrina Christiana, cap. 22. paulò aliter accipit ejusdem præcepti vocabula, nimirum totius cordis nomine intelligit omnes cogitationes, juxta illud Marci 7. v. 21. *De corde hominum malæ cogitationes procedunt; & nomine totius animæ omnem vitam; Diliges, inquit, Deum ex toto corde, & ex tota anima, & ex tota mente, ut omnes cogitationes tuas, & omnem vitam, & omnem intellectum in illum conferas, à quo habes ea ipsa quæ confers.*

Sed quantumlibet varia sit acceptio horum vocabulorum, una est omnium sententia hocce divino præcepto ab homini exigì, ut ex toto se Deum diligat: Cum autem ait *toto corde, tota anima, tota mente, nullam vitæ nostræ partem relinquit, quæ vacare debeat, & quasi locum dare, ut alia se velit frui; sed quidquid aliud diligendum venerit in animum, illuc rapiatur, quò totius dilectionis impetus currit . . . . . quæ nullum à se rivulum duci extra patitur, cujus derivatione minuatur.* S. Augustinus cit. c. 21. Lib. de Doctr. Christ.

Dices: Deus impossibilia non jubet: atqui impossibile est Deum sic diligere: Ergo admitti non debet allata expositio.

Concessa majore, distinguo minorem, impossibile est Deum sic diligere perfectè, Conc. Sic diligere imperfectè & quantum fert hujusce status conditio, Nego minor. Qui enim dicit, *diliges ex totis viribus, nihil exigit ultra vires.*

Insta-

**Instabis :** atqui ea est voluntas cujuslibet Legislatoris, ut lex illius perfectè impleatur; longè enim absurdissimum est dicere, vel etiam cogitare non esse ex mente Legislatoris, ut leges ab eo sancitæ servantur accuratè: Ergo Deus, utpotè Legislator sapientissimus, nullam ferre potest legem, quæ perfectè & accuratè servari nequeat. Ex concessis autem præceptum, de quo est sermo, perfectè impleri non potest eo quo expositum est modo: Ergo hujusmodi expositio non est genuina, nec ad sensum litteræ.

Distinguo subsumptum; ut lex ejus perfectè impleatur quantum subditorum facultas patitur, Conc. Ultra quàm patitur, Nego subsumptum; Omnis quippe vera lex tendit in bonum commune subditorum; vergeret autem in evidentem eorum perniciem, si esset ipsis jugum intolerabile.

Distinguo similiter consequens; Deus nullam ferre potest legem, quæ perfectè servari nequeat perfectione propria hujusce status naturæ corruptæ, Conc. Perfectione, quæ speratur in patria cœlesti, Nego consequentiam.

Duplex itaque est charitatis perfectio, altera patriæ, altera viæ. Illa est in omnimoda plenitudine; quia nulla ibi pugna, quæ dividat animam à seipsa, nulla lex in membris repugnans legi mentis, sed prorsus toto corde, tota anima, tota mente Beati adhærebunt Deo. Ista verò in progressu & conflictatione, similis est perfectionis, sive viatoris, qui celeri & recto cursu ad patriam properat; sive militis, qui anhelans ad victoriam strenuè dimicat; nam ex S. Augustino Libro de Perfectione Just. cap. 8. *Cum est adhuc aliquid carnalis concupiscentiæ, quod vel continendo frænatur, non omni*

*modo ex tota anima diligitur Deus : non enim caro sine anima concupiscit , quamvis caro concupiscere dicatur , quia anima carnaliter concupiscit , sicque divisa , totaliter in Deum ferri non potest.*

Prima perfectio proponitur , ut finis & merces , ad quam tendere nos oportet : secunda præcipitur ut opus , quo promereamur tantum præmium. Finis autem præcisè sumptus , inquit S. Thomas q. 44. art. 6. præcipi non solet , sed proponi , Imperator exercitus v. g. militibus propriè non imperat ut victoriam reportent , sed ut fortiter & legitime pugnent , quo victores evadant : nec Magister Scholæ præcipit discipulis , ut scientia excellent , sed ut diligenter studiis incumbant. Unde nec miles , nec discipulus tenentur culpa : ille si victor non extiterit ; iste , si scientia cæteros non superet ; modò uterque partes suas impleverit , ille acriter pugnando , iste ad scientiam omnem operam suam conferendo.

Igitur perfectio viæ , quæ præcipitur , & ad quam assequendam Deus misericorditer nos adjuvat , in eo consistit , ut concupiscentiæ , quæ habitat in membris nostris , & reluctatur menti nostræ , ad nullum opus malum vel facti , vel dicti , vel cogitati , ut loquitur sanctus Augustinus , consentiamus , corpus castigando in servitutem redigamus , membra nostra exhibeamus servire justitiæ : ad anteriora extendentes nosmetipsos ; qui enim sic sapiunt , hos Apostolus perfectos pronuntiare non dubitat , Philipp. 3. vers. 13. *Quicumque , inquit , perfecti sumus , hoc sentiamus.* Sed observat sanctus Augustinus , quòd idem ipse Apostolus , qui se perfectis hìc annumerat , paulò ante dixerit vers. 12. *non quòd jam acceperim , aut jam*  
*perfe-*



*perfectus sim, quæ contradictoria viderentur, nisi intelligeretur Apostolus hic loqui de perfectione patriæ, ad quam seipsum extendebat, quia ibi ipsa dilectio, inquit S. August. Lib. de Spir. & Litt. c. 36. non solum supra quam hic habemus, sed longè supra quam petimus, & supra quam intelligimus, erit, nec idèd tamen plus esse poterit, quàm ex toto corde, ex tota anima, ex tota mente; neque enim restat in nobis aliquid, quod addi possit ad totum. Ad hanc autem perfectionem & felicitatem anhelans Apostolus, priori loco dicebat, sequor autem, si quo modo comprehendam, quod pertinet ad perfectionem viæ: quicunque enim tam strenuè currunt, hos Apostolus posteriori loco dicit perfectos, ut qui Deum diligant ex toto corde, ex tota anima, & ex tota mente, quatenus scil. nullam sequuntur cupiditatem, sed contendunt in dies ad maiorem charitatem: Ac per hoc, inquit S. Augustinus cit. loc. quantum mihi videtur, in ea, quæ perficienda est, justitia multùm in hac vita profecit, qui quàm longè sit à perfectione justitiæ proficiendo cognovit.*

Porro ista, quæ nobis præcipitur, dilectionis perfectio impossibilis non est; quia etsi omnia peccata venialia collectivè sumpta declinare nequeamus; singula tamen distributivè vitare possumus ac debemus, ut diximus Tract. de Gratia c. 5. §. 3. Sic ergo curramus, ut comprehendamus, omnes enim qui rectè currunt comprehendunt: non sic in agone theatro, omnes quidem currunt, sed unus accipit palmam. Curramus credendo, sperando, desiderando; curramus corpus castigando, & eleemosynas in nobis dandis malisque ignoscendis bilariter & ex corde faciendo, & currentium vires, ut adjuventur orando; & sic audiamus præcepta perfectionis, ne currere negligamus ad plenitudinem charitatis, sanctus Augustinus Lib. de Perf. Just. cap. 8.

## §. II.

## De Præcepto amoris proximi.

Q. I. *Extatne præceptum divinum eliciendi actus amoris proximi?*

Negarunt quidam Recentiores hisce propositionibus. Prima, *non tenemur proximum diligere actu interno & formali*. Secunda, *præcepto proximum diligendi satisfacere possumus per solos actus externos*. Tertia, *præceptum affirmativum amoris Dei & proximi non est speciale, sed generale, cui per aliorum præceptorum adimplentionem satisficit*.

Verum duæ priores propositiones damnatæ sunt ab Innocentio XI. anno 1679. & tertia ab Academia Parisiensi anno 1665. ac demum à Clero Gallicano anno 1700. ut falsa, erronea, impia. Quare

R. Præcepto divino tenemur diligere proximum interno amore amicitiae.

Probatur ex Scriptura, Matth. 22. *Diliges proximum tuum sicut teipsum*. Quæro autem ad Adversariis quomodo seipfos diligant? An externo duntaxat amore? Joann. 15. *Hoc est præceptum meum, ut diligatis invicem, sicut dilexi vos*. Quis autem nesciat Christum nos dilexisse interno amore amicitiae? Propterea Joan. 17. vers. 21. vult ut omnes, sive dominus, sive famulus & mancipium, sive bello victor, sive captivus, unum sint ad invicem. Et cap. 13. vers. 25, dicit hanc fore notam, qua veri Christiani secernantur à Philosophis Ethnicis, qui virtutem colere profitebantur, *in hoc cognoscent omnes; quia discipuli mei estis; si dilectionem habueritis ad invicem*. Quemadmodum, inquit

inquit S. Chrysostomus, Rex sola purpura distinguitur inter aulicos, qui nonnunquam pretiosioribus vestibus induuntur. 1. Cor. cap. 13. Apostolus ex professo docet externos charitatis actus sine internis non sufficere ad salutem: *Si distribue- ro*, inquit, *in cibos pauperum omnes facultates meas . . . charitatem autem non habuero, nihil mihi prodest.* Notent, qui ita subveniunt necessitatibus famulorum suorum, & aliorum infimæ plebis, ut indignum se judicent iis intimo charitatis affectu conjungi, & esse cum illis cor unum & animam unam, ut legitur Act. 4.

Dices: nullum extat præceptum diligendi seipsum: Ergo non debuit dari præceptum diligendi proximum.

Nego conseq. Disparitas est, quia homo naturaliter diligit seipsum etiam infimum, etiam pessimum, nec in potestate ejus est, ut nolit esse beatus; quin aliquando idè malus est, quia vult esse beatus, beatitudinem suam constituens in voluptatibus, & rerum terrenarum abundantia. Quamobrem frustra daretur illi præceptum diligendi seipsum; sed imprimis eget & doctrina, ut discat in solo Deo sitam esse hominis felicitatem, & præcepto simul ac gratia, quibus suaviter impellatur devium amorem sui ab illicitis revocare (qui enim diligit iniquitatem, odit animam suam,) & totum in Deo colligere: *Quia igitur*, inquit sanctus Augustinus cit. Epist. 155. *nemo nisi Deum diligendo, diligit seipsum; non opus erat, ut dato de Dei dilectione præcepto, etiam seipsum homo diligere deberet, cum in eo diligeret seipsum, quòd diligit Deum.* Sed amor noster non simili impetu in proximum currit, multa in illo, etiam in sanguine conjun-

conjunctissimis, displicent; suntque nobis onera, quæ impatienter ferremus, nisi Lex diceret, *diliges proximum tuum sicut teipsum*. Item, *alter alterius onera portate*. De quo præcepto sic scribit Augustinus Lib. 83. qu. qu. 71. *onera invicem nostra portemus, ut ad eam vitam, quæ caret omni onere, pervenire possimus . . . v. g. iram fratris tui nunc portas, cum adversus eum non irasceris; ut rursus eo tempore, quo te ira præoccupaverit, ille te lenitate & tranquillitate sua supportet. Loquacitatem tuam ille portat; tu illius pertinaciam charitate portare debes, donec illud in te, & illud in illo vitium sanetur, &c.*

Q. 2. *Quid est diligere proximum sicut seipsum?*

Respondet sanctus Thomas quæst. 44. art. 7. pronomen *sicut*, non denotare æqualitatem dilectionis, sed similitudinem; debemus enim nos plus diligere quàm proximum, nec licet nobis peccare etiam venialiter, cum illud necessarium videtur ad impediendum lethale alterius peccatum: prudentes virgines oleum suum cum fatuis partiri noluerunt, sed totum sibi servarunt, ne omnibus non sufficeret, Matth. 25. *Concha imitetur fontem*, inquit sanctus Bernardus Sermone 18. in Cantica, *non manat ille in rivum, nec in lacum extenditur, donec suis satietur aquis*.

Præcipitur itaque secundo Legis præcepto, ut charitas, qua nos ipsos diligimus, sit instar exemplaris, ad cujus similitudinem procedat dirigaturque dilectio nostra erga proximum, quo sensu accipiendum est illud Christi, Matth. 5. *Estote perfecti, sicut Pater vester cælestis perfectus est*. Et illud Genes. 1. *Creavit Deus hominem ad imaginem & similitudinem suam*.

Q. 3. *Unde repetitur ejusmodi dilectionis similitudo?*

R. Ex



R. Ex triplici capite, juxta S. Thomam cit. artic. 7. 1. ex fine & motivo, *ut sit sancta*, 2. ex objecto materiali, seu materia circa quam, hoc est ex iis, quæ volumus proximo, *ut sit justa*, 3. ex principio, seu ex ipso animo benevolo, *ut sit vera*.

Primò igitur, ut proximum diligamus sancta & simili dilectione, qua nos ipsos diligimus, idem sit utriusque dilectionis motivum & finis necesse est. Cum autem nemo nisi diligendo Deum ex toto corde, seipsum diligit, *quod agis tecum*, inquit S. Augustinus, Lib. de Moribus Ecclesiæ cap. 26. *id agendum cum proximo est; hoc est, ut ipse etiam perfecto amore diligit Deum. Non enim eum diligis tanquam teipsum, si non ad id bonum, ad quod ipse tendis, adducere satagis.* Et Serm. 335. aliàs 256. de Tempore: *Ille veraciter amat amicum, qui Deum amat in amico, aut quia est in illo, aut ut sit in illo.* Quin ipsemet Dominus noster vetus illud mandatum cordibus nostris insculptum, *diliges proximum tuum sicut te ipsum*, nova sua interpretatione illustravit, exposuitque quo motivo, quove fine proximum jubemur diligere: *hoc est præceptum meum*, inquit Joan. 15. *ut diligatis invicem sicut dilexi vos.* Quod mandatum expendens sanctus Augustinus Tract. 65. in Joann. sic scribit: *Ipsa est dilectio ab omni mundana dilectione discreta, quam distinguendo addidit Dominus, sicut dilexi vos. Quid enim nisi Deum dilexit in nobis, non quòd habebamus, sed ut haberemus? ut perducatur nos, ubi Deus sit omnia in omnibus . . . . . In hoc cognoscent omnes, quia Discipuli mei estis, tanquam diceret, alia munera mea habent vobiscum etiam non mei, non solum naturam, vitam, sensum, rationem . . . . . verum etiam linguas,*

*guas, sacramenta . . . . . fidem, distributionem rerum suarum pauperibus, sed quoniam charitatem non habent, ut cymbala concrepant, nihil sunt, nihil illis prodest.*

Ergo dilectio proximi, quam Christus præcipit, ex motivo suo sancta est & planè divina, essentialiterque distinguitur ab omni amore temporali, cujus species sanctus Augustinus enumerat Serm. 395. aliàs 38. inter 50. Homil. ubi rejecta nefaria amicitia, quam facit mala conscientia ebriosorum, rapacium, &c. recenset licitos amores, sed temporales, quos Christianus ex præcepto charitatis transcendere debet. Incipit licitus amor à conjugio, inquit sanctus Doctor, sed adhuc carnalis est, ut qui sit communis cum pecoribus; passeris quippe simul ova confovent, simul pullos nutriunt. Secundus amor filiorum est, sed & ipse carnalis; nam leones & serpentes amant filios suos, ac proinde non laudandus, qui amat filios suos, sed detestandus, qui non amat; *Pro magno enim laudaturus sum in homine, quod video in tigride, si non amaveris, à serpentibus vinceris.* Tertius amor est propinquorum, qui si ultra non extenditur, etiam carnalis est, qui enim propinquos amat, adhuc sanguinem suum amat. Quartus est consuetudinis cohabitandi, colloquendi, simul conversandi, ut contristetur homo, quando deseritur ab amico, cum quo solet colloqui. Et ista amicitia, honesta quidem; sed consuetudinis est, non rationis; habent enim illam & pecora: duo equi v. g. manducant simul, desiderant se: *Surgamus adhuc ab ista, inquit sanctus Doctor, est alia superior amicitia, non consuetudinis, sed rationis, qua diligimus hominem propter fidem & mutuum bene-*

*benevolentiam in hac vita mortali. Hac superius quicquid invenerimus, divinum est. Quid autem sit superius, statim aperit. Incipiat homo amare Deum, & non amabit in homine, nisi Deum. Hæc est Christiana proximi dilectio; hoc est præceptum meum, ait Christus, ut diligatis invicem, sicut dilexi vos. Quid autem nisi Deum dilexit in nobis? non ergo diligendus est proximus, inquit sanctus Augustinus, Libro de vera Relig. cap. 46. ut diligunt carnales fratres, vel filii, vel conjuges, vel quique cognati, vel affines, aut cives; nam & dilectio ista temporalis est: Itaque ad pristinam perfectamque naturam nos ipsa veritas vocans, præcipit ut carnali consuetudini resistamus, docens (Luc. 14. vers. 28.) neminem aptum esse regno Dei, qui non istas carnales necessitudines oderit. Neque hoc cuiquam inhumanum videri debet; magis enim est inhumanum non amare in homine quod homo est, sed amare quod vilius est; hoc est enim non in eo amare illud, quod ad eum pertinet, sed amare illud, quod ad se pertinet. Quid ergo mirum, si ad regnum non pervenit, qui non communem, sed privatam rem diligit. . . . Nemo potest perfecte diligere quod vocamur, nisi oderit unde revocamur. . . . Quare oderimus oportet, unde ut liberemur, optamus. Oderimus ergo temporales necessitudines, si æternitatis charitate flagramus. Diligat homo proximum tanquam seipsum; certè enim sibi ipsi nemo est pater, aut filius, aut affinis, aut aliquid hujusmodi, sed tantum homo. Qui ergo diligit aliquem tanquam seipsum, hoc in eo debet diligere quod sibi est. Eadem repetit S. Doctor Lib. 1. de Serm. Domini in Monte cap. 26. Quæ non sic intelligenda sunt, quasi charitas nullam rationem habeat ejusmodi necessitudinum; nam illas ordinat ad Deum, ut dicetur capite sequenti; fed*

sed ostendit duntaxat quo motivo & quo fine nos & propinquos, & cæteros homines diligere debeamus.

Secundò, tum proximum simili amore quo nos ipsos prosequimur, cùm illi eadem quæ nobis volumus, nempe ut Deus in illo sit omnia sicut in nobis, atque ad hunc finem, quantum in nobis est, illum data occasione juvamus, utilia suggerendo, & subministrando, noxia verò amovendo. Quilibet enim amans optat dilectum fieri sibi similem, ipse sibi est amandi regula: amat divitias, mundi honores, voluptates; vult similiter filios, propinquos, & amicos fieri divites, gloria celebres, & facillimè se agere. Tu verò amas justitiam, vis proximum esse justum, amas sub Deo esse, vis & illum esse sub Deo; odisti animam tuam in hoc mundo ut eam custodias in vitam æternam, illum in eundem affectum adducere niteris: *Quomodo ergo, inquit S. Augustinus cit. Serm. 335. amicus hujus sæculi secundum sæculum amans animam suam, febrem vult pellere de amico suo, quem similiter amat ut se propter præsentem salutem; sic tu quemcunque diligis, propter vitam æternam dilige. Cùm inveneris iram, indignationem, odium, iniquitatem, sic coneris exponere morbum animi, quomodo amicus sæculi morbum corporis. Ad hoc enim ama ut facias quod tu es, & erit in te perfecta charitas. Tam enim repugnat charitatem servire aliorum cupiditatibus, quàm veritatem eorum mendaciis, & castitatem libidinibus. Scriptum quidem est Luc. 6. omni petenti te tribue; sed, ut advertit S. Augustinus Lib. 1. de Serm. Domini in Monte cap. 40. non ait omnia petenti te tribue, ut id des quod dare bonestè & justè potes . . . . Id profectò dandum est, quod nec tibi,*  
nec



*nec alteri noceat, quantum sciri, aut credi ab homine potest: & cui justè negaveris quod petit, indicanda est ipsa injustitia, ut non eum inanem dimittas. Ita enim petenti te dabis quamvis non semper id quod petit, dabis, sed aliquando meliùs aliquid dabis, cum petentem injustè correxeris. Quodsi non acquiescat, sed inhumanum te pronunciet, fortè etiam tanquam ingrato collata beneficia exprobret, iram ejus veluti phrenesim sustine, febrienti compatere, nec desieris in illo odisse, quod secundum charitatem in te ipso odisti, & proximum sicut te ipsum diligis.*

Tertiò, ut dilectio erga proximum sit ad similitudinem dilectionis, qua nos ipsos diligimus, procedat oportet ex animo erga eum benevolo; quia ex S. Thoma citat. art. 7. *Cum quis diligit proximum propter suam utilitatem, vel delectationem: non vere diligit proximum, sed seipsum.* Et sanctus Augustinus Libro de vera Religione cap. 46. Si, inquit, *vel ipsum hominem homo dilexerit, non tanquam seipsum, sed tanquam jumentum, aut habitum, aut aviculam pictam, vel garrulam, id est, ut ex eo aliquid temporalis voluptatis, aut commodi capiat, serviat necesse est, non homini, sed quod est turpius, tam fædo & detestabili vitio, quo non amat hominem sicut amandus est. Quo vitio dominante usque ad extremam vitam, vel potius mortem perducitur.*

Atque ex hac explicatione colliges raram admodum esse eam benevolentiae & charitatis dilectionem, quæ nobis præcipitur tum lege naturali: *Diliges proximum tuum sicut teipsum*, tum Legge Evangelica, *hoc est præceptum meum*, (non ait consilium meum) *ut diligatis invicem, sicut dilexi vos.* Namque voluptuosi animo suo obsequun-

tur, dum amant; aleatores v. gr. compotatores, & mulierum amore insanientes non aliter amicis blandiuntur quàm Domino suo catulus, qui benevolentiae capax non est. Bonorum temporalium cupidi in rem suam magnates & beneficos suos colunt. Carnales cognati quod ad se pertinet, in propinquis scilicet suum sanguinem diligunt, ut supra dicebat S. Augustinus. Qui aliorum consuetudine delectantur præcisè, vel propter morum similitudinem, vel propter lucra temporalia, familiaribus suis potius utuntur, quàm eos diligunt. Denique omnes peccatores, ut malè se diligunt, ita & proximum; quia Deum in se & in aliis non diligunt. Quin Apostolus graviter monet beneficos erga pauperes, erogationes eorum non prodesse, nisi ex charitate procedant, ut innuat illud misericordiae opus posse fieri absque proximi dilectione, quam præscribit Lex Evangelica, ut scilicet diligamus invicem, sicut Christus dilexit nos. Unde S. Augustinus Lib. de morib. Ecclesiae c. 26. *Qui ergo diligit proximum, inquit, agit quantum potest, ut salvus corpore, salvusque animo sit; sed cura corporis ad sanitatem animi referenda est. Agit ergo his gradibus quod ad animum pertinet, ut primò timeat, deinde diligat Deum.* Hæc est illa eleemosyna, quæ resistit peccato, sicut aqua extinguit ignem ardentem, Eccl. 3. vers. 33. liberat à morte, Tob. II. vers. 4. & promeretur regnum cælorum, Matth. 25. v. 34.

Q. 4. *Quandonam obligat præceptum dilectionis proximi?*

Nota duplicem vulgò à Theologis distingui amorem, affectivum, scilicet, & effectivum. Amor

Amor affectivus est ipsemet gratuitus voluntatis affectus erga proximum: effectivus verò est effectus hujusce gratuiti affectus, ut eleemosyna. His præmissis,

R. 1. Toties tenemur proximum diligere amore effectivo, & suppetias illi afferre, quoties nobis facultas non deest & ipse indiget. Responsionis ratio patebit ex dicendis de præcepto eleemosinæ, & correctionis fraternæ.

R. 2. Amoris effectivi duplex est præceptum: alterum negativum, quo prohibetur omnis mala affectio erga proximum: alterum affirmativum, quo præcipitur erga eum benevolus animus.

Præceptum negativum obligat semper & pro semper; quia quod est per se malum, semper est prohibitum, nec unquam licet illud velle, aut facere: atqui esse erga proximum animo vel per odium averso, vel indifferenti; ita ut nec in odium, nec in amorem velit moveri, est res per se mala, utpote contraria huic præcepto Legis naturalis, *diliges proximum tuum*; nam ex S. Thomæ præcepta affirmativa eo ipso, quod actus virtutis imperant, actus oppositos prohibent; filius v. gr. qui patrem contemneret, aut indifferenter erga eum ageret, procul dubio peccaret contra illud præceptum, *honora patrem tuum*; ejusque contemptus, aut animus indifferens esset per se malus. Ergo & qui odio in proximum flagrat, & qui est animo erga eum indifferenti, nec vult eum diligere, manet in morte, ut dicitur 1. Joan. 3. vers. 14. Nec est absolutionis capax. Unde Apostolus Rom. 13. vers. 8. *Nemini, inquit, quidquam debeatis, nisi ut invicem diligatis*; hoc est, omnibus debitis vos

liberate , vectigalia solvite , mutuum acceptum refundite , &c. nemini manete debitores, solo debito fraternæ charitatis excepto , quod omnino exolvere non potestis ; quia proximus etiam inimicus semper est diligendus , si non actu , saltem in præparatione cordis , & animi propensione. Ita sanctus Thomas quæst. 25. artic. 8.

Præceptum affirmativum amoris effectivi erga proximum non obligat pro semper , sicut nec præceptum amoris Dei ; cum sit impossibile in hac mortali vita , ut semper actu ardeamus amore Dei & proximi. Quando autem & quoties obliget illud præceptum, omnino definiri nequit. Omissis variis opinionibus , utpote quæ fundamento satis firmo careant , pro certo statui debet illud sæpius obligare , efficaciterque probatur ex oratione , quam Christus & frequentem , & pro omnibus , nemine excepto , fundendam præcebit : *Quando oramus* , inquit S. Cyprianus Serm. de Oratione Dominica , *non pro uno , sed pro populo toto oramus , quia totus populus unum sumus. Deus pacis , & concordie Magister , qui docuit unitatem , sic orare unum pro omnibus voluit , quomodo in uno omnes ipse portavit . . . . . Deus qui unanimes facit habitare in domo , non admittit in divinam & æternam domum , nisi apud quos est unanimes oratio.* Et S. Thomas quæst. 25. artic. 9. Sunt , inquit , *quædam signa vel beneficia dilectionis , quæ exhibentur proximis in communi , puta , cum aliquis orat pro omnibus Fidelibus , vel pro toto populo ; aut cum aliquod beneficium impendit aliquis toti communitati. Et talia beneficia vel dilectionis signa inimicis exhibere est de necessitate præcepti. Si enim non exhiberemus inimicis , hoc pertineret*



*neret ad livorem vindictæ.* Quibus verbis S. Doctor explicat quod art. 8. scripserat, & à nonnullis sensu ab ejus mente alieno accipitur, ut scil. aliquis in speciali moveatur motu dilectionis ad inimicum, non est de necessitate Charitatis absolute; quia nec etiam moveri motu dilectionis in speciali ad quoslibet homines singulariter, est de necessitate Charitatis; quia hoc esset impossibile. Est tamen de necessitate Charitatis secundum præparationem animi, ut scil. homo habeat animum paratum ad hoc quòd in singulari inimicum diligeret, si necessitas occurreret. Hic S. Thomas loquitur de inimico absolute spectato, articulo autem 9. de inimico in hypothese quòd pro omnibus oremus, ut in Oratione Dominica, vel adsit in cœtu, quem ingredimur, cuique benevolentia signa exhibemus, & definit ad livorem vindictæ pertinere, si eum excludamus vel ab oratione nostra, vel ab honorifica salutatione, quam aliis impertimus, si oculos ab illo avertamus; si verba ad nos dirigenti respondere detrectemus. Idem dicendum, si sit propinquus, vicinus, si antea nobis familiaris fuerit; in iis quippe circumstantiis ea amoris signa illi debentur, quæ communiter dantur propinquis, & vicinis. Esto familiariter eo non utamur sicut prius, modò id fiat ex prudentia, non autem ex appetitu vindictæ, & ex animo eum contemnendi aut contristandi; tenemur tamen necessariis benevolentia signis ab illo amovere omnem odii suspicionem, alioquin illi essemus malo exemplo & offensionem; *Vae autem homini per quem scandalum venit, Matth. 18.*

Sunt aliæ occasiones, in quibus tenemur elicere actus Charitatis fraternæ.

1. Cùm quis acerbo dolore pungitur ob injuriam acceptam, periculumque est ne inimico vel malum exoptet, vel malis ejus insultet, vel rebus lætis invideat; contraria enim contrariis expelluntur, fide infidelitas, spe desperatio, & amore odium. Tum igitur maximè urget Evangelicum præceptum, *orate pro persequentibus . . . vos*, Matth. 5. *Ille scivit, tu precare; ille odit, tu miserere*, S. Augustinus Tract. 8. in 1. Joan. Nihil efficacius ad sedandum animum, nihil salubrius Confessarii imponere possunt pœnitentibus, quàm crebras orationes pro iis qui illos infestant, ut scilicet Deus eos convertat, & ex inimicis fiant amici.

2. Cùm prævidemus inimicum inimicitias depositurum, nec aliter, nisi eum specialibus benevolentiae officiis præveniemus: *Unicuique enim mandavit Deus de proximo suo*, Eccli. 17. & si asinum, vel bovem inimici errantem ad ipsum reducere tenemur, multò magis ipsum errantem reducere debemus ad Deum Dominum ipsius, & nostrum. Scio justitiæ legem juxta quam qui non læsus est, sed qui læsit, prior obsequiis occupare tenetur; sed superior est lex Charitatis, à qua nullus immunis fieri potest, ut quisquis proximum diligat, id est, benè illi velit & faciat, ubi ope nostra indiget. Illud autem Charitatis officium maximè spectat Pastores, quorum munus est ovem errantem requirere, dissidia subditorum extinguere, exasperatos animos blanditiis delinire, & ad pacem revocare. Atqui nullus sollicitudine ejus pastoralis tam indiget, quàm qui odium capitale adversus illum gerit: sit injustus, sit impius; de ejus tamen salute desperare.

sperare non licet; fortè enim prædestinatus est sicut plures, quos Ecclesia experta est crudelissimos persecutores. Malitia ejus febris est. Quanta medici plerumque patiuntur à phreneticis? Quales verborum contumelias? plerumque & percutiuntur, & nihilominus curant hominem à quo percutiuntur, oderunt morbum, febrem persequuntur; denique illud tollunt, quod illis adversatur, ut remaneat illud unde gratulentur. Ita ferè S. Augustinus Tract. 8. in 1. Joan. Si autem Pastor adjiciat curam hujusmodi phrenetici, si litibus morbum ejus exaggeret, & sub prætextu jus suum tuendi, illum in extremam perniciem impellat, quis dubitet quin Deus sanguinem animæ illius de manibus ejus requirat? maximè cum experientia constet hujusmodi flagitiosos vinci inexpectata Pastoris humanitate, nec posse resistere ei, qui cum posset ulcisci graves injurias sibi irrogatas, amore tamen paterno eos complectitur.

3. Inimico veniam petenti, non solum offensam remittere, sed etiam benevolentiae & reconciliationis signa exhibere tenemur, saltem ut plurimum; sic enim præcepit Dominus, Luc. 17. vers. 3. & 4. *Si peccaverit in te frater tuus, increpa illum . . . . . & si . . . . . septies in die conversus fuerit ad te dicens, pœnitet me, dimitte illi.* Unde sanctus Augustinus Serm. 52. *Quando, inquit, inimicus veniam petit, continuo dimittas . . . . . Tunc si non ignoveris: non dico, deles orationem de corde tuo: sed deleberis de Libro Dei . . . . . sed fortè dicis, mentitur, fingit. O Judex cordis alieni! Rogat, veniam petit: dimitte, prorsus dimitte. Si non dimiseris, non illi nocet, sed tibi. Nam ille*

*scit quid sit facturus . . . . Ibit ad Dominum vestrum . . . . Nunquid non licet Domino debita relaxare servi sui? Ille accepta venia à Domino, recedit absolutus, tu remanes obligatus.*

Dixi, ut plurimum; nam pater, & quivis Superior justæ correptionis causa, ab amoris indiciis excludere possunt filium & subditum, reconciliationemque differre, modò intus in corde dimittant, & Charitatem servant. Sic David Absaloni veniam petenti ita indulgit, ut eum ad tempus videre noluerit, 2. Reg. cap. 14. Sic & Deus, inquit S. Augustinus Serm. 5. *nunquid non nos diligit? non ad hoc nos hortatur ut diligamus inimicos nostros, ut quomodo possumus, similes illi simus? Quanta dilectio est in Domino, quando pro peccatoribus & impiis Christum crucifigendum misit? . . . . Ecce quomodo diligit homines. Attendamus, fratres, nunquid non illos flagellat? nunquid non illos corripit? Si non illos corripit, unde fames, unde ægritudines, unde pestilentia & morbi? Omnes enim istæ correptiones Dei sunt. Sicut ergo ille diligit, & tamen corripit: sic & tu si habes aliquem in potestate, quamvis serves affectum dilectionis, noli tamen negare flagellum correptionis, quia si negaveris, non tenebis dilectionem; quia ille moritur in peccatis, qui fortè correptus ea relinqueret, & tibi imputatur verum odium. Est igitur Charitas piè sæviens, & odium perversè blandiens.*

Sed patres & Superiores imprimis præcavere debent exemplo Apostoli 2. Cor. 2. Ne circumveniantur à Satana, hoc est, ne abundantiori tristitia absorbeantur, quos exercent ad emendationem; suspendant verbera, aperiantque Charitatis viscera, ubi salus pœnitentium postulaverit.



Q. 5. *Veniam petenti estne etiam remittenda ex præcepto actio injuriarum & satisfactio?*

R. Minimè, quia non ordo justitiæ, sed solus appetitus vindictæ repugnat Charitati. Ita S. Thomas 2. 2. qu. 108. art. 1. ubi sic habet. *Est in vindicatione considerandus vindicantis animus; si enim ejus intentio feratur principaliter in malum illius, de quo vindictam sumit, & ibi quiescat, est omnino illicitum, quia delectari in malo alterius pertinet ad odium. Nec aliquis excusatur si malum intendat illius, qui sibi injustè intulit malum, sicut non excusatur aliquis per hoc quòd odit se odientem; non enim debet homo in alium peccare, propter hoc quòd ille prius peccavit in ipsum; hoc enim est vinci à malo.. Si verò intentio vindicantis principaliter feratur in bonum, puta ad emendationem peccantis, vel saltem ad cohibitionem ejus, & quietem aliorum, & ad justitiæ conservationem, & ad Dei gloriam, potest esse vindictio licita. Et illud probat in responsione ad quartum exemplo tum Eliæ, qui obtinuit ut ignis descendens de cælo devoraret quinquaginta viros ad vindicandum injuriam sibi illatam, 4. Reg. 1. tum Elisæi, qui maledixit pueris eum irridentibus, 4. Reg. 14. quia Dei honos læsus erat in persona utriusque Prophetæ.*

At valde periculosum est ne in ejusmodi actionibus injuriarum appetitus propriæ vindictæ subrepat, neve per speciem tuendæ justitiæ re vera privato dolori indulgeamus; quæ cùm nobis satis explorata esse nequeant; (*præsumendum enim est cor hominis & inscrutabile. Jer. 17.*) illud fuit semper consilium viris sanctis, Dei honorem, & proximi injurias acriter vindicare, proprias verò patienter sustinere; nec existimant se ultra manda-

tum progredi, sed proximam illius transgrediendi occasionem vitare.

Q. 6. *Si inimicus plenam Satisfactionem offerat, pars læsa teneturne eam acceptare?*

R. Ordinariè tenetur, saltem ex præcepto Charitatis: quia nulla honesta ratio interpellandi Judicem, nulla causa proximum obruendi sumptibus, nisi ultionis libido; quid enim amplius læsus expectare potest, quàm ut plenè sibi satisfiat? atqui id ultro ipsi offertur: Ergo.

Dixi 1. *saltem ex præcepto Charitatis*, ut innuerem ad id non teneri ex virtute justitiæ, ut probavimus Tract. de Incarnatione, ubi de differentia restitutionem inter & satisfactionem pag. 185. & seq.

Dixi 2. *ordinariè*, quia aliquando expedit, vel etiam necesse est satisfactionem injuriarum petere coram Judice. 1. Si reus sit Reipublicæ noxius, & concives injuria afficere solitus. 2. Si gravis esset offensa, nec privata satisfactio deleret infamiam, quæ in totam familiam recidit.

## CAPUT IV.

### De Ordine Charitatis.

Q. 1. *Estne servandus ordo in Charitate?*

R. Servandus est. Probatur 1. ex Scriptura 2. Cant. vers. 4. *ordinavit in me Charitatem.* Quem locum expendens sanctus Bernardus Serm. 49. in Cant. sic habet: *Omnium necessario importabilis liquidem absque scientia est zelus. Ubi ergo vehemens est æmulatio, ibi maxime discretio est necessaria, quia est ordinatio Charitatis.*

Proba-

Probatur 2. ratione ; quia ibi est ordo , ubi unum est principium & causa cæterorum ; atqui in Charitate amor Dei est principium , & causa amoris rerum cæterarum : Ergo.

Objicit sibi S. Thomas qu. 26. art. 1. in aliis virtutibus non invenitur ordo : ergo neque in Charitate.

Respondet negando consequentiam ; Quia *Charitas tendit in ultimum finem sub ratione finis ultimi, quod non convenit alicui alii virtuti ; finis autem habet rationem primi principii in appetibilibus , & in agendis. Et ideo Charitas maximè importat comparationem (ordinationem) ad primum principium.*

Q. 2. *Quomodo ordinanda est Charitas ?*

R. Amore affectivo meliora sunt magis diligenda : amore autem effectivo seu opere , quæ nobis sunt conjunctiora : in pari tamen necessitate , & in eodem bonorum genere.

Prima pars probatur ; quia ubi major est ratio diligendi , magis diligere oportet : atqui bonum est ratio diligendi : ergo quod est majus bonum , illud magis est diligendum. Hinc bona spiritalia , utpote meliora , plus amare oportet , quàm temporalia , si tamen ista sint amanda ; nam , ut sæpiùs diximus , non sunt bona nostra , sed necessaria , quibus utendum ad illud , non quibus frui liceat amore iis inhærendo.

Secunda pars probatur 1. ex S. Augustino Lib. de Doctrina Christiana cap. 28. ubi sic scribit : *Omnes homines . . . æquè diligendi sunt* (hoc est idem bonum hominibus expetendum , quamvis non eodem affectu.) *Sed cùm omnibus prodesse non possis, his potissimum consulendum est, qui pro locorum & temporum vel qualibet rerum opportunitate constrictus tibi*

*tibi quasi quadam sorte junguntur.* 2. Ratione; quia omnis causa prius & fortius agit in ea quæ sunt viciniora, quàm in remotiora.

Confirmatur utraque pars responsionis, ex S. Bernardo cit. Serm. 49. in Cant. num. 6. *Non semper, inquit, quod prius curandum, id etiam amplius diligendum erit, cum sæpè quod prius est ad sollicitudinem, minus sit ad utilitatem, ac per hoc minus esse oporteat & in affectu . . . Nonne v. gr. ex injuncto incumbit mihi cura omnium vestrum?* (alloquitur Monachos sibi subditos.) *Fam quidquid huic fortè prætulero operi, quod minus ipsi invigilem dignè & utiliter pro viribus exequendo; & si ex Charitate fortassis id facere videar, ordinis tamen ratio non consentit. Quod si ante omnia quidem (ut debeo) huic intendo curæ, non autem magis ad majora gaudeo Dei lucra, quæ per alterum fortè fieri comperero, patet me ordinem Charitatis ex parte tenere, ex parte nequaquam. Si verò me & ad id amplius, quod specialius incumbit, sollicitum & nihilominus ad illud quod majus est, magis affectum exhibeam, utrobique profectò invenior Charitatis ordinem affectus, & non est cur dicere non possim etiam ipse, quia ordinavit in me Charitatem. Notent Pastores & quilibet Præpositi, qui prætextu amplioris messis aliò excurrunt, proprium verò agrum pro virili non excolunt.*

Ergo Deum nobis & cæteris omnibus debemus antepondere amore tum affectivo, tum effectivo; quia præterquam quod est summum bonum & ultimus finis, ad quem omnia sunt referenda, nobis quoque est conjunctissimus, & intimior nostro intimo; habet quippe rationem totius, nos verò partis, pars autem minus est sui, quàm totius. Unde S. Aug. Lib. de Doctr. Christiana c. 22. *Si teipsum, inquit, non propter te debes diligere,*

*non*



*non succenseat alius homo (etiamsi pater sit) si & ipsum propter Deum diligas.*

Dices : tenemur ex dictis nos magis diligere quam ceteros homines, inter quos sunt nobis meliores ac sanctiores : Ergo charitatis ordo non postulat ut præferamus meliora.

Distinguo conseq. Ut præferamus amore effectivo, & desiderio efficaci, Concedo : amore complacentiæ ; Nego conseq. Itaque debemus efficacius nostrum quam aliorum in virtute perfectum ac beatitudinem desiderare, & in iis attentius versari, quod est simpliciter seipsum magis diligere ; sed recta ratio postulat ut magis complaceamus in majori aliorum sanctitate & beatitudine. Si autem dicas, inquit S. Bernardus Serm. cit. num. 7. *difficile quenquam plus alieno gaudere magno bono, quam proprio parvo, advertes certò vel ex hoc excellentiam gratiæ apud sponsam, & quoniam non cuilibet animæ dicere sit, quia ordinavit in me charitatem . . . . nimirum metientes nos ipsos nobis, sentimus aliqui nostrum pro nostræ imperfectionis experientia, quam rara virtus sit alienæ non invidere virtuti, necdum gaudere ad illam, necdum etiam tantò plus, quam ad propriam quemque gratulari, quantò se perpendit in virtute superari.* Cùmque S. Doctor adverteret Discipulorum suspiria, quibus testabantur nondum se illam perfectionem affecutos, eorum dolorem lenit pergens : *Si doles quod invidēs ; sentis, sed non consentis, Passio est, quandoque sananda, actio non condemnanda.* Absit enim, ut inveniatur expers salutis, qui magis confunditur sic se esse malè affectum, qui inclytum ex longo vitium, confitendo, flendo, orando conatur expellere : & cùm non prævalet, mitior inde ad omnes, atque apud se humilior inveni-

*invenitur , quis sanè sapiens hominem damnet, qui à Domino didicit mitis esse & humilis corde?*

Dixi in responsione, *in pari tamen necessitate*. 1. quia præceptum charitatis non obligat aliis benefacere, nisi adsit aliqua opitulandi necessitas; neque enim tenemur utilia quæque aliis afferre. 2. quia extraneus in extrema aut gravi necessitate constitutus, præferendus est propinquo non ita indigenti.

Triplex autem distingui solet necessitas, nempe communis, gravis, & extrema. Communis est ea, in qua non habentur, nec labore comparari possunt necessaria quæque ad victum & vestitum; talis est mendicantium necessitas. Gravis, quæ hominem è statu suo dejiceret, nisi suppetiæ ei afferrentur. Extrema, in qua homo, v. g. ægrotus derelictus, mortem effugere nequit, nisi ei subveniatur.

Ordo autem charitatis exigit, ut proximus in communi necessitate constitutus, adjuvetur ex bonis superfluis: in gravi ex bonis statui nostro partim necessariis: in extrema, etiam ex bonis (si necesse sit) sine quibus status noster stare non potest.

Dixi 2. *in eodem bonorum genere*; in diverso enim servandus est diversus operis seu amoris effectivi ordo. Alia autem sunt bona, quæ dicuntur fortunæ, alia naturæ, ut vita corporis: alia spiritualia, & quæ spectant æternam animæ salutem. Porro responsionem nostram limitavimus ad bona ejusdem generis in pari necessitate conferenda.

Atque

Atque juxta regulam à nobis traditam & stabilitam, ubi agitur de bonis fortunæ, in pari necessitate prius consulere debemus nobis, deinde propinquis juxta gradum propinquitatis; & postmodum cæteris secundum varias necessitudines amicitiae, societatis, ac demum extraneis. Si ergo parentes, amici, & extranei, nobiscum versentur in gravi necessitate, hoc est, in proximo periculo cadendi à proprio statu legitime acquisito, nobis prius providere debemus, secundo loco parentibus, ac deinceps aliis. Eadem regula servanda est, si omnes pariter premantur extrema necessitate, quæ tum duntaxat censetur, cum imminet mortis periculum. Quapropter in ea necessitate agitur de bonis naturæ, nempe de vita, quam quisque debet prius sibi servare, quam parentibus, & his prius quam reliquis; quia iis conjunctior est in ordine naturæ, qui firmior est ac præsuppositus omnibus necessitudinibus, quas deinceps superstruimus, nec proinde earum gratia subvertendus. Non igitur audiendi sunt filii inhumani, dum exaggerant mala, quæ à parentibus perpeffi sunt, ut inde concludant sibi licitum esse non habere eos ut parentes, vita enim quamdiu filio superest, tantum est beneficium à parentibus acceptum, ut pro eo semper sit illis debitor, nec par reddere possit, ex ipsismet Philosophis Ethnicis.

Ergo à fortiori is charitatis ordo in extrema necessitate servandus est erga patriam, quæ cum habet rationem totius, præferenda est parentibus, qui & ipsi utpote ejus partes propriam vitam pro illius salute exponere tenentur, ex S. Thoma qu. 26. art. 4. ad tertium: *Charitas*, inquit,

quit, communia propriis antepōnit, semper autem commune bonum est magis amabile unicuique, quàm proprium, sicut etiam ipsi parti est magis amabile bonum totius, quàm bonum partiale sui ipsius.

Q. 3. Cum sint diversi gradus consanguinitatis, quomodo in iis servandus est ordo charitatis?

R. 1. Parentes præferendi sunt 1. filiis; quia præter communionem sanguinis, rationem habent principii, adeoque eminentioris boni. 2. uxori propter eam rationem; quamvis enim maritus & uxor sint una caro, ob vinculum conjugale; in patre tamen est eminentior bonitas, quàm in uxore, scilicet ratio principii. 2. Pater est præferendus matri, utpote qui nobiliori modo principii rationem obtineat. 3. præferenda est uxor filiis; quia est una caro cum marito, filii verò sunt partes ex patre decisæ. 4. filii sunt præferendi patribus, & hi cognatis; quia major est sanguinis conjunctio cum prioribus. Quamobrem si omnes, quos hic recensuimus, naufragium aut simile mortis periculum patiuntur, filius præ uxore & propriis liberis, patrem eripere tenetur.

Q. 4. Cur non æquè in gravi necessitate ac in extrema filius antepōnere debeat parentes uxori, ac liberis, & excidere à proprio statu, si necesse sit, ut labentem patris statum fulciat?

R. 1. Quia illud repugnat Scripturæ sacræ, Gen. 2. Relinquet homo patrem & matrem, & adhærebit uxori suæ. 2. Cor. cap. 12. Nec enim debent filii parentibus thesaurizare, sed parentes filiis. 2. quia si filii exhaurirentur ad sustentandam domum paternam, magna sequeretur perturbatio in familiis, & in tota Republica; uxor divortium faceret



ret cum marito , re familiari dilapidata filii convenienter non instituerentur , nec decenter collocarentur ; qui in Republica aliorum curam gerunt , ut Magistratus , Pastores , officio suo , ut par est , defungi non possent , utpotè minùs liberales , & munifici , sed contra undique corradentes , quæ subditorum animos à Præposito prorsus avertunt. Unde Trid. Patres Sess. 25. c. 1. de Reformatione , Beneficiarios , ac præsertim Pastores , gravissimis hisce verbis compellant , *quàm maximè potest , eos sancta Synodus monet , ut omnem humanum hunc erga fratres , nepotes , propinquosque carnis affectum , unde multorum malorum in Ecclesiâ seminarium extat , penitus deponant.*

Parochi igitur , ut præscriptum charitatis ordinem servant attentius , statumque suum parentum statui accuratius anteponant , meminerint imprimis verborum Apostoli , *nec enim debent parentibus thesaurizare filii , sed parentes filiis* , quæ ad litteram prolata sunt de Ecclesiæ Ministris , ut legenti patebit. Et quamvis juxta corticem litteræ , quæ leguntur , Gen. 2. *relinquet homo patrem & matrem , & adhærebit uxori suæ* , intelligantur de conjunctione viri & fœminæ ; idem tamen Apostolus Ephes. 5. docet ea etiam accipienda in sensu spirituali à Spiritu Sancto intento , de summo Pastore Christo Ministrorum suorum exemplari , qui reliquit patrem ut adhæreret Ecclesiæ , pro qua seipsum tradit , ut eam sanctificaret , gloriosamque sponfam exhiberet. Similiter ejus Ministri Ecclesiæ sibi creditæ adhæreant , se & sua in ejus sanctificationem impendant , Parochianis , tanquam filiis , quos per Evangelium genuerunt in Christo , spiritualia thesaurizent , quod præ-

*D. Habert Theolog. Tom. III.      B b b      stare*

stare nequeunt, nisi pro facultate largi & effusi fuerint erga indigentes; alliciendi enim ac devinciendi sunt eorum animi, aperienda corda, ut verba vitæ suscipiant, correptiones nonnunquam adhibendæ, quæ non proficiunt, nisi libentiùs admittantur. Quis autem Pastor subditos sic erga se affectos habebit? beneficiis & patientibus profusæ suæ charitatis testificationibus, sicut scriptum est Prov. 22. v. 9. *viCTORIAM & bonorem acquirat, qui dat munera: animam autem aufert accipientium*, id est, accipientes sibi devincit, ac reddit obnoxios.

Q. 5. *Quis charitatis ordo servari debet, ubi agitur de bonis spiritualibus proximi comparatis cum nostris temporalibus?*

R. 1. In extrema necessitate, in qua positus proximus non potest vitam æternam consequi sine alterius auxilio, v. g. parvulus qui nondum initiatus, mox vitam exhalaturus est; tene-mur pro illius salute vitam nostram evidenti mortis periculo exponere, v. g. parvulum illum baptizare, etiamsi constet nos ob illud charitatis opus mortem à parentibus infidelibus intentatam non fore evasuros. Ita S. Thomas q. 26. art. 5.

Probatur 1. ex Scriptura, 1. Joan. 3. *Et nos debemus pro fratribus nostris animas ponere*, quæ Divina Lex, si in extrema necessitate non obliget, nusquam obligabit. 2. ex S. Augustino Lib. de Mendacio c. 6. *temporalem vitam suam*, inquit, *pro æterna vita proximi non dubitavit Christianus amittere*. 3. ratione; quia licet corpus sit pars nostri, magis tamen spectari debet ut quid ad nos pertinens quàm nos ipsi; nam ex Philosopho, quem lau-  
dat

dat S. Thomas citato artic. 5. ad primum, unumquodque videtur esse id, quod est præcipuum in ipso: atqui proximum magis diligere tenemur, quàm ea, quæ ad nos pertinent, aliàs illum non diligeremus sicut nos ipsos; ita quippe nos diligimus, ut parati simus corpus temporaliter amittere pro salute æternæ animæ nostræ: Ergo ut amor proximi sit ad similitudinem amoris, quo nos ipsos prosequimur, necesse est, ut quemadmodum in extrema ejus necessitate bona nostra, quæ dicuntur fortunæ, largimur pro corporali ejus salute; ita sanguinem nostrum effundamus pro æternæ illius animæ beatitudine.

Dices: ex concessis magis diligere debemus amore effectivo, quæ sunt nobis conjunctiora: atqui proprium corpus nobis est conjunctius anima proximi: ergo illud magis diligere debemus saltem amore effectivo.

Distinguo maj. Debemus magis diligere quæ nobis sunt conjunctiora in eodem genere bonorum, v. g. corpus proprium tenemur magis diligere, quàm corpus proximi, Concedo: in diverso genere bonorum, Nego major. Nam capilli, vel quælibet minima pars corporis est nobis magis conjuncta, quàm proximus: quis autem dixerit illam anteponendam saluti æternæ proximi?

Instabis: naturale est corpus suum diligere, nemo unquam carnem suam odio habuit, inquit Apostolus Ephes. c. 5. sed nutrit & fovet eam: atqui charitas non destruit naturam, sed eam perficit: Ergo.

Distinguo maj. Naturale est corpus suum diligere secundum rectam rationem, Concedo:

homo quippe rationabili modo semper agere debet: naturale est corpus suum diligere contra rationem, Nego maj. Atqui recta ratio admodum probat quòd data occasione, pro fide & charitate vitam profundamus, quòd desideria carnis refrænemus, & reluctantem castigemus vexemusque pœnitentiæ exercitationibus, & ad id charitas mentem roborat & accendit, ac proinde naturam nedum destruit, quin illam perficit.

R. 2. In gravi necessitate, in qua proximus absolutè, sed non sine magna difficultate sibi providere potest necessaria ad salutem, qui tenentur ex justitia, ut Pastores salutis aliorum curam gerere, cum discrimine propriæ vitæ, proximo sic indigenti subvenire debent. Exemplum esto Parochiani, qui tempore pestis Sacramento Pœnitentiæ indiget, ille quidem saluti suæ absolutè providere potest per actum perfectæ contritionis; sed quia difficilis est ejusmodi actus, necessitas Parochiani censetur gravis, quamvis non sit extrema, ut in parvulo nondum baptizato; & ideo Parochus, si non adsit alius Sacerdòs qui suppleat, tenetur vitam suam exponere pro salute Parochiani, juxta illud Joan. 10. *Bonus Pastor animam suam dat pro ovibus suis.* Quin alibi probamus ipsum etiam aliquando cum vitæ periculo teneri ministrare Sacramenta Eucharistiæ & Extremæ Unctionis; quia ejusmodi Sacramenta, licèt necessitate mediis absolutè necessaria non sint, homini tamen in extremis posito, in quo solet impeti gravibus tentationibus, quodammodo necessaria sunt tanquam arma spiritualia, quæ Pastor pro officio suppeditare tenetur.

Dixi,



Dixi, qui ex iustitia seu ex officio tenentur: nam cæteris laudabile quidem est, si in gravi necessitate proximi propriam vitam periculo exponant; sed præcepti obligatio non incumbit; aliàs discrimen non esset Pastorem inter & alios: quod repugnat communi hominum sensui.

R. 3. In necessitate communi, in qua quis propriæ saluti facilè consulere potest, nedum propriam vitam, quin nec bona temporalia pro bono spirituali proximi perdere tenemur; quia necessitas illa planè voluntaria est in proximo, cùm ex ea facilè se expedire possit, ut supponitur. Hinc viator non tenetur se tradere potestati prædonis, cùm possit se defendere servato moderamine inculpatæ tutelæ, ne fortè in periculoso conflictu ille cadat, & moriatur in peccato mortali; quia sola malitia prædonem constituit in ejusmodi necessitate. Idem dicendum de debitoribus, qui si urgeantur ad solvenda debita, efferri soleat iracundia & odio: & de Usurariis, qui sine usura mutuo dare nolunt graviter indigentibus.

## CAPUT V.

### De Effectibus Charitatis.

**E**ffectus charitatis alii sunt interni, alii externi.

Interni sunt amor, gaudium, pax, tristitia: propter Dei offensam.

Externi sunt beneficentia, qua alteri ex affectu charitatis confertur beneficium: eleemosyna, & correctio fraterna: illa temporalem pro-

ximi miseriam ex commiseratione expellere nititur; ista spiritualement. De internis strictim dicemus; de externis verò paulò accuratius.

## §. I.

*De internis Effectibus Charitatis.*

Q. I. *Amor estne quid idem ac benevolentia?*

R. Negat S. Thomas q. 27. art. 2. quia amor importat quandam unionem secundum affectum amantis ad amatum, in quantum scilicet amans aestimat amatum quodammodo ut unum sibi, vel ad se pertinens, & sic movetur ad ipsum. Sed benevolentia est simplex actus voluntatis, quo volumus alicui bonum, etiam non præsupposita prædicta unione affectus ad ipsum . . . sic ergo in dilectione secundum quod est actus charitatis includitur quædam benevolentia; sed dilectio sive amor addit unionem affectus. Et propter hoc Philosophus dicit (Lib. 9. Eth. cap. 5.) quòd benevolentia est principium amicitiae. Itaque amor charitatis, cum essentialiter sit amicitiae, tendit ad unionem cum dilecto; ac proinde qui in sublimitate constituti ita infimis bene volunt, ut indignum se putent eis affectu conjungi, non amant amore charitatis, sed simplici benevolentia, sicut accidit in nobis de pugilibus, inquit sanctus Doctor, quorum alterum vellemus vincere.

Q. 2. *Deus potestne totaliter diligi?*

Respondet S. Thomas q. 27. art. 5. Deum non posse totaliter diligi ex parte modi diligendi, ita ut modus diligendi adæquet modum rei dilectae; quia quàm bonum est objectum, tam est diligibile: atqui Deus est infinitè bonus: ergo & infinitè

tè diligibilis: Nulla autem creatura potest Deum infinitè diligere, cum omnis virtus creata sive naturalis, sive infusa, sit finita: Ergo. Ex parte verò objecti, & ex parte diligentis Deus est totaliter diligendus: ex parte quidem objecti; quia quidquid est in Deo, sive misericordia, sive iustitia, sive omnipotentia, &c. diligere debet. Ex parte etiam diligentis; quia ex toto posse suo homo debet diligere Deum; & quidquid habet, ad Dei amorem ordinare, secundum illud Deut. 6. Diliges Dominum Deum tuum ex toto corde tuo.

Q. 3. *Estne modus habendus in Dei amore?*

R. Negat S. Thomas cit. qu. 27. art. 6. probatque 1. auctoritate S. Bernardi Lib. de diligendo Deo c. 1. in quo sic habet: *Causa diligendi Deum, Deus est: modus, sine modo.* 2. *ratione, quia finis in omnibus est absque fine & termino; eorum autem quæ sunt ad finem, est aliquis terminus. Non enim Medicus imponit aliquem terminum sanitati, sed facit eam perfectam quantumcunque potest; sed medicinæ imponit terminum. Non enim dat tantum de medicina quantum potest; sed secundum proportionem ad sanitatem . . . finis autem omnium actionum humanarum & affectionum est dilectio Dei, per quam maximè attingimus ultimum finem . . . Et ideo quanto Deus plus diligitur, tanto est dilectio major.* Et in responsione ad tertium distinguit inter exteriores actus charitatis, & interiorum dilectionem, docetque exterioribus competere modum, juxta illud Apostoli Rom. 12. *rationabile obsequium vestrum*; quia se habent ut medium ad finem: interiorum verò dilectionem esse sine modo; quia habet rationem finis; quatenus nos conjungit Deo, qui est nostrum summum bonum.

Q. 4. *Estne quid perfectius & magis meritorium diligere inimicum, quàm amicum?*

R. Distinguit S. Thomas art. 7. ejusdem qu. nempe si spectetur dilectio amici per se & secundum bonitatem, quam desumit ex parte objecti, est perfectior, & magis meritoria: tum quia objectum illius est melius; amicus enim hominis iusti est bonus, inimicus verò malus: tum quia amicus est diligenti magis conjunctus, agens autem intensius agit in subjecta priora, quàm in remotiora: tum quia pejus est odisse amicum quàm inimicum: ergo è contrario melius est illum diligere. Sed per accidens dilectio inimici est perfectior & magis meritoria. 1. quia est difficilior. 2. quia bonitas divina est sola ratio illum diligendi, utpote qui malus sit. At aliæ sunt rationes diligendi amicum, quæ nisi caveamus, solæ movent ad illum diligendum, & ejusmodi dilectio mercedem non habet apud Deum, ut dicitur Matth. 5. v. 46.

Q. 5. *Estne magis meritorium diligere Deum, quàm proximum?*

Respondet S. Thomas art. 8. si seorsim spectentur ambæ illæ dilectiones, non est dubium quin dilectio Dei sit magis meritoria; quia propter quod unumquodque, illud magis: atqui dilectio proximi non est meritoria, nisi quia diligitur propter Deum, qui est fons bonitatis, quæ derivatur ad proximum, & propter quam ipse diligitur. Sed si includatur amor Dei in amore proximi, ita ut tota ratio diligendi proximum sit Dei dilectio, sub illo respectu magis meritorium est diligere proximum, quàm Deum sine proximo; quia per ejusmodi dilectionem complexam adæquatè



adæquatè impletur mandatum, quod habemus à Deo, *ut qui diligit Deum, diligat & fratrem suum.* 1. Joan. 4. v. 21.

Q. 6. *Cur gaudium tribuitur charitati tanquam proprius ejus effectus?*

R. 2. Quia delectatio ex dictis pagina 74. est fructus operationis perfectæ: atqui charitatis amor est actus omnium perfectissimus: ergo fructus ejus est gaudium & delectatio, *fructus autem spiritus*, inquit Apostolus Gal. 5. v. 20. *est charitas, gaudium.* 2. quia omnis motus tendit ad quietem; corpora graviora v. g. moventur donec attigerint centrum veluti ultimum finem, in quo quiescant: atqui ex omnibus motibus animi solus charitatis amor attingit ultimum finem, solus animam Deo summo bono & omnium desideriorum fini conjungit, *qui non diligit, manet in morte*, 1. Joan. 3. contra verò, *qui manet in charitate, in Deo manet, & Deus in eo*, 1. Jo. c. 4. Charitas enim essentialiter est unio animæ cum Deo, & Dei cum anima: Ergo fruitio, gaudium, quies animi est proprius effectus charitatis. Vide plura in hanc rem Tract. de Actibus humanis pag. 80. & 197. & seq.

Dices, una & eadem virtus non potest esse principium gaudii & tristitiæ: atqui charitas est principium tristitiæ; ait enim Apostolus Rom. 8. v. 23. *Nos ipsi primitias Spiritus habentes, & ipsi intra nos gemimus, adoptionem filiorum Dei expectantes.* Et v. 26. *Ipse Spiritus postulat pro nobis gemitibus inenarrabilibus:* Ergo gaudium non potest esse effectus charitatis.

Distinguo maj. Eadem virtus non potest esse principium gaudii & tristitiæ sub eodem respec-

Etu, Concedo : sub diverso respectu, Nego maj. Nonne amor matrem perfundit gaudio & simul elicit ejus lacrymas, indubitata tristitiæ signa; dum recipit filium, qui diu fuerat absens?

Q. 7. *Sub quo respectu Charitas est causa tristitiæ?*

R. Respectu eorum, quæ impediunt ejus motum, & perfectam unionem cum Deo summè dilecto; qui enim amicum impensè diligit, doleat necesse est, si quid amicitiam interturbet, vel amico adversetur. Quamdiu autem mortalem hanc vitam vivimus, duo impediunt charitatis motum,

Primum est absentia dilecti; *quoniam dum sumus in corpore, peregrinamur à Domino; per fidem enim ambulamus, & non per speciem.* 2. Cor. 5. Tantò autem quis molestius fert absentiam amici, quantò ardentius illum diligit, nec ullus credet sponsam diligere, quæ non tangitur, sive præsens, sive absens sit sponsus. Per charitatem quidem hìc manemus in Deo, gustamusque quàm suavis sit Dominus, & sub eo respectu charitas non potest esse sine eo gaudio, quod avellit à terrenis cupiditatibus; inchoatque beatitudinem, quam expectamus; ut fusè demonstravimus Tract. de Actibus humanis pag. 114. & sequentibus. Attamen gaudium illud, quantum quantum sit, plenum hìc esse nequit, quia nec Deus plenè possideri potest, sed est duntaxat prælibatio quædam & irritamentum, quo accendimur ad quærendam faciem Domini semper; sicque charitas non est sine tristitia & gemitu, donec ruamus in amplexus sponsi super omnia dilecti; *fuerunt mihi*, ait Psaltes Regius Psalm. 45. *lacrymæ meæ panes die ac nocte, dum dicitur mihi quotidie: Ubi est Deus tuus?*

Alte-

Alterum charitatis impedimentum, ex quo diligentibus Deum nascitur tristitia & continuus dolor, sunt nostra & proximi peccata, utpotè Dei offensæ. Primum quippe amici officium est à dilecto malum avertere, priùs v. g. febrem ab illo expellere satagit, quàm de opibus vel honoribus ei acquirendis cogitet. Quodsi morbus sit insanabilis, doleat necesse est, & eò ampliùs, quò impensius diligit. Atqui peccata sunt malum Dei, polluunt nomen ejus, ut dicitur Levit. 18. & 19. lædunt honorem & gloriam, propter quam omnia operatus est, ideoque summè ipsi displicent, si gravia, ipsum inter & animam dividunt: si levia, remonent à familiarissimis ejus amplexibus. Hinc charitatis pugna adversus peccatum uti malum Dei super omnia dilecti: hinc continua Justi pœnitentia & animi dejectio pro quotidianis peccatis, quæ etsi minuere conetur, omnia tamen cavere non prævalet: hinc denique pia commiseratio erga proximum delinquentem, fervens studium illius emendationis, & ubi videt crescere scandala ex intimo cordis dolore dicit cum Propheta Psal. 118. *Vidi prævaricantes, & tabescebam; & Psalm. 138. Perfecto odio oderam illos, & inimici facti sunt mihi.* S. quoque Aug. Præfat. in Psal. 69. de ejusmodi scandalis, ait: *Inter hæc gemimus, & hæc persecutio nostra est, si est in nobis charitas, quin addit fortasse sæviorem ea, quam passi sunt Martyres.* Ne ergo sibi blandiantur, quasi Deum diligant, qui ad animi oblectationem familiariter convivunt cum voluptuosis & rerum fluxarum cupidis; quæ enim societas luci ad tenebras, charitati ad cupiditatem? An ignorant scriptum Jac. 4. *Quia amicitia hujus mundi inimica est Deo? quicunque*

*cunque ergo voluerit amicus esse hujus sæculi, inimicus Dei constituitur.*

Q. 8. *Pax estne proprius effectus charitatis?*

R. Ita est proprius ut sine ea haberi non possit; quia pax ex ordine efflorescit, definiturque à S. August. Lib. 19. de Civit. Dei c. 13. *tranquillitas ordinis*, pax corporis, ut ibidem advertit S. Doctor, est ordinata temperatura partium: pax domus aut civitatis, ordinata imperandi atque obediendi concordia cohabitantium. Subvertatur autem ordo, mox sequitur discordia & tumultuatio in familia & in civitate: vel os unum moveatur è sede sua, nulla corporis requies; atqui ex omnibus virtutibus sola charitas ubique ponit ordinem; namque 1. hominem Deo subjicit, singulos ejus affectus in illum colligit & refert, ut homo sit unius cum Deo voluntatis, & ita pacem ad Deum habeat, ut dicitur Rom. 5. vers. 1. 2. homo per charitatem jam subditus Deo secundum mentem, per eandem virtutem habet, ut moderetur animo suo, cohibeatque reluctantes cupiditates suas; quia sicut justitiæ fuit, ut qui peccando obtemperare noluit Superiori, Deo scilicet, inferiorem suum, nempe carnem, inobedientem pateretur; *neque enim imperare inferioribus potest, nisi superiori se subjiciat*, inquit S. August. Lib. 1. de Serm. Domini in Monte cap. 2. ita consequens videbatur, ut pacifici cum Deo, in nobis ipsis pacem haberemus; *nam si te regit superior, non te cruciat & affligit inferior: & si Deo conjunctus ieris, diabolus non timebis; quia sub tali Rege militas, ut de victoria dubitare non possis.* 3. Nihil desiderari potest ordini, quem charitas servat erga proximum, quam ea benevolentia, qua nos ipsos diligimus,  
parati



parati & quæ nostra sunt amittere, ubi necessum fuerit, pro corporis ejus salute, & nostrum etiam sanguinem fundere pro æterna illius beatitudine, ut latius exposuimus capite præcedenti. Quid autem ulterius expeti potest, quam ut homo charitate instructus cum proximo tranquillam vitam agat, & cum omnibus (quantum in ipso est) pacem habeat? Ex quibus S. Thomas q. 29. art. 4. in hæc verba concludit, *non est alia virtus, cujus pax sit actus proprius, nisi charitas.*

Dixi, *quantum in ipso est*; quia pax non est impiis, neque ab impiis, qui, ut omnem pervertunt ordinem, nec quiescere possunt, nec alios lacerare desinunt; sed dum foris justos exagitant, hi pacem intus servant, & sibi adversantes quovis modo conciliare satagunt, juxta illud Psal. 119. *cum his, qui oderunt pacem, eram pacificus*; charitas quippe *patiens est, benigna est, non irritatur, omnia suffert, omnia sperat*, scilicet meliora etiam de nequissimis.

Dices: Christus, qui vult ignem charitatis vehementer ardere, Luc. 12. nihilominus ait Matth. 10. *non veni pacem mittere, sed gladium*: Ergo pax non est effectus charitatis.

Distinguo antec. Christus venit mittere gladium in vitia, Medicorum more, qui morbo non parcunt, ut corpus doloribus vexatum, pristinae sanitati, & tranquillitati restituant, Concedo: in ipsas peccantium personas, Nego ant. *Venit enim Filius hominis quærere, & salvum facere quod perierat.* Luc. 19. v. 10. Itaque plurimum interest inter cupiditatem & charitatem. Illa non distinguit inter amicum & ejus vitia; nec inter inimicum & ejus virtutes. Amici hujus sæculi vulgo excusant,

excusant, amant, laudant amicorum vitia ; contra verò fugillant inimicorum virtutes , ut dum peccator laudatur in desideriis animæ suæ , quietam vitam agat, eò sanè miserior, quò non dolet amissam justitiam ; namque ex S. August. Lib. 9. de Civit. Dei c. 13. *Qui peccat, pejor est, si lætatur in damno æquitatis.* Quamobrem charitas, cujus ignem vult Christus vehementer accendi, perniciosam illam pacem veluti lethiferum letargici somnum amovere nititur, ut ipsum hominem salvet. Cogita quid agat filiorum pietas erga charissimum patrem letargico somno oppressum, quomodo illum vexent, pungant, vellicent ; irascitur ille, inhumanos & crudeles inclamat, quos valetudine confirmata, pios ac beneficos laudabit. Ita se habet charitas Pastoris, qui vocatur ad regendam plebem, apud quam contractus usurarii, injusti, & alia hujusmodi illicita obtinuerunt, tanquam licita, ex diuturno & communi omnium usu exitialem plebis pacem perturbat, gladium Spiritus (quod est verbum Dei, Eph. 6.) assumit adversus depravatos illos mores. Conqueruntur incolæ, Pastorem infamant tanquam publicæ pacis perturbatorem : & ita oportet fieri (modò prudenter) donec rebus in debitum ordinem adductis, pax vera, quæ est genuinus justitiæ fructus, stabiliatur.

## §. II.

## De Eleemosyna.

Q. I. *Extatne præceptum Eleemosynæ faciendæ ?*

R. Extat tum naturale, tum divinum positivum.

Prima pars, quæ est de præcepto naturali, sequitur ex dictis c. 3. de necessitate charitatis ; ex  
iis

iis enim constat nos teneri lege naturali amare amore benevolentiae & amicitiae omnes homines, etiam inimicos : atqui amare amore amicitiae est bene velle, & facere, quantum in nobis est : Ergo lege naturali tenemur non solum optare, ut proximus non indigeat, sed etiam ipsi indigenti opem ferre, si facultas adsit.

Secunda pars probatur 1. ex Scriptura, Jo. 3. v. 18. *Non diligamus verbo, neque lingua, sed opere & veritate. In hoc cognoscimus, quoniam ex veritate sumus.* Jac. 2. v. 13. *Judicium . . . sine misericordia illi, qui non fecit misericordiam.* Quæ sanè verba non consilium, sed præceptum indicant, Luc. 6. v. 37. & 38. *Dimittite, & dimittentur vobis, date & dabitur vobis . . . eadem quippe mensura, qua mensi fueritis, remetietur vobis.* In quem locum S. Aug. Serm. 42. & aliàs Hom. 29. sic loquitur : *Sacrificium Christiani est eleemosyna in pauperem, hinc enim fit Deus peccatis propitius : nisi autem peccatis propitius fiat Deus, quis remanet nisi reus ? Ab eis peccatis & delictis, sine quibus vita illa non ducitur, mundantur homines per eleemosynas, quæ sunt duorum generum, erogando & remittendo ; erogando quod habes bonum, & remittendo quod pateris malum . . . remitte, & remittetur vobis, pertinet ad ignoscendum : date, & dabitur vobis, pertinet ad erogandum.* Denique supremus ipse Judex nos præmonuit Matth. 25. quam judicii formam instituturus sit, cum venerit judicare vivos & mortuos, nempe separabit electos à reprobis, tanquam oves ab hædis : illos constituet à dextris, istos à sinistris ; dicetque iis, qui à sinistris erunt : *Discedite à me maledicti in ignem æternum, moxque causam subjungit, esurivi enim, & non dedistis mihi manducare.* Non exprobrat furta, rapinas, adulteria, homicidia, quia etsi ab iis se  
 conti-

continuerint, fatis est ad æternum supplicium quoddam misericordiam pauperibus non exhibuerint; quemadmodum nec eorum, qui à dextris erunt, laudabit fidem, æquitatem, Religionem, castitatem, & alia ejusmodi præmio digna: sed charitatem in pauperes, ut intelligamus sine oleo misericordiæ nemini, etiam aliis virtutibus prædito, patere januam regni cœlestis. Ex quibus perspicuum est illud præceptum obligare sub mortali; nullus enim excludetur à regno cœlorum ob peccata venialia.

Probatur 2. ex sanctis Patribus. S. Basiliius Ser. ad divites avaros: *est panis famelici, inquit, quem tu tenes, nudi tunica, quam in conclavi conservas, discalceati calceus, qui penes te marcescit, indigentis argentum, quod possides inhumatum. Quocirca tot pauperibus injuriam facis, quot dare valens es.* S. Hieronymus Epist. ad Hebidiam, *si plus habes quàm ad victum vestitumque necesse est, illud eroga, & in illo debitorem esse te noveris.*

Q. 2. Quando & quanta præcepto eroganda est elemosyna?

R. Quando & quantum proximus indiget, nosque possumus ei suppetias ferre juxta ordinem charitatis à nobis descriptum capite præcedenti, nimirum in extrema ejus necessitate ei succurrendum ex bonis nostris propriæ vitæ superfluis: in gravi necessitate ex bonis statui nostro absolute non necessariis, quamvis commodis, v. g. detrahendo aliquid de suppellectili, de ornatu vestium, de lautioribus cibis, &c. In communi denique necessitate ex bonis statui nostro superfluis, quæ alioquin vel frustra coacervaremus, vel in expensas inutiles consumeremus.

Probata est responsio capite præcedenti.

Confir.



Confirmatur 1. ex censura primùm lata ab Academia Lovaniensi anno 1657. deinde ab Innocentio XI. anno 1657. ac demum à Clero Gallicano anno 1700. in hancce quorundam Modernorum propositionem in Ecclesia hætenus inauditam, *vix in sæcularibus invenias, etiam in Regibus superfluum statui: & ita vix aliquis tenetur ad eleemosynam, quando tenetur tantum ex superfluo statui.* Hæc propositio unum supponit tanquam verissimum, & ab omnibus receptum, scilicet proximo, in gravi necessitate constituto opitulandum, etiam ex iis, quæ statui nostro sunt commoda, & aliquatenus necessaria, ac proinde reos esse gravioris peccati qui tempore publicæ famis nihil de suo statu minuunt ad alendos pauperes.

Duo autem negat; primum, vix in sæcularibus etiam in primariis inveniri superflui, adeo ut quilibet sumptus ad luxum & delicias sint illis concedendi: alterum ejusmodi homines ordinariè non teneri ad eleemosynam, quando necessitas proximi est duntaxat communis. Utrumque autem laudata censura præstringitur. *Hæc propositio, inquit Antistites Gallicani, est temeraria, scandalosa, perniciofa, erronea, Evangelicum de eleemosyna præceptum pessundat.*

Confirmatur 2. necessitas ea dicitur communis, in qua proximus tenuiter vivit, non quidem ex propriis facultatibus, ut qui nullas habeat, neque ex labore, cum fractus sit viribus; sed aliorum ope & subsidio. Et hæc est fors mendicorum, & aliorum benemultorum, qui mendicare erubescunt. Atqui nisi succurratur saltem ex bonis statui superfluis ejusmodi egenis, qui in Republica sunt in magno numero, eorum necessitas,

divitum ope duntaxat communis, manifestè evadet extrema, & omnes fame & miseria peribunt. Ergo omnes & singuli sub gravi peccato tenentur ex bonis superfluis antevertere extremam egenorum necessitatem, alioquin ineluctabilem; ac proinde graviter peccant, qui obtentu honesti & elegantis status, vel fallaci futuræ necessitatis umbra, superflua sua vanitati ac luxuriæ impendunt, aut avaritiæ accumulunt.

Eadem ratio urgetur amplius, vel enim nullus, vel omnes & singuli ex superfluo tenentur juvare proximum in communi necessitate constitutum; primum nemo concesserit; quia egeni, qui non vivunt nisi aliorum ope, certò certius interirent, si nullus eis opem ferret. Secundum autem admittatur necesse est; cur enim unus præ alio superflua erogare teneretur? Si Respublica collectivè sumpta tenetur suppeditare victum & vestitum iis qui sibi comparare nequeunt, annon singuli tanquam ejusdem corporis membra ad necessarium illud misericordiæ opus, saltem ex superfluo conferre debent? Enimverò Magistratus ubi cives minus liberaliter egenis subministrant, tanquam ministri Dei, cui derelictus est pauper, summam pecuniæ in subsidium pauperum singulis imponunt, exiguntque veluti rem pauperibus debitam. Porro ejusmodi civilis disciplina supponit debitum in unoquoque cive; alioquin esset injusta; nec enim licet transferre unius bona in alterum, cui ille nihil debet. Hinc S. August. vel quivis auctor Hom. 47. nunc Serm. 310. in Appendice, Deum habenti superflua sic inducit loquentem: *Plus tibi dedi, ut haberes unde pauperi dares; pauperi non dedi ob hoc, ut te probarem; non quia ambobus*

*ambobus non habui unde darem, sed per pauperem volui te probare. Ego sum qui divitem & pauperem feci, prerogatore te constitui in bonis meis . . . Quid tibi soli vindicas, quod ambobus dedi? Quare tu solus comedis, quod ambobus creavi? Quasi tuo labori hoc assignas, & tuum esse putas? Aufero auxilium meum, babe laborem tuum: aufero misericordiam meam, & tunc apparebit miseria tua. Et S. Basilii cit. Serm. ad divites: Si fateris ea tibi divinitus provenisse (bona temporalia) an injustus est Deus inæqualiter res nobis distribuens? Cur tu abundas, ille verò mendicat, nisi, ut tu bonæ dispensationis merita consequaris, ille verò patientiæ bra-viis decoretur? Aliàs injusta foret rerum divisio, ut docet S. Thomas 2. 2. qu. 66. art. 7.*

Dices 1. ex S. Thoma, eleemosyna est consilii duntaxat extra casum extremæ necessitatis; sic enim scribit qu. 32. art. 5. *dare eleemosynam de superfluo est in præcepto, & dare eleemosynam ei, qui est in extrema necessitate. Alias autem eleemosynas dare est in consilio: Ergo.*

Nego antec. Sanctus enim Doctor non vult necesse esse ad inducendam obligationem erogandæ eleemosynæ, ut duo illa simul concurrant, scilicet superfluum ex parte dantis, & extrema necessitas ex parte accipientis; sed statuit obligationem illam repetendam ex alterutro capite, ut patet ex ejus responsione ad secundum, ubi sic habet: *Bona temporalia, quæ homini divinitus dantur, ejus quidem sunt quantum ad proprietatem, sed quantum ad usum non solum debent esse ejus, sed etiam aliorum, qui ex iis sustentari possunt ex eo quod ei superfluit.*

Dices 2. Rigidior est ejusmodi sententia, utpote quæ damnet plerosque divites, & eorum Confessarios: Ergo.

Nego anteced. Quid enim rigidius habet nostra sententia, quàm illud præceptum, *diliges proximum tuum sicut teipsum*, quod non impletur, ut patet ex dictis, nisi proximo bene velimus & faciamus, quantum in nobis est, quando ille nostra ope indiget; *Ad dilectionem proximi pertinet*, inquit S. Thomas cit. art. 5. *ut proximo non solum velimus bonum, sed etiam operemur secundum illud*, 1. Joan. 3. Non diligamus verbo, neque lingua, sed opere & veritate. Illud ipsum ratio naturalis docuit Philosophos Ethnicos, ex quorum schola hancce definitionem cap. 10. protulimus, *amare est bene velle & facere alteri, quantum in nobis est, ipsius gratia*.

Quod opponitur ex moribus & agendi ratione quamplurimorum divitum, nullius est momenti; eosdem enim ipsos non magis in gravi & extrema necessitate pauperibus opitulari experti sumus paucis abhinc annis, cum pauperes ubique fame interirent; namque divites illi nihil quidquam de status sui ornatu & elegantia detraxerunt, quamvis ex constanti omnium sententia ad id sub mortali tenerentur. Meminerint autem Confessarii, qui ista non vident, aut videre se dissimulant, scriptum esse Matth. 15. vers. 14. *Cæcus autem si cæco ducatum præstet, ambo in foveam cadunt*, scilicet, & qui ducit, & qui ducitur.

Cæterum difficilius est figere quantum quisque, præsertim si sit paterfamilias, erogare debeat in communi necessitate, quàm in gravi aut extrema; in communi quippe necessitate divites, ut diximus, ex præcepto tenentur erogare duntaxat superflua suo statui; atqui ex S. Thoma qu. 32. art. 6. *necessarium status non consistit in indivi-*  
sibili,



sibili, plura enim requiruntur ad sustinenda onera familiæ, dotandas filias, honestè collocandos liberos, prospicienda sunt, quæ frequentius accidunt incommoda, ut morbi, bella, agrorum sterilitas. Dico, *frequentius*; nam ex S. Thoma quæst. 33. art. 5. ad 3. *Nec oportet quod consideret ad omnes casus, qui possunt contingere in futurum, hoc enim esset de crastino cogitare, quod Dominus prohibet Matth. 6. Sed debent dijudicari superfluum & necessarium secundum ea quæ probabiliter, & ut in pluribus occurrunt.* Inter necessaria statui computantur etiam ea, sine quibus non servaretur decorum, quod status postulat, non quidem mundanorum iudicio, sed sapientium; *Nullus quidem inconvenienter vivere debet,* inquit idem S. Doctor, art. 5. ejusdem qu. 32. sed inanis gloriæ & rerum fluxarum cupidis nihil videtur superfluum, imò nunquam satis, privatus v. gr. qui hætenus vixit decenter, auctus ampla hæreditate, pingui beneficio, largior non est in pauperes, sed profusior in sua commoda. Similiter paterfamilias orbatus filio, quem cum aliis sustentabat prout statum ejus decebat, partem defuncti superfluum & pauperibus dividendam non reputat, sed tanquam superstitibus necessariam servat. His & similibus argumentis sanctus Augustinus & alii Patres revincunt divites, qui cupiditatem & cordis duritiam velamine pietatis obtegere solent.

Q. 3. *Quinam sunt eleemosynæ fructus?*

R. Eleemosyna, quæ ex vera Charitate in Deum & proximum procedit, 1. Liberat à peccatis etiam gravioribus, Tob. 4. *Eleemosyna ab omni peccato & à morte liberat, & non patietur animam ire in tenebras,* Eccli. 3. vers. 33. *Ignem ardentem*

extinguit aqua, & eleemosyna resistit peccatis. 2. Purgat à quotidianis delictis, Luc. 11. vers. 41. *Date eleemosynam, & ecce omnia munda sunt vobis.* Unde sanctus Cyprianus Serm. de eleemos. *Sicut lavacro aquæ salutaris, inquit, gebennæ ignis extinguitur; ita eleemosynis atque operibus justis delictorum flamma sopitur. Et quia semel in Baptismo remissio peccatorum datur, assidua & jugis operatio, Baptismi instar, Dei rursus indulgentiam largitur.* 3. Debita ex peccatis contracta, seu reatum pœnæ, dissolvit & expungit, Dan. 4. *Peccata tua eleemosynis redime.* Ecclesia hætenus eleemosynam inter opera satisfactoria numeravit, eamque orationi & jejunijs semper adjunxit, juxta illud Tobiae 12. *Bona est oratio cum jejunijs & eleemosyna, quo ostenditur deprecationes solas parùm ad impetrandum valere,* inquit S. Cyprianus citat. Serm. de eleem. *Nisi factorum & operum accessione satientur; neque enim promereri misericordiam Domini poterit, qui misericors ipse non fuerit, aut impetrabit de divina pietate aliquid in precibus, qui ad precem pauperis non fuerit humanus.* 4. Eleemosyna non solum liberat à malis sed insuper omni bonorum genere abundare facit, Luc. 6. *date, & dabitur vobis.* Proverb. 19. *fœneratur Domino, qui miseretur pauperis.* In quem locum S. Ambrosius sic scribit Lib. de Tobia cap. 16. *Fœnerate ergo Domino pecuniam vestram in manu pauperis. Ille astringitur & tenetur: ille scribit quidquid egenus acceperit: Evangelium ejus cautio est . . . ille dicit fidem, quid dubitatis dare? si quis vobis dives hujus sæculi offeratur, qui fide promittat sua pro aliquo debitore, statim numeratis pecuniam, &c.* Quid autem pro eleemosyna Deus se repensurum promittat, lege ejus chirographum, sacram scilicet Scripturam: 1. Pro mercede

cede invenis regnum cœlorum, Matth. 25. *Possidete paratum vobis regnum . . . esurivi enim, & dedistis mihi manducare. Quod expendens S. Augustinus enarr. in Psal. 102. Vide, inquit, quid emas, quando emis, quanti emas; emis enim regnum cœlorum; & non est emendi tempus, nisi in hac vita. Et quàm vili emas, attende. Tanti tibi valet, quantum habere potueris. Et sanctus Leo Serm. 8. de Collectis, cibus egeni regni cœlestis est pretium. Et largitor temporalium hæres efficitur æternorum. Unde autem exigua ista impendia tanta æstinari taxatione potuerunt? nisi quia pondera operum Charitatis lance pensantur, cùm amatur ab homine quod Deus diligit, meritò in ejus ascenditur regnum, in cujus transitur affectum.* 2. Scriptura cautio est pro temporalibus etiam bonis in hac vita multiplicandis, 2. Cor. 9. vers. 10. *Qui autem administrat semen seminanti, & panem ad manducandum præstabit, & multiplicabit semen vestrum, & augebit incrementa frugum justitiæ vestræ.* Sensus est: qui eleemosynam tribuit, more seminantis spargit opes suas in manibus pauperum, tanquam in agro fertili: videntur incredulis & insipientibus perire, sed permanent & fructificant, quemadmodum semina in terram jacta uberiore fructu succrescunt. Si verbo Dei scripto non credis, quid facit in domo fides perfidum pectus? Verba sunt sancti Cypriani cit: Serm. de Eleemosyna. *Quid, qui Christo omnino non credit, appellatur & dicitur Christianus? Et infra: retardat te numerositas filiorum . . . atqui hoc ipso operari amplius debes quò multorum pignorum pater es, plures sunt pro quibus Deum depreceris . . . Si ergo verè filios tuos diligis, si eis exhibes plenam & paternam dulcedinem Charitatis, operari magis debes, ut Filios tuos Deo justa operatione commendes . . . Illi assi-*

*gna facultates tuas, quas hæredibus servas : ille sit liberis tuis tutor , ille contra omnes injurias sæculares divina majestate protector. In tuto hæreditas ponitur, quæ Deo custode servatur. Hoc est charis pignoribus in posterum providere. Scriptum quippe est Psal. 36. de Patre misericorde, tota die miseretur & commodat, & semen ejus in benedictione erit Unde concludit idem sanctus Martyr : prævaricator itaque & proditor pater es, nisi filiis tuis fideliter consulas, nisi conservandis eis Religiosa & vera pietate prospicias. Confirmant suam sententiam exemplo viduæ, quæ 3. Reg. cap. 17. Filiis suis abundè prospexit, ex iis quæ Eliæ misericorditer subministravit, nec filiis, inquit, abstulit mater, quod Eliæ dedit : sed magis filiis contulit, quod benignè & piè fecit.*

*Dixi in responsione, quæ ex vera Charitate in Deum & proximum procedit, contra absurdum eorum errorem, qui, ut refert S. August. ex Scripturis malè intellectis colligebant, divites eleemosynis salvatum iri absque mandatorum observatione, & pecunia sua quasi emere licentiam peccandi : Non se fallant, inquit S. Doctor Enchir. cap. 77. qui per eleemosynas quaslibet largissimas fructuum suorum, vel cujuscunque pecuniæ impunitatem se emere existimant in facinorum suorum immanitate ac flagitiorum nequitia permanendo . . . , qui diligit iniquitatem, odit animam suam, & qui odit animam suam, non est misericors, sed crudelis . . . . Si ergo vellet ei dare eleemosynam, per quam munda illi essent omnia, odisset eam secundum sæculum, & diligeret eam secundum Deum. Anima autem sic rectè diligens, hoc est propter Deum, rectè quoque diligit proximum sicut seipsum, id est propter Deum; & eleemosyna ex illo affectu data, liberat à morte, & jus tribuit ad regnum cælorum.*

*Eleemo-*



*Eleemosynæ ergo, pergit idem sanctus Doctor Hom. 19. nunc Serm. 388. possunt tibi prodesse ad delenda peccata præterita, si mores mutaveris. Si autem in eisdem malis perseveraveris, eleemosynis tuis non corrumpes iudicium Dei. Et Hom. 2. nunc in appendice Serm. 53. Noli tibi pingere talem Deum; noli collocare in templo cordis tui tale idolum. Non est talis Deus tuus, qualis non debes esse nec tu.*

Eleemosyna tamen peccatoris pœnitentis ad obtinendam morum emendationem, & justificationis gratiam, quamvis non sit meritoria vitæ æternæ, plurimum tamen valet ad flectendam Dei misericordiam, ut constat ex dictis ubi de merito.

Q. 4. *Ex quibus bonis danda est eleemosyna?*

R. Ex bonis propriis, & aliàs non debitis, de quibus liceat nobis disponere; scriptum quippe est Tob. 4. *Ex substantia tua fac eleemosynam.* Et Eccli. 34. *Dona inimicorum non probat Altissimus . . . Qui offert sacrificium ex substantia pauperis, quasi qui vitimat filium suum in conspectu patris sui.* Et S. Augustinus Serm. 113. aliàs 35. de Verbis Domini; *De justis, inquit, laboribus facit eleemosynas: ex eo quod rectè habetis, date: non enim correpturi estis Iudicem Christum.*

Ergo Religiosus extra casum extremæ necessitatis, in quo omnia communia esse diximus, licet non potest eleemosynas erogare sine consensu Superioris; quia nihil habet proximum. Præsumitur autem Superior consentire in iis circumstantiis, in quibus Religiosus extra monasterium divertens, malo exemplo esset si non erogaret.

Idem dicendum de uxore, quæ non habet bona paraphernalia; quamvis enim bona dotalia sint ipsi propria, horum tamen administratio per-

tinet ad maritum, ac proinde sine ejus consensu non licet ei eleemosynas facere, nisi eas quæ decent ejus statum, & conditionem habita ratione rei familiaris. Plura erogare poterit, si ex eis, quæ maritus concedit in proprios usus, quædam sibi subtrahat in pauperum subsidium. Idem quoque judicium esto de filiofamilias. Sed de his iterum, Tract. de Justitia & Jure.

Dixi: *Et aliàs non debitis*; Qui enim obligatur ære alieno, tenetur prius liberare se, quàm eleemosynas dare in incommodum creditorum, nisi tanta esset proximi necessitas, ut ipsimet creditores tenerentur ei succurrere; in illa quippe hypothefi non censerentur rationabiliter inviti, quòd debiti solutio differretur.

Dices 1. Qui injustè collegerunt, nec inveniunt quibus restituant, tenentur bona sic acquisita distribuere pauperibus: Ergo eleemosyna licitè fieri potest ex bonis aliàs debitis.

Nego consequ. Illa quippe erogatio eleemosyna non est, sed vera restitutio, utpote opus strictæ justitiæ, non verò misericordiæ. Injustè ergo ambiunt vocari misericordes ac benefici, qui ex bonis malè partis Ecclesias aut Xenodochia dotant; ista opera non minùs sunt monimenta præteritarum rapinarum, unde erubescere & deijci deberent, quàm præsentis satisfactionis ac pœnitentiæ quæ laudem non meretur, nec mercedem, si ex appetitu inanis gloriæ procedat.

Dices 2. Si eleemosyna non sit eroganda, nisi ex bonis propriis, & aliunde nemo sine operibus misericordiæ ingressurus sit in regnum cœlorum, pauperes qui nihil habent unde tribuant, de salute

late desperare debent: atqui consequens longe est absurdissimum: Ergo & antecedens.

Nego maj. Namque ex S. Thoma q. 32. art. 2. multiplex est eleemosynæ genus: alia respicit corpus, alia animam. Eleemosynæ corporalis actus sunt visitare infirmos, aut carcere detentos, cibum & potum præbere esurientibus & sitientibus, redimere captivos, vestire nudos, colligere & excipere hospites, condere, seu sepelire mortuos, quæ continentur sequenti versiculo.

*Visito, potō, cibo, redimo, tego, colligo, condo.*

Ad eleemosynam autem spiritualem pertinet docere proximum, eique consilium dare, delinquentem corrigere, afflictum aut tristem consolari, remittere offensam si in nos peccaverit, patienter & benignè ferre ejus defectus, apud Deum pro illo intercedere, ut habetur versu sequenti.

*Consule, castiga, solare, remitte, fer, ora.*

Porro quilibet etiam pauperrimus, aliquo ex his misericordiæ operibus proximum recreare potest: Nullus est, inquit S. Gregorius Hom. 9. in Evang. qui veraciter dicat, talentum minimè accepi, non est unde rationes ponere cogar. Talenti enim cuilibet pauperi etiam hoc ipsum reputabitur, quod vel minimum accepit . . . habens ergo intellectum curet omnino ne taceat (cùm scilicet proximus doctrina aut consilio indiget) habens rerum affluentiam vigilet ne à misericordiæ largitate torpescat: habens autem, qua regitur, magnopere

gnoscere studeat , ut usum atque utilitatem illius cum proximo partiatur : habens loquendi locum apud divitem , damnationem pro retento talento timeas , si , cum valet , non apud eum pro pauperibus intercedit. Et sanctus Augustinus in Psalm. 125. Si non habes , inquit , noli esse tristis , si est tibi bona voluntas . . . . Nunquid dixerunt Angeli , pax in terra divitibus hominibus ? sed , pax in terra hominibus bonæ voluntatis . . . . vidua illa , quæ duo minuta misit , parum seminavit , imò tantum quantum Zachæus ; minores enim facultates ferebat , sed parem voluntatem habebat . . . calix aquæ frigidaë , non duobus nummis , sed gratis constat ; tamen sic gratis constat , ut habeat illum alius , & alius non habeat : si ergo ille qui illum habet , dedit illi qui non habet , tantum dedit , si de plena Charitate dedit quod dedit , quantum illa in duobus minutis , quantum Zachæus in dimidio rerum suarum . . . . Quid si nec hoc habeat ? securus sit , pax in terra hominibus bonæ voluntatis. Charitas non potest esse otiosa aut infœcunda , est arbor illa bona , quæ bonos fructus facit : aut commiseratione cor movet super malis proximi , & pro illo precatur : aut membra accommodat , ut debilem sustentet : aut linguam adhibet , ut irati dolorem leniat , vel errantem revocet , corrigat , adhortetur , & plus est , quàm si pecuniam largiretur. Ista præsertim inculcari debent pauperibus , qui vulgo ita occupantur propriis miseriis , ut alienis nedum tangantur , quin invideant , si quis alteri similiter patienti opituletur.



## §. III.

*De Correctione fraterna.*

**D**uplex est correctio: alia judicialis, seu juridica, quæ fit cum auctoritate, tenditque non solum ad emendationem delinquentis, sed etiam ad vindictam & pœnam infligendam, estque actus justitiæ saltem latius sumptæ pro fidelitate, qua Superiores ex officio tenentur subditos in ordine continere, & ad bonum promovere. Altera correctio dicitur fraterna; quia per eam proximum fraternè, hoc est, motivo misericordiæ & charitatis à peccato revocare nitimur. Prior competit solis Superioribus: posterior verò eisdem spectat, quos præceptum misericordiæ & charitatis; sicut enim per eleemosynam succurrimus corporali indigentia proximi, ita per correctionem fraternam spirituali ejus miseriæ. Hæc distinctio duplicis correctionis imprimis notanda est propter eos, qui obtrudere non desinunt, Superiorum esse peccantes corrigere, non inferiorum, aut æqualium, quod verum est de correctione juridica, de qua hic non agimus, sed de fraterna duntaxat, circa quam

*Q. I. Correctio fraterna estne necessaria necessitate præcepti?*

**R.** Est necessaria necessitate præcepti tum naturalis, tum divini positivi, tum Ecclesiastici. Ita omnes Theologi post S. Thomam qu. 33. art. 2.

Prima pars, quæ est de præcepto naturali, probatur, quia diligere Deum ex toto corde, est primum & maximum legis naturalis præceptum: secundum verò, diligere proximum sicut seipsum,

*in his duobus mandatis universa Lex pendet & Propheta*, Matth. 22. Atqui cum diligere ex sæpius dictis sit bene velle & bene facere dilecto, primum & maximè necessarium officium dilectionis est amovere malum à dilecto; neque enim filius ita efficaciter argueretur non amare patrem, ex eo quòd commodiora quæque ei non procuraret, quàm si eum liberaret, cum faciliè posset, à malis, quibus premitur. Porro peccatum lethale est grave malum, tum Dei, utpote gravis ejus offensa, tum proximi, cum spiritualiter occidat ejus animam, & reatum æternæ damnationis inducat: Ergo lege naturali tenemur revocare proximum à peccato, cum id fieri potest per correctionem fraternam.

Confirmatur. Jure naturali tenemur per elemosynam subvenire proximo corporaliter indigenti: ergo à fortiori per correctionem spiritualiter indigenti: nam potior cura habenda est animæ, quàm corporis, cum propter illius salutem vita corporis aliquando sit amittenda. Illud ipsum agnoverunt Philosophi Gentiles, ut patet ex Lib. 9. Ethic. cap. 3. ubi legitur magis in moribus, quam in facultatibus ferendum esse auxilium. Unde sanctus Bernardus Lib. 4. de Considerat. cap. 6. meritò de Christianis conqueritur in hæc verba: *Cadit asina, & est qui sublevet: perit anima, & nemo est, qui reputet.*

Dices: Præceptum charitatis non obligat nisi in proximi necessitate: atqui proximus nullam patitur peccandi necessitatem; peccatum enim adeò est voluntarium, inquit sanctus Augustinus, ut nisi voluntarium fuerit, peccatum non sit: Ergo nulla est obligatio illum revocandi à sordibus

bus peccati, in quibus voluntariè & liberè voluntur. Quis enim dixerit erogandam esse eleemosynam homini fame laboranti ex sola inertia?

Nego minor. Multùm erras, inquit S. Augustinus Julianum Pelagianum alloquens, qui nullam putas peccandi necessitatem; solus Pelagianus negaverit necessarium Dei auxilium ad vincendas tentationes, quas patimur ex ignorantia, ex infirmitate naturæ lapsæ, & ex duritia cordis, quæ parit peccata malitiæ. Eleemosyna quidem est deneganda homini otioso, qui labore suo victum & vestitum facilè sibi comparare potest, ne videamur fovere ejus inertiam; *Si quis non vult operari, nec manducet*, inquit Apostolus 2. Thessal. 3. & S. Augustinus Epist. 93. aliàs 48. *Utilius panis esurienti tollitur, si de cibo securus justitiam negligat, quàm esurienti panis frangitur, ut injustitiæ seductus acquiescat.* Sed ejusmodi homini fraterna correctio est adhibenda, ut à peccato, Deo interiùs operante, resipiscat; quamvis enim humana subsidia per se non sufficiant ad aliorum emendationem, Deus tamen iis utitur, vultque à nobis adhiberi, ut constat tum ex Ezech. 33. v. 8. ubi Pastori ait: *Si me dicente ad impium: Impie, morte morieris, non fueris locutus, ut se custodiat impius à via sua, ipse impius in iniquitate sua morietur; sanguinem autem ejus de manu tua requiram;* tum ex textibus pro secunda nostræ responsionis parte mox afferendis, in quibus speciatim præcipitur correctio fraterna. Itaque

Secunda pars, quæ est de præcepto divino positivo, probatur tum ex veteri, tum ex novo Testamento. Ex veteri quidem, nam habetur Levit. 19. *Non oderis fratrem tuum in corde tuo, sed publice*

*blicè argue eum, ne habeas super illo peccatum. Eccli. 19. Corripe amicum, ne fortè non intellexerit . . . . corripe proximum . . . . ne fortè iteret : corripe amicum : sæpe enim fit commissio. In novo quoque Testamento pluribus in locis præcipitur correctio fraterna. Epist. S. Judæ: Hoc quidem arguite judicatos, illos verò salvate de igne rapientes. 2. Thessal. 3. Si quis non obedit verbo nostro . . . ne commisceamini cum illo, ut confundatur : & nolite quasi inimicum existimare, sed corripite ut fratrem. 1. Thessal. 5. Corripite inquietos. Gal. 6. Si præoccupatus fuerit homo in aliquo delicto, vos, qui spirituales estis, hujusmodi instruite in spiritu lenitatis. Quodd autem hæc verba vim habeant præcepti, patet ex sequentibus : Alter alterius onera portate, & sic adimplebitis Legem Christi. Roman. vers. ult. Qui talia agunt, digni sunt morte ; non solum qui ea faciunt, sed etiam qui consentiunt facientibus. In quem locum Glossa laudata à sancto Thoma 2. 2. qu. 70. art. 1. sic habet : Consentire est tacere, cum possis arguere. Et cap. Facientis, dist. 86. quod refertur ex Joanne VII. Facientis culpam procul dubio habet, qui quod potest corrigere, negligit emendare ; scriptum quippe est, non solum qui faciunt, sed etiam qui consentiunt facientibus, participes judicantur . . . . & negligere, cum possis deturbare perversos, nihil aliud est quàm fovere : nec caret scrupulo consensionis occultæ, qui manifesto sceleri desinit obviare. Sanctus quoque Augustinus Serm. 82. aliàs 16. de verbis Domini : Pejores, inquit de eo, qui negligit corrigere, tacendo, quàm ille convitiando.*

Sed insignis est locus Matth. 18. ubi Christus sic loquitur vers. 15. Si . . . . peccaverit in te frater tuus, vade & corripe eum inter te & ipsum solum. Si te audierit, lucratus eris fratrem tuum. Si autem te

non



non audierit, adhibe tecum adhuc unum vel duos, ut in ore duorum vel trium testium stet omne verbum. Quodsi non audierit eos, dic Ecclesiæ; si autem Ecclesiam non audierit: sit tibi sicut Ethnicus & Publicanus. In nos peccat proximus, 1. quando in Deum patrem nostrum super omnia dilectum peccat; quis enim filius non læditur, nec injuriam sibi factam existimat, cum pater, ipso præsentem, convitiis laceßitur? 2. Quando nos testes, & quasi approbatores iniquitatis suæ facit; scandalum enim nobis præbet. Ita sanctus Augustinus cit. Serm. 82. cap. 7. Peccavit in te frater tuus, inquit, si tu solus nosti, tunc verè in te solum peccavit; nam si multis audientibus tibi fecit injuriam, & in illos peccavit, quos testes suæ iniquitatis effecit . . . . . quando me audiente, fratri meo, quisque injuriam facit, absit ut à me injuriam alienam putem. Prorsus & mihi fecit: imò & mihi plus fecit, cui putavit facere quod fecit. Sed magis ad litteram, & ad mentem Christi eo loci, peccat in nos frater, quando contra nos peccat, & ita intellexit B. Petrus hæc Christi verba, ubi quæsit: Domine, quoties peccabit in me frater meus, & dimittam ei? Jubet autem Dominus corripere contra nos peccantem, non quia nobis injuriam fecit; sed quia lethale vulnus sibi inflixit; subdit enim Christus: Si te audierit, lucratus eris fratrem tuum. Quæ verba expendens sanctus Augustinus laudato Sermone, ait: Quare illum corripis? quia tu doles, quod peccaverit in te? absit: si amore tui id facis, nihil facis. Si amore illius facis, optimè facis. Denique in ipsis verbis attende, cujus amore id facere debeas, utrum tui, an illius? Si te audierit, inquit, lucratus es fratrem tuum: Ergo propter illum fac, ut lucreris illum. Si faciendo lucraris, nisi fecisses, perierat.

D. Habert Theolog. Tom. III. D d d rat.

rat. Quæ posteriora verba 1. supponunt grave peccatum in fratre, non enim periret propter peccatum leve, 2. lethale peccatum arguunt in eo, qui non corripit occasione opportuna. Unde sanctus Doctor concludit, eum pejorem esse delinquente, qui negligit corrigere: *Ille*, inquit, *injuriam fecit, & injuriam faciendo, gravi seipsum vulnere percussit. Tu vulnus fratris tui contemnis? Tu vides eum perire, vel periisse, & negligis? peior es tacendo, quam ille convitiando.* Quando ergo in nos aliquis peccat, habeamus magnam curam, non pro nobis; nam gloriosum est injurias oblivisci, sed obliviscere injuriam tuam, non vulnus fratris tui. Similiter jam scripserat S. Basilii in reg. brev. ubi ad interrogat. 47. *numquid adversus peccantes dissimulatione uti conveniat?* sic respondet, *sanè quòd hoc fieri non debeat, perspicuum est ex præceptis Domini, qui in veteri quidem Testamento dixerit (scil. Lev. 19. juxta aliam versionem) correptione corripies fratrem tuum, & non assumes propter illum peccatum. In Evangelio autem, si peccaverit in te frater, vade & corripe eum.* Mitto alios Patres, qui divinum præceptum in laudatis Christi verbis agnoscunt; ut S. Hilarius, S. Hieronymus in cap. 18. Matth. & sanctum Ambrosium in cap. 17. Lucæ.

Tertia pars, quæ est de præcepto Ecclesiastico, probatur ex laudato cap. *Facientis*, dist. 86. ex cap. *Qui potest*, 23. qu. 3. ex cap. *Ecce*, qu. 4. & ex cap. *Qui alios*, extra. tit. *de Hæreticis*, in quo sic habetur: *Qui alios, cum potest, ab errore non revocat, seipsum errare demonstrat.*

Confirmatur responsio nostra auctoritate Academiæ Parisiensis, ad quam cum delatæ fuissent anno 1665. sequentes propositiones: Prima, *Il-*

le ordo procedendi Evangelicus, neminem obligat ut præceptum, ut communiter accipitur à Theologis pro lege obligante ad mortale peccatum ejus transgressores: Secunda, Frustra excipiuntur tot casus & conditiones ab illo præcepto Evangelico (correctionis fraternæ) quia non datur tale præceptum; cum secundum naturale præceptum charitatis correctio fraterna debeat regulari, &c. Tercio loco ostendetur (quod gravius est) præceptum illud perniciosum fore, nedum utile; de quibus propositionibus hocce judicium tulit sacra Facultas; Doctrina bis propositionibus contenta, falsa est & temeraria, sanctis Patribus contraria, & quatenus dicit fore perniciosum præceptum, si quod foret in Evangelio Matthæi cap. 18. blasphemum. Falsam dicit ejusmodi doctrinam, quia adversatur legi naturali: temerariam, quia pugnat contra communem Theologorum sententiam: blasphemam, quia malè sentit de divino præcepto, illudque asserit fore perniciosum in hypothese quòd daretur, quamvis nihil societati humanæ sit magis salutare ac necessarium.

Enimverò correctio fraterna medetur præsentibus malis, & tuetur à futuris: *Ventus Aquilo*, inquit Sapiens, Prov. 25. v. 23. *dissipat pluvias, & facies tristis linguam detrahentem*; Adde impudicam, blasphemam, & impiam. Ad quid enim tam obscæna, tamque injusta proferuntur in familiaribus congressionibus, nisi in sociorum oblectationem? An quasi per risum stultus operabitur scelus, ut dicitur Prov. 10. peccata sua ut Sodoma prædicaturus est, si familiares amicos id ægrè ferre, & inde erubescere advertat? Ergo correctio fraterna, sive fiat verbo, sive facie tristi, & aliis displicentiæ signis, dissipat linguam detrahentem

& quævis alia mala, non secus ac ventus Aquilo dissipat pluvias.

Ergo tollere è societate humana correctionem fraternam, idem est ac si ligentur venti, quominus flent super terram; quemadmodum enim Deus ventos de thesauris suis produxit, qui tanquam scopæ mundant aërem putridis halitibus & fœtidis vaporibus, quos continuò terra expirat, quique brevi aërem corrumpere, & pestilentiam inducerent: ita per præceptum correctionis fraternæ prospexit integritati morum, qui maximè periclitantur in familiaribus colloquiis, ubi, laxatis quodammodo severioris disciplinæ habenis, è natura per concupiscentiam corrupta ebulliunt plura immunda & illicita, quæ sine correctione fraterna erumpunt in gravia scandala, mores corrumpunt, tranquillitatem publicam perturbant, & fulmina iræ Dei in provincias & regna integra provocant.

Ex iis efficaciter colligit S. Augustinus Lib. 1. de Civit. Dei cap. 9. in vastationibus publicis, quibus Deus nonnunquam temporaliter ulciscitur incolarum flagitia, justè concludi cum auctoribus criminum etiam illos, qui licèt tam nefanda detestentur, timore tamen mundano ea palam improbare, & fraterna charitate arguere prætermiserunt: *Quis tandem, inquit, facile reperitur, qui eosdem ipsos, propter quorum horrendam superbiam, luxuriam, & avaritiam, atque execrabiles iniquitates & impietates, Deus, sicut minando prædixit, conterit terras, sic habeat ut habendi sunt; sic cum eis vivat, ut cum talibus est vivendum? Plerumque enim ab eis docendis, admonendis, aliquando etiam objurgandis & corripiendis malè dissimulatur; vel cum laboris piget, vel*  
*cum*



cum eorum os coram verecundamur offendere, vel cum inimicitias devitamus, ne impediant & noceant in illis temporalibus rebus, siue quas adipisci adhuc appetit nostra cupiditas, siue quas amittere formidat infirmitas: ita ut, quamvis bonis vita malorum displiceat, & ideo cum eis non incidant in illam damnationem, quæ post hanc vitam talibus præparatur, tamen quia propterea peccatis eorum damnabilibus parcent . . . . jure cum eis temporaliter flagellantur, quamvis in æternum minimè puniantur. Et infra: Qua in re non utique parem, sed longè graviolem habent causam, quibus per Prophetam dicitur: Ille quidem in suo peccato morietur, sanguinem autem ejus de manu speculatoris requiram. Ad hoc enim speculatores, hoc est, populorum Præpositi constituti sunt in Ecclesiis, ut non parcant, objurgando peccata. Nec ideo tamen ab hujusmodi culpa penitus alienus est, qui licet præpositus non sit, in eis tamen, quibus vitæ hujus necessitate conjungitur, multa monenda vel arguenda novit & negligit devitans eorum offensiones.

Non nego hypocritas & temerarios occasione hujusce præcepti nonnunquam pacem turbare; sed tolletur de medio præceptum naturale & divinum, putà, *Dominum Deum tuum adorabis*; quia occasione illius non solum Infideles, sed etiam vulgus Christianorum in absurdas ruit superstitiones? Nonne idem ipse Dominus, qui Matth. 7. v. 34. & 35. increpat hypocritas, præcipit Matth. 18. ut proximum corripiamus? *Vade, inquit, & corripe eum.*

Q. 2. Si proximus nos non audierit, tenemurne peccatum illius manifestare alteri, qui possit illum emendare, aut saltem coërcere?

R. Tenemur. 1. Quia sic Christus præcipit laudato c. 18. Matth. Si autem, inquit, te non au-

dierit , adhibe tecum adhuc unum vel duos . . . Quod si non audierit eos , dic Ecclesiæ. 2. Quia Ecclesia Fideles censuris compellit patefacere occulta proximi crimina , quæ vergunt in damnum aliorum : atqui censura , utpote pœna peccati , ferri non potest , nisi in præcepti transgressores : Ergo. 3. Quia communis est SS. Patrum ac Theologorum sententia , teneri nos ad ejusmodi declarationem , quando necessaria est ut proximus vel emendetur , vel coërceatur. S. Augustin. Epist. 236. aliàs 74. ad Deuterium , non vult Subdiaconum ex hæresi Manichæorum redeuntem , ad pœnitentiam admitti , nisi prius manifestaverit , quos novit eadem impietate infectos : *petenti autem pœnitentiæ locum tunc reddatur* , inquit , *si & alios , quos novit illic esse , manifestaverit vobis.* S. Thomas 2. 2. quæst. 70. art. 1. ad 2. docet , præceptum revelandi crimen occultum alteri noxium , præponderare præcepto naturali servandi secretum , *quandoque enim* , inquit , *sunt talia cum ad notitiam hominis venerint ; homo ea manifestare tenetur , puta si pertinent ad corruptionem multitudinis spiritualem , vel corporalem , vel in grave damnum alicujus personæ , vel si quid est aliud hujusmodi , quod quis propalare tenetur , vel testificando , vel denuntiando ; & contra hoc debitum obligari non potest per secreti communissim.* Excipit tamen secretum Confessionis Sacramentalis , quod nullo modo violari debet : Quia , inquit , *hujusmodi non scit ut homo , sed tanquam Dei Minister , & majus est vinculum Sacramenti quolibet hominis præcepto.*

Q. 3. Ordo correctionis fraternæ , Matth. 18. præscriptus estne necessitate præcepti observandus ?

R. Observandus est , nonnullis tamen casibus exceptis , quia hæc Christi verba : *Corripe eum inter*

ter te & ipsum solum . . . si autem te non audierit, adhibe tecum adhuc unum vel duos . . . quodsi non audierit eos, dic Ecclesiae, vim habent præcepti juxta constantem doctrinam SS. Patrum & Theologorum: Corripe eum, inquit S. Augustinus Serm. 82. aliàs 16. de verbis Domini cap. 14. inter te & ipsum solum, intendens correctioni, parcens pudori, fortè enim præ verecundia incipit defendere peccatum suum, & quando vis facere correctionem, facis pejorem. Et cap. 7. Quia secretum fuit, quando in te peccavit, secretum quære, cum corripis quod peccavit. Nam si solus nosti, quia peccavit in te, & eum vis coram omnibus arguere, non es corrector, sed proditor . . . sic agamus, & sic agendum est, non solum quando in nos peccatur, sed quando peccatur ab aliquo ut ab altero nesciatur. In secreto debemus corrigere. Eadem habet S. Hieronymus in laudata verba Matth. 18. Et S. Thomas qu. 33. art. 7. præclare quæstionem solvit his verbis: Medicus corporalis sanitatem ægroto confert, si potest, sine alicujus membri abscissione; si autem non potest, abscindit membrum minus necessarium, ut vita totius conservetur, ita etiam ille, qui studet emendationi fratris, debet, si potest, sic emendare fratrem, quantum ad conscientiam, ut fama ejus conservetur, quæ quidem est utilis ipsi peccanti; non solum in temporalibus, in quibus quantum ad multa homo patitur detrimentum, amissa fama; sed etiam quantum ad spiritualia: quia præ timore infamiae multi à peccato retrahuntur. Unde quando se infamatos conspiciunt, irrefrænate peccant. Sed quia conscientia præferenda est famæ: voluit Dominus, ut saltem cum dispendio famæ, fratris conscientia per publicam denuntiationem à peccato liberetur (quando, scilicet, nos audire noluit.) Unde patet de necessitate præcepti esse, quòd secreta admonitio publicam denuntiationem præcedat.

Dixi: *Nonnullis tamen casibus exceptis*; præscriptus enim correctionis ordo non obligat quatuor in casibus.

Primus, quando crimen est publicum; ait quippe Apostolus 1. Tim. 5. *Peccantes coram omnibus argue, ut & cæteri timorem habeant*; in quem locum sic habet S. Augustinus laudato Serm. 82. cap. 7. *Ipsa corripienda sunt coram omnibus, quæ peccantur coram omnibus: ipsa corripienda sunt secretius, quæ peccantur secretius.* Et rationem affert S. Thomas qu. 33. art. 7. *Quia non est tantum adhibendum remedium ei, qui peccavit, ut rectior fiat, sed etiam aliis, in quorum notitiam devenit, ut non scandalizentur.* Ut autem crimen censeatur publicum, satis non est quod uni aut alteri sit notum, ita ut in judicio probari possit, sed requiritur ut, si non in omnium, saltem in plurium, v. gr. septem sive è communitate, sive è vicinia notitiam venerit. Quis verò nisi superior ejusmodi scandalo mederi potest? Ergo statim ei deferendum est.

Secundus, cum crimen, etsi occultum, vergit in perniciem aliorum; quia, ut advertit sanctus Thomas in quæst. disputatis qu. de corr. art. 2. ad primum, secreta admonitio est periculosa; timendum quippe est, ne admonitus, v. gr. patriæ proditor, fur domesticus, Pastor occultè disseminans errores contra fidem, aut sollicitans mulieres ad turpia, secreta illa monitione cautius se gerat, & minus cogitet crimen emendare, quam occultare, eoque plus noceat, quod adhibita nova cautione, se securiorem existimabit. Quare in ejusmodi casibus magis consulendum est securitati publicæ, & saluti cujusque innocentis, quam



quàm famæ peccatoris. Unde S. Thomas quodlib. II. quæst. 10. art. 1. *Oportet, inquit, ordinem fraternæ correctionis sumere secundum ordinem charitatis; ordo autem charitatis est, ut quis bono proximi præferat commune bonum: item ut velit bonum proximi & conscientiae & famæ; & in his magis velit bonum conscientiae, quàm famæ, quando utrumque haberi non potest; hoc est vulnus quoddam inferat famæ, si necesse sit, ut sanet conscientiam.*

Tertius: Quando prævidetur non profutura secreta admonitio, ut peccantibus ex habitu & ex contemptu, magis quàm ex infirmitate; ii quippe validiori remedio indigent, nimirum Superioris correptione, qui monitionibus & exhortationibus minas, aut etiam pœnas, si necesse sit, adjungere potest: nec in eo peccabitur contra præceptum, *corripe inter te & ipsum solum*: tum quia ex dicendis omittenda est correctio, ac proinde monitio, quando prævidetur inutilis: tum quia ex sancto Thoma citato articulo ad decimum: *Dominus non loquitur de culpa futura cavenda, sed de culpa præterita jam commissa.*

Quartus casus: Quando cum majori delinquentis utilitate, & sine dispendio ejus famæ, Superior tanquam pater immediatè monetur. Ita S. Augustinus in Regula ad Sorores: Si, inquit, *soror tua vulnus haberet in corpore, quod vellet occultari, dum timet secari, nonne crudeliter abs te fileretur, & misericorditer indicaretur? Quantò ergo potius eam debes manifestare, ne perniciosius putrescat in corde? Sed antequam aliis demonstretur, per quas convincenda est, si negaverit, Præposita debet ostendi.* Quæ posteriora verba expendens S. Thomas qu. 33. art. 8. ad 3. sic habet: *Augustinus intelligit, quòd prius di-*

catur Prælato, quàm testibus, secundum quod Prælati  
est singularis persona, quæ magis potest prodesse, quàm alii. Et quodlib. 11. qu. 10. art. 11. Si ego scio, inquit, quod frater per me corrigetur, tunc non debeo hoc denuntiare Prælato: si autem videtur, quod hoc melius fiat per Prælatum, & Prælati sit nihilominus pius, & discretus, & spiritualis, non habens rancorem seu odium adversus illum subditum; tunc licitè potest hoc denuntiari ipsi: & tum non dicit Ecclesiæ, quia non dicit ei sicut Prælato, sed sicut personæ proficienti ad correctionem proximi & emendam. Sed quia propter diversas conditiones Prælatorum & subditorum, non potest in hoc dari generale iudicium, quia aliquando vel Prælati movetur ad odium adversus subditum; vel subditus non bene ferret verba Prælati: idè tenendum est hoc pro regula, quod in omnibus istis semper servanda est charitas, & quod melius & magis expedire videtur.

Q. 4. Quando nam obligat præceptum correctionis fraternæ?

Ut propositæ quæstioni fiat satis, meminisse oportet in quolibet præcepto affirmativo, quo præcipitur actus virtutis, semper intelligi præceptum negativum, prohibens peccatum oppositum; præceptum v. g. dilectionis inimicorum, aut correctionis fraternæ, quod affirmativum est, includit præceptum negativum, prohibens odium inimicorum, aut approbationem fratris coram nobis delinquentis. His præsuppositis,

R. 1. Præceptum correctionis fraternæ negativè sumptum, obligat semper & pro semper; quia nunquam licet malè agere: atqui approbare sive interiùs, sive exterioriùs proximum delinquentem, laudando v. g. ejus libidines, impietates, de inimicis ultiones, &c. est malum per se:

se : Ergo ne quidem signis exterioribus licet approbare , quæ coram nobis fiunt , aut dicuntur mala ; ac proinde quamvis non semper adsit oportunitas positivè corripiendi fratrem, nec præceptum affirmativum obliget in quibuslibet circumstantiis, ut dicetur responsione sequenti ; tamen est semper præcepti necessitas non blandiendi, aut applaudendi ejus peccatis ; quod imprimis notandum est.

R. 2. Præceptum affirmativum correctionis fraternæ non obligat , nisi quatuor concurrentibus circumstantiis. Prima , quando constat de peccato proximi , præsertim mortali ; scriptum quippe est Eccli. 20. *Priusquam interroges, non vituperes quemquam.* Et Matth. c. 7. *Nolite judicare,* scil. temerè. Et certè proximus injuriæ duceret, quòd crimen ei imponeretur, cujus conscius non est, & ejusmodi correctio esset contra charitatem, quæ non *cogitat malum*, 1. Cor. 13. Si tamen essent conjecturæ admodum probabiles cum aliqua infamia, proximus non deberet quidem corrigi & absolutè condemnari, sed moneri, ut causas, si quas dedisset suspicionis, amoveret. Sed ista magis Superiores spectant, quàm æquales, nisi familiares sint, vel proximus sit in proximo ruinæ, putà mortis periculo constitutus, nec adsit Pastor, qui illum commoneat. Secunda, quando spes aliqua, saltem dubia affulget correctionis profuturæ ; finis quippe correctionis fraternæ est emendatio proximi, quemadmodum sanitas medicinæ ; ac proinde sicut remedia, quæ prævidentur fore inutilia, non sunt corpori adhibenda, maximè cum periculo ne noceant ; ita nec correctio fraterna, ubi nulla est  
spes

spes ne quidem dubia emendationis ; tunc enim ferè semper periculum subest, ne proximus deterior fiat. Atque in eo differt correctio fraterna à judiciali ; quòd ista, cùm spectet bonum commune, & scandalum removendum, adhiberi debeat, etiamsi reus prævideatur deterior futurus. Tertia, quando nullus adest magis idoneus, v. g. Superior, qui possit & velit corrigere. Dico, & *velit* ; si enim noluerit, perinde est ac si nullus adesset ; ideoque sicut in casu necessitatis eroganda est eleemosyna, etiamsi adsint ditiores, qui erogare nolunt ; ita & correctio ab inferiori facienda, si Superior eam negligat, fortè ex inadvertentia ; sed in eo casu inferior prudenter ac modestè agere debet, nempe rogando potius quàm pronuntiando, num quæ dicuntur, aut fiunt, sint licita. Quarta, quando non speratur tempus correctionis opportunius ; si enim commodius & utilius proximo foret eam differre, differenda est ; cùm ejusmodi dilatio non sit occasio cupiditatis, sed consilium charitatis, ut loquitur S. Aug. Lib. i. de Civ. Dei c. 9.

Dixi correctionem tum faciendam, cùm constet de peccato proximi, præsertim mortali ; quia nisi venialia in grave damnum vergant, v. gr. ad subvertendam Monasterii disciplinam, satius est ut plurimum dissimulare, quàm arguere ; tum quia intolerandus esset in societate civili, qui minima quæque reprehenderet ; tum quia ejusmodi correptio sæpè iram & odium potius provocat, quàm emendationem, nisi fiat vel à familiari amico, vel ab eo, qui bene novit indolem & animum proximi ad omne genus virtutis propensum.



Q. 5. *Quid agendum, quando æquè dubitatur, an correctio profutura sit, an nocitura?*

R. Fraternalis ordinariè est omittenda, non verò judicialis; quia fraternalis correctio, utpote actus charitatis, tendit in bonum proximi delinquentis: atqui nullum apparet bonum quando æquè timetur malum, ac speratur bonum: Ergo in illa hypothese non est locus correctioni fraternali. At correctio judicialis spectat bonum commune, propter quod negligendum est, si necesse sit, bonum privatum; Medicus enim, ut supra dicebat S. Thomas, membrum amputat, cum non potest aliter consulere salutem totius corporis.

Dixi; *Ordinariè*; Quia si quis in familiari congressu nonnulla proferret contra fidem, aut bonos mores, unde astantes inficerentur, corripiendus esset quamvis deterior futurus, modò spes foret correctionem aliis profuturam. Ergo non tenemur corrigere homines ob quodvis peccatum etiam mortale, quorum ingenium nobis est ignotum, ne scilicet peiores fiant potius, quam corrigantur.

Q. 6. *Quinam obligantur præcepto correctionis fraternalis?*

R. Omnes sive Sacerdotes, sive Laici, sive iusti, sive peccatores, sive æquales, sive inferiores, sed maximè Superiores. 1. Quia Christus Matth. 18. neminem excipit, dum ait: *Si peccaverit in te frater tuus, vade & corripe.* 2. Quia sic docent sancti Patres, ut sanctus Augustinus Lib. 1. de Civit. Dei cap. 9. *Nec tamen, inquit, ab ejusmodi culpa corripiendi alienus est, qui licet Præpositus non sit, in eis tamen, quibus necessitate conjungitur multa monenda, vel arguenda novit, & negligit.* Illud ipsum

ipsum fulè probat S. Thomas q. 33. art. 3. 4. & 5. 3. Quia præceptum charitatis omnes, & singulos obligat: Ergo sicut singuli tenentur eleemosynam erogare proximo indigenti, ita & correptionem. Cùm autem ordo charitatis postulet, ut nobis conjunctiores præferamus, ut parentes, Superiores, iis maximè debitum correctionis fraternæ impendere debemus, sed seorsim & magis obsecrando, quàm arguendo, juxta illud 1. Timoth. 5. *Seniorem ne increpaveris, sed obsecra ut patrem.* Excipit tamen S. Thomas art. 4. nisi imminet periculum fidei; tunc enim publicè arguendus est Superior exemplo S. Pauli, qui in faciem restitit S. Petro Gal. 2. ob idque laudatur à S. Augustino Epist. 82. aliàs 19. *Ipse verò Petrus, inquit, quod à Paulo fiebat utiliter libertate charitatis, sanctæ ac benignæ pietatis accepit: atque ita rarius & sanctius exemplum posteris præbuit; quo non dedignarentur, sicubi fortè recti tramitem reliquissent, etiam à posterioribus corrigi, quàm Paulus; quo confidenter audent etiam minores majoribus pro defendenda Evangelica veritate, salva fraterna charitate, resistere. Nam cùm satius sit, à tenendo itinere in nullo quàm in aliquo declinare, multò est tamen mirabilius & laudabilius libenter accipere corrigentem, quàm audacter corrigere deviantem.*

Præceptum tamen correctionis fraternæ ad plura obligat Superiores, quàm privatos. Namque 1. Superiores ex officio in se suscipiunt curam subditorum, ideoque debent invigilare, num quis eorum recto itinere declinet, aut in eo negligentius incedat, explorare, num dederit locum suspicionibus malis, quæ de eo sparguntur, quæ privatis non competunt, ut advertit sanctus Augustinus

gustinus cit. Serm. 82. aliàs 16. de verbis Domini cap. 1. ubi sic habet : *Admonuit nos Dominus nonster non negligere invicem peccata nostra , non quærendo quid reprehendas , sed videndo quid corrigas.* 2. Superiores, non verò privati tenentur corripere, etsi nulla sit spes emendationis, ut peccans saltem timore pænæ coërceatur.

Dices : peccator non debet alios corrigere : Ergo non omnes obligantur præcepto correctionis fraternæ.

Probatur ant. 1. ex Scriptura, Matth. 7. *Hypocrita , ejice primum trabem de oculo tuo , & tunc videbis ejicere festucam de oculo fratris tui.* Rom. 2. *In quo judicas alterum , te ipsum condemnas ; eadem enim agis , quæ judicas.* 2. Ex SS. Patribus. S. Augustinus Lib. 2. de Serm. Domini in Monte cap. 19. *Accusare vitia , inquit , est officium bonorum virorum & benevolorum : quod cum mali faciunt , alienas partes agunt.* Et S. Isidorus laudatus à S. Thoma qu. 33. art. 5. *Non debet vitia aliorum corrigere , qui est vitiis subjectus.*

Nego ant. Absit enim, ut dicatur peccator immunis à lege naturali & divina : atqui præceptum charitatis, cujus præcipui actus sunt elemosyna & correctio fraterna ; numeratur inter primaria legis naturalis & divinæ præcepta : Ergo.

Ad confirmationem respondeo, hæc & similia intelligenda esse de peccatore, qui propria peccata, quamvis aliis manifesta, dissimulans, aliena corrigere præsumit, quasi ipse sit justus, & aliis sese præferat, quod cum fieri nequeat sine audientium offensa & scandalo, verbumque veritatis contemptui exponat, meritò illi dicitur :  
quare

*Quare tu enarras iustitias meas, & assumis testamentum meum per os tuum? Psal. 49. Urgente ergo præcepto correctionis fraternæ, tenetur peccator à se remove, quæ illam impediunt, nempe quæ viderentur sapere superbiam & ostentationem, prius seipsum arguendo, & pœnitentiæ signa præferendo; & ita proximum utiliter non solum verbo, sed etiam exemplo ad resipiscendum commovebit. Unde S. Augustinus post laudata in objectione verba, subdit: Si autem cogitantes nosmetipsos invenerimus in eo esse vitio, in quo est ille, quem reprehendere parabamus, non reprehendamus, neque obijgerimus, sed tamen congemiscamus; & non illum ad obtemperandum nobis, sed ad pariter conandum inviteamus. Et S. Thomas cit. art. 5. Si peccator cum humilitate corripiat delinquentem, non peccat, nec sibi novam condemnationem acquirit.*

*Q. 7. Quale est peccatum omittere correctionem fraternam urgente præcepto?*

*R. Est ex suo genere mortale. Ita S. Thomas q. 23. art. 2. ad tertium: Prætermittitur, inquit, fraterna correctio cum peccato mortali, quando formidatur iudicium vulgi, & carnis excruciatio vel peremptio, dum tamen hæc ita dominantur in animo, quod fraternæ charitati præponantur: & hoc videtur contingere, quando aliquis præsumit de aliquo delincente probabiliter, quod posset eum à peccato retrahere, & tamen propter timorem vel cupiditatem prætermittit. Et ratio est, quia ex dictis Tractatu de Peccatis, gravitas peccati ex duplici capite colligitur, i. ex pœnæ magnitudine per Legem definita contra transgressores, & ex gravitate materiæ, circa quam Lex versatur; atqui pœna gravis decernitur contra eos, qui omittunt correctionem fraternam, digni sunt*



sunt morte, ait Apostolus Rom. 1. qui consentiunt facientibus, hoc est, ut supra exposuimus, qui silent, cum arguere possint, materia quoque est gravis, scilicet spiritualis ruina proximi impedienda: Ergo.

Dixi, *ex suo genere*, ut innuerem peccatum illud esse nonnunquam veniale, ut agnoscit S. Augustinus his verbis supra laudatis ex cap. 9. Lib. 1. de Civit. Dei; *qui propterea peccatis eorum damnabilibus parcunt* (scilicet ne temporaliter noceant) *jure cum eis temporaliter flagellantur, quamvis in æternum non puniantur.*

Q. 8. *Quandonam omissio correctionis fraternæ censenda est venialis?*

R. 1. Cum agitur de corrigendo peccato veniali, quod non vergit in grave detrimentum alterius; quia ejusmodi materia est levis, 2. quando ex inadvertentia minimè crassa omittitur correctio etiam gravioris peccati. 3. ex sancto Thoma cit. art. 2. ad tertium, *quando timor & cupiditas tardiores faciunt hominem ad corrigenda delicta fratris. Non tamen ita, quod si ei constaret, quod fratrem posset à peccato retrahere propter timorem, vel cupiditatem omitteret, quibus in animo suo præponit charitatem fraternam. Et hoc modo quandoque viri sancti negligunt corrigere delinquentes.* In quibus verbis Angelicus Doctor supponit hominem, qui intus in corde servat charitatis ordinem, juxta quem bonum spirituale proximi in casu necessitatis præferendum est commodo nostro temporali; sed quodam pudore corruptus, & timore amittendi boni temporalis præoccupatus, non invenit quomodo prudenter moneat delinquentem, desunt verba & modus, sine quibus salutare remedium rejicere.

*D. Habert Theolog. Tom. III.*      E e e      tur;

tur; nisi enim correctio fraterna sit sale prudentiæ condita, sæpè noxia est, nedum utilis. Ideo autem S. Thomas in proposito casu agnoscit peccatum saltem veniale; quia timor ille mentem incertam tenens, est quodammodo voluntarius in causa, scilicet in cupiditate; si enim esset planè involuntarius, orireturque ex naturali infirmitate, excusaret à peccato, ut in scrupulosis, qui cum prudentia ad corripiendum necessaria careant, vix alios utiliter reprehendunt.

## CAPUT VI.

### De Peccatis Charitati oppositis.

**O**mnia peccata dici possunt charitati opposita, saltem indirectè: mortalia quidem, quia excludunt charitatis & habitum & actum: venialia etiam, quia etsi non destruant charitatis habitum nisi dispositivè, ejus tamen actum excludunt. Præterea charitas, ex qua omne bonum, & cupiditas radix omnium malorum, non minus inter se pugnant, quàm calor & frigus: major charitas, inquit S. Augustinus, minor cupiditas; & perfecta charitas ut in patria nulla cupiditas, ac proinde nullum peccatum. Contra verò ubi major est cupiditas, minor est charitas, & ubi dominatur cupiditas, ut in peccatoribus, nulla est charitas.

Sed sunt quædam peccata, quæ directè opponuntur charitati, formaliterque pugnant contra ejus actus, scilicet amorem Dei & proximi, gaudium, pacem, & beneficentiam, seu correctionem fraternam. Contra amorem pugnant odium  
Dei

Dei & proximi: contra gaudium de bono Dei, tristitia, quam S. Thomas, post S. Gregorium & alios Scriptores Ecclesiasticos, vocat acediam: contra gaudium de bono proximi, invidia. Contra pacem discordia, contentio, schisma, bellum injustum, rixa, seditio. Contra correctionem fraternam scandalum, & ita decem peccata numerantur charitati opposita, de quibus S. Thomas, à q. 34. ad q. 43. inclusivè. Paucis perstringemus, quæ spectant novem prima, & paulo diutius immorabimur circa scandalum ultimo loco recensitum.

## §. I.

*De novem primis peccatis Charitati oppositis.*

**N**ihil est, quod addamus iis, quæ dicta sunt de odio, ubi de actibus internis charitatis. De acedia & invidia plura, & quidem in praxi maxime necessaria hinc dicenda essent, nisi Tractatus noster jam prolixior in immensum excurreret. Quare Lectorem remittimus ad Praxim pœnitentiarum à nobis Gallicè editam, ubi fusè expendimus, quæ spectant illa duo vitia capitalia, scilicet eorum malitiam, causas, effectus longè perniciosissimos, proponimusque remedia, quibus curari possint. His igitur prætermisissis, pergimus ad dubia quædam solvenda circa septem alia peccata charitati opposita.

Q. 1. *Quid est discordia?*

R. Est contrarietas voluntatum; opponitur enim concordia, quæ est unio cordium, ut nomen sonat. Unionem autem illam efficit charitas, inquit S. Thomas q. 37. art. 1. *in quantum sci-*

*licet multorum corda conjungit in unum, quod est principaliter quidem bonum divinum, secundario autem bonum proximi . . . unde per se discordat aliquis à proximo, quando scienter & ex intentione dissentit à bono divino, & à proximi bono, in quo debet consentire (nimirum quando recta agnoscitur proximi voluntas & conformis divinæ, quæ est omnium voluntatum regula) & hoc est peccatum mortale ex suo genere propter contrarietatem ad charitatem, licet primi motus hujus discordiæ propter imperfectionem actus, sint peccata venialia. Unde Apostolus Gal. 5. dissensiones seu discordias numerat inter opera carnis, de quibus ait, qui talia agunt, regnum Dei non consequentur.*

*Dixi, discordiam esse contrarietatem voluntatum; quia, ut docet S. Thomas ex Philosopho q. 29. art. 3. ad tertium, ad amicitiam (seu charitatis concordiam) non pertinet concordia in opinionibus, sed concordia in bonis conferentibus ad vitam, & præcipue in magnis, quia dissentire in parvis, quasi videtur non esse dissensus: Et propter hoc nihil prohibet aliquos charitatem habentes in opinionibus dissentire . . . . similiter etiam existente concordia in principalibus bonis (quæ sunt de necessitate salutis) dissensio in aliquibus parvis, non est contra charitatem; procedit enim talis dissensio ex diversitate opinionum, dum unus æstimat hoc, de quo est dissensio, pertinere ad illud bonum, in quo conveniunt, (putà ad gloriam Dei, utilitatem proximi, quam uterque intendit) alius æstimat non pertinere. Unde concludit S. Doctor cit. art. 1. q. 37. ejusmodi dissensionem non esse peccatum, nisi quando quis opinionem suam inordinatè & cum pertinacia propugnat; cum enim contrarietati opinionum adjungitur contrarietas voluntatum, quam dicit esse filiam superbiæ & inanis gloriæ.*

*Et*



Et in responsione ad tertium, scribit discordiam quæ intercessit S. Paulum inter & S. Barnabam, Act. 15. fuisse absque peccato; quia uterque intendebat bonum: sed absque pertinacia, & contentione, *uni videbatur hoc esse bonum, aliud, quod ad defectum humanum pertinebat.*

Q. 2. *In quo differt discordia à contentione?*

R. In eo, quòd discordia præcisè dicat contrarietatem voluntatum: contentio verò contrarietatem verborum & sermonis cum inordinata acrimonia, & modo indebito, putà clamoribus & dictis mordacibus: *Contentio, inquit Glossa in cap. 1. Rom. v. 29. est impugnatio veritatis cum confidentia clamoris.*

Q. 3. *Illà verborum contentio estne peccatum?*

R. Distinguit S. Thomas q. 38. art. 1. *Si contentio, inquit, dicatur impugnatio falsitatis cum debito modo acrimoniæ, sic contentio est laudabilis, si autem accipiat secundum quod importat impugnationem veritatis, & inordinatum modum, sic est peccatum mortale: si autem accipiat contentio secundum quod importat impugnationem falsitatis cum inordinato modo; sic potest esse peccatum veniale, nisi fortè tanta inordinatio fiat in contendendo, quòd ex hoc generetur scandalum aliorum. Unde & Apostolus, cum dixisset 2. Timoth. 2. noli contendere verbis, subdit: ad nihil enim utile est, nisi ad subversionem audientium: subvertuntur autem, & scandalum patiuntur audientes, quoties ejusmodi contentiones eos provocant ad odium & convicia contra inordinate contendentes.*

Ergo in omni controversia, imprimis vitanda est contentio, utpote charitati & paci opposita, inter opera carnis, quæ excludunt à regno Dei, ab Apostolo reposita, Gal. 5. & uti immunda

iræ ac superbiæ soboles ; *honor est homini, qui separat se à contentionibus*, inquit Sapiens Prov. 20. v. 3. *omnes autem stulti miscentur contumeliis*, quæ vix absunt ab indecoris illis contentionibus. Si autem ejusmodi excessus cavendi sunt, etiam ubi agitur de tuenda manifesta veritate aut justitia ; quanto magis quando unusquisque pugnat pro sua opinione aut jure duntaxat præsumpto. Nihilominus non solum homunciones ac mulierculæ, sed & viri alioquin spectabiles, sæpè etiam Theologi & Sacerdotes se propterea alicujus culpæ conscios non advertunt, etsi data occasione, in eisdem excessus semper prolabantur, adeo prævalent in Christianorum cordibus superbia & cupiditas.

Q. 4. *Quid est Schisma ?*

R. Respondet S. Thomas qu. 39. art. 1. est separatio ab unitate Ecclesiæ, cujus partes tanquam membra unius & ejusdem corporis charitas veluti spirituale vinculum copulat ac constringit. Læditur quidem illa unitas per quamlibet inobedientiam, qua quis præcepta Prælati sui contemnit ; sed absolutè non solvitur, nisi inobedientiæ addatur rebellio & contumacia, qua inobediens non vult subesse vel Concilio Generali, vel Summo Pontifici, vel suo Episcopo. Unde non omnis inobediens est schismaticus.

Q. 5. *Omne bellum estne peccatum charitati oppositum ?*

R. Minimè ; quia ut argumentatur S. August. Ep. 138. aliàs 5. *Si Christiana disciplina omnia bella culparet, hoc potius militibus consilium salutis petentibus in Evangelio diceretur, ut abjicerent arma, seque omnino militiæ subtraherent : Dicitur est autem eis, neminem con-*

concusseritis, nulli calumniam feceritis, sufficiat vobis stipendium vestrum, Luc. 3. Enimverò si licet privato cuique jus suum tueri, bona sua à raptoribus in judicio repetere cum eorum capitis periculo, quidni & Principi? Non enim sine causa gladium portat, Rom. 13.

Q. 6. *Quæ requiruntur ut bellum sit licitum?*

R. Tria, ex S. Thoma q. 40. art. 1.

Primum est potestas, quæ residet in Principe, cui cura Reipublicæ commissa est, & eo titulo eam tanquam Dei Minister tueri debet contra infestantes hostes: *Ordo naturalis*, inquit S. August. Lib. 22. contra Faustum c. 75. *mortalium paci accommodatus hoc poscit, ut suscipiendi belli auctoritas atque consilium penes Principem sit, exequendi autem iussa bellica ministerium milites debeant paci salutique communi.* Hinc duellum non solum Jure Canonico & Civili; sed etiam Naturali prohibetur; non quia præcisè eligitur appetitu vindictæ; sed quia privati non habent dominium propriæ vitæ, ut eam exponant tam evidenti mortis periculo, nisi in necessitate boni communis, quod est præferendum bono privato.

Secundum est causa justa; si enim litibus alios premere non licet absque necessitate, multò minus urbes & provincias devastare cum plurimi sanguinis effusione. *Iusta autem bella*, inquit S. Aug. lib. 9. super Josue q. 10. *definiri solent, quæ ulciscuntur injurias, si qua gens, vel civitas, quæ bello petenda est, vel vindicare neglexerit, quod à suis improbè factum est, vel reddere quod per injurias ablatum est.* Sed ista ponderare eorum est, quos Princeps adhibet in consilium, non verò subditorum.

Tertium est recta intentio, *qua scilicet*, inquit

S. Thomas cit. art. 1. *intenditur, vel ut bonum promoveatur, vel ut malum vitetur . . . Potest autem contingere, ut sit legitima auctoritas indicentis bellum, & causa iusta; nihilominus propter pravam intentionem bellum reddatur illicitum; dicit enim August. Lib. 22. contra Faustum c. 74. nocendi cupiditas, ulciscendi crudelitas, implacatus atque implacabilis animus, feritas rebellandi, libido dominandi, & si qua similia, hæc sunt, quæ in belli jure culpantur.*

Christianus igitur, jubente Principe, & deposito dubio, num belli causa sit iusta, necne? arma sumat, sed eo animo, quo Chyrurgus ad nutum Medici ferrum & ignem adhibet, nimirum ad sananda Reipublicæ vulnera, & stabiliendam publicam pacem, quæ est regni salus. Quid enim tam alienum à Christianis moribus, aut tam inhumanum & crudele, quàm contra hostes insurgere, veluti si avis rapax, aut canis venaticus ruat ad prædam & devictum adversarium, qui secundum militiæ leges servandus esset captivus, interficere, spoliandi causa, quomodo venator captam feram occidit, ut pellem detrahat? Hæc & similia Confessarius inquiret non solum à gregariis militibus, sed & à militiæ Præfectis, quibus ut ipsimet palàm testantur, pax & tranquillitas publica oneri est, & bellum in votis, utpote occasio, vel captandæ gloriæ, vel rei familiaris amplificandæ, eò sanè peiores Judice & Medico, qui exoptarent, ille dissidia in civitate ad multiplicandas lites, ille ægritudines ad colligendas opes ex alienis malis; quò urbium subversiones, & innumeræ interneciones sunt quid longè gravius ruina unius aut alterius familiæ.

Q. 7. *Quid rixæ & seditionis nomine intelligitur, & quomodo ambo illa peccata differunt à prioribus?*

R. 1.



R. 1. Rixa est bellum privatum, in quo discordes se invicem percutiunt, ex Glossa in c. 5. ad Gal. vers. 20. Igitur ex discordia seu oppositione voluntatum nascitur contentio, quæ est pugna verborum; ex contentione rixa, quæ est pugna manuum & verberum. In aggressore est peccatum ex genere suo mortale: in repugnante licita est, si servet moderamen inculpatæ tutelæ, illicita verò & peccatum si non servet, vel veniale, vel lethale, secundum iræ, odii, & appetitus vindictæ excessum. Ita S. Thomas quæst. 41. art. 1.

R. 2. Seditio ex Glossa in secundam Corinth. cap. 12. vers. 20. laudata à S. Thoma quæst. 42. art. 1. est tumultus ad pugnam, cum scilicet cives tumultuantur, pacem civitatis turbant, & arma sumunt ad pugnandum, non contra extraneos hostes, sed contra se invicem. Unde patet seditionem esse grave peccatum charitati oppositum.

## §. II.

### *De Scandalo.*

Q. 1. *Quid significat nomen scandali?*

R. Offendiculum, seu pedis offensionem, ut lapis in via, ad quem viator incautè offensus prolabitur. Translatum autem ad mores illud nomen Græcum, significat quidquid nobis ad beatitudinem tendentibus est causa ruinæ spiritualis, quo sensu Christus dicitur 1. Petri cap. 2. lapis offensionis & petra scandali, nempe incredulis & carnalibus.

Q. 2. *Quomodo definitur Scandalum?*

R. Definitur à S. Thoma quæst. 43. art. 1. & aliis communiter Theologis; ex S. Hieronymo in cap. 15. Matth. dictum vel factum minus rectum præbens alteri occasionem ruinæ.

Dicitur 1. *dictum vel factum*; quia sola voluntas nisi exterius se prodatur dictis vel factis, non potest esse aliis offensio. Nomine autem dicti & facti intelligitur etiam externa omissio; qui enim omittit loqui vel agere cum deberet, v. gr. subditum blasphemantem corrigere, Sacrum audire die festo, aliis est scandalum & offensione.

Dicitur 2. *minus rectum*, sive illud sit per se malum, sive habeat duntaxat speciem mali; species enim mali æquè inducit ad peccandum ac malum ipsum: imò si malum haberet speciem boni, non moveret alios ad peccatum, v. gr. fornicarius, qui domum mulieris frequenter ingreditur sub specie negotii necessarii, neminem scandalizat: contra verò Clericus, qui apud se puellam retinet, quamvis castimoniam illibatè servet, nihilominus aliis est malo exemplo & offendiculo; quia factum habet speciem mali.

Dicitur 3. *præbens alteri occasionem ruinæ*: quia necesse non est ad rationem scandalum, ut ruina actu sequatur, sed satis est, ut ruinæ detur occasio.

Q. 3. *Quotuplex est scandalum?*

R. Duplex, alterum datum sive activum, cujus mox definitionem attulimus: alterum acceptum seu passivum, quod est effectus scandalum activi seu peccatum, cujus causa fuit scandalum datum.

Q. 4. *Quotuplex est scandalum datum?*

R. Duplex,

R. Duplex, scilicet directum, & indirectum. Directum, cum quis dictis vel factis proximum in ruinam impellere intendit, puta in fornicationem. Indirectum, cum quis non intendens ruinam proximi, nonnulla dicit aut facit in proprium commodum, aut animi oblectamentum, quæ tamen sunt alteri occasio peccati.

Q. 5. *Quotuplex est scandalum passivum seu acceptum?*

R. Duplex; alterum dicitur pusillorum, quod ex proximi ignorantia, aut infirmitate oritur: alterum Phariseorum, quod nascitur ex malitia accipientis. Ideo autem dicitur Phariseorum; quia insignis fuit eorum malitia, qua ex dictis & factis Christi Domini peccandi occasionem sumperunt.

Dices: hæc divisio non est adæquata. Triplex enim est hominum status: alii peccant ex affectu, qui oderunt veritatem, nec volunt intelligere, ut bene agant: alii sunt infirmi & pusilli, qui facile seduci possunt, & ad malum, quod oderunt, impelli. Alii sunt fortes, & in virtute firmati, ideoque ab ea difficilius dimoventur; Ergo sicut aliud est scandalum Phariseorum, qui sunt primi status; aliud pusillorum, qui sunt secundi status: ita illud admitti debet perfectorum, qui sunt in tertio statu, ac proinde triplex est scandalum passivum.

Negat S. Thomas qu. 43. art. 5. & 6. admitendum esse tertium illud genus scandali; dicitur enim Psalm. 118. *Pax multa diligentibus legem tuam, & non est illis scandalum.* Et prov. 1. vers. 17. *frustra jacitur rete ante oculos pennatorum;* quod parabolicè scriptum communiter intelligunt Interpretes de

de viris perfectis, qui scandalorum retia facile declinant, & è peccandi periculo promptè ad cœlestia avolant spiritualibus alis; nempe amore Dei, & timore. Imò ex conspectu prævaricantium amplius accenditur eorum charitas; agens quippè vires exerit ad præsentiam Adversarii; ignis, v. gr. frigore impugnatus ardentior evadit, *vidi prævaricantes & tabescebam*, inquit Psalmista Psalm. 118.

Quòd si perfecti scandalum non accipiunt, multò minùs aliis præbent, quia plus repugnat perfectioni, inquit Angelicus Doctor, scandalum passivum: *ad perfectos enim pertinet ea quæ agunt, secundum regulam rationis ordinare . . . & præcipuè hanc cautelam adhibent in his, in quibus non solum ipsi offenderent, sed etiam aliis offensionem pararent.*

Ergo ex intoleranda ignorantia, sive affectata, sive crassa, nonnulli scandalum pusillorum contemnendum ducunt: vel enim nullum scandalum est cavendum: vel scandalum pusillorum cavere necesse est. Primum dici nequit, cum manifestè repugnet Scripturæ sacrae, rectæ rationi, & omnium hominum sensui, ut mox demonstrabitur: ergo secundum dicatur oportet, nempe sollicitè cavendum, ne unum ex pusillis contemnamus scandalizemusque, nam scandali Pharisæorum nullam habendam esse rationem docuit Magister & Dominus noster, Matth. 15. v. 12. Ubi referentibus Discipulis, quòd Pharisei verbis ejus fuissent scandalizati, respondit, *Sinite illos, cæci sunt*, id est, ne curetis illorum scandalum; est enim ex cordis malitia eos excæcante, & *utiliùs nasci permittitur scandalum, quàm quòd veritas relinquatur*, inquit S. Gregorius Hom. 7. in Ezech. Potest



Potest quidem veritas, quam infirmi necdum ferre possunt, ad tempus opportunius abscondi, sicut & correctio fraterna differri; sed longè absurdissimum foret, si Justī, quos Deus posuit tanquam luminaria in medio nationis pravae, ut loquitur Apostolus, bonis operibus lucere caveant, eo prætextu quòd veritas improbis odium pariat, & virtus sit illis lapis offensionis & petra scandali. Igitur contemnendum est scandalum Phariseorum, vix etiam timendum est scandalum perfectorum, cum scandalizari non soleant, certique simus quòd si dictum & factum minus rectum nobis excidat, illi nos correpturi sint in misericordia, nedum scandalum accepturi, proindeque nullum scandalum habemus cavendum, nisi pusillorum.

Q. 6. *Quomodo accipi, debet, quod scribit sanctus Thomas loco citato, perfectos nec dare nec accipere scandalum, cum possint à perfectione sua excidere, juxta illud Apostoli 1. Corinth. 10. qui se existimat stare, videat ne cadat?*

R. Illud accipiendum eo sensu, quo dixit Christus Matth. 7. *non potest arbor bona malos fructus facere.* Et Beatus Joannes 1. Epist. cap. 3. *omnis qui natus est ex Deo, peccatum non facit . . . & non potest peccare, quoniam ex Deo natus est*, nempe, ut alias diximus, quamdiu manet arbor bona, & quamdiu semen gratiæ Dei, qua renatus est, conservat, ejusque ductum sequitur; Charitas enim non agit perperam. Sed perfecti, utpote in Charitate fundati & radicati, ac pro consuetudine exercitatos habentes sensus ad discretionem boni & mali, non facile moventur pravis aliorum exemplis,

emplis, ut fiant arbor mala, ac proinde non videtur pro iis timendum.

At, inquires, non est homo super terram quantumcunque perfectus, qui non peccet, *neceſſe eſt*, inquit ſanctus Hieronymus Lib. 2 contra Pelagianos, *nos ſubjacere peccato, non naturæ & conditionis (ut tu calumniaris) vitio, ſed fragilitate & communicationis voluntatis humanæ, quæ per momenta variatur; quia Deus ſolus eſt immutabilis; Ergo perfecti ſcandalum dare & accipere poſſunt.*

Reſpondet S. Thomas 1. de ſcandalo paſſivo cit. art. 5. ad tertium, viros perfectos interdum quidem labi in peccata venialia, ſed potiùs ex infirmitate, & ex illicita concupiſcentia, quæ in eis remanet; quàm ex aliorum dictis vel factis minùs rectis; *ſed*, inquit, *potest eſſe in eis quædam appropinquatio ad ſcandalum, ſecundum illud Pſalmi 72. Mei penè moti ſunt pedes.*

Reſpondet 2. quoad ſcandalum activum art. 6. ad tertium, *peccata venialia perfectorum præcipuè conſiſtunt in ſubitis motibus, qui cum ſint occulti, ſcandalizare non poſſunt. Si qua verò etiam in exterioribus dictis & factis venialia peccata committant, tam levia ſunt, ut de ſe ſcandalizandi virtutem non habeant. Quòd ſi nonnulli peccant occasione ejuſmodi leviorum defectuum, ſanctus Doctor in reſponſione ad primum & ſecundum, docet non viros perfectos occasionem peccandi præbere, ſed ipſoſmet peccantes accipere ad excuſanda ſua peccata exempla perfectiorum; non tamen, inquit, factum Petri (de quo Gal. 2.) erat tam grave peccatum, quòd merito poſſint alii ſcandalizari. Unde patiebantur ſcandalum paſſivum; non autem erat in Petro ſcandalum activum.*

Ergo

Ergo amici hujus seculi desinant nobis obtrudere quædam dicta vel facta, quibus viri doctrina & pietate illustres, eorum vanitati & cupiditati favisse existimant. Aut enim falsa sunt, quæ de ipsis narrantur: aut si vera, non eo, quo referuntur modo, dixerunt vel fecerunt, aut si revera dixerint vel fecerint, ut dicitur, sunt defectus, non exempla quæ sequi liceat: homines quantumcunque perfecti non sunt regula regulans, inquit S. Thomas, sed regula regulata, hoc est non ad eorum dicta vel facta Evangelium, quod est regula regulans, flecti & detorqueri debet; quia non ex personis fidem, sed ex fide personas judicamus, ut loquitur Tertullianus, & ad rem præsentem pertinet, quod scribit sanctus Augustinus ad sanctum Hieronymum Epist. 82. aliàs 29. *Solis eis Scripturarum Libris, inquit, qui jam Canonici appellantur, didici hunc timorem honoremque deferre, ut nullum eorum auctorem scribendo aliquid errasse firmissimè credam . . . . alios autem ita lego, ut quantalibet sanctitate doctrinaque præpolleant, non ideo verum putem, quia ipsi ita senserunt: sed quia mihi per illos auctores Canonicos, vel probabili ratione, quod à vero non abhorreat, persuadere potuerunt.* Absit v. gr. ut propter dissensionem quæ intercessit Apostolum Paulum inter & sanctum Barnabam, Act. 15. existimem, licitam esse discordiam inter fratres, quam Scriptura tam dilucidè numerat inter opera carnis Gal. 5. quin ut honos tantis viris debitus servetur, eorum controversiam accommodare debeo regulæ regulanti, ut verbis Angelici Doctoris utar, & judicare illam dissensionem fuisse duntaxat in opinionibus, illæsa Charitate, sine contentione & peccato. Denique si quid leve minùs  
tamen

tamen rectum sanctis viris aliquando excidat propter concupiscentiam, quæ semper in ipsis manens nonnunquam obrepit, nunquam trahendum est in exemplum; sed existimatio, quam multis titulis merentur, exigat, ut eorum dicta vel facta, quantum fieri potest, cum regula morum, hoc est, cum lege componamus; alioquin non illi dant occasionem, ut supra docebat S. Thomas, sed nos ipsi occasionem sumimus laxandi habenas propriis cupiditatibus, & ita scandalum Phariseorum est in nobis, id est, passivum & acceptum.

Ergo qui singularem pietatem præ se ferunt, præsertim si in dignitate sint constituti, ut Pastores, præ cæteris dicta sua & facta ad regulam exigere debent, utpote quæ statim evulgentur tanquam effata & exempla, quibus nec contradicere, nec resistere liceat.

Q. 7. *Scandalum estne peccatum?*

Certum est 1. scandalum activum directum esse peccatum ex genere suo lethale; quia voluntas impellendi proximum in peccatum & ruinam formaliter pugnat contra Charitatem, & est malitia prorsus diabolica.

Certum est 2. scandalum passivum, cum sit ipsemet lapsus illius, qui scandalum patitur, esse quoque peccatum non unius speciei, sed totuplicis, quotuplex est materia, in qua peccatur occasione dicti vel facti alterius, nempe erit peccatum injustitiæ, intemperantiæ, impudiciæ, si quis ex dictis vel factis alterius furetur, inebrietur, desideria impudica concipiat.

Difficultas itaque superest duntaxat circa scandalum activum indirectum, num scilicet qui nonnulla dicit aut facit, non ea intentione, ut  
proxi-



proximus in peccatum labatur, sed solum ut suo commodò consulat, vel suo genio indulgeat, reus sit peccati, si dicta ejus aut facta præter intentionem præbeant alteri peccandi occasionem.

R. Ejusmodi scandalum est peccatum ex genere suo mortale & speciale, ac in Confessione Sacramentali exponendum. Ita omnes Theologi post S. Thomam qu. 43. art. 3. & 4. Duæ autem sunt responsionis partes. Prima, quòd ejusmodi scandalum sit ex genere suo peccatum lethale. Secunda, quòd sit speciale, & in Confessione Sacramentali exponendum.

Prima pars probatur 1. ex Scriptura Matth. 18. qui . . . scandalizaverit unum de pusillis istis qui in me credunt, expedit ei, ut suspendatur mola asinaria in collo ejus, & demergatur in profundum maris. *Væ mundo à scandalis; Neceffe est enim ut veniant scandala: verumtamen vae homini illi, per quem scandalum venit.* Hic agitur de scandalo, quod necesse est præbeatur in mundo agentibus, si spectentur corrupti mores eorum quibuscum versari oportet: atqui illud scandalum est indirectum; facile enim vitari possunt, qui nos ad malum directè, v. gr. consiliis & suasionibus inducant; impossibile verò quin in mundo multa videantur & audiantur illicita, quæ videntibus, & audientibus sunt occasio peccandi. Porro scandalum illud esse peccatum grave colligitur ex pœna gravissima, qua Christus dicit fore puniendum, *Væ mundo, inquit, à scandalis.* Sed Apostolus distinctè ac dilucidè loquitur de scandalo indirecto, cap. 14. Epist. ad Rom. & cap. 8. & 10. Epist. 1. ad Cor. ibi quippe agit de iis, qui in fide plenè instructi idolothytis, id est, carni-  
bus idolo immolatis vescebantur, ut quæ nihil

Religionis haurirent ab idolo, quod nihil est, cum non sit quod repræsentat. Sed quia hacce Evangelica libertate utebantur coram infirmis fratribus, qui cum conscientia idoli, hoc est, putantes idolum ejusmodi carnes inficere, aliorum exemplo idolothytum quasi pollutum & illicitum cibum manducabant, ideoque peccabant, quia ex conscientia erronea id non licere arbitrabantur; manifestum est autem, quod peccatum illud infirmorum, esset præter intentionem firmiorum, ut qui illud unum intenderent, hacce libertate fidem suam ac Religionem testatam facere in idolorum contemptum, fore cum aliqua ostentatione, propter quam illis dicitur, *scientia inflat, charitas verò* (quam negligebant) *ædificat*. Nihilominus scandalum illud quantumcunque indirectum reprehenditur ab Apostolo tanquam grave peccatum, & *peribit*, inquit, 1. Cor. 8. *in tua scientia frater, propter quem Christus mortuus est? Sic autem peccantes in fratres, & percutientes conscientiam eorum infirmam, & in Christum peccatis*. Quæ sanè non dicerentur de peccato veniali. Unde sanctus Chrysostomus Hom. 21. in 1. ad Cor. de hujusmodi scandalo ait: *est quovis vulnere gravius scandalizare, seu offensionem afferre*. Sed audiendus est auctor egregii libelli de singularitate Clericorum inter opera S. Cypriani, ubi insurgit adversus Clericos, qui prætextu Charitatis, religiosas mulieres in suis domibus alebant, & contenti testimonio propriæ conscientiæ, contemnebant malas vulgi suspiciones, oblocutiones, & scandala: *pudicitia bonum, inquit, frustra intrinsecus laborioso agone custodit, quod forinsecus efficit infamari*. . . . . *Pejus est quam mæchari, continentiam ducere*

*cere criminofam , & infamem ferre ſanctimoniam.*

Probatur 2. ratione ; quia ſub peccato gravi tenemur amovere proximi miſeriam , ſive corporalem per eleemoſynam , ſive ſpiritualem per correctionem fraternam : Ergo à fortiori tenemur cavere , ne illum per ſcandalum in ruinam conjiciamus : pejus enim eſt , proximum in malum conjicere , quàm illum jam lapſum non erigere.

Confirmatur à ſimili. Societas humana non patitur , ut quis in proprio fundo quidquam faciat in privatum commodum , & ornamentum domus , quod ſit alteri nocivum , & ruinæ periculum. Si quis , ait Dominus Exodi 21. verſ. 33. *aperuerit cisternam & foderit , & non operuerit eam , cecideritque bos aut aſinus in eam , reddet dominus cisternæ pretium jumentorum.* Ergo à pari , qui ſcandalum ſive directè , ſive indirectè dederit , reus eſt illius damni , & ruinæ.

Dixi , ſcandalum indirectè datum , eſſe peccatum ex genere ſuo mortale , ut innuerem , aliquando eſſe veniale ob levitatem materiæ , cùm ſcilicet eſt ſolùm occaſio peccati venialis , modò tamen peccatum illud veniale non vergat in grave detrimentum proximi , ut ſupra diximus de omiſſione correctionis fraternæ.

Secunda pars , nempè quòd peccatum ſcandali ſit ſpeciale , & in Confeſſione Sacramentali exponendum , probatur : quia illud peccatum eſt ſpecie à cæteris diſtinctum , quod pugnat contra ſpecialem virtutem ; ebrietas v. gr. ſpecie differt à ſacrilegio ; quia eſt oppoſita virtuti ſobrietatis , quæ eſt ſpecie diſtincta à Religione , quam impugnat ſacrilegium ; atqui ſcandalum indirectè datum pugnat contra charitatem , qua tenemur di-

ligere proximum sicut nos ipsos, hoc est, malum illius avertere, & bonum procurare. Ergo scandalum etiam indirectè datum, est peccatum speciale, & consequenter in Confessione Sacramentali exponendum; de fide enim est, explicandas esse circumstantias, quæ peccati speciem mutant, ut definiit Concilium Tridentinum Sess. 14. Can. 7.

Ergo satis non est, ut quis confiteatur se obscœna colloquia habuisse, fornicatum fuisse, aut furatum cum aliis; sed tenetur insuper explicare, an auctor fuerit ejusmodi colloquiorum, aut fornicationis, & furti aliorum; namque in hypothesi quod auctor fuerit, dupliciter peccavit, 1. contra charitatem per scandalum ab ipso datum, 2. contra castitatem in primo & secundo exemplo, & contra justitiam in tertio. Imò scandali peccatum in eo multiplicatur pro numero eorum, quibus dedit occasionem peccandi, ut docent Navarrus Manualis cap. 6. num. 19. & alii; quia sicut qui uno ictu interficeret duos homines, reus esset duplicis homicidii; ita qui uno verbo obscœno duobus, tribus, quatuor, &c. dat occasionem peccandi, tot peccatorum reum se constituit.

Dices: ex S. Thoma art. 3. scandalum indirectè & præter intentionem datum, non est speciale peccatum; quia, inquit, quod est per accidens, non constituit speciem: Ergo.

Distinguo antecedens; non constituit speciem primariam & essentialem actui, quæ repetitur ex objecto, Concedo: speciem secundariam, quæ repetitur ex fine & circumstantiis, quemadmodum diximus ubi de Actibus humanis, Nego antecedens. Itaque certum est, dari circumstantias,



tias, quæ in genere moris novam actui dant speciem; quæ tamen dicitur à S. Thoma & ab aliis Theologis, bonitas vel malitia actui accidentaria; eleemosyna v. gr. data Sacerdoti ex motivo Religionis, licet duplicem specie habeat bonitatem, scilicet misericordiæ & Religionis; tamen sola bonitas misericordiæ, quæ repetitur ex miseria pauperis Sacerdotis, est essentialis huic actui: bonitas verò Religionis accidentaria. Item si quis injustè percutiat Sacerdotem, reus est duplicis specie peccati, scilicet injustitiæ & sacrilegij, nullusque nisi hæreticus negaverit, utrumque in Confessione aperiendum; sacrilegium tamen dicitur circumstantia actui accidentalis, & minimè speciem constituens. Quòd autem S. Thomas faveat nostræ sententiæ, patet ex responsione ad secundum, in qua sic habet *scandalum activum potest inveniri separatim ab aliis peccatis, puta, quando proximum scandalizat facto, quod de se non est peccatum, sed habet speciem mali*: unde concludit, scandalum esse peccatum à cæteris distinctum, cum possit existere in dante scandalum sine alio quovis peccato.

Q. 8. *Tenemurne omittere actionem indifferentem, vel etiam bonam ad vitandum scandalum?*

R. 1. Ob scandalum Phariseorum, actio sive indifferens, sive bona, non debet omitti; quia illud scandalum ex sola malitia scandalizati oritur, ac proinde nulla illius ratio habenda.

R. 2. Actio indifferens debet omitti ob scandalum pusillorum, si quos noverimus inde ob infirmitatem commovendos; quia ordo Charitatis postulat, ut omittamus quæ indifferentia sunt, cum prævidemus periculum, ne sint proximo ruinæ occasio. Sic excusari nequit, qui ignem defert

cum periculo incendii in aream proximi, in qua sunt paleæ; quis eum innocentem pronuntiabit, qui rem facit indifferentem cum scandalo fratris, quem novit infirmum? Dico, *quem novit infirmum*; quia intolerabile esset onus, & janua patens innumeris scrupulis, si omittenda esset omnis actio indifferens, quæ generatim ac indeterminatè posset esse occasio ruinæ, nisi actio illa de se, & prudentum judicio talis esset, quæ omnibus infirmis speciem mali præ se ferret, à qua abstinendum docet Apostolus 1. Thess. 5. vers. 21. Hinc mulieres peccant peccato scandali, si ornatus earum sit indecens & ad lasciviam provocans; secus si decens judicetur.

R. 3. Actio bona vel non est præcepta, vel est præcepta: si non est præcepta, censet sanctus Thomas qu. 43. art. 7. propter scandalum pusillorum, aut esse occultandam, aut differendam, donec ipsis exposuerimus nostram ita agendi rationem. Quòd si, expulsa jam ignorantia, nihilominus scandalum patiantur; non erit datum, sed acceptum, & Phariseorum, ac proinde contemnendum.

Major est difficultas circa bonam actionem præceptam, quæ ut solvatur, distinguendum est inter præceptum negativum & affirmativum, naturale, & positivum: præceptum naturale negativum obligat semper & pro semper; quia, ut supra diximus, prohibet actionem per se malam; nunquam autem, qualibet hypothese posita, licet malè agere, ac proinde propter scandalum vitandum, nefas est mentiri, pejerare, sacrilegium committere, v. gr. absolutionem sacramentalem impertiri indigno; ne ex ejusmodi repulsa, longè

gè deterior fiat. Idem iudicium esto de uxore, à qua maritus propudiosa contra legem naturalem exigit, nempe morem illi gerere non debet ad vitanda gravia scandala. Secus sentiendum de præcepto negativo Legis humanæ, putà de præcepto abstinendi à carnibus vel ab operibus servilibus certis diebus; Catholicus enim inter Hæreticos occultus, licitè carnes comederet, si prævideret suam abstinentiam fore occasionem injustæ persecutionis; & famulus licitè operaretur die festo; si aliter non posset vitare iniquam heri vexationem & blasphemias.

Quod verò spectat præceptum affirmativum sive naturale, sive positivum, cum non obliget pro semper, sed solum positis omnibus circumstantiis ad honestè agendum requisitis, potest aliquando prætermitti ad vitandum scandalum; correctio fraterna v. gr. licèt sit præcepti naturalis & divini positivi, omittenda tamen est, si proximus ex ea deterior sit futurus, imò & juridica ex sancto Augustino Lib. 3. contra Parmenianum cap. 2. si schisma timeatur. Veritas quoque, quam Christus præcepit super tecta prædicandam, aliquando tegenda est, non quidem falsitate, & æquivocationibus, quæ à mendacio non differunt, sed prudenti dispensatione, juxta illud Matth. cap. 7. *Nolite dare sanctum canibus, neque mittetis margaritas vestras ante porcos*; quod sanctus Thomas citato art. 8. intelligit de doctrina. *Propter nullum scandalum*, inquit in responsione ad secundum, *quod sequi videatur, debet homo, prætermissa veritate, falsitatem docere. Sed ipse actus docendi inter spirituales eleemosynas computatur. Et ideo eadem ratio est de doctrina, & de aliis misericordiæ operi-*

*operibus*, quæ scilicet exerceri debent pro loco, tempore & personis. Ii tamen, quibus incumbit officium alios docendi, ut Pastores, tacere non debent propter periculum scandali, quando mendacium prævalere advertunt, v. gr. contractus usurarii & iniusti laudantur, & prædicantur ut liciti; tunc enim utiliùs nasci permittitur scandalum, utpote Pharisæorum, quàm si veritas relinquatur.

Utrùm autem & quando temporalia sint dimittenda propter scandalum vitandum, patet ex dictis de correctione fraterna.





